

49377/B



SPRENGE, C.

[Vol 6]



Digitized by the Internet Archive
in 2018 with funding from
Wellcome Library

https://archive.org/details/b29338311_0006

CURTII SPRENGEL
INSTITUTIONES
THERAPIAE GENERALIS.

LIPSIAE ET ALTENBURGI,
SUMTIBUS F. A. BROCKHAUS.
1816.

CURTII SPRENGEL
INSTITUTIONES
M E D I C A E.

TOMUS VI.
P A R S P R I M A.

T H E R A P I A G E N E R A L I S.

LIPSIAE ET ALTENBURGI,
S U N T I B U S F. A. B R O C K H A U S.

1 8 1 6.



CONSPECTUS.

Pars generalis.

Cap. I. De doctrinae consilio.

- §. 1. Quid sit curare, sanare, therapeutice?
2. Est doctrina scientiam comprehendens.
3. Neque tamen absque experimentis est.
4. Ars non habet locum, ubi natura sufficit.
5. In desperatis morbis quid agendum.
6. Curatio perfecta et imperfecta.
7. Constantia consilii.
8. Individua curatio.
9. Ad exitum probabilem formandum.
10. Celeritas curationis, eiusque circumscriptio.
11. Incunditas curationis.

Cap. II. De obstaculis curationum.

12. Generatim.
13. Publica obstacula. Agyrtarum toleratio.

- §. 14. Vulgi praeiudicia.
- 15. Privata obstacula in aegro.
- 16. Obstacula in medico.

Cap. III. De examine therapeutico.

- 17. Quid sit?
- 18. Praecepta generalia.
- 19. Quid primo interrogandum sit.
- 20. Symptomatum examen.
- 21. Virium inquisitio.
- 22. Vitae genus, aetas, aliaque investiganda.
- 23. Potentiae nocentes, et epidemica constitutio.

Cap. IV. De viribus naturae medicatricibus.

- 24. Quid sit natura?
- 25. Veterum sententiae.
- 26. Morbi mora et tempora consideranda.
- 27. Naturae salubritas limitanda.
- 28. Natura utitur instinctu.
- 29. Lex universalis, cui obtemperans natura morbos sanat.
- 30. Alius modus, morborum universalium transitus in locales, quomodo imitandus sit.
- 31. Per consensum agit natura et antagonismum.
- 32. Dolores et spasmus saepe salubres.
- 33. Inflammatio et suppuratio tempestiva salubriter cientur.
- 34. Destructio partium salubris quomodo imitanda.

CONSPECTUS.

Cap. V. De indicationibus generatim,

- §. 35. Indicatio quid sit, a quonam inventa?
- 36. Indicationes ab hypothesebus orsae.
- 37. 38. Simplicitati indicationum studendum.
- 39. 40. Nec tamen ubique particulares indicationes negligendae.
- 41. Indicatio causalis, prophylactica, curativa, apotheparentica.
- 42. Indicatio vitalis.
- 43. Indicatio symptomatica, saepe necessaria,
- 44. Eius praesentia.
- 45. 46. Commoda alia eiusdem.
- 47. Circumscriptio dignitatis.

Cap. VI. De indicantibus et contraindicantibus.

- 48. Definitio.
- 49. Indicantia generalia et particularia.
- 50. Utraque iungenda.
- 51. Unde petenda indicantia.
- 52. Certitudinis et probabilitatis gradus in iis.
- 53. Indicantia perfecta et completa.
- 54. Conditiones indicantium.
- 55. Indicantium obscuritas ad experimenta compellit.
- 56. Contraindicantia.
- 57. Eorum natura.
- 58. Quomodo contraindicantibus utendum sit.
- 59. Quatenam sint speciatim.

Cap. VII. De indicatis.

- §. 60. Amplissimus ambitus.
- 61. Victus ratio gravissima est.

- b. Indicantia. §. 187 — 195.
- c. Contraindicantia. §. 194 — 197.
- d. Indicata. §. 198 — 203.

Cap. VII. De methodo antiphlogistica.

- a. Modus agendi. §. 204. 205.
- b. Indicantia. §. 206. 207.
- c. Contraindicantia. §. 208.
- d. Indicata. §. 209. — 212.

Sect. III.

De humorum mutanda vel copia vel indole.

Cap. VIII. De directione humorum mutanda.

- a. Modus agendi. §. 215 — 215.
- b. Indicantia. §. 216 — 224.
- c. Contraindicantia. §. 225 — 227.
- d. Indicata. §. 228 — 231.

Cap. IX. De motu sanguinis humorumque accelerando.

- a. Modus agendi. §. 232 — 234.
- b. Indicantia. §. 235 — 237.
- c. Contraindicantia. §. 238 — 240.
- d. Indicata. §. 241 — 251.

Cap. X. De humoribus evacuandis.

Art. I. De sanguinis missione.

- a. Modus agendi. §. 252.
- b. Indicantia. §. 253 — 265.
- c. Contraindicantia. §. 266 — 272.

Art. II. De mutandis, quae praeter naturam in primis viis haerent.

- a. Generatim. §. 273.

- b. De succi gastrici pravitatibus corrigendis. §. 274 — 276.
- c. De concrementis bilis solvendis. §. 277.
- d. De peregrinarum rerum et venenorum fontica qualitate compescenda. §. 278. 279.
- e. De flatibus pellendis. §. 280. 281.
- f. De vermibus enecandis. §. 282.
- g. De coctione promovenda. §. 283 — 286.

Art. III. De vomitu ciendo.

- a. Modus agendi. §. 287. 288.
- b. Indicantia. §. 289 — 296.
- c. Contraindicantia. §. 297 — 300.
- d. Indicata. §. 301.

Art. IV. De alvo ducenda.

- a. Modus agendi. §. 302 — 304.
- b. Indicantia. §. 305 — 310.
- c. Contraindicantia. §. 311 — 315.
- d. Indicata. §. 316. 317.

Art. V. De lotio pellendo.

- a. Modus agendi. §. 318 — 320.
- b. Indicantia. §. 321 — 324.
- c. Contraindicantia. §. 325. 326.
- d. Indicata. §. 327 — 330.

Art. VI. De methodo diaphoretica.

- a. Modus agendi. §. 331 — 333.
- b. Indicantia. §. 334 — 340.
- c. Contraindicantia. §. 341 — 345.
- d. Indicata. §. 346 — 349.

Art. VII. De sputis promovendis.

- a. Modus agendi. §. 350. 351.

- b. Indicantia. §. 352 — 354.
- c. Contraindicantia. §. 355. 356.
- d. Indicata. §. 357 — 359.

Cap. XI. De humorum cursibus praeternaturalibus regendis aut compescendis.

Art. I. De sanguinis profusionibus cohibendis. §. 360 — 365.

Art. II. De cohibendis aliis profluviis. §. 366 — 371.

Art. III. De regendis et restituendis sanguinis cursibus, qui natura sunt.

A. De menstruorum cursu evocando vel restituendo: §. 372 — 375.

B. De haemorrhoidum fluxu restituendo. §. 376 — 378.

Cap. XII. De secretionum correctione. §. 379 — 388.

Sect. IV.

De euthanasia promovenda.

§. 389 — 393.



INSTITUTIONES
THERAPIAE GENERALIS.

PARS GENERALIS.

CAP. I.

DE DOCTRINAE CONSILIO.

1.

Ad sanitatem perducunt mortales, qui adversam mutant in secundam valetudinem: curare vero dicuntur aegros, qui arte eas in corpore vicissitudines excitant, quas recursus in sanitatem sequi possit. Itaque, licet fortuito ac ulla sine arte plurimi sanescant aegri, curatio tamen citra artis regulas contingere nequit.

Doctrina autem de regulis curandi *therapeutice* appellatur; naturaliter diducta in duas partes. Si quidem vel universa morborum genera comprehendit,

regulasque generales tradit, quibus artifex obtemperaturus est; vel formis aegritudinum singulis ac speciebus accommodat regulas: illa *therapeutices generalis*, haec *specialis* nomine venit. Quibus accedit *medicina clinica*, quae in singulis aegris valetudinem adversam fugare docet. (*instit. med. vol. 1. introit. §. 6.*)

2.

Doctrina est scientiam comprehendens: namque curationum regulas haud membratim tradit, sed e principiis rationalibus deducit: pariter igitur scientiam gignit, ac mathesis applicata, quae architecto aut nautae regulas impertit.

Artificis est, dum morbis medetur, regularum conscium esse, easque e principio derivare universalium. Hac enim ratione distinguitur ab agyrta aut inscio homine, qui, etiamsi sanat forte homines, rationem tamen actionum suarum reddere nequit, quod regulas nequaquam cognoscit.

3.

Quamquam ubique finem eum sibi proponere debet medicus, ut legibus huius doctrinae et regulis obediat, nonnunquam tamen, ubi abstrusum est morbi ingenium, aut ubi latent, quae morbum genuerunt; necesse est confugiat ad ea, quae usus do-

cuit ac experientia, five sequatur ea, quae iuvant aut nocent, five experimenta etiam fortuita instituat, ut, quo demum cunque modo id fiat, opem aegro ferat. Accidit id praeprimis in novis morborum generibus, five plane ante ignotis, five populari ingenio obsequentibus, ubi, Celso id iam monente, confirmante etiam Sydenhamo, novae saepius mendendi viae inveniendae sunt, quas ratio tantum abest ut semper doceat, ut potius usu et exercitatione multo saepius pateant. Nec indoles, quam aegritudo, utut probe cognita, in corpore individuo accipit, eiusmodi ubique est, ut regulas certas fixasque liceat statuere ac consequi; cum abdita nonnunquam dispositio aut fortuitum aliquid ita mutare possint morbum, ut regulas suetas appliceri nefas sit, sed oporteat experimenta instituere. Sic, qui in clarissimis semper Germaniae medicis nominatur, Richter Göttingensis, quamvis iure suo carpat eos, qui purgantia remedia sine regulis imperant, ipse tamen, si in febre biliosa pleni sunt pulsus et vegeti, sanguinem mittendum esse, praecipit, ut periculum faciamus.

4.

Priusquam ulterius progrediamur, inquirendum est, semperne curationes locum obtineant. Haudquaquam id ita esse patet tum e superflua quandoque curatione, tum quod interdum curatio omnem vim humanam superat.

Non superflua solum sed noxia etiam est omnis curatio, ubicunque naturae ope levia incommoda nascuntur, quae sponte iterum sua in pristinum statum redeunt. Noxia ibi omnis officiosa sedulitas fit, quia naturae efficaciam turbat ut et peiores sequelae nasci possint. Hippocraticis viris probe iam notum erat, invenire naturam sibi ipsi vias, nullius magistri egentem ac debita sine praeceptis facientem *); et sponte sua revalescere homines, nisi quid aliunde male actum fuerit **): et nullo utentes medico aegros saepius convalescere ***). Superfluas igitur curationes perscruxerunt Gid. Harvaeus, (*ars sanandi cum expectatione. Offenb. 1730. 8.*) . Stahlius, (*diff. de autocratia naturae. Hal. 1696. progr. περί φύσεως ἀπαιδέυτου. Hal. 1705. diff. de abstinentia medica ib. 1709.*) Fr. Hoffmannus, (*de naturae et artis efficacia in medendo opp. tom. 6. p. 261; f. 1.*) Petr. Camper (*de optima agendi vel expectandi ratione in diff. 10. app.*) et Schmidtius (*analecta practica de morbis expectationem deside-*

*) Hipp. epid. lib. 6, f. 5. p. 1184. Ἀνευρίσκει ἡ φύσις ἐωυτῇ τὴν ἐφόδον, ἀπαιδέυτος ἐοῦσα, καὶ οὐ μαθούσα τὰ δεόντα ποιεῖ.

**) Hipp. nat. hum. p. 224. Ὑγιᾶς γίνονται αὐτόματα, ἢν μὴ τι ἐξ ἄλλου κακουργῇται.

***), Hipp. de arte, p. 4. Οὐ χρησάμενοι ἰητρῷ νοσέοντες ὑγιάνθησαν.

rantibus. Goett. 1759.) Quodsi in iis adfectibus, quibus natura ipsa medetur, artifex nihil molitur, sed naturae nutibus observatis victus rationem moderatur, multo magis saluti aegrorum consulit, quam nimia activitate; artemque ipsam promovet, quae naturae ministra merito habetur.

5.

Dein abstinendum est a curationis consilio, si eae adsunt laesiones, quae nunquam arte humana penitus curatae fuerunt; si destructis organis nobilioribus aut viribus omnino pessumdatis spes nulla salutis superest. Quivis enim conatus, incurabiles eos morbos tollendi, in detrimentum aegri aut perniciem etiam vertitur. Veteres iam Hippocratici viri praeceperunt, nequaquam suscipere curationem eorum, qui ad summam morbi devenerint, scientes, quod talia ars praestare nequeat *). Et Celsus: neminem velle, ait, periclitari coniectura sua in splendida persona, ne occidisse, nisi servasset, videretur. Neque tamen eo minus nunquam deferendi sunt eiusmodi aegri, ne a medicis desperantibus semet ad agyras convertant, eoque modo arti opprobrium nascatur. Si hoc prudentiae est, humanitas etiam imperat iuvare ac levare molestias,

*) Hipp. de arte, p. 5. Μὴ ἐγχειρῆεν τοῖσι κεντρατημένοισιν ὑπὸ τῶν νοσημάτων, εἰδότες ὅτι τοῦτα οὐ δύναται ἰητρικὴ.

etiam si penitus tollere aegritudines in nostra neutiquam potestate situm sit. „Duo, inquit Hippocratici viri, circa morbos, facienda sunt: iuvare, aut non nocere.“ *) Iam vero iuvat saepe magis, qui blanditur aegri sensibus molestis, ac dolores aliosque adfectus mitigat, quam qui ubique, repugnantibus etiam viribus ipsaque morbi indole, penitus eum tollere studet. Boni tamen et cordati est artificis, si nulla plane spes superest salutis, nec aegrum ne eos, qui adsunt, id celare; sed artis impotentiam candide aperire, ne falsa spe decepti crudelitatis denique et imprudentiae medicum arguant.

Neque desunt aegritudines, per se quidem magnopere ancipites et periculosae, quae, etiam si usitato modo haud curentur, cedunt tamen interdum novae methodo, aut experimentis παραβόλως institutis. Syphilitici morbi, antequam hydrargyri usus; febres pervicaces intermittentes, priusquam corticis peruviani administratio innotescerent, incurabiles putabantur. Angina polyposa, magnopere anceps, nuperis kali sulfurati applicationibus debellata fuit. Itaque verecundiae est, fateri, morbum hunc a me quidem et meae aetatis medicis penitus curari non posse, etiam si haud inficiar, a posteritate forte

*) Hipp. epid. lib. I. p. 960. Ἀσκέειν περὶ τὰ νοσήματα
ὅσο, ἢ ὠφελέειν, ἢ μὴ βλάπτειν.

meliolem tutiolemque inventum iri methodum. Ea autem confessio, quamlibet magnopere deceat medicum optimum, a tirone tamen et iuniole medico, famae suae consulente, vix ac ne vix quidem expectanda est.

6.

Ex iis, quae modo dicta sunt, liquet, *curatio-*
nes esse vel *perfectas* vel *imperfectas*: illas versari in tollendo morbo ipso cum omnibus effectibus: has vero in amovendis partibus morbi, seu effectibus quibusdam, superstitie tamen morbi ipsius essentia. Perfecta curatio, quae et *tuta* dicitur, quaque radicitus evellitur malum, ut nullae supersint reliquiae, generatim quidem necessaria est, cum melior sit securitas, quam intuta indoles: praeferrì quoque debet curatio tuta ac perfecta reliquis omnibus modis, si modo artis facultas eam permittit. Laude igitur dignissimus est medicus, qui tutae curationi operam dat, quam qui celeriter gratoque ac iucundo modo aegritudines tollere studet.

Morbi vero inveterati, aut qui partium nobilium destructionem adferunt, cum perfecte ac tuto curari nequeant, exigunt tamen curationem imperfectam, ut ea solummodo abigantur, quae perniciem ocyus adferre morbumque magis insanabilem reddere possunt. (§. 5.)

7.

Qui perfecte curaturus est aegritudines, consilium curationis totius inire debet, quod, dum morbus ipse non mutatur, constanter sequatur, nec unquam penitus mutet, quamvis artis praesidia, consilio apta, omnino permutare possit saepeque debeat. Ratio enim ipsa nos cogit atque compellit, si rite cognitus est morbus, consilium unum idemque sequi, neque variis turbari phaenomenis, quae agrytam aut inscium hominem ilico instinguunt, ut aliam agendi rationem eligat. Haec est ἡ περὶ τὸν νοσέοντα οἰκονομία, quam Hippocratici viri commendant: haec est ἡ ὁδὸς καὶ τῶν ὀρθῶς ἐχόντων δοκιμασίη καὶ τῶν μὴ ἐχόντων ἔλεγχος, ab iis ipsis viris praedicata. „Quam viam omnem medendi qui intelligit, cognoscit ac sequitur, donec fine potiatur, solus is est, qui medendi scientiam et artem possidet.“ (*Galenmeth. med. lib. 6. c. 1.*) Haec est constantia medici, cui qui studet, si omnia secundum rationem fecerit, quamvis κατὰ λόγον res non succedant, non discedet ad alia, firma manente principiorum sententia. (*Hipp. aph. 2, 52.*) Hanc necessariam medici perseverantiam in consilio curationis semel facto, magnopere et uberrime commendavit summus Fr. Hoffmannus. (*Opp. tom. 6. p. 278.*)

Nec perturbari semet medicus sinat doloribus aut molestiis variis, curandi rationem excipientibus.

Quodsi necessario sequuntur, neque morbi vim superant, transire etiam solent; vertiginis exemplo et amblyopiae, quae belladonnae usum sequitur; gingivarum tumoris ipsiusque salivae cursus hydrargyrosin excipientis. Quodsi vero curandi ratio etiam maiores aut diuturniores molestias adlatura est, quam morbus ipse; rationalis est medi*i* eam penitus reiicere, cum securitas curationis princeps sit ac primaria indoles.

8.

Ut perfecta curatio instituat, antecedit necesse est cognitio morbi omniumque eius partium, partis praecipue laesae, modi, quo laesa est, et causarum, quae nocuerunt. Quibus omnibus rite cognitis, consilium curationis ita eruitur, ut ad proprium ac singularem aegri cuiusvis conditionem applicetur. Namque, ut Galenus (*de optim. sect.* p. 18.) monet, ἀδύνατον ἐν ᾧπαντι τῷ βίῳ, μὴ ὅτι πλείοσιν, ἀλλὰ καὶ δύο ἀγρώστοις πάντα ὁμοίως συμβῆναι. Nec in ipsis popularibus morbis perfecta omnium casuum similitudo observatur, sed peculiaribus cuiusvis aegri conditionibus mutatur morborum forma. Hinc igitur, μηδὲν ἐκῆ, μηδὲν ὑπερσφᾶν, antiquissima est Hippocraticorum regula, nunquam negligenda, quae eo potissimum valet, ne curationis consilium praecipitur, sed tum demum formetur, cum omnia rite cognita fuerint, quae basin eius constituunt.

9.

Qui perfecte curaturus est, aegritudinis exitum probabilem debet praenoscere, ut sperato curationis fine potiatur. Imprudentis enim est hominis et agyrtae, praesentia duntaxat incommoda amovere, neque curam eorum habere, quae instant, quacque caveri possent, si rite cognoscerentur. Egregie enim Celsus senex (*Hipp. progn.* p. 36): „Curandi rationem optime molietur, si ex affectionibus praesentibus futura praenoverit.“ *) Et Galenus (*meth. med. lib. 13.* p. 174.): „Quod iam factum est, illi medendum; quod futurum est, impediendum.“ **) Hinc boni medici est, haud fidendum cessationi molestiarum praesentaneae, si sine bono securitatis signo evanuerint. ***)

10.

Celeritas curationis quamvis laudabilis sit, ubique tamen observanda non est, cum morbi plures id habeant singulare, ut tempora sua adfido fervent, nunquam mutanda, nec arte, sine aegri dam-

*) Τὴν θεραπείαν ἀριστα ἂν ποιεῖτο προειδὼς τὰ ἐσόμενα τῶν παθημάτων.

**) Τὸ ἤδη γεγονὸς ἱκτέον, τὸ δὲ ἐσόμενον κωλυτέον.

***) Hipp. praedict. 1. p. 77. Τὰ ὀλέθρια ἀσήμως ὑπαστωνήσαντα θάνατον σημαίνει.

no, turbanda. Qui enim acutis morbis medetur, quotidie animadvertet, stadia cruditatis, coctionis et criseos nunquam esse pervertenda: maxime si exanthemata peculiaria cum iis morbis iuncta sunt. Nec in aliis aegritudinibus taxanda est cunctatio rationalis, qua et vires aegroti sublevare et salubrem exitum praeparare valemus. Itaque cavendum et in morborum diuturnorum curatione a tumultuaria medicaminum valentissimorum administratione, priusquam rite cognita fuerit morbi indoles et probabilis exitus. „Sanatio,“ inquit Celsus senex, „tempore fit, sed magis etiam opportunitate.“ *) Et Galenus: „Satius est, longius impendere tempus curae, quam celerius progressos malle occidere.“ **)

11.

Nec *incunctata* curationis negligenda est, cum humanitas iam praecipiat, minimos, quantum fieri potest, dolores mortalibus excitare; prudentia etiam et artis ipsius honos vetent, taedium facere, quo aeger fiduciam amittit. Optime antiquus Hippocraticus auctor τὰς τῶν καμνόντων χάριτας commendat,

*) Hipp. de prisc. med. p. 8. ἄκεις χρόνῳ, ἐστὶ δὲ ἡνικα καὶ ᾤ.

**) Meth. med. lib. 12. p. 163. Ἐν πλείονι χρόνῳ θεραπεύσαι βελτίον, ἢ τοὺς σπένδοντας ἀνδρείως ἀποθανεῖν.

ut munde tum potus tum cibus parentur, tum etiam, quae videt aut tangit, mollia sint. Gratificandum esse iubet aegroto in iis, quae magnam haud adferant noxam, quaeque facile corrigenda sint (*εὐανδλήπτα*). Medicum vero ipsum et habitu cultuque, et sermone et ingressu, gratum esse debere aegroto, antiqua erat regula. *) Per totam antiquitatem celebris est Asclepiades Bithynas blanditiis, quibus mulcere sensus aegrotorum studebat. Eae quamvis commendandae, postponendae tamen sunt tutae curationi et celeri, si una consistere nequeunt. Namque, sicut antiquus auctor monet, metus impotentiam, audacia autem imperitiam indicat **): itaque nec metus aegrum offendendi, nec rustica fiducia unquam medicum ad actiones compellere debent.

*) Hipp. epidem. lib. 6. s. 4. p. 1180. Hipp. de decent. ornat.

**) Hipp. lex. p. 2. Δειλὴ μὲν ἀδυναμίην σημαίνει, θρασύτης δὲ ἀτεχνίην.

CAP. II.

DE OBSTACULIS CURATIONUM.

12.

Immensam profecto provinciam suscipit, qui ea omnia perstringere, ne dicam enarrare cupiverit, quae obstant, quominus curationes institui aut ad finem perducere possint. Praeter enim impedimenta, quae natura ipsa, finibus certis humanam prudentiam et potestatem continens, efficit, innumera alia posita sunt in praeconceptis medici aegrotorumque opinionibus, in peculiari artificis temperamento, in aliis fortuitis rebus, quae humanam effugiunt providentiam potestatemque. Ea brevibus decurrere libet, ut artis nostrae termini pateant.

13.

Primo autem loco publica nominamus impedimenta, quae vel magistratuum negligentiae vel popularibus praeiudiciis tribuenda sunt. Magistratum autem incuria arguenda est, si agyrtae, quos ἀρχοκλέοντες ἐν ταῖς πόλεσι veteres Hippocratici appellabant, si seplasiarii et barbarum tonsores, si rhizotomi et aniculae ipsae aegris mederi audent. Namque e Plinii inde temporibus (*lib. 29. f. 8.*) dolendum est, „in hac artium sola evenire, ut cuicumque medicum se professo statim credatur, quum sit

„periculum in nullo mendacio maius. Non tamen
 „illud intuemur, adeo blanda est sperandi pro se
 „cuique dulcedo. Nulla praeterea lex, quae puniat
 „infcitiam: capitale nullum exemplum vindictae.
 „Discunt periculis nostris, et experimenta per mor-
 „tes agunt: medicoque tantum hominem occidisse
 „impunitas summa est.“ In ea autem civitate, quae
 circulatores tolerat, ars vera contemptui expolita
 opem ferre aegrotis rite nequit: populi enim vulgus
 magis attrahitur a circumforaneis hominibus, salutem
 thrafonica audacia pollicitantibus, quam a verecun-
 do medico, doctrina imbuto, qui fines artis suae
 probe nescit, ideoque neminem decipere audet.
 Quodsi igitur, securitati curationis potissimum stu-
 dens, taedium forte aegrotis impatientibus adfert,
 ad agyras confugiunt, qui eo maiorem saepe fidu-
 ciam vulgi acquirunt, quo simpliciora usuque com-
 probata remedia adhibent, quae salutem saepius ad-
 ferunt. Accedit naturae vis medicatrix, quae non-
 nunquam obstacula ipsius perversae curationis supe-
 rat, ut huic tandem tribuatur, quod naturae, est
 beneficium.

14.

Alia sunt vulgi praeiudicia, e ruditate, mala
 educatione, cultus animi defectu et imperitia pro-
 ficiscentia, quae magnopere impediunt curandi ratio-
 nes. Quo pertinent opinatio: Deum humanae vi-
 tae

tae terminum statuiffe, quem non praetereat, ideoque parum vel nihil valere artem, artisque praesidia. Huc pertinet miraculorum desiderium, quo adlectum vulgus ei maxime confidit, qui momento citius, pulvere unico, vel paucis guttulis morbum atrocissimum fugare iactat; qui abstrusas aegritudinum causas vel e sola lotii inspectione diiudicare gestit; qui velut e tripode de salute aut exitio iudicium ferre gloriatur. Multo minus fiduciae vulgus collocat in medico ab iis iactationibus abstinenti artisque finium bene conscio. Huc pertinet praeconcepta vulgi opinio, quemvis morbum suum exigere remedium, quo, quisquis fuerit aeger, quaecunque demum causae, semper debelletur: itaque, quidquid alium iuverit eadem aegritudinis forma laborantem, id et praesenti aegro adminiculum fore. Taceo errores populares, cuivis fere regioni, singulisque nationibus peculiare, quos medicus corrigere nequit, cum magistratum sit, educationi providere, ac noxia, per paedagogos et praecones sacros, praeiudicia destruere.

15.

Privata dein sunt aegrorum praeiudicia, variaeque ex eorum conditione proficiscentia obstacula, quae curationem saepe impediunt. Diduci potissimum possunt in ea, quae animum complectuntur, ac quae in corpore et rebus externis versantur. Ani-

mi ruditas saepe ignorantiam caussarum historiaeque morbi producit, ut neglectae ab aegro opportunitates et potentiae nocentes diu etiam medicum lateant. Nec doloris sedem ac ingenium peculiare, nec sensus anomalos rite aperire verbisque describere potest aeger, vel rationis expers, vel animo rudis, vel a sermonis cultu etiam alienus. Accedit pudor, maxime in feminis, licet et in viris obvius, qui prohibet detegere causas, quae derogare aliquid honestati, bonis moribus et fidei videntur. Quoties enim contingit, infectionem celeri veneream, occultari hernias, negari vitia turpia,² quae morbum tamen produxerunt?

Nec minus gravia sunt alia animi vitia, quae curationi saepius obstant: impotentia et importunitas, quae diuturnam curationem respuit, reiicitque praesidia, nisi citissime molestias omnes fugaverint: meticulositas et dolorum omnium fuga, qua compulsi aegri curationem abhorrent iniucundam et dolores parientem: animi abiectio mortisque metus, quibus vires corporis, necessariae ad sanationem, infringuntur: victus ratio neglecta cupidiarumque amor puerilis.

His adnumeranda sunt alia, quae morbi ipsius naturam complectuntur, adstantes etiam et res externas. Morbi indoles pervicax aut complicata, quae curandi conamina omnia eludit; adstantium

incuria aut negligentia, dum victus rationem negligunt, vel remedia non rite administrant; variae demum res externae, quae morbum pertinacem reddunt, haec omnia curationem saepenumero impediunt.

16.

Iam vero et ignominiam medicorum aut imbecillitatem reticere nequeo, quae curationibus obest. Peccant autem non raro in dignoscendo morbo et iudicio de laesa parte ferendo, unde falli etiam in curationis consilio necesse est. Hi autem errores nascuntur tum e temeritate nimiaque properatione, qua negligunt curiosius aegritudinis examen; tum (quod maxime vulgare est) e scholarum praeiudiciis, quibus intellectus et iudicium obfuscatur, ut veritatem haud videant; tum ex opinionibus, quae fixas radices egerunt, ut libertatem tollant. Huc pertinent commenta scholarum, dominationem adfectantia, quae quamvis animos iuvenum per aliquot annos aut lustra etiam compedibus vinciant, postea tamen oblivioni traduntur. Huc demum referenda est eruditionis noxa, quae, quomodoque medicum ornet, saepius tamen obstaculo est, quominus rite observet.

Dein curationem impediunt medici, dum ve in selectu medicaminum falluntur, vel nimis fre-

quenter ea mutant, vel male demum componi iubent. Praeter imperitiam pharmacologiae nocet imprimis novorum adminiculorum desiderium. Haec, priusquam studiose ventilata sunt, praepostere adhibita saepe totum curationis consilium pervertunt, ut curationes, quas magneticas vocant scioli homines gloriolam adfectantes; quibus mirum est, quantopere naturae vires pervertantur et motus salubres turbentur. Huc referendum esse puto venenorum abusum, a temerariis medicis commissum, quem cordatissimus Frankius iure suo damnat. (*Syst. der medic. Poliz. B. 4 p. 448.*)

Nec sine noxa graviore est inconstantia medici, quae vel nullum consilium sequitur, vel de die in diem id mutat, variatque simul artis praesidia. Eo valet ea inconstantia, ut naturae vires turbentur, nulla conamina salubria nascantur, adeoque finis curationis haud attingatur.

CAP. III.

DE EXAMINE THERAPEUTICO.

17.

Ut curationis consilium rite formetur, necesse est medendi vias trahamus ab iis rebus, quae morbum

fecerunt vel etiamnum constituunt, adeoque mutant, ut peculiari modo in hoc aegro appareat. Cum eo potissimum fine id examen instituatur, aliter comparatum est ac id, quod aliquis, scientiae forte augendae causa, instituit. Itaque necesse est, paulo uberius de eo praecipiamus.

18.

Generatim autem monendum, medicum tum demum veram morbi imaginem concepturum esse, si, relatione aegri patienter audita, in ea, quae necessaria videntur, directa et cum ipsa inspectione ac inquisitione comparata, iudicium formare conatur a praeconceptionis opinionibus liberum. Exigitur autem patientia in audienda aegri aut adstantium narratione, cum non raro deflectant a tramite, inepta aut quae idonea sunt, admisceant, eoque modo medici iudicium perturbent. Necessaria est vultus habitusque ea compositio, quae percellere aegrum timore nequeat, quam ἀταρακτοποίησιν Hippocrates nominare consuevit; necessariae sunt χάριτες, ut aeger fiducia adlectus omnia revelet, quae alioquin facile reticuerit. Oportet medicum loquendi facilitatem (ἐυεπληγ) cum audiendi facultate iungat, ut aegrum, ubicunque defiluit eius relatio, revocet in tramitem, et quaestiones idoneas interponat. Necessaria est comitas medici et humanitas, quae nec spernat nec

negligat aegrotorum querelas, nisi modum nimis excedant.

Magnopere autem interest, nec aegrum quæstionibus nimis obruere, nec certissimum expectare iudicium de prima inspectione. Saepiuscule enim diebus sequentibus tandem in id incidimus, quod prima vice latuerat. Gravissimum quoque est monitum, ne medicus aegrum compellat, omnia verbis exprimere, quæ vel nutu, vel suspiriis, vel vultu prodantur; parcendum est pudicitiae feminarum, parcendum honesti sensui.

Nec abs re esse arbitror, si medicus meminerit, nimis studiosam rerum omnium investigationem nonnunquam potius obesse iudicio, quam ipsam partium inspectionem et pertractationem. Quid enim iuvat interrogatio maxime sedula, si manibus ipsis vel herinam tangere vel ulcera genitalium inspicere oculis potuerit?

19.

Quibus generatim decursis, de ordine iam dicendum est, quo examen institui debet. In eo autem ordine præcipiendo alienus sum a plerisque, qui his regulis memoriae traditis, ordiendum esse suadent vel ab ætate, vel a causis vel etiam a functionibus laesis. Meo autem arbitrio necesse est, quid queratur aeger, quid doleat, quænam sint molestiae, primum inquirere. Eo autem valet id

exordium, ut fiduciam aeger in medico collocet, cum is summam mali ex ipso sciscitatur, cui sublevando aut tollendo accersitus fuit. Qui, protinus et intrans, aetatem aegrotorum scire cupiunt, non feminas solas terrent, sed plurimos alios aegros, saluti anxios. Ad primam istam quaestionem, quid ninirum doleat, aeger, vel, si nequit, adstantes ita respondent, ut saepe sedem mali et indolem manifestent. Insistendum est huic, ut, quantum fieri potest, clara fiant omnia et lucida, quae morbi sedem et ingenium complectuntur.

Dum haec referuntur, vacare debet medicus habitui aegri, vultui, oculis, modo, quo decumbit, observandis. Gravissima est haec studiosa inspectio, ut, quod sequitur, examen ea illustretur et ad finem dirigatur. Ex hac enim habitus, vultus decubitusque observatione mirum est, quantum effici possit ad vires aegri, morbi ipsius indolem, quin etiam ad causas aegritudinis percipiendas.

20.

Quae postquam probe sunt investigata, tempestivum est, ad symptomata semet convertere. Ea autem ceteris praemittenda sunt, quae cum summa querelarum cohaerent: dein sequuntur, quae ex his fluunt. Ex iis autem symptomatibus ratio- cina ea deducenda sunt, quae morbi et sedem et

modum noscendi et reliquas qualitates declarant. Necesse est, ea ratiocinia haud prius formare, quam omnia singulaque symptomata scienter secum contuleris. Neque uni aut alteri soli fidendum, sed conspiratio potius omnium observanda est. *) Hactenus autem argumentandum est, ut partium solidarum fluidarumque mutatio et imponderabilium per nervos conductorum vicissitudines pateant. **) in symptomatibus his etiam considerandae sunt accessiones remissionesque seu continua mora. ***) Quibus adiungenda est historia morbi, seu relatio de initio eius variisque vicissitudinibus, quas ad hanc usque diem subierit. Gravissima enim est cognitio prodromorum primique insultus, quo tempore contigerit quoque modo aegrum adfecerit.

In eo autem examine probe distinguenda sunt partium systemata, quae primitus patiuntur. Morbi enim, qui in reproductionis systemate radice egerunt, valde differunt ab iis, qui irritabile syst-

*) Χρὴ πάντα θέασασθαι τὰ σημεῖα καὶ μὴ πιστεύειν αὐτὰ.
Galen.

**) Τὰ ἴσχοντα, ἢ ὀρμῶντα, ἢ ἐνισχόμενα σώματα. *Hip. epid. lib. 6. f. 8. p. 1199.*

***) Ὡς τῆς νόσου, ὁ χρόνος, τὰ ἐπιγινόμενα, αἱ περίοδοι, καὶ τῶν περιόδων αἱ μείζονες καὶ αἱ διὰ πλείονος, αἱ ἐξιδόσεις, καὶ ἡ τῆς ἄλλης νόσου ἐπίδοσις, ἡ χάλασις καὶ ἡ σκλήρυνσις. *ib.*

ma aut sensuum organa corripuerunt. Quanquam in plerisque adfectibus omnia systemata laborant, fit id tamen haud uno eodemque modo, neque perinde est, in hoc sive in illo systemate primitus appa-
ruerit aegritudo. (*inslit. path. gen. §. 28 — 31.*)

21.

His absolutis ad virium rationem consilium transferendum est, quae, licet nonnunquam ex ipsis symptomatibus iam elucet, saepius tamen studiosius investiganda est. Magnopere interest, discrimen statuere oppressarum duntaxat et vere debilitatarum virium (*inslit. path. gen. §. 48.*); neque querelis aegrotorum nimis fidere, qui summam saepe infirmitatem accusant, dum humorum congerie partes nobiliores obrutae aut vi morbi, dolorum etiam et spasmorum violentia corpus defessum est. Probe quoque distinguenda est inaequabilis virium dispensatio a vera debilitate. Illa enim in multis morbis speciem infirmitatis prae se fert, longe alio tamen modo diiudicanda. (*inslit. path. gen. §. 56 — 58.*) Comparanda sunt aegri aetas, vitae ratio, peculiaris corporis constitutio, causae praegressae, symptomatum denique caterva, ut virium vera ratio inde eruatur.

22.

Tum transeundum est ad aetatem, quae insignem habet efficaciam in mutandis morbis; puberta-

tis. exemplo et annorum scansilium, quibus peculiarēs interdum aegritudines excitantur. (*inslit. path. gen.* §. 37.) In feminis calliditate saepius cauta opus est, ut prodant magis aetatem quam claris exprimant verbis.

Exploranda dein sunt vitae ratio, modus quo victus quaerebatur, studia, opes aegri; quibus indagatis interdum egregia lux morbo adfulget. Exiguntur autem cognitiones haud ubivis obviae victus vitaeque opificum artificumque, quae ilico saepe morbi genus dilucidant. Nec res domesticae familiarumque curae aut educatio aegri aut mentis dotes et proclivitas negligendae sunt, quibus morbus vel efficitur vel mutatur. *) Consuetudinum etiam vel maxime ratio habenda est, quippe quae vel intermissae morbum efficere potuerunt, varioque modo vicissitudines eius excitare.

In variis morbis examinanda etiam est parentum constitutio, morborum genera, quibus conflictati fuerint, ut hereditarii mali indoles pateat. Id in arthriticis, calculosis, scrofulosis, melancholicis adfectibus magni momenti instar habet.

*) Hipp. epid. lib. f. S. 8. p. 1200. Καὶ τῆς γνώμης ξύνοια, αὐτὴ κατ' ἐωυτὴν χωρὶς τῶν ὀργάνων καὶ τῶν πρηγμάτων ἄχθεται καὶ ἰηθεται καὶ φοβεῖται, καὶ θασέει, καὶ ἐλπίζει καὶ ἀδοξέει.

Peculiaris ea dispositio saepe in censum venit, quam *ἰδιοσυγκρασίαν* Graeci vocitare consueverunt, quae fit, ut potentiae nocentes singulari modo vel ferantur vel contra eas natura laceſſatur.

Nec contemnenda sunt medicamenta, quae vel in hoc morbo vel in praegressis iam adhibita fuerunt. Eorum effectus insigniter saepe aegri dispositionem morbique naturam exponit.

23.

Tandem ad potentias ipsas nocentes seu causas occasionales abeundum est, quae summa sedulitate et prudentia investigandae sunt. In iis autem eminet popularium morborum dominium, quod tanti est, ut per se morbis excitandis par sit. *) Ex ea constitutione epidemica cognita non morbi indoles sola, sed probabilis etiam exitus noscendus est, ut indicationes rite formari possint.

*) Τῶν ἐπιδημιουσέων νόσων οἱ τρόποι. Hipp. I. c.

CAP. IV.

DE VIRIBUS NATURAE MEDICATRICIBUS.

24.

Priusquam medicus curandi consilium capiat, in virium rationem inquirendum esse monuimus (§. 21.). Inde autem deducenda est sacratissima medicorum lex: *Νούσων φύσις ἡτορὶ: morborum medicum esse naturam*, quae sine doctrina et instructione (*ἀπαίδευτος ἐοῦσα*) omnia molitur, quae commoda saluti esse possint. Nec tamen peculiaris est aut sui generis naturae vis in morbis medicatrix, cum optime exponatur e vi universam naturam organicam regente, quae in duo momenta naturaliter diducta, altero momento suscipit stimulos et limitatur iisdem, altero autem eosdem mutat et vel in suam naturam abire iubet, vel arcet ac removet. (*inslit. phys. §. 62. inslit. path. gen. §. 6. insl. pharmac. §. 8.*) Ea ratione assimilatio contingit et nutritio, ac integra servatur corporum mixtio, etiamsi proclivis sit ad discessum particularum. (*insl. phys. §. 54. 58. 78.*). Eo modo consideratus morbus luctam sistit rerum externarum cum vi vitali, e qua phaenomena varia ipsique tumultus morborum explicandi sunt. (*insl. path. gen. §. 6.*). Ita praecipue symptomata activa, tempora

morborum et critica molimina exposuimus. (*ib.* §. 17. f.)

25.

Hinc igitur firmissima est et inconcussa veritas, tot praeclaris veterum dictis illustrata, sine virium viulium adminiculo nihil medicum posse in curationibus perpetrare. „Auxilia, inquit Galenus (*de opt. sect. ad Thrasymb.* p. 21.) in se ipsis considerata, non „uti sunt, faciunt caussarum ablationem. Opus est „cooperante natura: equidem saltem impulsus et „principium naturae indunt, reliqua natura per se „ipsam efficit.“ Et Aretaeus (*causs. acut.* lib. 2. c. 3.): „Natura vegeta et probe temperata omnia superat, „omnibus dominatur, ac per humores et spiritus et „solidas partes, eorumque convenientem ordinem „et modum hominis vitam administrat.“ Et iterum: „Potentia naturae sanitatem, imbecillitas morbum „parit.“ *) Luctam eam naturae cum potentiis externis, quae vel in victoriam vel cladem naturae tendit, pluribus locis Galenus illustravit. (*de causs. sympt.* lib. 2. c. 2. *meth. med.* lib. 2. c. 3.)

Nec naturae termino, ut qualitati occultae aut deo cuidam ex machina acquieverunt veteres, sed

*) Aret. cur. diut. lib. 1. c. 7. Δύναμις μὲν γὰρ φύσις ὑγίαν τίκτει, ἀσθένεια δὲ νοσήσιν.

disertis verbis expreſſerunt ingenium, differentiaſ et modum agendi. „Haud ſimpliciter, inquit Gale-
 „nus *), nominanda eſt natura, ſed adiiciendum eſt,
 „cuius ea ſit et ubi.“ Generatim autem dicit natu-
 ram totam genus virium, quibus quis convaleſcit:
 et uberius: „Natura eſt ratiocinium totius virtutis
 „illius, quae animal regit, ſive cum noſtra conſcien-
 „tia, ſive ſine illa obluctamur omni praeter naturam
 „cauſſae, per quam laeditur aut corrumpitur corpus.“
 (*de ſympt. cauſſ.* lib. 1. c. 3.)

26.

Quodſi igitur naturae vires et molimina uberius
 conſiderantur, obvium eſt protinus diſcrimen mor-
 borum acutorum et diuturnorum. In iis laceſſita
 vehementius vis vitalis ſaepe ſufficit, ſibi ipſi vias
 aperit eaque molitur, quae ſanitatem adferre valent.
 (*inſt. path. gen.* §. 17.). In diuturnis vero morbis
 minus efficax eſt, etiamſi et ii quandoque, ſi vitae
 ratio et victus mutantur, naturae conatibus tollan-
 tur. Hinc Celfus (lib. 3. praef.) „Magis ignoſcendum
 „medico eſt parum proficiente in acutis morbis, quam
 „in longis. Hic enim breve ſpatium eſt, intra quod,
 „ſi auxilium non proſuit, aeger exſtinguitur; ibi
 „et deliberationi et mutationi remediorum tempus
 „patet.“

*) *Method. med.* lib. 3. c. 1. Ἀλλ' οὐχ ἀπλῶς εἰπεῖν χρὴ
 φύσιν, ἀλλὰ προσθεῖναι τὴν τιμὴν καὶ ποῦ.

Dein tempora morbi momenti aliquid habent. In initio morbi perfecte formati raro solet esse natura sufficiens ad eliminandas noxas. Plerumque necessaria est praevia praeparatio et remissio ingentium turbarum, quas sequi solet solutio morbi aut crisis. Quodsi vero iam fini exitioso proximus est morbus, naturae vires labascunt, rarissimeque possunt ita revalescere, ut crisin moliantur. Caute tamen et de his est iudicandum; siquidem haud sine exemplo est, crises saluberrimas praecedi oppressione ea virium, ut penitus prostratae esse videantur: ipso tamen naturae beneficio iterum suscitantur, ut miraculo revalescere aeger videatur.

27.

Cum tamen natura sit ἀπαίδευτος et, ut Hippocraticus auctor dicit, κατὰ θεὸν ἀναγκάην, secundum divinam necessitatem, agat, in salutem nequaquam omnes eius actiones vertuntur. Etenim potentiae externae indoles haud facile adsimilanda, vis eiusdem nimia vehementia facultates corporis sollicitans, turbas nonnunquam producit, ni perniciosas, arte saltem haud imitandas. Accedit, etiamsi per se salubria sint, quae natura molitur, effectus tamen adsociari, qui interdum maiora incommoda producant: ulcerum, furunculorum, bubonum etiam pestilentium exemplo, quibus, licet a natura productis, mala tamen plurima efficiuntur.

Nec negligenda sunt obstacula varia, qui semet naturae moliminibus opponunt: complicata aegritudinis indoles; illuvies humorum corruptorum: spasmus etiam aut rigores, quibus viae constringuntur. Ita oriuntur crises impeditae: τὰ κρίσιμα, μὴ κρίνοντα, quae Galenus dicit τὰ μὲν θανάτωδεα, τὰ δὲ δύσκριτα, τούτέστιν ἄκριτα ποιεῖν τὰ νοσήματα. (comm. 3. in praedict. Hipp. lib. 3. p. 205.) Haec sunt τὰ ὑπερβόπως κριθέντα, quae ex metaptosi acutos morbos faciunt. (Galen. Comm. in aphor. lib. 2. p. 349.)

Itaque, quamvis naturae minister medicus esse debeat, haud sine prudentia ei obedire, neque, quaecunque molitur, promovere debet, sed exitum prospicere.

28.

In observandis naturae moliminibus modos eos, quibus natura utitur ad finem obtingendum, probe animadvertere decet.

Primum autem utitur *instinctu*, seu impulsu e sensu organico orto, quo sine disciplina ac conscientia actus sensui congruos producuntur. (*inst. phys.* §. 89.) Solet is appetentia ciborum, siti, postu corporis motibusque semet manifestare; saepius magnum artis adminiculum, ut, quamam ratione aegro succurrendum sit, discatur. Equis enim negaverit, cupiditatem acidorum in morbis putridis,
vini

vinum in typho, aëris liberi in aliis morbis magni esse momenti, ut praecepta medici rite dirigantur? Saepius quidem fallitur instinctus; interdum pro instinctu habetur, quod cupiditati rudi tribuendum est. Neque facile obtemperandum est abnormi aut pravae chloroticarum feminarum et virorum melancholicorum appetentiae, quae ex acrimonia succi gastrici derivanda insaniae saepe proxima est.

Quodsi igitur instinctu duci cupit medicus, et morbi indolem necesse est probe noscat et rerum naturam, quas appetit aeger, ut, salubres futurae sint an noxae, iudicare possit.

29.

Multo latius patet alius modus, quo naturae vires morbis medentur. Lex enim universalis, quod omnem incitationem remissio sequi debeat, sufficit fere, ut spontaneae sanationes morborum multorum exponantur. (*inst. path. gen. §. 21.*) Cum ea cohaeret alia lex, quod chemica indoles insignite mutetur, si intentio virium sese remittit. (*inst. phys. §. 250. inst. path. gen. §. 30.*) Hac ratione inaequabilis imponderabilium conductio impeditaque consumtio cessat, eliminata per humores copiose excretos abundantia imponderabilium. Hinc non raro, si animi perturbationibus aut vigiliis aut aliis causis, nullo modo per se humores mutantur.

bus, febriles insultus accenduntur aut spasmi cientur, solutio contingit per sudores peculiari odore conspicuos, quibus et spasticorum nervosorumve morborum accessus terminari solent. (*inst. path. spec.* §. 527.) Quae humorum mutationes quanquam salubriter contingant, hactenus imitari solummodo naturae nutus nos oportet, ut remissionem ipsam parare, naturae vero committere, quorsum ac quomodo humores eiectione sit. (‘Α δεῖ ἄγειν, ὅκου ἀν μάλιστα ῥέπη, ταύτη ἄγειν, διὰ τῶν συμφερόντων χωρίων aph. 1. 21.)

30.

Cum eo naturali modo congruit etiam transitus morborum universalium in locales, quem alio loco (*inst. path. gen.* §. 29.f.) uberius illustravimus. Univerſo corpore stimulis morboſis incitato et partibus praefertim nobilioribus laceſſitis liberatio contingit, dum cutis inprimis, organon depurationi inferviens et univerſalem conſenſum importans, adſcitur; dum vel ſudores, vel exanthemata vel ulcuſcula etiam cientur. Haec eſt via, qua plerique morbi, et mere etiam nervoſi, indicantur. Itaque imitatio naturae penſi habenda eſt, ut cutem irriteremus, exanthemata aut ſecretiones morboſas producamus. Neque tamen prius haec molienda ſunt, quam morbi univerſalis efficacia ceſſaverit; (*inst. path. gen.* §. 29.) et naturae etiam nutus eo verſerint. Ita etiam de

partiali tractus intestinalis incitatione sequentique excretionem humorum ac sordium indicandum est. Universalis non raro morbus cessat, si haec contigerint; quanquam remittente semet febre et activis symptomatibus praegressis duntaxat salubre esse alvi profluvium potest. (*insl. path. gen. §. 249.*)

Generatim vero sancte servanda est lex, parari potius debere corpora aegrotorum ad excretionem, quod victu sit iisque artis praesidiis, quae nimiam incitationem et inaequabilem imponderabilium conductionem minuunt, quam hunc vel illum adfectum localem, arbitrio magis quam naturae iudicio, excitari. Εὖρος ποιεῖν vocitabat Cous senex, ποροποιεῖν Galenus eam medendi rationem (*aph. 2, 9.*), quam de meatibus omnibus recludendis et humoribus diluendis intelligit Galenus. Nonnunquam enim citra omnem excretionem morbi cessant, sola perspiratione cutanea aucta. (*insl. path. gen. §. 21.*)

31.

Consensum facpius et antagonismum partium naturae vires adhibent, ceu adiutricum in amovendis morbis. (*insl. phys. §. 72. 74.*) Liberatur enim altera pars incitatione, si altera, consensu priori iuncta, denuo incitatur. Eam ἀντισπασιν dictam studiose observandam esse suadet Hippocrates: nec prius simile aliquid patrandum esse existimamus,

quam ingenium popularium morborum et naturae nutus eo vergere videantur. Ita angina parotidea frequenter in tumores verendarum partium abscedit (*inst. path. spec. §. 223.*); pulmonum inflammationes in erysipelata et ulcera cutanea, quae omnino caute imitanda sunt.

32.

Praeterea inest ipsi inaequabili vis nervosae dispensationi salubre aliquid, quo morbi tolluntur. Namque accumulata vis sensifera excitat nonnunquam et alias facultates, praesertim vegetativam et nutritivam, aut dolores nascuntur et spasmi, quibus, etiamsi molestias plures proferant, salus tamen parari potest. (*inst. path. gen. §. 57. 259. 260. 271.*) Hac ratione arthritici insultus salubres sunt, ut torporem organorum digestionis inservientium tollant ac excretiones utiles promoveant. (*inst. path. spec. §. 452.*) Quodsi natura eo vergit aut iis phaenomenis adfuefacta est, et ars imitari debet naturam, doloresque ciere aut spasmos, quibus nervorum resolutiones et humorum stasis saepe avertitur.

33.

Alia prorsus est sanandi ratio, qua natura utitur, ut, si quid continui solutum est aut amissae partes, inflammationem suscitet, novamque secretionem, qua ὀργανομένην particulae accedunt ad resar-

ciendum vulnus et partes regenerandas. (*instit. phys.* §. 84, *path. gen.* §. 105. 196. *path. spec.* §. 162. f.) Itaque et suppurationi magna vis inest, morbos naturae nutu sanandi et partes amissas restituendi. Neque tamen et haec contingere possunt, priusquam universalis incitatio decreverit, et in localem abscellerit excitationem, secretionibus stipatam. Necessitas imminutae incitationis universalis vel inde probari potest, quod regenerationis vis in ratione inverfa est ad sensiferæ vis dominium. (*instit. phys.* §. 84.) Ars imitatur hæc naturae molimina, dum debito tempore inflammationem suscitât, eoque modo continet ac in mediocri gradu servat, ut suppuratio benigna aut exsudatio saltem consequi possit.

54.

Denique natura finis potitur, dum partem vi morbi depravatam atque destructioni proximam penitus destruit ac a reliquo corpore omnino separat. Ea quidem curandi ratio in gangraena, sphacelo et carie ossium conspicua (*inst. path. spec.* §. 174. 183.) non nisi cautissimam admittit imitationem, cum nostræ potestatis haud sit, destructioni terminos imponere idoneos. Itaque nec in gangraena curanda sphacelum, nec in carie necrosin causticis producere consilii est: sed ita agere, ut naturæ vires in partibus, quæ iuxta sunt, erigantur, debi-

toque modo contineantur, ut abigere partem destructam possint. Quodsi naturae vires vel non suffecerint, vel obstaculis pluribus impeditae fuerint, factus est ferramentis id tentare, ulcusque carcinomatofum exstirpare, quam medicamentis intutam partium destructionem moliri.

CAP. V.

DE INDICATIONIBUS GENERATIM.

35.

Regulae curationum, seu iudicia de eo quod salubriter in corpore mutandum est et perficiendum, *indicationes* dicuntur. Haec iudicia si format, eas regulas si sequitur, medicus artifex dicitur; alioquin opifex est aut agyrta. Hic enim, nullius regulae sibi conscius, quae iuvarunt aut nocuerunt in similibus morbis, usu doctus iterum adhibet. Regularum earum auctor Hippocrates therapiam generalem vere condidit, quanquam indicationum nomen ab ipso inventum non sit. (*Galen. meth. med. lib. 4. p. 78.*) Magna dein contentione inter dogmaticos empiricosque oborta de medicinae viis ducendis; illi et nomen et informationem ἐνδείξεις s. indicationum curatius introduxerunt. Cum Galeno

autem omnes dogmatici in eo semper consenserunt, a primis indicationibus et generalibus incipiendum esse, si methodum medendi instituere volueris; atque ex illis, quae generatim dicta et clare patefacta sunt, invenienda esse ea, quae speciatim valeant. „Qui rationem, inquit Galenus (*meth. med. lib. 1. p. 38.*), ducem inventionis fecerunt, et ordinem „et viam unam, quae ad finem ducit, instituunt, „illis necessum est, ab universali quodam incipientibus, agnito ab omnibus, transire ad reliqua. Sic „arbitror etiam ab illis, quae in medica arte demonstratae sunt, ad summas quasdam haud porro „demonstrabiles et ex se ipsis fide dignas propositiones ascendendum esse.“

Est autem indicatio ratiocinium quoddam, quo universalia cognita ponuntur, ex iis autem conclusio fit ad invenienda auxilia. Nec tamen protinus haec conclusio valet, nec ubique certissima est. Haud proxime fluit e generali status morborum cognitione, quomodo removendus sit, cum prius specialis et individua aegritudinis conditio praemitti debeat. Neque certissima est regula, siquidem iure suo τὴν ἐπιστημονικὴν διάγνωσιν, τεχνικὸν στοχασμὸν Galenus nuncupat. (*inslit. phys. §. 19.*)

36.

Quodsi medendi regulae ex iis proficiuntur, quae clara sunt et manifesta, aut quae inductione

et epilogismo eruta sunt, indicationes ipsae verae et tuta sunt: opinabiles vero, *στοχαστικαί* aut fallaces etiam, si hypothesebus vel commentis nituntur. (*instit. phys. introit. §. 10 — 13.*) Quo plus arbitrarii inest hypothesebus, eo magis fallaces fiunt indicationes iis superstructae: quo plures vero conveniunt ac conspirant observationes in stabilienda hypothesis, eo probabilior fit indicatio; donec tandem, quae optimum epilogismum basin habent, contradictionem fere nullam admittant. Cuivis patet, gradus quosdam adesse et modos sensibus fere non obvios a claritate ad solam opinabilem indolem, quos animadvertere et rite distinguere acutissimum exigit optimi medici iudicium. Quo magis therapeutica doctrina sibi cavet a regulis opinabilibus, eo dignior est, eoque magis verae artis progressum promovet. Neque tamen omnes omnino hypotheses vitandae sunt, cum rerum ipsarum indoles haud ubivis clara sit, sed coniecturis locum largiatur. Itaque praepriis enitendum, ut hypotheses caute casteque formentur, continueque in emendandis iis et corrigendis laborandum, ut, quantum fieri possit, dignitatem naturae iudiciorum adipiscantur.

37.

Regula curationum potest versari in removendo statu praeternaturali simplici vel composito vel etiam complicato: unde indicatio erit vel *simplex* vel *com-*

posita. Qui aequabilem vis sensiferae dispensationem restituere conatur, simplicem; qui simul egere studet abundantiam humorum aut detrahere impetum ab organo quodam nobiliori, compositam format indicationem. Iam vero, cum simplicior informatio, simplicior regula clarior sit et tutior composita, praeferendae his ubique illae sunt.

Id tamen ante omnia tenendum: compositas indicationes saepius, ni plerumque posse debereque ad simpliciores reduci, ut clariores fiant facilioresque. Siquidem composita morbi natura complectitur variorum organorum adfectiones ab eadem causa diverso modo productas (*inslit. path. gen. §. 43.*); disparilitas haec adfectionum saepe fucum imponit morbo toti, deducitque medicos a simplicitatis tramite, ut regulis magis compositis sibi ipsis tenebras pariant et valetudinem aegroti etiam magis offendant quam adiuvent.

38.

Quo magis optimus quisque medicus penetraverit morbi naturam, eo simpliciore formabit indicationem, cum facile perspiciat, disparilitatem variorum adfectuum simul praesentium ex opportunitatibus organorum aut e varia causarum indole proficisci, nec verae causarum diversitati adscribendam esse. Namque, qui febre laborat nervosa,

pulmonum adfectiones inflammatorias simul pati potest, ex eadem causa fluentes, eodemque methodo tollendas, si modo exploratum habemus, causam generalem morbi in hoc homine eo modo egisse. Tirones et, qui expertes interioris sunt morborum cognitionis, proclives sunt in compositiones morborum complicationesque statuendas, quibus curandi ratio non solum pervertitur, sed penitus etiam deletur, ut tandem empirico modo adfectus quivis et molestiae tollantur.

Ut ab hac caveamus perversitate, necessaria est particularis regulae cuiusvis reductio ad normam universalem; quod, etiamsi ubique fieri nequeat, faciliorem tamen et clariorem et simpliciolem reddit curandi rationem. Quodsi enim obviam ire inflammationi ad typhum accedenti necesse est, regula ea particularis optime reduci potest ad universalem in typho indicationem, quae versatur in restituenda aequabili vis sensiferae distributione et minuenda nimia eius incitatione.

39.

Nihilominus fallitur, qui, simplicitati soli studens, generalibus praeceptis solummodo subsistit. Imperfecta enim est et lacunosa curationis via, quae corporum singulorum varietates negligit: namque nec genus humanum sanare, nec morbi ideam,

qualem sibi intellectus fingit aut imaginatio, e medio tollere nostrum est, sed morbos singulares et individuos in singulis et individuis hominibus. Itaque probe unienda sunt generalia praecepta cum particularibus, haec autem ex illis, inductione prae-eunte, eruenda. Quodsi compositio inde regularum exoritur, operam dare debemus, ut certo et naturali ordine constitutae eodem ordine observentur iisque obtemperetur. Si quis forte ex iracundia inflammationem contraxerit, fordes biliosae in ventriculo congestae prius eliminandae sunt, quam impetum avertere a partibus nobilioribus tentaveris.

Saepius tamen generalibus praeceptis acquiescere necesse est, cum peculiare morbi conditiones aut singulares corporis adfectiones nos lateant. Id docent inter alia exempla celeberrima Wassenauerii et S. Albani a Boerhaavio descripta. (*Rariorum morborum historiae prior et posterior ed. Baldinger. Frcf. 1771. 8.*)

40.

Cum simplicitate indicationum iungenda est complexio omnium ad eas pertinentium cumulata, sine qua nec cogitari quidem perfectio potest. Necessaria est clara perspectio et corporis conditionum, indicationem hanc vel poscentium vel admittentium, et mutationum omnium, quae sequi necessario con-

inescunt, aut fortuito possunt indicationis expletionem. Quod nisi fiat, salebrosa est via, qua medicus incedit. Qui in inflammationibus impetum sanguinis minuendum esse iubet, necesse est simul perspiciat, quomodo id fieri in hoc singulari casu possit, quamam ratione mutationes impetu sanguinis minuto obortae sanitatem restituere possint, ac quibus modis obstacula huius curationis rite removenda sint.

Hac igitur ratione abusus simplicitatis vitatur. Sed alius est scopulus, in quem impingunt, qui, phaenomena morbosa e primis rerum omnium principiis exponere satagentes, regulas quidem fingunt simplicissimas, sed examen rationis et liberi a praeconceptis scholarum commentis iudicii fugientes. Qui nimiam in ratiociniis fiduciam collocant, malunt facillimam et simplicissimam statuere curationis normam, quam naturae iudiciis, saepe magis compositis operam navare.

41.

Quanquam indicationes semper versentur in removendo statu praeternaturali, possunt tamen vario modo distingui pro varia ratione eius status.

Indicatio *causalis* dicitur, quae causas amovendas, vel occasionales vel etiam disponentes complectitur: ut, si quis plumbi oxyda colicam satur-

ninam excitantia, in regulinum statum reducere aut e corpore eiicere studet, aut si pulmonum debilitatem custodire contra morbi efficaciam conatur. *Prophylactica* eadem dicitur, cum terrentia morbi avertere et cavere a morbo imminente nitatur. Quae quidem definitione patet, therapeutices omnino partem esse, cum in statu praeternaturali avertendo versetur. Alia autem est prophylaxis, hygieines pars, quae, quomodo servanda sit secunda valetudo et vitandi morbi, docet. Liquet etiam indicationem prophylacticam neutiquam locum obtinere, ubi nulla sunt morbi terrentia, nulla causarum efficacia. Homo, qui bene valet, dum morbus popularis grassatur, curationem nullam admittit: sed is, qui vel valetudinarius est, vel terrentia morbi iam sentit.

Huic indicationi opponitur *curativa*, quae ipsi morbo iam praesenti obviam it et *apotherapeutica*, quae reliquias morbi excutere conatur. Haec autem necessaria est, cum officium medici exigit perfectam morbi curationem. (§. 6.)

42.

Gravissimae quoque sunt indicationes *vitales*, quae in servandis solis viribus versantur, neque rationem ullam morbi aut causarum habent. Quodsi enim natura aegritudinis specialis vel individua nos latet, si causae occultae sunt, nil superest, nisi vi-

res vitales servare et excitare, ut, quomodocunque id fieri possit, ipsae morbum vel tollant vel leviores reddant. (§. 4. 24.)

Cavendum tamen, ne haec indicatio negligentiae vel ignorantiae asylum praebet. Etenim dedecet medicum levitas ea, quae praetendens morborum aut causarum latentem indolem, solis viribus servandis operam navat: cum in plurimis morbis naturae conamina haud sufficiant ut morbus tollatur. Itaque prius acquiescere huic indicationi est nefas, quam cum vel desperamus curationem ipsam, vel persuasum nobis est, nec causas nec morbum penitus nos cognituros esse: aut denique, cum obstacula ea curationi semet opponunt, quae e medio tollere omnino nequimus.

Nec sine momento est, indicationes vitales saepiuscule cum curativis easdem esse, siquidem in morbis pluribus cardo totius curationis vertitur in vitium rationibus ita regendis moderandisque, ut pares morbo sint vincendo.

43.

Denique indicationi curativae opponitur ea, quae graviores solummodo adfectus levare aut e medio tollere studet, salvo tamen morbo ipso et intactis causis. Barbara voce ea indicatio dicitur *palliativa*, quasi pallio obtegit morbum. *Mitigato-*

riani appellamus cum veteribus (*παρηγοριανήν*) et *symptomaticam*, quod symptomatibus solis opposita est.

Hac autem indicatione egere non possumus, cum, Galeni sententia (*comm. in aph. 6, 38.*) mēderi duplex sit: alterum quidem omnia facere, ut sana fiat adfecta pars; alterum, adhibita conveniente morbis circumspectione, solari et mansuefacere. Itaque non soli morbo tollendo cura est adhibenda, sed amovenda omnia quae molesta sunt.

Alia etiam, et maior quidem dignitas indicationis symptomaticae inde proficiscitur, quod interna morborum indoles, quae essentia dicitur, saepius nos penitus latet, neque indicationes inde petitae adeo clarae sunt ac exploratae, neque eam habent securitatem, quam quae e manifestis functionum laesionibus et symptomatibus fluunt. Febrem enim curaturus, si solam sequitur informationem, quam scholae sibi de morbi ingenio et natura fingunt, in diluculo et nebulis saepius versabitur, cum hypotheses duces agnoscat. (§. 36.) Qui vero calorem minuere et sanguinis impetum, aperire conatur vias, quibus natura semet liberare possit, is, licet symptomaticas formet indicationes, multo tutiorem viam eligit, eamque, quae ad salubrem finem conducit.

Alia est indicationis symptomaticae praesentia, quae e symptomatibus variis curationem ipsam impe-

dientibus fluit. Potest enim symptoma quoddam eius esse indolis, ut, nisi prius tollatur, nulla omnino curatio contingere valeat, aut vires saltem prius deficiant. Qui hydropem curaturus est, haud ubique laxitatem vel stricturem vasorum absorbentium, vel glandularum duram imperviamque indolem auferre potest, nisi prius colluviem aquosam acu triquetra eduxerit. Faciliorem igitur reddit indicationem curativam ipsa indicationis symptomaticae expletio. Quod eo clarius fit, si, virium vitalium prostrationem symptoma esse frequentissimum morborum consideramus: eius autem amotio quantopere necessaria sit, ex indicationis vitalis praesentia patet. (§. 42.)

45.

Nec negligenda est symptomatum efficacia in producendis novis morbis aut compositionibus etiam morborum. Haec minuitur, novique morbi avertuntur, cum symptomatibus nosmet opponimus. Quodsi enim in febrium nervosarum initio impetus sanguinis haud mitigatur, eo nobiliora organa saepius adeo corripuntur, ut encephali et pulmonum inflammationes inde nascantur. Itaque capitis atroces dolores in typho studiose mitigandi sunt, ne vel encephalitis vel apoplexia aegrum praecipitent.

Accedit, quod cum his cohaeret, symptomata varia hactenus atrocia esse tantumque casum recipere, ut, ni vincantur, praecipitent aegrum. Ecquis enim

gan-

gangraenam, quae ad febrem nervosam accedit, aut nervorum resolutionem, morborum diuturnorum comitem, intentatum reliquerit? Ecquis semet haud opposuerit alvi profluvio pertinaci, vires aegroti confumenti?

46.

Denique, quod caput rei esse videtur, morbi natura ipsa saepe insuperabilis, aut curatio, quae opponitur, plus damni etiam infert quam salutis. Itaque tutius est, symptomata oppugnare, maxime cum iis ablatis morbus etiam simul tollatur. Nalli enim non notum est, scirrhum tentari neutiquam debere ea curatione, quae acris stimulis penitus resolvere eum conatur: multo plus autem iuvare mitigatoriam methodum, quae doloribus sedatis et impetu sanguinis averso cavet a transitu in carcinoma. Quin etiam potest nonnunquam, quae symptomatibus adversa videtur methodus, vere esse curativa, cum remediorum actio saepe latius pateat.

Hinc nec specificam methodum symptomaticam nuncupaverim, cum illa potius curationis consilio ipso nitatur et morbi ingenio ipsi opponatur: hydrargyroseos exemplo, quae etsi specificè agat in syphilide, indicationem tamen curativam sequitur.

47.

His enumeratis indicationis symptomaticae commodis, generatim tamen dicendum est, symptomata sola medendi vias haudquaquam aperire, sed tum demum, cum rite collata atque cum causis et toto morbi decursu comparata fuerint. (*inst. path. gen.* §. 11.) Ratio doctrinae pariter ac constantia medici exigunt methodum eam, quae, rite exploratam morbi naturam e medio tollere omnesque effectus avertere conatur, quaeque haud facile accedentibus his vel illis symptomatibus perturbatur. (§. 7.)

CAP. VI.

DE INDICANTIBUS ET CONTRAINDICANTIBUS.

48.

Qui acturus rationem sequitur, clare perspiciat necesse est, cur aliquid agat aut moliatur. Medicus igitur rationalis, regulas sibi formans actionum therapeuticarum, debet causae conscius esse, cur hoc vel illud moliatur: quae causae actionum dicuntur *indicantia*: res vero, quae oppositae curationibus eas prohibent, *contraindicantia* appellantur.

49.

Indicans autem vel generatim consilium curationis format, vel speciales regulas. Illud omnium eorum, quae morbum fecerunt, complexionem sistens, diagnosi nititur, et unicum est, cum ea omnia iubeat, quae consilium curationis producant. Indicantia vero particularia plura esse possunt, cum variis modis consilium generale obsequi liceat.

Magnopere interest, prius consilium secundum indicans generale formare, quam ad singulas variasque cautiones seu medendi vias descendamus. Etenim haec sine illo haud satis cohaerent, neque constantes esse possunt: sed contrariae sibi plurimae sunt, nisi ad generalia praecepta redigantur. Sic qui in typho impetum sanguinis minuere student, iis semet opponunt, qui stimulis fugacibus nimiam credunt incitationem deprimere posse. Sed utrumque consilium speciale ad generale praeceptum reduci potest; inaequabilem vis sensiferae distributionem regendam ac moderandam esse.

50.

Quemadmodum consilium generale curationis e diagnosi morbi, ut generis, fluit, ita consilia particularia e modis variis proficiuntur, quibus morbus sese manifestat. Individua vero existunt indicantia e ratione singulari, qua morbus in hoc vel illo ho-

mine apparet. Sic typhus alio modo in homine curandus, qui in lustris tempus aetatis consumsit, ac in eo, qui ἐνεξία consueque insignis fuit. Arthritis alias curandi regulas particulares exigit in femina delicata ac in agricola aut auriga. Itaque perfecta indicatio nititur tum indicante universali, tum speciali, tum etiam individuo; quanquam ex hoc, cautelae potius aut momenta consilii formantur quam ipsa consilia.

51.

Quaenam sint indicantia, patet ex iis, quae de examine aegrotorum instituendo monuimus. (§. 19. f.) Therapeutico vero fine quaestio ea ita habenda est, ut phaenomena morbosa et praesentia et praeterita non solum observemus, sed etiam rite aestimemus, ut pateat, quomodo orta sint; quamnam habeant rationem ad formam morbi; quaenam systemata corporis aut quaenam partes primum adfectae sint; quaenam denique internae corporis mutationes probabiliter contigerint, a quibus tota aegritudinis forma pendeat. Ea sunt indicantia principalia, quae tum observatione, tum etiam ratiocinio erui, cuius patet. Per se igitur symptomata non indicant, nisi ope ratiocinii ad ortum eorum adscenderis, nisi que ratione habita eorum, quae de indicatione symptomata praecipimus. (§. 43.)

Nec caussae externae per se indicant, nisi quatenus mutationes corporis ex iis exponuntur. Neque enim aëris temperies aut qualitas depravata prius regulas curationum indicabit, quam corporis constitutio ea peculiari modo correpta est. Causae autem praedisponentes, cum corporis sint deflexus a norma sanitatis, utique indicantibus accensendae sunt, licet individua maxime consilia inde proficiantur. Quodsi morbi natura per se haud adeo patescit, ut indicans esse possit, refugiendum est ad causas remotiores, quarum effectus magnopere iuvant expositionem morbi ipsam.

Quod et prognosis indicantia formet supra iam innuimus. (§. 9.) Decursus enim morbi probabilisque exitus ni consilia ipsa formare iubent, mutationes tamen modosque consiliorum producunt nunquam in perfecta curatione negligendos.

52.

Cum nec morbi interior indoles, nec modus, quo causae mutarunt corpus, nec symptomatum ratio ad morbi ingenium semper satis pateant; indicantia saepius incerta, plurimum nonnunquam valent, dum coniectura probabili nituntur. Quamquam certitudinem ambire dignissimum sit medico rationali, vi tamen eam exigere, ubi pleraque latent, haud licet. Indicantia particularia, et quae

epilogismo eruantur, multo magis probabilia esse solent, quam generalia, quae ratione sola aut inductione haud perfecta, aut hypothese demum finguntur.

Increfcit probabilitas et certitudini proxima est, si duabus aut pluribus corporis conditionibus idem curationis consilium indicatur. Ea consensio magnopere exoptanda est, ut actiones nostrae aliquid certi acquirant.

53.

Indicans si sufficientem indicationis rationem continet, *perfectum* dicitur et *completum*; imperfectum vero et incompletum, si id secus se habet. Generalis quidem indicatio saepius rationem sufficientem in indicante quodam habet, nec tamen specialis. Namque evacuandas esse sordes indicatur non raro, nec tamen emetica methodus. Quodsi vero plura consentiunt indicantia, per se quidem haud perfecta, perfecta tamen et completa fiunt consensu. Itaque necessarium est accuratius examen, quo rationes corporis penitus cognoscantur, ut indicantia fiant completa.

54.

Indicantia pleraque conditione quadam circumscribuntur; nisi alia, ea saltem, si vires susse-

cerint, aut nisi obstacula fortuita semet opposuerint. Plura tamen fere nullam admittunt conditionem, sed qualibet corporis ratione regulam eandem adhiberi iubent: velut sphacelus membrum aliquod devastans, qui praecidendam esse emortuam partem imperat.

Interest tamen et hic inter indicationes generales et speciales, quod illae ut plurimum nulli adstrictae sunt conditioni, haec autem omnino pluribus circumscribuntur. Febris quidem intermittens comitata celerrimam iubet virium vitalium excitationem: sed, siue id fiat ope corticis peruviani, siue alio modo, perinde saltem neutiquam est, sed examine ulteriori eruitur.

55.

Ubi latet morbi natura, ubi caussarum effectus aequae obscuri sunt ac symptomatum ratio: ubi saltem indicantia tot conditionibus circumscripta videntur, ut, quo nos vertamus, quidve agendum sit, dubitemus; ibi cordatum medicum experimenta instituire atque a iuvantibus nocentibusque medendi vias trahere decet. (§. 3.) Quod vero cum empiricorum temeritati finitimum sit, prius eo refugiendum non est, quam exhausti fuerint omnes indicantium fontes. In morbis novis etiam popularibus saepius contingit ea indicantium obscuritas aut con-

traria indoles, ut, eo duntaxat, quod iuvat aut nocet, edocti, moliri aliquid possimus.

56.

Contraindicantia sunt rationes corporis aegroti, quibus prohibetur regulae cuiusdam applicatio aut indicatio. Itaque per se contraindicantia haud subsistunt, sed ubique sunt in ratione indicantium: quodvis etiam indicans contraindicat omnia ea, quae obstant, quominus imperata rite perpetrentur.

57.

Contraindicantia totidem habent differentias, quot indicantia. Sunt certa et incerta; vera et fallacia, probabilia etiam; perfecta et imperfecta; generalia, specialia et individua, conditionibus circumscripta, vel nullis conditionibus subiecta. Specialia quidem et individua multo frequentiora sunt generalibus: namque indicantia quidem generalia tuta esse possunt ac certa, secus tamen specialia et individua. (§. 50, 53.)

Itaque contraindicantia eo valent, ut, licet indicatio generalis sancte servanda sit, speciales tamen regulae eruantur, quae actiones medici determinant selectumque medicaminum idoneum formare iubent. Cautum faciunt medicum contraindicantia, ut mo-

menta quaevis investiget, quae et morbi perfectam cognitionem et idoneam medendi methodum paratura sunt. Qui his sedulo inquirendis operam dat, nihil temere, ac praeconceptionis scholarum opinionibus irretitus, molitur; sed circumspectissime tutam curationis consilium et perfectum sequitur.

58.

Quae circumspectio etiam si laudabilis est, quamvis graviora contraindiciantia indicantium usum penitus abolent; abutuntur tamen meticulosi homines contraindiciantibus, si iis, quae speciales individuasque corporis rationes aut effectus medicaminum fortuitos complectuntur, deterrentur a mascula curandi ratione. Nihil agunt, ne nocuisse videantur. Quae timiditas ut virum dedecet, qui suae spontis est et miseris opem ferre debet, ita saepius e scientiae defectu proficiscitur. Namque, qui phaenomenorum morbosorum rationem nexumque rite indagaverit, multo pauciora reperiet contraindiciantia; nonnulla enim, quae contraria primo intuitu videntur, ut interius cognoscuntur, in eo nexu apparent, qui curationis consilium nequaquam impedit. Quod si enim aliquis, ad curandam febrem intermittentem vocatus, saburrâ animadverterit primarum viarum, huius nexu haud prius indagato, deterrebitur forte ab indicatione vera, quae tonicis remediis ventriculi

nervos sollicitare studet. Scientius vero indagato fonte saburrae, perspiciet, eamdem a longiore mora ipsius febris intermittentis natam soli saepe cedere tonicae methodo.

Strenui etiam medici est, contraindiantia prius remove, quam indicantibus obtemperet. Saepius contraindicans sola medicamina vetat, nequaquam vero curationis consilium: itaque mutanda remedia, sed minime consilium ipsum.

59.

Repugnant autem vel indicantibus ipsis vel indicationibus, maxime vero indicatis variae corporis rationes: aetas infantilis vel senilis: sexus rationes, ut graviditas, menstruorum cursus, aut tempus, ubi menstrua haud amplius feruntur; vitae genus et temperamentum partium solidarum: idiosyncrasia et consuetudo, quibus omnibus indicata nonnunquam oppugnantur, consilium ipsum vero generale neutiquam exceptionem experitur.

CAP. VII.

DE INDICATIS.

60.

Indicata dicuntur omnia artis praesidia, quae ad consilium curationis exiguntur, ut mutationes salubres contingant. Cum autem rerum salutis conferentium immensa fere sit varietas; tantum abest, ut solis medicaminibus finem attingamus, ut animi etiam vires et adfectus, victus rationem, aëra omniaque, quae hominem ambiunt, quocunque modo in corpus agentia, indicatis accensere liceat. (*inst. pharmac. §. 3.*)

61.

Maximi momenti est, nec victus rationem, nec rerum earum, quae aegrotum ambiunt, efficaciam unquam negligere, cum medicamenta saepius irrita sint, aut longe alienum, imo contrarium effectum producant, nisi victus ratio iis faveat; cum interdum quoque sola diaeta sufficiat ad morbos tollendos. Id non solum de levioribus acutis morbis valet, quos naturae vis, victu idoneo adita, saepe sola sanat (§. 4. 24. f.); sed in diuturnis pluribus aegritudinibus mutatio victus vitaeque generis, itinera et habitatio in locis sanis mirum quantum conferant ad sanitatem restituendam. Eum igitur erro-

rem sedulo vitare debet medicus, quasi solis medicaminibus, quae ex officinis petuntur, morbus quilibet fugandus sit; quamvis praeconceptae vulgi opiniones inertiae interdum medicum accusent aut negligentiae, nisi plures sorbitiones, pulveres, pilulas et unguenta ex officinis peti iubeat.

62.

Aliud est praeceptum, haud minoris momenti. Medicamenta, si qua indicantur, ita eligenda sunt, ut rationem actionis reddere possis. Itaque nihil imperandum, quod superfluum sit, cuius actio dubia, aut quod maiora etiam damna adlaturum sit. Studiosissime simplicitas observanda est, neve plura iungenda sunt remedia aut simul adhibenda, quam vel composita aegritudinis indoles, vel mutuum remedium adminiculum poscunt. Etenim, quo plura miscueris, eo minus rationem reddere actionis singulorum licebit.

Nec, si optio datur medicaminum exoticorum et indigenorum, novorum vel diu cognitorum, exotica potius aut nova praeferenda sunt, ut nostrae aetatis moribus obtemperemus. Nova remedia prius in nosocomiis publicis tentanda sunt, efficacia etiam comprobanda, quam in praxi privata adhibeantur. Gloriatio est contemptu digna, quamvis novam sequi curationem, novisque semper medicaminibus uti;

plerumque proficiscitur e defectu scientiae solidae. Exoticis remediis licet egere nequeamus; cavendum tamen ab eorum usu, si indigena minoris pretii, eiusdem autem valoris sunt. Namque impensis parcere aegrotorum, officii nostri est.

63.

Remediorum actionem in corpore medicus artifex ita observat, ne, partium studio aut praeconcep-
tis opinionibus occaecatus, organismi naturam fus-
que deque habeat. Triplex ratio, quo externae res
corpus animale adficiunt; mechanica nimirum, phy-
sico-chemica et dynamica, continuo ob oculos ver-
satur medico, ut cuiusvis remedii actionem prima-
riam sibi claram reddat. (*inst. path. gen.* §. 28.)
Nec negligit consensum partium omnium, maxime-
que conspirationem centralium organorum et antithe-
sin (*inst. phys.* §. 16. 61.), ut ex alio in aliud de-
flectere morbum atque a nobilioribus in minus gra-
ves partes derivare possit.

64.

Multo magis refert scire quid medicamenta effi-
ciant, quam quomodo agant, licet nec de hac scien-
tia penitus sit desperandum. Cum nondum explo-
ratum sit, quomodo hydrargyrum corpus animale ad-
ficiat, persuasum tamen habeamus, vasa absorben-
tia et capillaria peculiari ac specifico modo id irri-

tare (*inst. pharmac. §. 315.*); amplissimus aperitur campus observationum et inquisitionum, quibus differentiam effectuum, quos hoc et quos similia producant remedia. In eo semet exercere decet quemvis artificem, observatione adiutum doctrina et ratiocinio. Qua quidem parte scientiae gravissima rite exculta vitantur plurimi errores et contentionum occasiones, quae de modo agendi semper existent.

65.

In exhibendis remediis caute observabit medicus differentiam individuorum corporum; discrimen partium, in quas adhibentur remedia; magnam varietatem formarum, quibus applicantur; dosium diversitatem, unde insignis varietas effectuum nascitur: denique etiam aliarum rerum, quae aegrum ambiunt, magnam efficaciam in mutandis remedium effectibus. Haec iterum observationi et ratiocinio uberrimam praebent occasionem, qua semet exerceant.

66.

Tandem meminisse opus est, animi vires et propensiones insignis esse momenti ad morbos tum efficiendos tum etiam curandos. Itaque et in regenda mente et in observandis variis affectibus ac proclivitatibus studium collocare oportet et operam. Hinc praecipue studendum est, ut ipse medicus dignitate,

comitate, doctrina, εὐερίᾳ ceterisque virtutibus aegro placeat, fiduciamque ipsius obtineat. Dein necesse est, et eos, qui adsunt, et ceteras res, quae aegrum ambiunt, ni iucundo modo aegrum adficerent possint, ingrato saltem nequaquam modo in eum agere. Denique et adfectus vel excitandi sunt, a quibus salus speranda, vel mitigandi, si qui damnum adferre videntur.

CAP. VIII.

DE INDICATIONUM DIFFERENTIA
GENERALI.

67.

Cum triplici modo se vita manifestet: reproductione, irritabilitate et vi sensifera (*inst. phys.* §. 58 — 61.); cum morborum sedes primaria in systematibus, earum vitae manifestationum focus, quaeratur, (*inst. path. gen.* §. 31.) possunt omnino curationum consilia generatim dividi, prout haec vel illa functio primaria proxime laborat: licet haudquaquam negemus, in morbis concretis functionum earum laesiones intime nexus esse et quasi confusas.

Quodsi igitur, diagnosi absoluta, cognoscimus mutatam corporis indolem, ceu indicans (§. 49.):

ut id perfectum evadat, inquirendum est, cui systemati adnumeranda sit pars praeter naturam adfecta, aut quodnam momentum, seu quaenam functio eius partis primitus correpta sit; quomodo per eam adfectionem reliqua momenta mutata sint, aut quam ratione aliae functiones laborent. Eo examine rite perfecto, videndum, indicans primarium inconcussum maneat, quoniam omnia rite secum congruant, an mutetur aliarum functionum qualitatibus diversis. Sic qui ulcerationem partes late exedentem curaturus est, sedem quidem in systemate reproductivo cognoscit, sed necesse est simul irritabilitatis et vis sensiferae rationes circumspiciat, ut indicans rite finiatur et determinetur.

I.

Indicationes in morbis functionis reproductivae.

68.

Cum vita vegetativa formatione potissimum, incremento, secretionem et regeneratione partium amissarum manifestetur (*inst. phys.* §. 81. f.); primaria autem causa formationis typo universalis vitae, in quovis corpore alii, tribuenda sit (*ib.* §. 18. 19.); formationum vitia e typi defectu aut deflexu a norma universali proficiscuntur. (*inst. pathol. gen.*

§. 101.)

§. 101.) Itaque et lex generalis et consilium curationis versantur in mutando eo typo, ut redeant ad normam. Id autem, cum typus partium conformationem adiacentium sequatur, sine harum restitutione fieri nequit. Cum vero in secretionibus, ad formationem necessariis, vis sensiferae efficacia in animalibus perfectioribus exigatur, (*inst. phys.* §. 247.); typi mutatio, si qua arte perficitur, redit fere ad moderamen vis sensiferae, ne depressa sit, neve modum excedat. Quibus accedit aequabilis rationis, quae appositionem intercedit ablationemque, idonea restitutio (*inst. phys.* §. 80. 81.), quae humorum rerumque earum, e quibus partes formantur, mutationem poscit.

69.

Quibus positis, sequentes potissimae curationum regulae in morbis a reproductione vitiata ortis patent:

1. Restituantur partium adfectarum positus, cohaerentia et continuïtas normales, ut typus inde pendens iterum in integrum redeat.

2. Vis sensiferae abnormitates, inaequabilis praecipuis distributio corrigendae sunt, ut secretiones ad normam redeant.

3. Humorū indoles ita emendanda, ut peregrinae, si quae adsunt, amoveantur: miasmata autem

et contagiorum evolutio, nutritioni et reproductioni vel maxime infesta, impedienda est aut moderanda. Raro id proxime fit, e. g. in infectione syphilitica (*inst. pharmac.* §. 314.), et in contagio febrium malignarum (*ib.* §. 259. 264.); plerumque miasmata ea et contagia aliter mutari nequeunt, quam curatione morbi ipsius idonea.

II.

Indicationes in morbis irritabilitatis.

70.

Cum irritabilitas, seu vis contractiones alternans et expansiones, antithesibus nitatur, materialis etiam eius conditio sit polarium elementorum lucta (*inst. phys.* §. 59.); antithesum abnormium restitutio polariumque elementorum moderatio summam totius curationis complectuntur. Cum vero nec polaria elementa mutari nec debita restitui ratio absque reproductione emendata possint; nec irritabilitas in corpore animali sine vis sensiferae sit efficacia (*inst. phys.* §. 314.); luculenter patet, et huius abnormitatis curationem redire ad mutationes, quas in aliis functionibus perficere conamur.

71.

Itaque, ut antithesum ratio restituatur et motus fiant normales, sequentes regulae servandae sunt:

1. Motus sanguinis regendus est, ut antithesis arteriarum venarumque; vasorum etiam et organorum nobiliorum ad normam redeat. Quantum enim sanguinis appulsus ad internam necessariamque in fibris muscularibus secretionem, quae quicunque motum comitatur, conferat, olim docuimus. (*inst. phys.* §. 309. 313. 316.)

Huic regulae obedimus, cum sanguinem vel mittimus, vel motum tardiozem acceleramus, vel in alia loca dirigimus. Quae quidem acceleratio motus et directio abnormitatem eius vel proxime fit, vel nervorum arteriis providentium ea mutatione, ut, sensifero momento minuto, energia evocetur.

2. Nutritio regenda est et ad normam reducenda, ut secretio idonea in fibris muscularibus et congrua antithesis consequatur. Itaque in atonia fibrae muscularis pariter ac in spasmis alimenta digestu facilia eaque remedia exiguntur, quae digestioni favent.

3. Peregrina omnia, quae polarium elementorum rationem turbant, aer depravatus, humores corrupti, miasmata et contagia, vel amovenda atque arcenda sunt, vel ita moderanda, ut irritabilitatem offendere nequeant.

4. Magnopere autem refert, in momentum sensiterum irritabilium partium primitus agere, ut laesa ratio eius ad alterum momentum corrigatur, notand-

lis autem antithesium ratio restituatur. Id plerumque fit specificis remediis, quae usus probavit.

III.

Indicationes in morbis vis sensiferae.

72.

Cum vis sensifera et perceptionibus variarum rerum externarum et dominatione, quam in motus et secretiones exercet, unitatem exprimat; abnormitates eius complectuntur fere unitatis, seu vis eius defectum, cuius ope varios rerum externarum impulsus nobiscum iungimus ac in nos recipimus; cuius adminiculo nosmetipsos unum esse ac constans sentimus libereque agimus; cuius demum auxilio motus et secretiones ad typum eundem praestitutum perficimus. (*inst. phys.* §. 88. *f. inst. path. spec.* §. 552. *f.*)

73.

Quodsi igitur vis nerveae abnormitatibus mederi cupimus, regulae sequentes observandae sunt:

1. Inquirendum est, irritabile an sensiferum momentum huius vis primitus laesum sit, et quam ratione? Scimus enim, debilitato irritabili

momento, increfcere turbarique fenfiferum (*inft. path. gen.* §. 52.), remediaque plura ita agere, ut vel fufcitato momento irritabili fenfiferum vis nerveae momentum debilitent, vel fufcitato hoc illud deprimant.

2. Ubi inaequabilis diftributio, maxime organici fenfus, in gangliorum fyftemate adefl, quae plerumque confumptionem impeditam ut caufam agnofcit (*inft. path. gen.* §. 58. 61.); aperiendae funt viae, quibus eliminari abundans imponderabilium copia poffit. Cum nutritio quoque eo valeat, ut rite adhibeatur et confumatur vis nervea, in diuturnis morbis magnopere interefl, alimentis idoneis, motu corporis et aëris falubris ufu nutritionem promovere.

3. Quodfi vires perfectiores fyftematis fenfiferi patiuntur, primum ratio inter eas et organicum fenfum efl reftituenda, a cuius laefione plures faltem, ni plerique mentis morbi pendent. (*inft. path. gen.* §. 287.) Itaque turbis organici fenfus fopitis, fenfus altiores et interni faepe iterum revalefcunt.

4. Cum reproductio, licet vi fenfifera regatur, iterum in eam reagat, atque vel nervorum nutritione locali manifefletur (*inft. phyf.* §. 362.); in omnibus eiusmodi morbis graviffima efl motus fanguinis et humorum, fe retentionis etiam moderatio. Hinc quoque ad periodos evolutionis confilium efl trans-

ferendum, in quibus utplurimum vis nerveae dispensatio turbatur. (*inst. path. gen. §. 37.*)

5. Denique earum rerum, quae mentem proxime adficiunt, ratio est habenda. Animi perturbationes nimiaeque intentio, quibus mentis morbi efficiuntur, regendae sunt ac moderandae, ut ad bonam frugem mens ducatur.

74.

Id quidem generale indicationum discrimen quamlibet verum sit, nentiquam tamen normam dividendae doctrinae huius praebet. Namque conspectio functionum omnium in quovis organo id impedit. (*inst. path. gen. §. 31.*) Accedit etiam, plura superesse curationis consilia, his quidem quodammodo comprehensa, quae vero seorsim tractata usu praeslant. Denique et remedia huic normae nequaquam apta sunt, cum lubrica esse probaverimus ac arbitraria plura, quae de polarium elementorum in remediis obviorum ratione ad polaria organorum elementa proferantur. (*inst. pharmacol. §. 7. 8.*)

75.

Itaque curationis consilia satius est ad effectus dividere, quae sub sensus cadunt. Ea enim divisio ut tutior est ceteris, quia in manifestis versatur, ita et a repetitionibus aliena est. Dividendas autem

esse curationes reor, prout effectus in solidis partibus aut in fluidis simul conspicui sunt. Solidae curationem tum demum poscunt, cum in vivo corpore statuuntur: namque vitae expertia corpora curari nequeunt. Itaque si cohaerentiam partium solidarum augere conamur aut minuere, id proprio sensu curatio nuncupari nequit, sed praeparatio ad curationem; nisi statueris, in vivo corpore has mutationes aliter tamen fieri ac in eo, quod vitae expertus est. Curationes autem, quae humores complectuntur, simpliciter eos comprehendere nequeunt, sed, cum pendeant humorum morbi a solidarum partium vitiata indole; (*inst. path. gen.* §. 47.) haec etiam curationibus nostris mutatur, cum in humores agimus.

76.

Conspectus curationum singularum hic est:

Sect. I. Cohærentia solidarum partium mutanda.

1. Cohærentia augenda. Methodus adstringens.
2. Cohærentia minuenda. Methodus molliens, humectans.

Sect. II. Vires vitales mutandae.

1. Efficientia ipsa augenda. Methodus roborans, tonica.

2. Receptivitas augenda. Methodus incitans.
3. Ratio virium atque directio vi penitus mutanda. Methodus metasyncritica.
4. Inaequabilis vis sensiferae dispensatio moderanda: nimia intentio minuenda. Methodus sedans, anodyna, antispastica.
5. Caloris vis minuenda. Methodus antiphlogistica.

Sect. III. Humorū mutanda vel copia vel indoles.

1. Directio humorum mutanda. Methodus derivans, revellens, antagonistica, consensualis.
2. Motus sanguinis humorumque accelerandus. Methodus resolvens. Absorptio promovenda.
3. Methodus evacuans,
 - a. Sanguinem. De sanguinis missione.
 - b. Sordes primarum viarum.
 - α. Mutatio earum chemica aut organica.
 - β. De vomitu ciendo.
 - γ. De alvo laxanda et purganda.
 - c. Urinam. Methodus diuretica.
 - d. Sudores. Methodus diaphoretica.
 - e. De sputis promovendis.
4. De humorum cursibus praeternaturalibus compescendis aut regendis.
5. De secretionum correctione. Acrimonia compescenda; putredo avertenda. Suppuratio moderanda.

Sect. IV. De euthanasia promovenda.



PARS SPECIALIS.

SECT. I.

DE COHAERENTIA PARTIUM SOLIDARUM MUTANDA.

CAP. I.

DE METHODO ADSTRINGENTE.

a. Modus agendi.

77.

Adstringitur pars solida, si particulis coactis cohaerentia augetur et vis resiliens, quam elasticitatem vocamus; quod sine expulsionem fluidarum particularum, quae forte insunt, contingere nequit. Itaque et sicantur solida adstricta et secessus particularum

remotiorum prohibetur, et putredo arcetur et vis resistendi roburque augetur. Id autem vulgo in corio accidit, quod densare ope corticum adstringentium, principio coriario praegnantium ita consuescunt, ut hoc principium gelatinam animale[m] precipitet et cogat. (*inst. pharmac.* §. 189.) Ea autem actio mere physica statui omnino potest in corpore animali, si duntaxat primariam eam nec solam intelligimus: mutatur vero effectus adstringentium vi partium vitali, consensu ac conspiratione.

78.

Constrictionem partium solidarum vi vitali modificari, vel inde patet, quod in remota agat loca: quae proxime attingere nequeunt remedia adhibita, quia nequaquam probabile est, sanguinis massam permeare posse haud mutata; quia saepe brevissimo temporis spatio haec actio in remotas partes perficitur; quia denique vel minima eorum remediorum copia sufficit ad effectus in dissitis locis producendos. Itaque nil superest, nisi actionem primariam consensu partium cum remotis locis communicatam statuere. Unde patet, vires vitales omnino hac curandi ratione mutari.

79.

Iam vero, qualis sit ea mutatio, inquirendum est. Cum cohaerentia partium idonea exigatur ad

robur actionum et facultatem resistendi, robur vis vitalis ipsum augeri adstrictione, si laxae essent partes, manifestum est, (*infl. path. gen. §. 53.*) Itaque adminiculum insigni roboranti et tonicae methodo praebet adstringens, quod et natura ipsa docuit, cum in valentissimis remediis tonicis, corticis exemplo peruviani, particulas adstringentes cum extractivis amaris aliis roborantibus coniunxerit,

Neque tamen sine limitibus est hic effectus. Quodsi enim partes, cohaerentia idonea conspicuae, magis constringuntur, necesse est, mobilitas partium amittatur, rationi fluidorum debitae ad solida elementa tribuenda: unde solet obrigescere pars, haud facile stimulis obtemperare et immobilis fieri. Hinc abusus adstringentis methodi patet,

Quodsi cohaerentia quidem minor est, sed tensae simul partes, facile elucet, robur amissum aegre restitui adstrictione, sed augeri potius tensionem, sollicitari magis etiam vim iam excitatam atque morbosum statum increfcere. Cum vero, ut fieri consuefcit, tensa hac parte aliae relaxatae sunt et flaccidae, propter inaequabilem virium dispensationem, utilis adstrictio esse potest, dummodo caute adhibeatur, seduloque eligantur ea artis praesidia, quae sine noxa cogere partes possunt,

Actio adstringentis methodi in fluidas partes e solidarum mutatione proficiscitur. Cogitur quidem gelatina; sed plures oriuntur effectus, e robore aucto explicandi. Cruor rubore increfcit, quod ex aucta vasorum vi et reactione in sanguinem exponitur. Putredo arcetur, tum ob eandem caussam, tum quia cogitur gelatina.

Motus etiam humorum mutantur. Quodsi enim laxatis vasis tardior contingit motus et stases adfunt, hae solvuntur, motus acceleratur, tumores glandularum discutuntur. Si ex eadem caussa profluvia adfunt, haec reprimuntur: si cursus naturales suppressi, iidem restituntur.

b. *Indicantia.*

Itaque adstringens methodus generatim quidem indicatur a laxitate, seu cohaerentiae eo defectu, qui cum nulla vi resiliendi, cum sensu terpido, irritabilitate minuta et motibus languidis iunctus est.

Teneritas fibrae autem tum deinum adstringentem exigit methodum, cum recens forte est et congestionibus passivis serosis stipata. Angina serosa cum uvulae tumore oedematoso curatur ope aluminis: zinco sulfurico hernia humoralis. Dein etiam in

ipsis congestionibus cum teneritate et doloribus iunctis prodest haec curatio, dummodo dilatata sunt vasa et humores in telam cellularem effusi.

82.

Ut in singula abeamus, vitia praeprimis organica requirunt hanc methodum: luxationes maxime, a laxitate articulorum manticaeque natae (*inst. path. gen.* §. 213.); procidentia ani et vaginae, eisdem causis tribuenda (*ib.* §. 222. 223.); herniae etiam, quae aetate infantili, victu molliori, deside et debilitante contrahuntur. (*ib.* §. 224.) Deinde aneurysmata et varices causis laxantibus tribuendae (*ib.* §. 204. 205.) saepe adstringentibus topicis vincuntur.

83.

Congestiones passivae, profluvii praesertim et tumoribus manifestatae et ruptis etiam vasis stipatae, requirunt adstringentia, maxime si a causis externis aut a laxitate diuturna originem ducunt. Sanguinis profusio post evulsum dentem: metrorrhagia, qua mulier conflictatur, diu iam blennorrhoeam perpessa: blennorrhoea ipsa muliebris, cum torpore et laxitate partium iuncta: blennorrhoea virilis secundaria, quae e solo glandularum et fossae navicularis torpore nascitur: alvi profluvium diuturnum colliquativum, ipsaque dysenteria chronica, dolorum

vehementium expers: ptyalismus, hydrargyrosi excipiens, rebellis, aut laxitati soli tribuendus: lippitudo scrofulosa, ipseque diabetes, si torporem renum, ut causam, agnoscit: haec vitia adstringente methodo debellantur.

84.

Inflammationes diuturnae, passivae, glandulas praeprimis infestantes et a vitio scrofuloso ortae aut a scorbuto, feliciter saepe adstringentibus fugantur; ophthalmiae glandulosae exemplo. Ulcera scrofulosa, scorbutica, ex hydrargyrosi nata, omniaque, quae torpidis, flaccidis marginibus, tumoribus fungosis et oedematibus stipata sunt, adstringentium usui cedunt aut saltem pus benignum concipiunt. Exanthemata chronica, impetigines, lichenes, pityriasis, nonnunquam exigunt hanc curationem, si cutis pravitas e torpore diuturno et laxitate nascitur. Sphacelus ipse partialis, si partes vicinae doloris expertes sunt et torpor sensiferæ vis praeprimis accendi potest, nonnunquam adstringentibus utiliter curatur.

c. *Contraindiciantia.*

85.

Prohibetur adstringens curatio provecta aetate et in senium proclivi, quae cum rigiditatem par-

tium adferat, haec etiam magis adstringentibus remediis promovetur. Hinc in arthritica senum dispositione vel cautissime utendum vel plane abstinendum est remediis, stomacho robur adstrictione addituris.

Nocent adstringentia in infarctibus aut stasibus inveteratis, quae vel iam in longum tempus porrectae sunt, vel congestionibus stipantur. Tum enim humores diu stagnantes in corruptionem proni sunt, quae adstringentibus, dum irritant, augetur: tum obrigescere etiam solent vasa, quae diutius iam stasiles perpeffa sunt.

86.

Adversa sunt generatim adstringenti methodo teneritas partium, tensa indoles, dolores et spastici affectus. In statu crudo morborum acutorum, etiam profluviorum, nunquam adhibenda est, cum nimia irritatio et manifesti nonnunquam stimuli prohibeant. Removendi sunt prius stimuli materiales, quam ad hanc curationem veniamus. Ubicunque cum stasibus et torpore vasorum abdominalium hysterica mobilitas et spasmus iunguntur, vel cautissime adhibenda vel plane vitanda est haec methodus. Inflammatio quaevis, doloribus stipata et tensa partium indole nunquam indicat hanc curationem: nec ulcera, febre hectica forte iuncta, aut marginibus tensis, do-

lentibus cincta, aut, quae iam habitualia facta, organa sistunt depuratoria, quibus eliminatur quidquid in corpore remanens offendere illud possit. Ex eiusmodi ulceribus praepostere ficcatis damnorum insignium caterva saepenumero observata fuit.

87.

Profluvia omnia et congestiones, quae orgasmo universali aut febre cientur vel servantur, adstringentem methodum vetant. Nil enim nisi maior et valde noxia inde irritatio contingit: hinc probe cavendum est ab hac curatione, quoties dysenteriam aut metrorrhagiam etiam febris comitatur. Sedulo igitur inquirendum est in statum corporis universalem, ut, si qui adfuerint stimuli, hi amoveantur, si febris, huic opponenda idonea methodus, donec tempestivum sit, ad hanc confugere curationem.

d. *I n d i c a t a.*

88.

Quae ad perficiendam hanc curationem requiruntur, varia sunt; gravissimumque est praeceptum, delectum instituendum esse adstringentium cautissimum: ubi enim profunt acida, ibi nonnunquam obsunt vegetabilia adstringentia; ubi prodest aqua calcis, ibi nocent nonnunquam saturnina. Adstringentia autem dividi commode possunt in ea, quae modo

modo mere mechanico, atque ea, quae physico-organico aut etiam chemico-dynamico modo agunt.

89.

Mere mechanicis adminiculis primum accensenda est compressio, ope fasciarum tortilium, quas torcularia appellant; mantelium etiam, linamentorum carptorum, ellychniorum, turundarum, glomorum, spleniorum, pannorum gradatorum, quibus subinde laminae plumbeae seu monetae cupreae adduntur, ut magis etiam comprimant. Notissimum est, aneurysmata saepius curari vel fasciis tortilibus, vel compressione diuturna ope laminae plumbeae: varices etiam, quae a debilitate venarum nascuntur, cedere involutioni arctae, diu servandae. Vulgatissimus est περιζωμάτων, quibus pila aut pulvillus adfuitur, usus in herniis inguinalibus, ut, repositis, quae provoluta sunt, annulus abdominalis comprimatur. Fascias arcte membra involventes merito commendant in oedematibus et plagarum contusio-numque sequelis, quae ecchymoma aut transfusus in telam cellularem humores excipiunt. Ulcera oedematosa, ipsaque fistulosa fasciis involventibus probe adstrictis curantur, cum parietes fistularum fernet continuo tangentes tandem concrecant. Quinctiam ulcera diuturna, flaccida, in pedibus praeprimis obvia, vel fasciis arcte involventibus, lamina etiam plumbea addita, vel tibialibus arcte constringendis

optime curantur: et Bayntonii methodus, ulcera inveterata emplastris adhaesivis tractandi, usum praeprimis e compressione diuturna derivat.

90.

Aliud, et mechanicum quidem adminiculum est *frictio*, quae non cohaerentiam solam mutat, sed blanda etiam agitatione nervos partesque vivas sollicitat. Hinc veteres maximi fecerunt frictiones. Sic Hippocraticus iam auctor (*de diaeta*, lib. 2. p. 364.) frictionem ait carnes firmare, ideoque augere, ὅτι τὰ μὲν στερεὰ φύσει τριβόμενα συνίστησι, τὰ δὲ κοῖλα αὖξεται. Et Asclepiades, maximus huius methodi laudator, utendum esse frictione praecepit, cum adstringendum sit corpus hebes, aut molliendum, quod induruit, aut digerendum in eo, quod copia nocet, aut alendum id, quod tenue et infirmum sit. (*Cels.* 2, 14.) Optime addit Celsus, frictionem nunquam imperandam esse febre crescente, sed cum ex toto corpus ea vacabit: membra autem resoluta egregia hac methodo firmari. Namque et vasorum capillarium et nervorum vires hac agitatione ita cientur, ut et sensus et nutritio redire possint. Hinc in oedematibus, tumoribus rheumaticis et incipiente nervorum resolutione frictiones utiles sunt, μάλιστα διὰ Φαρμάκων θερμαινόντων, (*Galen.*), quod *medicamenta per strigilem instillare* vocabat Celsus. Nostrates ad id aquam colonien-

CAP. I. DE METHODO ADSTRINGENTE. 83

fem, spiritum vini, spiritum serpylli, mixturam, etiam vulnerariam acidam adhibere solent.

91.

Praestantissimum remedium adstringens praebet frigus, vel aëris, vel aquae, vel etiam glacie ipsa et nive admovendum. Cohærentiam frigore, momentumque irritabile augeri, sensiferam vero vim minui, probavimus. (*inst. path. gen.* §. 126.) Itaque in initio febrium acutarum, maxime malignarum, typhi et scarlatinae, dum sensifera vis inaequabiliter distributa et magnopere incitata est, debilitata autem energia, aër frigidus, ipsaque aqua frigida insignem usum praestant. Balnea frigida caute adhibita diuturnam cutis debilitatem curare, tonumque partium augere valent. Frictio etiam nive aut glacie perpetrata vim partium algore emortuarum restituit. Sed facile perspicitur, quot quantaque ex incauto frigoris usu damna nasci possint, cum non solum contractio irregularis et nimia, sed irreparabilis etiam vis sensiferae prostratio inde producat. Itaque ratio utriusque momenti vis vitalis probe noscenda est, priusquam hac methodo utamur.

92.

Quaenam sit plantarum adstringentium actio, alibi (*inst. pharmac.* §. 189 — 192.) exposuimus. Ex iis pura (*ib.* §. 193.) magis externe, amaro

adstringentia autem, seu quae balsamica simul sunt, interno usui aptissima sunt: quod pars extractiva amara cum oleo adiuncto aethereo simul incitat et stomachum viresque digestionis firmat. His igitur insignes tribuendae sunt laudes in curandis morbis, qui et a torpore ventriculi et a laxitate intestinorum et ab ipsa colluvie pituitosa nascuntur: unde et in lithiasi nonnulla eorum utilia sunt. (*instit. pharm. §. 221.*)

93.

Spirituosa adstringere alibi (*inst. pharm. §. 252.*) monuimus. Is autem effectus, irritatione semper iunctus, ab hac potius pendere videtur. Ad internum usum minus idonea sunt, quam ut loca externa quassata, contusa aut e luxatione laxata irritentur et constringantur. Spiritus aetherei cito avolantes, dum insignem caloris partem abripiunt, valide refrigerant, et externas partes, hernias inprimis, contrahunt. (*inst. pharm. §. 253.*)

94.

Acida, maxime mineralia, fibram contrahere, dum calorem minuunt, supra exposuimus. (*inst. pharm. §. 258.*) Eorum autem usus latissime patet, tum in acutis morbis, tum in diuturnis, ut non solum cohaerentia augeatur, sed ut vires etiam resocillantur et aequabiliter distribuuntur.

95.

Calcaria usta, seu aqua calcis, attracto repente acido carbonico contrahere fibram videtur, hinc in colluvie pituitosa irritando agit et egregium usum praestat in diuturnis alvi profluviis et ulceribus internis. (*inst. pharm.* §. 278.)

Alumen crudum, maxime ope acidi sulfurici, sed et terrae argillaceae, agit. Externe imprimis adhibitum potenter adstringit laxas partes et profluvia sistit. (*inst. pharm.* §. 285.)

Nec ammonium muriaticum sine levi vi adstringente est, quae exseritur praesertim in alvi profluviis curandis, ubi simul stases resolvit. (*inst. pharm.* §. 288.)

96.

In metallis plumbo praestantissima est vis adstringens, quae vero externe tantummodo tuta est. (*inst. pharm.* §. 339 — 341.) Zinci oxydum (*inst. pharm.* §. 343.), cuprum sulfuricum (*ib.* §. 347.), ferrum oxydatum fuscum (*ib.* §. 361.), peculiari-
bus singula gaudent viribus, quas suo loco indig-
tavimus.

97.

Sed praeprimis victus ratio est circumspicienda, ut faveas methodo. Iusculis, potibus aquosis, fruc-

tibus horaeis interdicendum est: imperandae carnes, fructus sicci, panis tostus, vina generosa, maxime rubrum Búrdigalense. Veteres etiam sudores evocare consueverunt, non per exercitationem tantum, quae utique fructuosa est, sed etiam in arena calida, vel laconico vel clibano, similibusque aliis. Maxime utiles praedicat Celsus (lib. 3, c. 21.) siccās sudationes, quales super Baias in myrtetis habebantur. Balnea frigida caute adhibenda: tepida plane prohibenda sunt.

CAP. II.

DE METHODO MOLLIENTE ET HUMECTANTE.

a. *Modus agendi.*

98.

Ut motuum ad vitam necessariorum ratio cohaerentiae defectu patitur, ita nimia cohaerentia et solidarum partium et fluidarum, quam rigiditatem dicunt in illis, tenacitatem aut spissitudinem in his, contrario modo facilitati motuum obest. Ut molliatur igitur, quod obduruit, et humectetur, quod propter siccitatem aut tensam indolem humorum defectu laborat, consilium est curationis saepe perquam necessarium, cuius summa fere est, humidarum par-

ticularum copiam augere, ut nimia cohaerentia minuatur. Quod ingestis in corpus humoribus fieri etiam si generatim statuendum sit, modus tamen agendi paullo altius repetendus est.

99.

Primum autem fatemur quidem, actionem humectantium rerum et mollientium vel maxime localem esse, atque in penetralia ipsa corporis, in vasa praesertim haud facile, qualia sunt, abire. Mutantur enim omnia, quae in corpus animale ingeruntur. (*inst. phys.* §. 78.) Neque tamen neganda est mollientium et humectantium rerum actio in distantias partes, quam vel e consensu generatim exponimus, vel ex amotis impedimentis, quae circuitui libero et secretionibus a tensis, siccis et duris partibus opponebantur.

Hinc secundum etiam praeceptum lucem accipit. Quod si enim solam relaxationem nobis proponimus, haec et alias curationes sequitur, et ipso morbi acuti decursu adfertur. Si relaxandae sunt partes, ad virium rationem semper consilium est transferendum: namque inflammatae, si rigiditate laborant aut tensa indole, optime methodo antiphlogistica relaxantur; spasmis tensae partes methodo antispastica et sedante. Nonnunquam ipsa irritantia, quae durarum partium vires sensiferas suscitant,

magnopere utiles sunt ad duritiem molliendam lubricandasque partes adfectas.

100.

Optime igitur agit haec methodus, si remedia indicata, fuscepta in organa digestioni dicata, aut in cutem, vires vivas salubriter mutant, ut et secretiones et absorptiones restituantur et rite peragantur. Namque aqua in corpus ingesta, per se quidem nec humectat partes nec mollit, priusquam, mutata virium ratione, perspirationem cutaneam promoverit. Hinc et ea, quae magis adhaerent partibus aut facilius semet insinuant, melius humectant et molliant solà aqua: quo pertinent mucilagines, saccharum et quae id habent.

b. *Indicantia*,

101.

Indicatur haec methodus protinus duritiae partium et rigiditate. Quo vitio cum spissitudo humorum producat (inst. path. gen. §. 88.), motuum autem sensuumque tarditas sequatur; liquet, in melancholico morbo et articulorum rigiditate, quae vel a senio est vel a topicis causis, hanc methodum praeprimis locum obtinere.

Eidem vitio adfinis est siccitas aut muci naturalis defectus, quo intestina praesertim in senibus las-

borant, unde diuturna alvi obstipatio sequi solet. Alvus clysmatibus eluitur, ut huic indicationi satisfiat.

102.

Tensio fibrarum, vis sensiferae nimia incitatio, aut inaequabilis distributio; dolores et spasmi, mollientem indicant et relaxantem methodum, quoniam, aucta fluidarum partium copia et apertis oscillis, quibus abundantia humorum educitur, nimia virium intentio aut inaequabilis distributio cessat. (*path. gen.* §. 30.) Hinc in incremento morborum acutorum et ad praeparandas crises magnopere prodest humectans methodus et molliens. Satius est, curationis consilium ab hoc aegrorum statu petere, qui exploratus est et sub sensus cadit, quam a latentibus rebus, quarum opinatio saepe scholae duntaxat est momentum. Quam regulam in curandis morbis acutis qui sequuntur, Hippocratici medici dicuntur, quod Coi senis praeclara praecepta, tum in aphorismis, tum in libro de victu acutorum in eo curationis consilio inculcando praeprimis versantur. Hac methodo saluberrima restituta, postquam consilia scholarum, ad opinionationes efficta, mortales plurimos enecassent, Sydenhamus immortalem gloriam nactus est: neo iustis encomiis destituendus nostra aetate Stieglitzius, qui eandem methodum cum antiphlogistica iunctam, ut summe fructuosam in febre scarlatina commendavit.

Itaque et calor nimius siccus, et sitis intensa et perspirationis defectus in febribus acutis tam graviter indicant methodum humectantem et relaxantem, ut nulli alii consilio prius obediendum sit. In morbis pectoris ad sputa promovenda utilissima est, si modo caute adhibetur.

Utilis eadem methodus est in adfectibus nervosis et spasticis ἀπυρέτοις: tetani ipsius exemplo, qui solis saepe balneis tepidis tollitur.

103.

Praeter haec indicantia, e partium solidarum indole petita, exigitur etiam haec methodus, dum saburra intestinorum nimis tenax est et dura, quae quidem indoles cum rigiditate intestinorum cohaerere solet aut cum spastica eorum constrictione.

Denique et acrimonia humorum secretorum, oxyda metallorum ingesta, variaque acria et venena ipsa, quae turbas in intestinis excitant eaque constringunt, mollientem indicant et humectantem methodum.

c. *Contraindiantia.*

104.

Et si utilissima haec methodus, potest tamen in abusum verti, dum, neglecto eo, quod virium

vitalium vitium est, soli huic relaxationi fibrae acquiescimus. Saepissime enim muscoli, quorum compages omnino laxa est, vis sensiferae tamen accumulatione et perturbatione tam vehementer stringuntur, ut obrigescere videantur: molliens tamen et lubricans methodus irrita est, ni adiungantur ea, quae sedare tumultus vis sensiferae possunt. Id et de nervorum distentionibus valet, quae ad febres accedunt, et de spasmis ac convulsionibus ἀπυρέτοις.

105.

Fallitur, qui, ubicunque strictae sunt fibrae, relaxandas esse easdem arbitratur. Causis potius obviam eundum est, quae cum sint saepe materiales, acria et venena, haec potius educenda sunt, quam involvenda: sic satius est plumbi oxyda reducere calcaria sulfurata aut kali sulfurato, quam olea iugiter ingerere: sic lactis, quamlibet utilis, ingestio post vorata venena postponenda tamen iis rebus est, quae noxiam venenorum indolem mitigare ac ea educere valent.

106.

Interdum quoque calor nimius et adstrictio partium salubris aliquid adfert: vis enim sensiferae incitatio crises moliri potest. Cui si relaxantem methodum assiduo opponimus, impeditur saluberrima naturae via, qua morbos ad finem perducere solet.

Accedit, quod laxitas nimia, quae hanc sequitur methodum continuo adhibitam, plurium morborum fons sit et apothepiam impediat. Itaque lubricantia et humectantia, quae ingeruntur, cautissime adhibenda sunt, maxime in pectoris adfectibus, quos levant quidem, sputis promotis; sed, si solis iis inhaeremus, diuturna saepius laxitas viarum aëriferrarum inde sequitur. Noxius etiam potius quam utilis usus lubricantium continuatus in primarum viarum adfectibus, ubi, laxatis partibus solidis, saburra, quam solvere eo curationis consilio studemus, etiam magis augetur.

Accedit, senes facilius ferre strictam quamdam partium indolem, aetati congruam, quam laxitatem, quae torpori sensuum motuumque favet. Itaque et hi circumspectissime hoc consilio curandi sunt.

107.

Si quis ex informatione morbi cuiusdam universim efficta, tollendam esse strictam fibrarum indolem, crediderit, saepe magnopere errat. Inflammationes enim, quas vulgus mollientibus solet tractare et lubricantibus, nonnunquam, si passivae sunt et diuturnae (*path. spec.* §, 148. 149.), irritantibus potius et ipsis adstringentibus melius curantur, quam molliente methodo et relaxante. Pariter et de doloribus et de spasmis iudicandum, qui si ab inaequa-

bili vis sensiferae distributione pendunt, interdum tonica methodo, nonnunquam etiam incitante, optime fugantur. Suppuratio instans, quamlibet mollientibus promoveatur, satius tamen est, si virium ratio id exigat, nonnunquam vasa incitare, ut eo tutius puri patando paria sint.

d. *I n d i c a t a.*

108.

Curationis consilium hoc secuturum decet victus rationem maximi facere, quoniam, quod remediis saepe perfici nequit, id diæta et bene moderatis iis, quae aegrum ambiunt, optime perpetratur.

Primum autem animi perturbationes avertendae sunt, ne incitent corpus et huic methodo resistant. Itaque animi tranquillitas et vacatio ab omnibus negotiis, quae intendere vires possunt, perquam necessaria est. Dein somno indulgeat, lectique levi tepore corporis superficiem mulceat, ut perspiratio servetur. Quies magnopere utilis est, ut molliatur corpus: iactatione enim et variis motibus augentur turbae magisque illud adstringitur.

109.

Aërie indoles, qui aegrum circumdat, sit tepida et humida. Quodsi fieri potest, vapores tepidi

adhibendi sunt, maxime vero, dum articuli obduruerunt, aut universales etiam spasmi urgent. Balneis his vaporariis diuturna mala, quae ex arthritide supersunt, ancylofes, nervorumque distentiones optime saepe debellantur. Magnopere etiam iuvat vapores ex animalibus recens mactatis adhibere, aut recens detracta pelle aegrum involvere, quali modo Lanneum, ducem Gallorum, se curasse gloriatur Larreyus. (*Denkwürdigk.* p. 495.)

Fovendae partes, quae obduruerunt, herbis mollientibus et aromaticis coctis; sed cavendum, ne frigescant fomenta in cute, sed continuo reiterentur. His quidem abscessus et tumores durissimi molliri et solvi solent.

110.

Balneorum tepidorum, i. e., quae temperiem habent $= 75^{\circ} - 90^{\circ}$ *Fahr.*, insignis est usus ad molliendas partes, tensionem et spasmos mitigandos, inaequabilem virium dispensationem turbasque circuitus sedandas, dolores leniendos, et perspirationem cutaneam restituendam. Quodsi pulsus tardiores fiunt et molliores, dum aeger balneo utitur, si spasticae partium frictiones cessant, si caput levius sentitur, oculi clarescunt, dolores sedantur; nil praestantius hoc remedio est: si modo tempestive atque rite indicatum adhibetur.

Antyllus olim tria potissimum indicantia balneorum tepidorum statuit: convulsiones nimirum, inflammationes et duritiem partium. Optime etiam addit Agathinus, lassitudinem, quae e nimis laboribus nascatur, iisdem balneis tepidis solvi: itaque et, qui per totum diem peregrinati sunt, mirifice recreantur balneo. In morbis autem praestat iis uti, dum vis vitalis nondum penitus exstincta est, cum vis sensiferae turbæ cum spasmis, febre valida, aestu arido et cutē tensa iunctae sunt: maxime vero, si quid ex ambitu corporis percussum est, aut si quid obstat, quominus exanthemata sudoresque critici idoneo tempore proveniant.

Si aucturi mollientem sumus balneorum effectum, iuvat sulfures addere aut saponem, cocta etiam semina lini aut foenugraeci vel herbas malvaceas. Quodsi vero vires simul erigere libet, vinum aut spirituosā addimus.

Post balneum laborantes pannis involvi solent, ut sudores prorumpant. Quod neutiquam semper opus est, cum saepius ad balneum accedatur, ut humectetur idque omnino irrigetur, quod immoderatus siccum est aut tensum. Sed opus utique est, ut is, qui balneo usus fuit, quieti semet tradat degatque in tepido aëre, ne perspiratio supprimatur. Saepius enim balnea tepida eapropter nocent, quod aegri perfrixerint protinus ut e labro egrederentur.

Id remedium, quamvis utilissimum, saepe tamen inutile est aut noxium, si haud tempestive adhibetur sed in id temporis differtur, ubi iam vis vitalis prostrata est et aeger in nervorum resolutiones pronus. Nocet etiam continuatus usus, quo lassitas diuturna partium contrahitur. (*Agathin. apud Oribas. coll. lib. 10. c. 7.*)

111.

Hac deinde pertinent praeprimis mucilaginosae purae (*pharmac. §. 22 — 25.*), quae externe ad dolores leniendos, duritiem molliendam et mitigandos spasmos adhibentur; gummes etiam (*pharmac. §. 27 — 29.*); gelatinosae et albuminosae (*ib. §. 30 l.*); mel et saccharina varia (*ib. §. 37. 39. 40. 41.*); pinguis et oleosae (*ib. §. 42. l.*); sapo denique et unguenta ex oleosis et variis mollientibus conflata.

112.

Ut internae partes humectentur, alvus primum eluitur clysmatibus, quae praeter mucilaginosae etiam amara saponacea, fumariae, cardui benedicti, taraxaci, graminis herbas et radices etc. continent. Quibus continuatis pervicax saepe numero obstructio et rigiditas intestinorum optime debellatur.

Ut viae aërierae humectentur et molliantur, vapores ex herbis mollientibus coctis per infundibulum

lum attrahuntur, qui insuper eo valent, ut vomica, si quae adfuerit, in bronchia depleatur. Infusum quoque herbarum mollientium et leniter irritantium, quae species pectorales dicuntur, bibere suademus. In his omnibus tamen cavendum a laxitate, quam diutinus eorum remediorum usus facile adfert.

 SECT. II.

DE VIRIBUS VITALIBUS MUTANDIS.

CAP. III.

DE METHODO ROBORANTE.

a. *Modus agendi.*

113.

Roborans dicitur methodus, quae proxime vires firmare atque efficientiam ipsam ita augere valet, ut motibus, sensibus et ceteris functionibus quiete et naturaliter perficiendis par sit.

Quod quidem curationis consilium, ut rite intelligatur, protinus animadvertendum est, robur vis vitalis versari in eo functionum omnium exercitio, quo fit, ut finibus suis respondeant. Itaque, si stimuli externi neque nimis limitant, neque nimis

laccessunt vim sensiferam; si haec cum efficientia ipsa naturali vinculo cohaeret, ut neutra excedat; si motus et automatici et arbitrarii ita perficiuntur, ut sanitatem servant; si sensus nec organicus nec superiores nimis vividi fuerint aut languidi, nec ullo modo hallucinantur; si et nutritio et secretiones et excretiones omnes hactenus peraguntur, sicut norma secundae valetudinis id exigit, tum robur partium et totius organismi idoneum adesse statuimus.

Debile autem declaramus corpus, infirmam partem, si quid horum omnium a norma recedit. Itaque infirmitas nascitur ex oppressis viribus. (*inst. path. gen.* §. 48.), maxime vero ex inaequabili vis sensiferae dispensatione (*ib.* §. 57.). Alia etiam est imbecillitas vis motricis (*ib.* §. 53.), alia vis sensiferae (*ib.* §. 56.); alia denique vis vegetativae (*ib.* §. 61.), quarum quaevis denique in debilitatem universalem abire potest. (*ib.* §. 64. 65.)

114.

Quibus perperis colligitur, quam vaga sit per se roborantis methodi informatio. Etenim, etiam si *καταχρηστικῶς* roborare dicuntur, quae impedimenta normalis virium exercitii removeant, purgantium exemplo, sanguinis missionis et sedantium; longe alia tamen est actio earum rerum quae, dum cohaerentia fibrae vivae patitur, hac constricta roborant,

CAP. III. DE METHODO ROBORANTE. 99

ac earum, quae nutritionem promovent, dum vis vegetativa pessumdata est. Alio modo agunt, quae, dum sensifera vis simul depressa est, erigere vires ac sollicitare solent, ac quae, dum ea vis inaequabiliter distributa est, aequabilem conductionem producunt.

115.

Quodsi igitur, neglectis iis curationibus, quae haud proxime, sed per ambages, ut ita loquar, roborant, ipsius methodi modum agendi consideraveris; protinus exploratum habebis, rebus iis, quae et proxime roborant, haudquaquam vi corporis aliquid addi, sed vel partium compagem firmari, vel permanentem organis digestionis inservientibus praebere stimulum, quo fiat, ut, vi vegetativa idoneo modo incitata, melius corpus et nutriatur et semet liberet iis rebus, quae offensurae sunt functiones naturales. Pleraque omnino, quae proprio sensu roborantia dicuntur, digestionis vires adeo augent, ut e bono chylo sanguis rite mixtus paretur, vires etiam vegetativas hactenus firmant, ut secretio, ad musculorum actionem necessaria, naturaliter peragatur, consumtio quoque seu ablatio assiduam rationem ad appositionem servet. (*inst. phys.* §. 80. 316.)

E quibus efficitur, quomodo differat haec methodus tum ab adstringente tum ab incitante. Quippe illa cohaerentia solummodo augetur, hac vis sen-

sifera tantum sollicitatur, ut vividius semet exferat. Quodsi vero remedia roborantia simul in vim sensiferam agunt, *tonicorum* nomen accipiunt, quia naturalem tonum partium augere solent. Alia vero, his fere opposita, vim sensiferam potius deprimunt, ut per longius actionum intervallum reparatio virium promptius contingat. (*inst. phys.* §. 68.)

b. *Indicantia.*

116.

Principem locum in indicantibus huius methodi meretur debilitas vera, seu defectus vis, qua functiones corporis rite peragantur. Eam autem adesse, tum ex morbi historia, tum e causis remotioribus, maxime ex ingenio morbi popularis, tum denique e symptomatibus scienter ac studiose comparatis cognoscimus. Quodsi enim sanguinis profusiones aut alia profluvia praecesserint morbum, cum a sanguinis penuria originem ducere atque verae debilitatitribuendum esse persuasum habemus, maxime cum symptomata congruunt.

117.

Dein verum quidem est, inaequabilem vis sensiferae distributionem, sicut a debilitate vera differt, ita et per se nequaquam hanc curationem exigere. (*inst. path. gen.* §. 56. 57.) Quid quod

saepius, si tonica simul sunt remedia, casum habet eorum usus, cum irregularem incitationem vis nervae valde augere soleant. Neque tamen eo minus, cum fluctuationum earum fons in intemperie gangliosi systematis quaerendus sit, roborans methodus, si idoneus sit selectus remedium, salubriter mutare gangliorum principum vim consuecit, ut aequabiliter iterum per nervos imponderabilia distribuantur. A victus etiam ratione et animi quiete ac hilaritate expectare licet vel aequabilem conductionem vel idoneam rationem consumptionis et appulsus.

118.

Quodsi efficientiae ipsius imminutio cum torpore vis sensiferae iuncta est, solet haec, quam Brownii adflectae debilitatem indirectam barbara voce nuncupare consueverant, ab incitatione praegressa morbosa vel a fortiorum stimulorum actione originem ducere. (*inst. path. gen.* §. 60.) Id autem valetudinis adversae genus non roborantem tantum, quam late patet, methodum, sed incitantem etiam et stimulantem requirit, quoniam, quae efficientiam ipsam auctura sunt, prius agere nequeunt, quam vis sensiferae torpore sublato. In apothera pia hac plerumque utendum est indicatione, praesertim post morbos graviores malignosque, qui vim sensiferam magnopere adfecerunt: quanquam interdum convalescentes nonnullorum organorum teneritate ea ac

sensu eo acuto laborent, ut incitantia aegrius ferant.

119.

Vis vegetativae debilitas indicat omnino etiam roborantem methodum, sed, cum plerumque vis sensifera sero aboleatur, magis etiam incitata sit (*inst. path. gen.* §. 63.), cavendum est ut plurimum a tonicis, quae proprie ita dicuntur et ab incitantis methodi connubio. Tum nutritio tum oxygenis in pulmonibus confectio promovenda est, tum etiam idonea ratio absorbtionis intestinalis et cutaneae restituenda. (*path. gen.* §. 62.)

120.

Universalis, aequabilis, ἀνύπερος diuturnaue debilitas, omnibus organis infesta, etiamsi per se in sanitatem haudquaquam abeat, in praeceps tamen dare aegrum non solet, nisi maior in singulis organis discrepantia adfuerit, aut destructas esse nobiliores partes patuerit. (*inst. path. gen.* §. 64. 65.) In illa diuturna labe palmaria est regula, roboranti methodo praemittere vis sensiferae incitationem fortio-riorem, febrem etiam excitare et metasyncrismum moliri, ut tandem roborans methodus rite adhiberi possit.

Quibus generatim decursis patet etiam, quae morborum classes roborantem methodum magis vel minus exigant.

Quodsi febrium primo meminerimus, intermittentes poscunt methodum roborantem, dum simplices sunt, nec cum inflammationibus aut sordibus biliosis compositae, quoniam ex atonia viscerum et inaequabili virium conductione originem ducunt. (*path. spec.* §. 38.) Nec deferenda haec methodus est, cum sordes gastricae ex longiore febris mora nascuntur: utique commendanda etiam in morbis febrium pedissequis, qui ex eadem atonia et stasibus abdominalibus ordiuntur. (*path. spec.* §. 39.) Si quis vero tumores viscerum aliasque febrium intermittantium sequelas resolvente methodo adgreditur, is causam eam amovere nequit.

Quod attinet ad febres remittentes, methodus haec, si tempestive adhibetur, utilissima est. Sed in popularibus morbis, maxime qui in typhum proclives sunt, nec initium postulat hanc indicationem, nec is morbi status, ubi vis sensifera magnopere fluctuat, nec is, qui in perniciem ruere aegrum prodit. Tempestive confugimus ad roborantem methodum, cum imminuta energia cum minore vis sensiferae incitatione iuncta est. Itaque, si febris semet manifesto remiserit, fractam tamen efficien-

tiam produnt pulsas debiles, molliores, sensus ipsius aegroti, motuum impotentia oculorumque languor. Necesse est, absit sitis intensa, absint dolores pertinaces, spiritus difficultas, deliria, aestus internus, anxietas et trux oculorum obtutus. Convelli tamen membra, per se haud contrarium est huic curationi, nisi e sociis symptomatibus insignem vis sensiferæ incitationem cognoveris.

122.

Praestantissimum praebet adminiculum haec methodus in curanda pravitate humorum, quae in putredinem vergit, acutus fuerit morbus sive longus. Siquidem principem eius vitii causam dicimus vis vitalis infirmitatem (*path. gen.* §. 94), quam cum protinus nonnulla contagia producant (*ib.* §. 140.), popularium morborum contagiosorum curatio roborantibus quoque et tonicis remediis saepe perficitur. Quinetiam diuturni morbi, in putredinem aut aliam humorum depravationem vergentes, roborantibus tonicisque ipsis optime curantur. Probe tamen observandum est, torporem vis sensiferæ cum efficientia deficiente adesse debere, si putredini tonicam methodum opponimus: itaque e pulsibus languidis, mollibus, exilibus, ex oculorum obtutu stupido, e voce tremula et clangosa, e sensuum torpore, soporibus continuis, mentis adiaphoria, humorum denique profusionibus per sudores, alvum et urinam,

eum cognoscimus statum, qui tonica requirit. Ubi contra continuo desipit aeger aut insomnia turbatur, ubi dolores internarum partium saeviunt pulsusque sunt concitati et duri, prius vis sensiferae incitatio tollenda est.

123.

Inflammatiо quamvis per se curatione hac potius augeatur quam minuatur, est tamen species quaedam, debilitate producta, quae in gangraenam vergit et ulcera maligna comitatur. (*path. spec.* §. 148. 169. 180. 184.) In hac, circumspectissime cognita, roborans methodus unicum praebet admodum: maxime si decrepitam senectutem, cachecticum habitum, causas praegressas summopere debilitantes, dolorum absentiam et febris validae, celerimum progressum gangraenae aut ulceris, viriumque prostrationem in praeceptis ruentem animadvertimus. Ita etiam agendum in morbis exanthematicis, si lividus aut niger color exanthematum, lipothymiae frequentes, pulsus exiles et languidi, pallor frigusque totius corporis exhaustas vires et vis sensiferae torporem signant. Inflammationes diuturnae, quae ulcera interna comitantur, tum demum hanc curationem indicant, cum febris vel nulla vel mitissima est, cum profusiones humorum, sopores et caloris defectus torporem vis sensiferae produnt. In phthisi praesertim ulcerosa delectus remedium

huc pertinentium necessarius est, cum, quae nutriunt et victus rationem complectuntur, multo tutius adhibeantur, quam quae simul tonica sunt.

124.

Dolores diuturni per se nunquam hanc methodum postulant, nisi morbi iis iuncti habitum depraverint, vires infregerint naturae et longam produxerint infirmitatem, maxime viscerum abdominalium. Arthritici adfectus, dum atonici sunt, nullis stipati activis doloribus articulorum (*path. spec.* §. 454.), roborante methodo optime curantur, licet etiam hic in victus ratione maior fiducia collocanda, quam in tonicorum usu, quae saepe impetum humorum in organa nobilia periculosum cient. Qui in rheumaticos dolores prони sunt, diuturna debilitate conflictati, roborante methodo maximeque diaeta vires confirmante saepe liberantur.

125.

Morbi spastici roborante methodo tum demum tractantur, cum nutritionis labes, viscerum torpor et vasorum abdominalium spasmos saepe recurrentes excitant. Id praesertim in hystericeis adfectibus contingit, qui sedantibus quidem ad tempus leniuntur, sed penitus fugari nequeunt, nisi vel totius corporis constitutio emendetur, vel viscerum abdominalium torpor tonica methodo, praesertim victus ratione,

CAP III. DE METHODO ROBORANTE. 107

amoveatur. Quid quod ipsa epilepsia, aliis omnibus remediis resistens, roborantibus nonnunquam, cortice peruviano, glandibus quernis etc. fugata esse fertur.

126.

Profluvia sanguinis aliorumve humorum, si a laxitate pendent vasorumque torpore, salubriter tonicis simulque adstringentibus curantur, quamvis circumspeditione opus sit propter vim irritantem, qua ea remedia facile impetum humorum augment. Itaque e. g. in dysenteria diuturna, postquam dolores spasmique sopiti fuerint, expedit confugere ad tonicam roborantemque methodum, qua penitus saepius debellatur.

127.

Denique et in stasibus si a laxitate oriuntur magis confert haec methodus quam resolvens proprie dicta, quae vires saepe magis infringere solet. Maxime vero confugiendum est ad hanc methodum, dum colluvies pituitosa viscera abdominalia infestat, in qua cum vermes nidulari consuecant, anthelminthica etiam virtute pollere roborantia patet. Quin calculi generationem avertunt, e mucii coagulo ut plurimum orti.

c. *Contraindiantia.*

128.

Gravissime et constanter prohibetur praestantissima haec methodus fallaci eo statu, qui ex opprefione virium nascitur. (*path. gen.* §. 48.) Is cum speciem verae debilitatis nonnunquam prae se ferat, magnopere refert, causas praegressas, morbi historiam praesentiaque symptomata curiose comparare, ut, uter adsit status, appareat. Nonnunquam per experimenta haec comperire opus est: (§. 3.) Siquidem sordium gastricarum praesentia et turgor etiam criticus, sanguinis impetus aliorumque humorum ita vires pessumdare videntur, ut, qui rudis est in doctrina et usu, facillime decipiatur. Purgantibus nonnunquam, sanguinis missione, vomitu excitato fallax ea debilitas ocyus tollitur, quam dum roborantia exhibueris.

Quodsi quoque compertum habemus, veram adesse debilitatem, si sordes tamen simul urgent aut obstructio alvina, humorum denique impetus, haec obstacula prius removenda sunt, quam ad ipsam curationem confugeris. Actio enim medicaminum eorum impeditur colluvie humorum, facileque nocent augendo stimulos.

129.

Magni dein est momenti, vis sensiferae incitationem aut nimis inaequabilem dispensationem, ut contraindicans huius methodi contemplari. Accessus febriles in se confluentes, calor continuus, inflammatio activa, spastica partium constrictio prohibent omnino hanc curationem, ni eae conditiones adsint, quas (§. 123 — 125.) perstrinximus. In haemorrhoidario morbo, arthriticis, hysteriis adfectibus, febribus continuis perquam noxius est roborantium effectus, quod praesertim abusus in Brownii schola docuit.

130.

Nec negligenda est naturae efficacia, quae saepe oppressis viribus utitur, ut salubre aliquid moliat. Dolores et spasmus, febres etiam interdum auxilia praestantissima sunt ad restituendas vires, quibus cum roborantem opposueris methodum, naturae molimina turbabis. Sunt caussarii, qui per arthricos insultus aut per spasmos etiam vires facilius recuperant, quam cum roborantem adhibueris methodum. Accedit, varios morbos diuturnos toti corporis constitutioni eam labem adferre, ut, digestionem labefactata, nullum remedium neque vulgaria nutrimenta ferri possint. Quid enim mulieri sexagenariae, quae maiorem vitae partem in spasmis aliisque nervosis degit adfectibus, quaeque iam eo redacta est,

ut ventriculus, praeter selecta quaedam alimenta, nihil ferat, quid ei mulieri roborantia imperaveris? Naturae potius committenda est, levanda symptomata, sensibus blandiendum: curatio autem perfecta ex arte nunquam speranda. (§. 5.)

d. *I n d i c a t a.*

α. Victus ratio.

131.

Quodsi uspiam praestat victus rationem remediis, quae officinae largiuntur, anteferre, certe in hac id opus est curatione perficienda. Namque, cum ipsa corporis compages ac efficientia mutandae sint, fieri id multo minus remediis potest, quippe quae plerumque transeuntem stimulum addant, aut, si permanentem etiam, si ex ipsis utique aliquid in corporis compagem abit, multo minus in suam naturam convertere id potest corpus, quam et alimenta et aërem ambientem; multo insignius agere debet animi temperies et corporis exercitium, quam omnia artis adminicula. Haec etiam potius adjuvant actionem earum rerum, quae e victu salubri proficiuntur.

Id tamen ex toto monendum, neutiquam eandem victus rationem cuivis debilitatis gradui aut speciei conferre; sed caute distinguendam esse eam,

CAP. III. DE METHODO ROBORANTE. 111

quae febres acutas comitatur, ab ea, quae in intermittentibus adest; longe alio modo tractandam esse eam, quae in convalescentibus ex acuto morbo superest, quam quae cachexias stipatur: denique peculiari modo studendum est, ut in nervosis adfectibus diuturnis victus ratio vires conservet et augeat.

132.

Nutrimenta, quae vulgus roborantia vocat, haud cuivis apta sunt. Generatim vero sedulo eligenda sunt leviora digestuque facillima: valentiora vero a sanis duntaxat ferri possunt. Dandum tamen, ut Hippocrates iam praecepit, aliquid est consuetudini, ut nec agricolae prohibeas valentiora, quibus adsuevit, nec tenerae mulierculae imperes quae miles gregarius aut auriga ferunt. Notandum etiam aliud Coi senis praeceptum: „Paullo deterior, et potus et cibus, iucundior autem, eligendus potius quam meliores sed ingratiore.“ *) Igitur et in his indulgendum est aegri cupiditati, ni plane noxia appetiverit. **) Denique ex toto cavendum est,

*) Aph. 2, 38. Τῷ σμικρῷ χειρὸν καὶ πόμα καὶ σιτίον, ἥδιον δὲ, τῶν βελτιόνων μὲν ἀνδεστέρων δὲ μᾶλλον αἰρετέον.

**) Aret. curat. diut. lib. 2. c. 6. Πολλὸν δὲ μέτρον ἐπὶ τούτων ἔστω αἱ τοῖσι κίμνουσι χάριτες, καὶ τὸ καθαρῶς ἅπαν δρᾶν καὶ ταῖσι ἐπιθυμίῃσι ἔπεσθαι τὸν ἰητρὸν, μὴ μεγάλα βλάπτοντα· ἄριστον γὰρ τόδε. ἢν μὴ κάστα ὥφελιεύτων ὄρεξις ἦκη.

ne alimenta remediis ullo modo contraria sint, aut haec in aegri damnum mutant; si quis e. g. aegro hydrargyrosin duranti fructus horaeos aut acida permiserit.

133.

Discrimen nutrimentorum e vegetabilibus animalibusque in diaeta aegrorum magni momenti instar habet, siquidem carniū proclivitas in putredinem eo minus subigitur a stomacho, quo debilior est eius vis, aut quo magis est intenta in alios fines. (*path. gen.* §. 137.) Itaque, qui febribus laborant, abstinuant a carnibus, iusculis valentioribus ipsisque ovis. Quo magis continua est febris, eo severius est prohibenda animalis diaeta, eo magis sola sufficiat ptisanā, cuius exhibendae varios modos pro varia morbi indole nemo curiosius Hippocrate praecepit. Quodsi vero semet remiserit febris, viribus etiamnum labantibus, addendum aliquid est nutritioni: namque tenuissimus victus aequè offendit aegrum sanitatisque restitutionem impedit, ac valentissimus.

Neque tamen vegetabilis victus ubivis saluberimus putator. Cum enim facilius ace scat, diuturna stomachi infirmitas leviores potius carnes poscit quam legumina aut fructus horaeos, quibus acrimonia ventriculi acida et flatus facillime generantur. Instinctui plerumque obediendum est; si enim aeger

carnes

carnes respuit aut horret, nocere etiam solent; si vinum concupiscit, utile etiam id ut plurimum erit. (§. 28.) Denique et convalescentibus carnes potius imperandae sunt, quod celerius nutriunt plantis.

134.

Sed magna carniū huic fini idonearum est differentia. Convalescentibus nil utilius ac incundius venatione et avibus, quae volatu fidunt: quae si assae comeduntur, digestionem adjuvant et corpus firman. Qui nec has mandere carnes possunt, iusculis nutriuntur e carne vitulina aut gallinacea, quibus oryza, hordeum decorticatum, allia etiam et petroselini, portulacae, dracunculi, sanguisorbae folia adduntur. Saluberrimae partes quaedam animalium iuniorum, thymi glandulae et mesenterii vitulini, quae etiam elixae cum succo citri, encrasicolis et pane triticeo miscentur. Febribus impliciti aut morbis diuturnis confecti gelatina animali nutriuntur, quae e cornu cervi raso aut pedibus vitulinis cocta cum additamentis gratis exhibetur. (*pharm.* §. 31.) Amphibiorum caro, viperarum maxime et lacertarum debilitati aptissima, quae cachexias comitatur, diureticas simul habet et diaphoreticas vires. (*ib.* §. 32.) Iuscula etiam e limacibus parata alibi iam (*ib.* §. 32.) commendavimus.

Carnes sale fumoque conditae quamvis in morbis acutis prorsus interdicendae, expediunt tamen in laxitate stomachi diuturna.

135.

Lac etiam optimis adnumeratur nutrimentis (*pharm.* §. 35.), maxime humanum et asininum, quod utrumque, intimo connubio saccharinae substantiae et albuminosae insigne, confert praesertim iabe confectis. Salubrius fit aqua Selterana aut Geilnaviensi aut alia, quae acidum carbonicum continet, mixtum. Salubrius quoque lac ebutyratum et serum lactis dulce: in profluviiis sanguinis utilissimum serum lactis aluminatum. (*pharm.* §. 285.)

Lacti similia sunt ova, quae si e gallinis petita, recentia aut inolliter cocta eduntur, leve nutrimentum praebent. Aliorum tamen pullorum cohortallium, Tringae etiam vanelli, licet dapes lautas praebent, aegris tamen ob pinguem indolem minus conferunt: insignem digestionis vim poscunt coctione durata.

Piscium carnes ocyssime putrescunt, hinc minus commendandae sunt aegrotis, prohibendae omnino, si febre laborant. Salubriores sunt Efox lucius, Cyprinus barbus, C. carassus; Perca fluviatilis et lucioperca; Salmo fario, trutta et alpinus; Gadus etiam lota. Ob adipis copiam prohibendi

Cyprinus Carpio, brama, Salmo Salar, Cottus gobio, Muraena anguilla et Petromyzon fluviatilis; ob valentissimam carnem marini et acipenseris.

136.

E vegetabilium partibus, ut leviter nutriatur corpus, praeferenda sunt cerealium semina, avenae praesertim et hordei excorticata, fagopyri etiam et Festucae fluitantis, e quibus iuscula parantur: dein panis vel triticeus vel secalinus. E farre secalino puls conficitur, tabidis commodissima: pariter utilis quoque medulla Cycae circinnalis et bulbi orchidum. (*pharm. §. 26.*) Solani tamen tubera, amylo ditissima, vel penitus prohibenda sunt aegris, vel in diuturnam infirmitatem servanda.

Plerisque aegris commodissima sunt legumina tenera, phaseolorum, pisorum lotique tetragonolobi, semina etiam ipsa, dum liquorem amni saccharinum continent. Qui si iam concrevit in albumen amyllumque, neutiquam idonea sunt semina, quia flatus excitant. Pariter levia et grata praebent alimenta radices Dauci Carotae, Scorzonerae, Tragopogonis et Sisari, cum intima mixtio saccharinae substantiae et mucilaginis digestionem invet ac alvum molliat. Huc etiam turiones asparagi, lupuli, Crambes maritimae; surculi etiam Podagrariae aliarumque herbarum, Brassica quoque gongylodes,

praesertim botrytis, referenda sunt. Minus confert Brassica fabellica et selenisia aut sabauda: Brassica vero Napobrassica, capitata, viridis et rubra; rapae; radices Apii graveolentis, Petroselini, ipsa etiam Spinacia oleracea vel plane prohibeantur, vel cautissime in diuturnis morbis permittantur.

In fructibus horacis, cerasis et prunis ficcatis iterumque coctis, dein ficubus et uvis, pomis borstorianis et cavilleanis, fragis etiam et moris princeps locus est tribuendus. Alii fructus vel flatus gignunt, ut malum armeniacum aut pyra; vel nimis calorem ligant, ut persicae; vel magis adstringunt, ut baccae myrtilli et vitis idaeae. Quibus quamvis uti possis in aliis adfectibus, firmare tamen corporis vires iis haud licet.

137.

Potus, quo corporis vires firmandae sunt, eo valere debet, ut digestionis vires leniter sollicitentur, excretiones rite servantur. Aquae purae admiscendum est vinum generosum, vel huius paucula vascula bibenda. Vina gallica leviora, praesertim rubra clarissima et fragrantia, huic fini aptissima sunt. E cerasis etiam coctis aut pomis borstorianis cum vino, saccharo et aromatibus gratioribus sorbitiones parantur delicatae, quae plerisque aegris optime conferunt. Cerevisia haud admittenda, nisi febre peni-

tus silente, nisque probe parata sit, clara, lupulo bene condita et facillime per urinam transeat.

138.

Aër purus praestantissimum offert auxilium ad firmandas vires sanitatemque restituendam. Studiose igitur ventilanda sunt cubicula aegrorum: aër purus continuo admittendus: protinus ut e morbo revaluerint aegri, sub dio degere, si temperies id permittit, discant. Aëre montano gaudere, si possint, insigne virium robur inde percipient. Temperies aëris frigidior, indoles siccior et serena multo utilior est aestuosa, humida et nebulosa.

139.

Magnopere iuvat exercitatio corporis, qua musculi firmanantur, digestio promovetur, oxygenis paratio in pulmonibus acceleratur. (*path. gen.* §. 178) In variis autem eius speciebus praecipiendis, plurimum dandum est et consuetudini et vitae generi, tum etiam aetati, sexui, acgritudinis denique speciei et gradui. Imbecillimi aegri, diuturnis malis impliciti, gestationem et vectionem in curru ferunt. Equo vehi vires magis exercet, animum reddit hilarem aërisque accessui multiplici favet. Navigatio, maxime per maria temperatiora, in diuturnis malis studiose commendanda est. Quodli vires suffecerint, subdialis inambulatio, armorum tractatio, venatus,

salutatio, ludusque varii, qui sub dio fiunt, commendantur. Eruditis hominibus declamatio et vocis exercitatio magnopere confert, quod quidem praesidium nemo uberius atque scientius Antyllo tractavit. (*Oribas. coll. lib. 6. c. 7 — 10.*)

¶140.

Appetitiones animi declinationesque quantum faciant ad valetudinem adversam producendam, olim uberius exposuimus. (*path. gen. §. 162. f.*) Itaque medici est, in id omnes industriae ingeniique nervos intendere, ut animus aegrotorum quietus sit, et, si fieri potest, etiam hilaris. Huc confert imprimis fiducia, quam aeger in medico collocat, quam hic quidem meretur ἀπαρκατοποίησει (§. 18.), humanissima sedulitate, nulloque praetermisso studii aut officii genere, quo benevolentiam suam et desiderium opem ferendi probare possit. Magnopere interest, cautissimum esse in praedictione formanda, qua se terreatur aeger cavendum. Si exitum instat, id ita praedicendum est, ut hominem sapientem et Christianum decet. Religionis nostrae, quae humanitatis triumphum sistit, praeceptis utendum, ut animi aerumnis terroribusque fessi vires erigantur eoque vertantur, unde solatium verum auxiliumque omne petendum.

Nec negligenda adfectuum salubrium excitatio, quae etiam musicae artis ope contingit: antiquissi-

mo more, incantationibus mollibusque carminibus morbos fugare, id praeprimis probante. Contra omnem morbi dolorem Avicenna dulcem suadet cantilenam. Et Asclepiades in furore aliisque mentis morbis adhibendum esse praecepit cantum duplicem: phrygium, qui iucundissime excitaret animum prae moestitia furore correptum, alterum doricum, gravem eum et compositum, qui iuvet puerilibus cachinnis exultantes. (*Cael. Aurel. chron. lib. 1. c. 5.*)

141.

Denique et somno utendum est, ut vires recreentur. Qui si potest absque narcoticis cieri quietus, mirum est, quantum eo addatur viribus, ut et crises perficiantur et convalescentes citius in sanitatem redeant.

β. Medicamenta.

142.

In remediis primum certe locum martialia obtinent, quae vero contraria fere statui febrili, in diuturna duntaxat et cachectica infirmitate adhibenda sunt. Ubi laxitas fibrae simul est corrigenda, ubi calefaciendum corpus, sanguinis mixtio depravata curanda, rubor cruoris augendus est, ibi martialia reliquis remediis praeferenda sunt: de quorum delectu alibi (*pharm. §. 353 — 365.*) praecepimus.

Sequuntur remedia extractiva amara, (*pharm.* §. 171.) quae praecipue ventriculi vires firmant, humorum digestioni inservientium mixtionem emendant stasesque resolvunt. Itaque praeferenda sunt in debilitate febrili atque inaequabili virium nervosarum dispensatione: commendanda etiam in colluvie pituitosa et verminosis adfectibus.

Dein remedia balsamico-adstringentia, quae et tonica dicuntur, maxime suadenda sunt, ubi infirmitas maior cum laxitate et atonia adest. E quibus cortex peruvianus reliquis palmam praeripit. (*pharm.* §. 200.) Eorum omnium usum in superioribus indicavimus.

Denique et acida mineralia energiam systematis sanguiferi potenter augent, vi sensifera minuta, quod e deposito oxygene exponere poteris. (*pharm.* §. 262.)

CAP. IV.

DE METHODO INCITANTE.

a. *Modus agendi.*

145.

Quodsi ea, quae de ratione corporis organici ad res externas (*phys.* §. 62.), de ortu morborum dyna-

mico (*path. gen.* §. 6.), de actione remediorum generatim (*pharm.* §. 5.) praecepimus, universim intelligantur; negari nequit, omnem praesidiorum, quae ars offert, actionem vel magis vel minus stimulantem esse, eo saltem tendere, ut, limitata protinus vis sensifera sese exferat. Qua quidem generali lege solutae sunt eae res, quae duntaxat limitant vim, aut quae mechanicas fibrae dotes ita mutant, ut cohaerentiam minuant. (*pharm.* §. 6. 7.) Ab eo autem loquendi usu latissimo recedimus, si incitantem methodum habemus peculiarem, qua vis sensifera vel totius corporis, vel systematis alicuius aut partium singularum ita sollicitatur atque laceffitur, ut, quae obdormiverit, expergiscatur; quae deses ac iners, fuscitetur; ut et efficientia ad valetudinis secundae normam redire possit. Quibus cum sufficienter pateat discrimen roborantis methodi ab hac, monendum etiam, nec evacuantem ullam methodum, etiam si ex incitatione vis sensiferae saepe proficiscatur, huc referendam esse.

144.

Cum per se hac methodo vires neutiquam augeantur, exertione duntaxat aut manifestatione vis sensiferae incremente, transire eum effectum liquet. Est tamen longa et continua fere series incitantium rerum, ordiens ab iis, quae fugacissimo modo stimulant (spirituum aethereorum exemplo) pro-

ducta in eas, quae fixo permanenteque modo virescunt (earum exemplo, quae resinam habent.) Hae locum primum adfectum potius sollicitant, in alia minus agunt: fugacissima vero incitamenta per nervorum imperium totius corporis potita vim sensiferam ubique proliciunt. Est autem id singulare in omni incitantium actione, virium functiones accelerari quidem sed nullo modo fortiores in se fieri, sensationes igitur ocysime contingere vividioresque esse motusque omnes crebriores, neque tamen ipsam efficientiam robustiorem fieri.

145.

Itaque contingere solet, ut laceffita vis eo citius semet remittat atque vel ad debiliorem redeat actionem, quo fugacior est incitatio, quoque ocys transit. (*phys.* §. 66.) Haec quidem remissio vel protinus in energia ipsa animadvertitur, vel post temporis aliquod spatium in vi sensifera. Hinc fit, ut musculorum actio decrescat, maxime in peculiaribus organis post stimulantium nonnullorum usum, camforae exemplo et digitalis aut kali etiam carbonici. (*pharm.* §. 98. 165. 273.)

Quibus accedit, virium intensitatem imminui secessu aquae et humorum aucto. (*phys.* §. 56. 52.) Atqui pleraque incitantia tum demum salubriter agunt et effectus speratos producant, cum perspirationem

cutaneam leniter promovent, quod de camfora, digitali, hydrargyro etiam et stibio notissimum est. Qua perspiratione cum discidium humorum increseat, eliminatur omne id, quod antea vires sollicitarat, ipsa etiam conductio imponderabilium faciliior fit et magis regularis. Hic autem agendi modus perquam memorabilis est, quod nimirum incitantia, quo magis fugacia sunt, eo melius et tutius inaequabilem vis sensiferae distributionem ad ordinem sanitatis reducunt: valerianae exemplo et spirituum aethereorum: quoniam horum effectus brevi tempore transit in remissionem, perspiratione aucta.

146.

Quamlibet, quae vere roborant adduntque aliquid ad corporis compagem, incitantibus proprie adnumeranda non sint; ea tamen, quae alterum vis vitalis momentum, energiam, privatim lacessunt, stimulare omnino merito dicuntur. Opium enim, quo nervorum energia augetur, minime tamen roborat, sed in praestantissimis militat incitamentis. (*pharm.* §. 232.)

147.

Magni tamen momenti instar habet discrimen systematum organorumque, quae peculiariter incitante methodo adficiuntur. Vita cuiusvis organi peculiaris (*phys.* §. 13.) ac specificus modus, quo ex-

ternae res eorum organorum vim sollicitant, (*physf.* §. 52.) nullibi magis clarescunt, quam in incitantium eorum actione. Quodsi enim cantharides et scilla et digitalis renes et vesicam specifico modo adficiunt; hydrargyrum vasa absorbentia et capillaria; cutim Viola tricolor, sulfur et stibium; pectus et asperam arteriam senegae radix; resinosa saponacea ventriculolum adoriuntur.

Neque earum rerum, quae idem systema aut organon adgrediuntur, eadem est et una actio; siquidem et kali carbonicum et galbanum et ammoniacum in vasa absorbentia agunt et capillaria; longe tamen alio modo ac hydrargyrum. Quanam autem ratione id exponendum sit, haud liquet; medici tamen est, sedulo indagare id discrimen, ut, quemnam effectum peculiarem quodvis remedium incitans exserat, patecat. Maxime vero notanda differentia eorum, quae, nervorum organicorum vim sensiferam eliciendo, motum sanguinis accelerant caloremque animale et earum rerum, quae nervis cerebribus blandum, gratum fugacemque stimulum imperiando, actiones systematis sanguiferi magis sedant et componunt.

In quibus antithesis organorum et antagonismus cum consensu haud negligendus est. Quodsi etiam

polarium elementorum antithesin minus advertimus, utpote minus clarum, sed hypotheticum, (*phys.* §. 72.) cuivis tamen patet arteriarum venarumque antithesis, intercedente systemate capillari, utpote indifferenti. Notissima est nervorum musculorumque antithesis, e praedominio alterutrius momenti, quo vis vitalis constituitur, exponenda: quae, si ad stimulantium quorundam peculiarium actionem applicatur, ad id fere redit, ut, vi sensifera fugaci modo incitata et conductio et consumptio imponderabilium augeatur, quo facto musculorum contractiones irregulares compescuntur. (*path. gen.* §. 259.) Tali quidem modo non est, cur dubitemus, incitantia plura antispastica virtute vigere, moschi exemplo et valerianae.

Nec negligenda est alia organorum cutaneorum et internorum antithesis, qua fit, ut incitatis illis, haec minus vivide, minus etiam turbulenter agant. Hactenus caustica, vesicatoria eaque, quae exanthemata proliciunt, interdum componere turbas viscerum videntur.

b. *Incantia.*

149.

Generatim haec methodus vis sensiferae torpore indicatur. Quem ut rite cognoscas, ut sedulo ratio-

nem utriusque momenti, quo vis vitalis constituitur, gradum torporis et tempus morbi discernas, omnes intendere nervos ingenii et intellectus oportet. Siquidem, ubi resoluti penitus sunt nervi, quivis, vel rudis ab omni scientia, perspicit, stimulantium opus esse; ubi vero, inaequabili virium dispensatione vigente, vis sensifera vergit quidem in torporem, sed nondum penitus est prostrata, curiose delectus incitantium instituendus est. Fugacia eaque, quae blandissimo modo nervos sollicitant, ut aequabiliter imponderabilia conducantur, praemittenda sunt; sequi debent, quae fixiori modo peculiariora organa adficiunt.

150.

Incitans igitur methodus in auxilium vocanda est in febribus acutis, dum citra inflammationem activam et saburram virium languor cognoscitur pulsibus exilibus, irregularibus et debilibus, sensuum hallucinationibus, somno turbato insomniis, aut soporibus; tum calor neutiquam adest continuus, sed crebri horrores, aut frigus etiam totum corpus exercet; dum cutis sudoribus madet haud levantibus, dum urina turbida est alvusque vel liquida vel etiam stricta. Nequaquam obstant spastici motus varii, subsultus tendinum et deliria, si modo haec initia fuerint: namque et in moribundis cum summo

languore virium haec symptomata iungi cuius notum est.

Multo fortius poscuntur incitantia, cum pulsus sunt molliores iusto et undabundi, cum temperiei nulla vicissitudo accidit, soporibus continuis aeger vexatur, oculi caligant, auditus aliquae sensus hebescent, cum tremores corpus quovis motu exercent. Tum ad validiora est confugiendum incitantia, quae vero, si energia omnino pessumdata est, sola haud sufficiunt, sed tonicis et roborantibus iungenda sunt.

151.

Indicantur incitantia, si naturae vires crisin molientes, infirmitate aut vi morbi impediuntur. Ea causa rite cognita et sedulo distincta ab oppressione, satius est, incitante methodo generali adhibita, naturae potius viribus suscitatis committere, quid moliturae sint, quam hanc vel illam crisin protinus suscitare. (§. 30.) Sic exanthemata, si quae iuvabunt; sic sudores, urinam, alvum etiam et vomitum ciet ipsa natura; sic pus benignum in ulceribus malignis producit, dummodo incitante methodo ad id stimuletur. Pleraque eiusmodi remedia, quibus tributa est vis, vel hanc vel illam proliciendi excretionem, generatim potius stimulant vasa capillaria, unde neque myrrha puris generationem proxime, ne-

que hydrargyrum salivae cursum promovere credibile est, sed incitatis vasis capillaribus modo hanc modo illam producere excretionem.

152.

In morbis diuturnis incitantem methodum non solum nervorum resolutiones indicant, sed maxime languor reproductionis, e vis sensiferae labe proficiscens. Hinc in hydrope praeprimis, si vasorum absorbentium torpor accusandus est, incitans methodus eligenda est, qua et excretiones augmentur et absorptio promovetur. Scorbutus, a depravata sanguinis paratione pendens, peculiaribus tractatur incitantibus, quae et digestioni et sanguinis boni confectioni favent. Scrofulae incitantibus iis curantur, quae glandulas vasaque absorbentia privatim adficiunt, ut laxitas eorum organorum tollatur.

153.

Morborum diuturnorum curatio eo saepe tendit, ut, vi sensifera inaequabiliter distributa, haec in normam redeat, quod excitata ea nonnunquam optime succedit. (§. 145.) Itaque in innumera fere malorum caterva, quae stases abdominales sensiferaeque vis per ganglia abdominalia fluctuationem excipit, prodest peculiaris methodus incitans, quae vel vasorum abdominalium actionem auget, vel impetum humorum versus organa quaedam peculiariora suscitatur. Ita in arthri-

arthritide anomala aconitum et guaiacum, dulcamara etiam et ammonium agere videntur. In imperanda vero hac methodo incitante magno opere interest, victus rationem ita instituere, ut faveat activis naturae medicatricis moliminibus: alioquin enim vires prius labascunt, quam salubres effectus producant.

154.

Gravissima est incitans methodus in atonia viscerum abdominalium, quae et colluviem pituitosam et vermium congeriem et flatum et calculi generationem producit. In his omnibus remedia quae adhibentur, ad incitantem potissimum methodum reducenda sunt. Permanente tamen distinguuntur stimulo, quo fuscitatae vires pituitae et resolvendae et educendae pares sunt. Lithontrica inprimis et phlogoga methodus huc fere redit.

155.

Vis sensiferae intentio, si ab inaequabili eius dispensatione pendet, tantum abest, ut irritantis methodi usum prohibeat, ut etiam magis et fortius imperet. Sed circumspectissime est aegritudinis genus et tempus indagandum, ne exasperetur malum, quod omnino debellari potest hac methodo, si tempestive adhibetur. Plurimi quoque interest, delectum instituere eorum remediorum, quae specifico

modo et hactenus incitare valent, ut inaequabilis virium dispensatio cesset. Sic hydrargyrum muraticum mite in inflammationibus passivis adhibitum omnino stimulat vasa absorbentia: nullum tamen aliud remedium incitans ei substitui potest. Kali causticum stimulare ecquis negaverit: eo tamen modo nervorum organicorum fines sollicitat, ut consumptionem imponderabilium accelerent, eaque ratione spasmi fileant. (*pharm.* §. 274.)

156.

Hinc et profluvia, quamvis vasorum fines utplurimum incitatos agnoscant, stasibus tamen saepe aut laxitate saltem truncorum sustinentur, aut ab inaequabili virium dispensatione pendent. Quibus omnibus merito opponitur incitans methodus. Hinc cinnamomi cortex in sanguinis profluviis, arnicæ flores in dysenteria, digitalis in variis eiusmodi profusionibus expediunt.

157.

Quanquam oppressio virium humoribus aut aliis rebus materialibus effecta incitantem methodum prohibet, gravissima tamen est, si vel virus animale vel contagium nondum totam humorum massam depravavit, ut suscitatae vires semet liberare ab iis possint venenis. Ammonium causticum contra viperæ morsus utilissimum nescio possitne alio modo ex-

poni. Multo vulgatioꝛ est vini usus protinus ut aliquis contagio infectus est: et, qui febris flavae contagio inquinantur, si modo hydrargyri muriatici mitis grandioꝛem copiam sumunt, ilico saepe revalescunt. (*Mawe's Reise in das Innere von Brasilien*, p. 8.)

c. *Contraindicantia.*

158.

Impotentia motuum et sensuum obfuscatio, quae obstacula excipit, tantopere nonnunquam urgent, ut verae infirmitatis speciem prae se ferant. Huic autem oppressioni, tum symptomatum comparisonem tum praecipue causis praegressis et historia morbi cognoscendae (*path. gen.* §. 48.) incitantem opponere methodum nefas est, cum stimuli opprimentes necessario augeantur.

Nihilominus monendum est, incitantem methodum, quamvis haud indicata sit, ad tempus tamen et in oppressione virium levamen adferre, cum, quaecunque adfuerint causae, virium exertio tamen augeatur. Itaque in lipothymia aut nervorum resolutione, humorum colluviei tribuendis stimuli fugacissimi, aqua Lucii aut ammonium causticum revocant ad tempus saltem vires, etiamsi perfecte curandus sit morbus remediis iis, quae humores elimi-

nant. Curatio enim symptomatologica, cui adnumeranda est haec incitans methodus, saepe necessaria est, cum vel urgent symptomata vel causa materialis ignota est. (§. 43. 44.) Accedit, quod paullo ante monui (§. 157.), nonnunquam incitantia ipsa paria esse, quibus materies morbosae evacuentur.

159.

Aliud, pariter grave, contraindicans existit, si efficientia ipsa iam vere prostrata est, ubi nequaquam sperandum, fore, ut suscitata vi sensifera efficientia refocillari possit. Quinetiam magis infringuntur vires, si continuo laceffuntur, neque aliquid earum robori additur. Itaque ex historia morbi, symptomatibus comparatis et causis praegressis gradus debilitatis efficiendus est. Si vero is cognoscitur, qui incitante methodo tolli nequit, his remediis addenda sunt roborantia et tonica. Cum arnicae floribus et radice serpentariae cortex peruvianus iungendus est, si in febribus nervosis, dysenteria maligna aut aliis eiusmodi morbis energia iam nimis labefactata est.

160.

Inaequabilis vis sensiferae distributio, saepissime debilitatis speciem prae se ferens, haud facile irritantia poscit, nisi adeo fugacia sint, ut intentio iis producta ocyssime in remissionem transiens restitutio-

nem normalis distributionis pedissequam habeat. (§. 153.) Gradus is aut ratio huius intemperiei quibus prohibetur incitans methodus, cognoscitur plerumque e duritie pulsuum, ariditate cutis, aestus continuitate, doloribus internarum partium adfidiis, anxietate, desipientia feroci atque continua, e truci oculorum obtutu et lotii flammeo colore. Quorum symptomatum si pauciora adfuerint, fugacissima quidem incitamenta, quae sensus mulcent, proficua saepe sunt, nocentissima vero, quae fixiori stimulo exaestuunt et turbas nervorum organicorum augment.

161.

Sedulo cavendum est, ne naturae vires et molimina medicatrix incitante methodo perturbentur. Eum errorem gravissimum committunt, qui vel negligunt oppressionem virium crifum praeviam (§. 26.); vel regulam auream fusque deque habent: ἃ δὲ ἄγειν, ὅκου ἂν μάλιστα ῥέπη, ταύτη ἄγειν, διὰ τῶν συμπερόντων χωρίων (aph. 1, 21.). Sic pervertunt naturae molimina, qui, si forte alvi profluvium molitur, incitatione generali potius diaphoresin producere fatagunt.

162.

Ex toto autem praeceptum valet: "Qui morbo ipsi et caussis efficacibus medetur, vires etiam optime servat, et incitat. Supereft saepe etiam post

morbos superatos debilitas insignis, quae incitantibus nonnunquam magis exasperatur, si status morbosus organi nobilioris remanet. Ita nonnunquam longe alienis methodis vires fuscitamus, si causis eae curationes contrariae sunt. Adstringentia incitant, si laxitas fibrae; mollientia, si durities partium et rigiditas; sedantia ipsa, si nimia vis sensiferae incitatio activitatem minuit.

d. *I n d i c a t a.*

163.

Nulla profecto alia curatio tam curiosum praesidiorum delectum exigit, quam haec, cum insignis adsit differentia remediorum, quorum alia alio modo agunt; plurima specifico modo organa peculiaria adficiunt; alia vim sensiferam nervorum, alia motricis fibrae receptivitatem laceffunt. Qui haec rimaturus discrimina probe delectum instituit, optime medetur. Experientia autem et pharmacologica scientia id examen instituendum est, nec opinionationibus fidendum, quas scholae forte de polarium elementorum ratione comminiscuntur.

164.

A generalibus incitamentis ordientes, aëris primum temperies obvia est, quae dum increfcit, totius corporis vim sensiferam potenter auget. Quan-

tae sint caloris vires in fuscitanda ea vi, uberius exposuimus. (*path. gen.* §. 125.) Eo igitur utimur ad restituendam vim sensiferam, si nervi forte resoluti sunt, aut si vasa absorbentia et capillaria inertia muneribus suis haud rite funguntur. Veteres iubebant in paralyfi sole corpus torrendum vel paroptesin e carbonibus, vel curationem, quam Graeci *Φοινιγμόν* appellabant, arena litori vicina, quae sit sole ignita, ut circumtecta gremio foveret aegrotantem: imperabant etiam in lavacro igneo usum flabrorum. (*Cael. Aurel. chron.* lib. 2. c. 1.) Igne et recentiores saepius utuntur, cylindris e moxa accensis, quibus pertinacem interdum nervorum resolutionem tollere licet. In hydropse quanta sit fomentorum calidorum utilitas, cuivis innotescit: in eodem morbo clibani aut furni aestus non vulgo soli sed medicis etiam commendabilis videtur.

Quae calorem augent mechanico modo, frictiones maxime panno laneo, urticatio etiam, acupunctura, qua Iaponiae incolae utuntur, flagra ipsa in usum vocanda sunt, ubi membra integra resoluta sunt. Themison plagis ferulae caedendas partes resolutas imperabat. *Cael. Aurel.* l. c.

165.

Magnum praebet electricitas adminiculum, ut vis sensifera fuscitetur. Id vel maxime de positiva

136 SECT. II. DE VIRIB. VITAL. MUTANT.

electricitate, e conductore fasciculis radiantibus prorumpente valet: haec enim pruritus, punctio-
nis sensum et aestus, dolores, succussiones vel par-
tium singularum, vel totius corporis producit. At-
trahuntur verius irritatam partem humores, maculis
rubris, congestionibus ipsisque inflammationibus
obortis. Id fieri oxygene in ea electricitatis forma
praevalente probabile est. (*path. gen.* §. 132.) Neque
tamen et negativa electricitas, *επ'αντησίω* seu pul-
vino fricatorio, elicit, sine stimulantibus effectibus
est: namque pulsus accelerati, dolores aucti et se-
cretiones promotae inde interdum observatae fuerunt.
(*Kühn's Zusätze zu Deiman über Electr.* p. 64.)
Quod Böckius explicare studet ex oxygenis e corpore
evocati aequae stimulantis vi, ac dum corpus ingre-
diatur. (*Beytr. zur Anwend. der Electr. auf den
menschl. Körper*, p. 21.)

Quodsi vero electricitatem adhibitori sumus,
morbi genus gradusque torporis ante omnia caute
definiuntor. Cum enim vis sensifera fortiter eo sti-
mulo laceffatur, considerata est utriusque momen-
ti, quo vis vitalis constituitur, ratio. In morbis
diuturnis potius, quam acutis ad hoc praesidium
confugiendum est, quanquam febres intermittentes
ipsique rheumatismi acuti huic methodo interdum
cedere soleant. (*Kühn's Zusätze zu Deiman*, p.
169. 308.)

Ita autem administranda est haec curatio, ut a mitioribus speciebus inchoemus, neque prius concussionem ope lagenae Kleistianae in usum vocemus, quam corpus adsueverit huic stimulo, mitioribus aliis incassum tentatis. Balneo electrico, quo, nulla elicta scintilla, atmosphaera electrica eum circumfundere iubetur, incipimus: ventus electricus sequitur, quem assilamus parti cuidam speciali, ope bacilli directoris recurvi, cuius apex pyrulo ligneo instructus est. Scintillarum elisio his valentior est methodus: sellae separatoriae imposito aegro admoventur elicitor bacillus, obiecta prius parte pannis laneis aut sericeis. Qui, quo crebrius parti admoventur, eo blandior est stimulus; fortior, quo longiora intercedunt temporis spatia. Succussus tandem electricus eo conducit, ut, circulo rapido electricitatis utriusque excitato fortissime pars adfecta feriat. Requiritur lagena Kleistiana, vel cum conductore iungenda, vel, si fortius et velocius impregnanda est, ita collocanda, ut tegumen alterum cum conductore, alterum cum *τριπτηρίῳ* ope catenularum cohaereat. Ex hac vero duobus bacillis ita elicitur electricitas, ut, altero cum altero tegumine iuncto ad extremam partem applicito, altero scintillas ex altera extrema parte provocemus.

Circumspectione vero opus est, ut evacuationes liberae serventur et promoveantur, sicut id in omni incitante methodo. (§. 145.)

Galvanismus, seu electricitas heterogeneis corporibus semet contingentibus elicitā, cum omnes electricitatis, quae machina provocatur, effectus edat, magni quoque pendendum esse in incitanda vi sensifera probabile est. Bischoffii quoque et Graepengiesseri, Schuberti et Waltheri Landshutensis studiis magnopere commendata est haec curatio; modus eam adhibendi commendatus ab Osiandro, Weinholdio et Westringio. Neque tamen experientia docuit, vel fortiozem praebere vel tutiozem stimulum electricitate machinis elicitā.

Magnetismo, quem artifex tractibus illis suscitāt, sensum organicum mirifice erigi et hactenus incitari, ut et clarus fiat et instinctu actiones salubres producat et crises etiam spasticis motibus turbulentas, olim (*phys.* §. 396. f.) docuimus: unde nonnulli nostrae aetatis medici in desperatis casibus, ad eam methodum confugiendum esse suadent. Cum vero morbus potius sit, quam status peculiaris; cum, quid effici possit iis turbis, incertum sit; cum id tamen persuasum habeamus, corpori hominis imprimi eam mobilitatem sensiferaeque vis perturbationem, ut diuturna saepe sequatur aegritudo adversa: abstinendum potius est hac intuta methodo.

168.

Potentissimum animi imperium in functionibus corporis regendis cogit nos atque compellit, ne unquam mentis dotes, ingenium et proclivitates in morbis curandis negligamus. Intentio animi languentis et marcentis ad stidia, ad adfectus laetos erigentesque gravissimum praebet praesidium, quo torpor vis sensiferae tolli potest. Quid quod ira ipsa et terrore nervorum resolutionis sanatae meminerunt auctores.

Ipse denique concubitus eximium praebet incitamentum, quo diuturnae aegritudines, maxime e languore mentis et adfectibus tristibus ortae tolli possunt.

169.

In medicamentis incitantibus dispescendis obvia prima est classis fugacium et volatilium, hydrogenae abundantium, seu fragrantium seu etiam graveolentium. Haec nervos cerebrales adficiendo toti nervorum imperio blandum impertiunt stimulum, ut et vividius agere et perturbationes cessare possint. Spiritus aetherei primum merentur locum: nominanda dein, quae oleo aethereo scatent, moschus et valeriana: quibus denique vinum rhenanum succedit. Haec in principibus. Pariter sedant ac incitant. (§. 156.)

Alia his sunt debiliora, ad refocillandas vires in animi deliquiis vel ad diaphoresin promovendam utilia: lavandulae exemplo et sambuci. In aliis oleum aethereum minus blandum est, nervos vasorum organicos fortiter incitat, atque exaestuat: quorum infinita iterum est varietas; aliis magis fugacibus et blandioribus, ideoque magis sedantibus, olei cayeput, castorei, asae foetidae, et cinnamomi exemplo; aliis fixioribus, stomachum salubriter et intestina incitantibus, flatum pellentibus, calorem augmentibus totiusque corporis activitatem. His accensenda sunt aromata et bitumina.

170.

Oleorum aethereorum ut magna est varietas, ita gradatim transeunt in resinas, accedentibus ad oleum aethereum oxygenae, extracto amaro fixioribusque particulis. Camfora cum iis, quae finitima sunt, hinc oleis aethereis proxima est; illinc balsama naturalia, quae tandem in resinas abeunt. Illa potentissimo stimulo vim nervorum organicorum sensiferam evocat, in cutem derivat atque ab aliis organis, maxime renibus et partibus genitalibus deflectit. Haec vero vasa capillaria organorum secretioni dicatorum peculiari modo suscitant, ut et urinam moveant et puris generationi faveant.

Balsama sensim in resinas abeunt, mediis quibusdam corporibus, oleo aethereo pariter et resina ac extracto amaro scatentibus. *Serpentariae radix* huc pertinet et *guaiacum*. Haec fortius irritando et fixius, nervos organorum secretioni inservientium sollicitant.

Adnumerari his etiam possunt cruciferarum virtutes, oleo aethereo acri et principio nondum satis cognito tribuendae. (*pharm.* §. 109.) Satis fixum praebent et localem partibus stimulum, quo et eroditur cutis et inflammationis species excitatur. Ingesta autem tum ventriculi vires erigunt, tum secretionem promovent.

His proxime accedunt resinosa ipsa; quorum alia fortissimo stimulo tunicam ventriculi et intestinorum mucosam exagitant, ut pituita et si quae sordes adfuerint naturalibus ostiis evacuentur, et, communicata cum aliis partibus incitatione, vasorum absorbentium et capillarium actio augeatur et totum systema nervosum salubriter erigatur. (*pharm.* §. 129.) Alia resinosa volatilia in remotas agunt partes, ut et secretiones in pectoris organis promoveant, *Senegae* exemplo (*pharm.* §. 160.), et lotium pellant, ut *scilla* (*pharm.* §. 162.) et in cutem agant, ut *Aconitum* (*ib.* §. 163.). Alia denique, *kali caustico* forte adiuncto, exedere partes potius solent inflam-

mationemque localem producant. Quibus cortex mezerei, euphorbium, ipsaeque cantharides adnumerantur.

172.

Insigne est discrimen, quod haec potissimum remedia et fossilia arteque parata intercedit. Horum, quae flagrantiae capacia sunt, suo plane et, quodvis singulari modo corpus incitat; fortissimo et fere universali phosphorus; multo blandiori, tum in tunica intestinorum mucosam tum in ambitum corporis agente, sulfur; fugaci autem et universali, quo et turbae nervorum sedantur, kali sulfuratum et ὑδροχλωρ.

His proxima sunt alcalina, maxime ammonium carbonicum, quae universalem nervis organicis praebent stimulum, fortissimum autem pura aut caustica, quae et exedere partes solent. Blandissimum vero stimulum localem excitant saponēs, quibus vasa indifferentia ad promovendam secretionem absorptionemque sollicitantur.

Similem fere saponi effectum habent sales neutri, quamvis magna sit eorum varietas. Incitans natri vis, quae et casum interdum recipit et calorem attrahens, longissime differt a natri sulfurici vi stomachum sollicitante, ab ammonii muriatici effica-

CAP. IV. DE METHODO INCITANTE. 143

cia resolvente, ab ammonii succinici et acetici virtute diaphoretica.

173.

Tandem metalla laudanda sunt, in quibus hydrargyrum oxydulatum tutius reliquis remediis vasa absorbentia et capillaria stimulat, ut functiones restituantur: stibii vero oxydula in cutem potissimum agunt atque ab aliis organis vim deflectunt. Barytes etiam muriaticus suo et peculiari modo eadem organa indifferentia adficit.

CAP. V.

DE METHODO METASYNCRITICA.

a. *Modus agendi.*

174.

Non dubito peculiari modo tractare hanc methodum, quamvis haud ignorem, magnam eius partem reduci posse ad methodum stimulantem, seu incitantem. Sed cum informatio alia sit, saepe etiam ita instituitur, ut nullo modo simpliciter incitetur corpus vel singulae eius partes, suam omnino sectionem poscere videtur.

Fuit autem nomen μετασυνκρίσεως a Theffalo, ut videtur, primo effectum, ut signaret curationem,

qua τὰ συγκρίματα, sive αἱ συγκρίσεις, e quibus corpus conflatum existimabatur ac constitutum, mutantur atque ratio penitus novaretur. (*Gal. de simpl. med. facult. lib. 5. p. 66.*) Συγκρίματα autem dixerunt veteres Eleatici, quos sequutus est Asclepiades Bithynius, atomorum, seu corpusculorum infecabilium rationes. (*Galen. de elem. lib. 1. p. 47.*) Itaque μετασύγκρισιν etiam *recorporationem* Caelius Aurelianus vertit: et Asclepiades, methodi quidem inventor, sed nomen, a methodicis sectatoribus usurpatum, nondum adhibens, hanc curationem Θεραπείαν dixit Φιλοπαράβολον, quam Caelius Aurelianus minus apte *temerariam* interpretatus est et periculofam.

175.

Quodsi recedimus ab antiquo illo commento methodicorum, atomorum nimirum rationem posse et debere hac methodo novari et plane mutari; id tamen persuasum habemus, medici esse officium, ut totam corporis constitutionem mutet, eamque reddere satagat, quae et destructioni resistere et salubria moliri possit.

Fieri id autem duplici modo potest; vel lento modo ac suavi, ut victus ratione, habitatione, moribus penitus mutatis, aliam plane virium rationem producere studeat; vel celeriter ac fere turbulenter,

ubi

ubi plerumque incitans methodus hactenus augetur, ut finis peculiaris amplius haud propositus sit, sed universalis potius, motibus sensibusque turbulentis excitatis mutandam esse corporis constitutionem.

b. *I n d i c a n t i a.*

176.

Necessaria autem est haec curatio in gravissimo quovis morbo et pertinaci, qui, vi vitali infestus, indicationem causalem eludit. Ibi quoquo modo et *Φιλοπαραβόλας* tentandum esse et periclitandum, ut, quid natura faciat aut ferat, cognoscatur. Quod si enim latent causae, aut si incitans vulgaris methodus vel tonica haud sufficiunt; quid superest, quam corporis constitutionem mutare?

177.

In diuturnis morbis, ab arthritide vaga, stasibus abdominalibus et inaequabili vis sensiferae distributione natis, in lue etiam venerica, scorbuto et variis cachexiis mentisque praesertim morbis unica nonnunquam spes perfectae curationis collocanda est in mutata victus ratione. Habitationis enim permutatio, itinera, navigatio, studiorum et negotiorum aliena plane indoles perfecte nonnunquam curant morbos, conamina omnia medicorum eludentes.

Roboranti methodo praemittendam esse metasyncrisin in debilitate universali, supra (§. 120.) monuimus.

178.

Morbos spasticos et nervosos subinde, ut et alios diuturnos, natura curat febre excitata, quae naturalis est metasyncrisis, arte imitanda. Parem igitur turbam excitamus, ut finis potiamur.

Nec in ipsis acutis morbis negligenda est haec curatio, cum vires haud potius esse videntur ad causam subigendam vel amovendam. Utiliter tunc totius corporis constitutio ita laceffitur, ut, quomodo-cunque id fiat, vires restitui et salubriter terminari possit morbus. Quodsi inaequabilis vis sensiferae distributio febris indolem complectitur, nova perturbatione per artem producta, morbosa filebit, ideoque veritatis quaedam species homoeopathicae curationis, quam Hahnemannus stabilivit, inde elucet.

c. *Contraindiantia.*

179.

Utilissima quidem et summe interdum necessaria haec curandi ratio temeritati tamen proxima est, si, qualem exitum habitura sit haec methodus, penitus latet. Indicantia enim et prognosi constitui su-

pra (§. 51.) monuimus. Itaque agyrtis similis fit medicus, si, nullo respectu ac exitum probabilem habito, metasyncrismum molitur. Cognita prius natura morbi, populari ingenio; cognitis viribus aegroti exitus ratio haud amplius latebit. Quia praevisa iudicare possumus, suppetiturae sint vires, sive secus.

180.

Dein prohibetur haec methodus, dum causa morbi manifesta, aut probabilis saltem, curationi occasionem praebet. Perversa esset temeritas in febre intermittente negligere viscerum abdominalium torporem nervorumque intemperiem, quae plerumque cortice peruviano optime tollitur. Quodsi vero ea curatio nil proficit, naturae viribus cognitis, expedit saepius ad *Τερακείαν Φιλοπαράβολον* confugere.

d. *I n d i c a t a.*

181.

Animi perturbationes violentae egregium interdum adminiculum largiuntur, quo haec possit curatio institui. Terrore et ira repente suscitata epilepsiam ipsamque hygrophobiam, metrorrhagiam quoque, maxime vero paralyses et febres intermittentes fugatas esse meminimus. Haud vero simpliciter incitare, sed febrem moliri et totam corporis constitutio-

nem permutare eos adfectus monuimus. (*path. gen.* §. 167.)

Magnopere prodest saepe frigus, quo irritabilitas seu contractilitas fibrarum augetur, vi sensiferà in aliis partibus sopita, in aliis vero accumulata. Itaque balnea frigida in febribus nervosis ac scarlatina merito laudanda sunt, quia non solum nimiam vis sensiferae activitatem minuunt et adstringunt (§. 91.), sed mutant etiam virium rationem veramque metasyncrisin producunt. *) Hinc quoque imbrium actio salubris exponenda, quam in febre flavâ Jacksonius (*on the fevers of Iamaica*, p. 349.), in hydropobia incipiente Morgagni (*de sed. et caus. morb. ep.* 8. n. 32.) observarunt.

Utiles etiam hoc potissimum nomine sunt succus electrici, ope lagenae Kleistianae producti, quos fortissima incitatione et mutatione potius virium (§. 165.) metasyncrisin moliri arbitror.

*) *Galen. meth. med. lib. 10. p. 148.* Ἐπειδ' ἐν μὲν τῷ φύξαι καὶ ἐγερῆναι τὸ κῆρος τῆς θέρμης ἐστίν, ἅπασιν δὲ τοῖς φυσικοῖς βοηθήμασιν ἐφεδρεύει βλάβη διὰ τὴν ἰσχυρότητα τοῦ σώματος, ἀναγκαῖον οἶμαι γίνεσθαι τὸ τοῦ Θεουκλίδου· δεῖσαντάς τι καὶ κινδυνεῦσαι. Οἷα μὲν γὰρ ἐτέρα μὲν οὐχ ἐπάρχει τῆς σωτηρίας ὁδὸς, ἡ δὲ οὕσα μόνη σφαλὲρὰ καθίστηκεν, ἀναγκαῖον οἶμαι τοῦτο ἐστίν, ὁμοίᾳ τοῖς θεινοῖς ἵεσθαι· οὐ μὲν οὐδὲ τὸ σφάλμα θανατικῶς οὐδ' ἀβοήθητον.

182.

Vesicatoria, cum magnam cutis partem sensu-
que acuto praeditam contegunt, neque secretionem
abunde augent, metasyncritice agunt. Eorum enim
ope pervicaces nonnunquam morbi acuti fugantur.
Simili modo agit aqua frigida guttatim ex alto dela-
bens, qua nervorum resolutorum vires potenter re-
stituuntur. Ignis etiam et ustio, παρόπτησις veterum
et ἡλώσις, aut insolatio eundem effectum pro-
ducunt.

Magna emeticis inest vis ad metasyncrisin mo-
liendam, dummodo uberius haud evacuent, sed suc-
cutiant potius ac commoveant viscera. Quibus et
adnumeranda sunt nausea arte producta, (*path. gen.*
§. 247.) et connubia hydrargyri cum sulfure stibia-
to, (*pharm.* §. 351.) ipsa unguenta mercurialia. (*ib.*
§. 318.) Hinc et ebrietatis usum in abigendo con-
tagio et curanda febre nervosa inchoante trahendum
esse puto. (*Eph. nat. cur. dec. 1. ann. 3. o. 145.*
Fr. Hoffm. opp. vol. 5. p. 352.)

Denique arsenicum, si quando profuit, fuscita-
ta vi sensifera totius corporis metasyncrisin moliri,
supra (*pharm.* §. 352.) statuimus. Simili modo age-
re et cuprum sulfurico-ammoniatum (*pharm.* §.
348.) et argentum nitricum in morbis rebellibus
(*pharm.* §. 312.) probabile est.

DE METHODO SEDANTE,

a. *Modus agendi.*

183.

Quodsi nimiae virium intentionis ortum studiose perpendimus, haud unam eandemque causam adesse, mox animadvertimus, sed plerumque quidem inaequabilem vis sensiferae distributionem. Quae vero variam originem habens, mox in systematis gangliosi, praecipue abdominalis, dispositione vel congenita vel acquisita; mox in stimulorum necessariorum absentia, profluviiis praegréssis, animi abiectione aerumnisque; mox in incitamentis valentioribus mechanicisque rebus, quae vim sensiferam nimis lacessunt quaerenda est. (*path. gen.* §. 57. f.) Quibus efficitur, sedantem methodum versari generatim in restituenda acquabili imponderabilium distributione, quod fieri potest variis modis,

184.

Primum igitur sedat, qui incitamenta peregrina morbosaeque amovet, sive humorum adsit colluvies et acrimonia, sive mechanice nervi obsideantur, sive aestus nimius corpus exercuerit; unde evacuantia, sanguinis missio, antiphlogistica demum optime sedare consuescunt.

CAP. VI. DE METHODO SEDANTE. 151

Dein sedat, qui materialem causam inaequalis per nervos abdominales conductionis e medio tollit. Stases enim vasorum abdominalium saepenumero in causa sunt si nervorum perturbationes nascuntur. (*path. gen.* §. 84.) Itaque resolvens methodus, eaque quae naturalem sanguinis mensuram promovet, magni saepe est momenti, ut tumultus nervorum compescantur.

Tertio sedat, qui teneritatem fibrae, inaequalis distributionis comitem, roborante methodo curat. Hinc, si evolutionis periodos stipatur, si a nutritionis defectu nascitur, si longos morbos gravioresque aut humorum cladem excipit vis sensiferae perturbatio, roborans methodus, maxime, quae victus rationem complectitur, utilissima est. (§. 124. 125. f.)

Quarto sedat, qui incitamenta auget iisque nova addit, ea tamen, quibus viae facilius aperiuntur, quaeque diaphoresi faveant. (§. 145.) Itaque incitans methodus, praesertim, quae fugacissimis utitur remediis (§. 169.) magnum praebet adminiculum, quo vis sensiferae perturbationes cohiberi possint.

Quinto sedat, qui humectat, lubricat et mollit fibram aridam, duram et nimis strictam: quae indoles quamvis minus causa sit, quam effectus vis sensiferae perturbatae; magnopere tamen sedantem curandi rationem adjuvat. (§. 102.)

152 SECT. II. DE VIRIB. VITAL. MUTAND.

Sexto et proxime quidem ac proprio sensu sedat, qui momenti utriusque, quo vis vitalis constituitur, rationem laesam restituit, quod ut plurimum suscitato fit ac erecto momento irritabili, simul tamen minuta vi sensifera. (*pharm.* §. 227.) Id a narcoticis proprie sic dictis expectari potest. Kali sulfuratum his accensere non dubito.

Novissime sedat, qui consumptionem imponderabilium auget adeoque accumulationem minuit, quod proxime fieri alcalinis, supra (*pharm.* §. 272.) posuimus. Forte et zinci oxydum et bismuthum nitricum et cuprum sulfurico - ammoniatum simili modo agunt.

185.

Quodsi ab iis recesseris, quae et dispositionem et causas occasionales inaequalis imponderabilium conductionis tollunt, proxime sedant, quae fugacissimo stimulo secretiones augent et excretiones; tum quae consumptionem imponderabilium promovent; novissime, quae momentum irritabile erigunt, ut vis sensifera decreseat. Cum autem per somnum fileant rerum externarum impulsus, quiete distribuaturs vis sensifera, momentum irritabile placide restituatur, in somno quaerenda est insignis sedandi vis, quae in omnibus vis sensiferae perturbationibus egregie valet. (*phys.* §. 386.)

186.

Cum duobus potissimum modis vis vitalis ex-
 lerat actiones, sensu nimirum motuque, doloribus
 etiam et spasmis irregularis ac nimia vis sensiferae
 intentio patet. Quae doloribus opponitur, sedans
 methodus, *anodyna*; *antispastica* vero dicitur, qui-
 bus spasmos debellare studemus *). Quarum utram-
 que generali hac sedantis methodi denominatione
 comprehendi posse, persuasum habemus.

b. *Indicantia.*

187.

Cum dolores, deliria et spasmi symptomata
 sint, symptomaticae curationis emolumenta atque ne-
 cessitas etiam in hanc methodum cadunt. (§. 43. f.)
 Symptomatica tamen curatio complectitur praecipue
 proximam actionem in alterutrum facultatis vitalis
 momentum, qua compescuntur turbae. Qui vero
 incitamenta amovet morbosa aut peregrina; qui
 fibrae dispositionem roborante methodo curat; qui
 stases resolvit abdominales et impetum humorum co-
 hibet, is in causas potius agere quam in sympto-
 mata dicendas est.

*) Veteres tamen antispastica dicebant, quae *ἀντίσπαστις*
 i. e. revulsionem efficiant.

188.

Dolores, etiam si saepius saluberrimi sunt, exigunt tamen sedantem methodum et anodynam, proprie sic dictam, si in tantam gliscunt atrociam, ut naturae molimina pervertant. Intentio enim summa, quam adferunt, placidam virium directionem impedit, osculaque ductuum excretoriorum obstringit, ut nulla coctio, crisis nulla contingere possit. (*path. gen.* §. 271.) Coctionem igitur promovere, crisin praeparare saepius melius nequimus, quam adhibita sedante, anodyna et antispasmodica methodo,

189.

Dolores pariter ac spasmi sedantem methodum poscunt, si, nobilioribus organis infesti, periculum augment. Ecquis enim dolorem capitis atrocissimum aut spasmos, impetum humorum versus encephalum vehementissimum adferentes desipientiam denique ferocem, tollere medicamentis non studuerit! Maxime, si praecesserit dispositio eius organi ad virium oppressionem: ibi enim periculum in mora esse, cuius patet.

190.

Dolores, deliria et spasmi exigunt methodum proxime iis oppositam, si vires ocysime infringunt, quod praesertim de spasmodicis tonicis valet. Hi enim, tetani exemplo, toti corpori infesti, tantam virium

prostrationem adferre solent, ut brevi exitium adferant. (*path. spec.* §. 522.) Nec clonici spasmi sine noxa sunt, dum causa nervis principalibus infesta, capitalem reddit morbum, quod hygrophobiae exemplum ostendit. (*ib.* §. 533.)

191.

Insigniter urgent dolores et spasmi, si metus existit aliorum morborum eos excepturorum. (*Cf.* §. 45.) Id de epilepsia, chorea S. Viti, tussi etiam convulsiva, quamvis per se minus periculosis, valet; in paralyse, mentis praesertim aegritudines ipsamque fatuitatem insanabilem aut apoplexiam abire. (*path. spec.* §. 527. 543.) Asthma convulsivum in hydrothoracem (*path. spec.* §. 588.) et phthisin pituitosam abit. (*ib.* §. 619.) Id et de desipientia praecipuis valet. Itaque Galeni praeceptum: τὸ ἤδη γεγωνὸς ἰητέον, τὸ δὲ ἐσόμενον κωλυτέον, studiose exsequi oportet,

192.

Protinus tollere et dolores et spasmos sedantibus remediis opus est, si morbi natura ipsa vel plane nos latet, vel adeo insuperabilis est, ut nulli cedat curationi perfectae. Satius tunc est, mitigare symptomata, levare molestias, virium perturbationem prostrationemque avertere, quam periclitari in curatione inutili. (§. 46.) In morbis gravissimis, conatus medicorum eludentibus, nil superest, nisi

156 SECT. II. DE VIRIB. VITAL. MUTAND.

dolores compescere, spasmos cohibere, ut placidius vel mors consequatur.

193.

Indicatur haec methodus, si diuturnae spasticae constrictiones absorptionem impediunt, unde stases oriuntur glandularumque tumores, quibus tollendis nulla alia methodus aptior est. Conii maculati ipsiusque Laurocerasi praestantissima haec est virtus.

c. *Contraindiantia.*

194.

Curationi, quae, remotis incitamentis superatisque obstaculis nervorum turbas sedat, nihil fere repugnat, nisi impedimenta curationis perfectae. (§. 15.) Quae vero proxime agit in momenti utriusque, quo vis vitalis constituitur, ratione, prohibetur saepe, et maxime quidem, si adsunt materiales eiusmodi causae: impetus humorum, plethora, humorum corruptio: mechanica quoque irritamenta, quae omnia prius arcenda sunt, quam ad ipsam sedantem methodum abiveris. Satius enim est causis mederi, quam symptomata suffocare, mox reditura, si causam intactam reliqueris aut morbi indoles eadem manserit. Capitis dolores atrocissimi in typhi initio multo tutius fugantur frigido lavacro, hirudinibus

appositis et acidi muriatici sorbitione, quam iis remediis, quae proxime dolores sedare dicuntur.

195.

Contraindicantur remedia anodyna, si effectus secundarii eorum plus detrimenti adferunt, quam primarii commodi. Cum opium ventriculi vires sufflaminare, digestionem offendere, alvumque segnem reddere, impetum vero versus caput magnopere soleat augere; abstinere eo opus est in infantibus iisque hominibus, qui ante iam laborarunt iis adfectibus, qui facile ex opii usu auferunt. Impedire tamen noxios eos effectus possumus idoneis additamentis, hydrargyro muriatico miti aut radice ipecacuanhae.

Quodsi morbum etiam excitant narcotica, Belladonnae exemplo; dispiciendus est detrimenti indeni gradus, qui si minor sit morbo praegresso, audaciter est sequenda haec curandi ratio; si maior, deferenda. (§. 7.)

196.

Gravissimum est huius methodi contraindicans, e salubribus naturae moliminibus petium. Quae cum saepissime dolores adferant spasmosque, hos qui praepostere sedat, naturae nutibus spretis, coctionem impedit crisesque pervertit. Ab eo vitio se-

dulo cavendum est, etiam si aegri doloribus cruciati, cohibitionem anxie poscant. Medicus, naturae minister, nunquam impune leges almae matris perfringit.

197.

Si teneritas fibrae defectusque nutritionis merito arguuntur, et superflua est haec methodus et eo potissimum nomine nociva, quod etiam magis infirmet vires, ideoque, nutritione labefactata, causam augeat. Multo tutius est, victu uti idoneo, vitaeque rationem, habitationem hominumque confortium mutare, ut constitutio plane alia fiat, quam ad tempus tantummodo sopire tumultus. Hystericis mulieribus hominibusque, qui arthritide anomala laborant, nil aeque saepius prodest, quam itinera, aëris puri montanique usus, fontium medicatorum balneorumque frequentatio. Haec igitur auxilia redeunt fere ad roborantem methodum (§. 125. 138. 139.) et metasynerisin. (§. 177. 178.)

d. *I n d i c a t a.*

198.

Gravissima praesidia, quae nunquam negligenda sunt, sola saepe sufficiunt, quaerenda sunt in victus ratione. Qui enim incitamenta omnia et externa et interna vitare valet, is melius doloribus obviam

it spasmisque, quam dum largas ingerit opii aut belladonnae aut aliorum eius farinae remediorum copias.

Aëris usus sereni, puri, tranquillī, nec nimis aestuosi nec nimis frigidi; cubiculi temperies idonea; lectorum positus et compositio, quae nullo modo stimulos augere possit: exercitatio modica: vectio in curru aut equo: itinera iucunda: frictio quoque et mollis membrorum contrectatio: animi quies et ab omnibus perturbationibus immunitas: cibi digestu facillimi, blande nutrientes, nullo modo incitantes: potus sensus quidem mulcens, sed ab omni irritante indole alienus: en maximam partem earum rerum, quibus dolores spasmique sedandi sunt.

199.

In somno conciliando cura omnis omneque studium collocandum, quod et diaeteticis remediis et amoto quocunque incitamento externo optime fit. Cavendum, ne lux nimia oculos seriat *), ne pictae forte in parietibus imagines **), ne coena lautior, vini aliorumque incitantium potus, ne occupationes brevi ante somnum mentem perturbent, ne vestimenta cubitoria, stragula vel culcitae nimis exae-

*) Hipp. vict. acut. 400. Κατακλίνειν ἐς ῥοφερά οἰκήματα

**) Aret. curat. acut. 1, 1. Ἐρεθιστικὸν τοιχογραφίη.

fluent aut duritie offendant. Facillime in somnum ire solet, qui aëre libero gavisus fuerit, qui corporis exercitatione fessus, qui alvum liquidam, saltem haud obstructam habet, qui brevi ante somnum lectione vel auditione, nullo modo perturbante fatigatus est, qui denique sonos auscultat uniformes. *) Nonnunquam sufficit, eodem corporis situ decumbere et quam minime volvere corpus, ut quies somnusque accedant.

200.

Sedari insultus spasticos in iis, qui dispositione ad somnambulismum gaudent, admotione palmarum, praesertim praecordiis, aut tractione earum paullo remotiore a corpore, digitis extrorsum versis; partisque etiam cuiusdam dolores et spasmos compesci, admoto saepius margine palmae inferiori, molliterque inferiore versus tracto, in superioribus docuimus. (*physf.* §. 395.) Huic magnetismi artificialis

*) Aret. cur. acut. lib. 1. c. 1. "Υπνου δὲ ἀγωγή ἐκάστου καὶ τὰ ξυνήθη· ναυτίλῳ μὲν ἢ ἐν ἀνότῳ κατὰ κλίσεις καὶ ἐν θαλάσῃ περιφορῇ, καὶ αἰγιαλῶν ἦχος καὶ κυμάτων κτύπος, ἀνέμων τὲ βόμβος καὶ θαλάσσης καὶ νεὸς ὁρμή· μουσικῷ δὲ ἔτι ἐθισμὸς αὐλῶν ἐφ' ἡσυχίῃ, ἢ ψαλμὸς λύρης ἢ πυκτίδος, ἢ μελέτη παιδῶν σὺν ᾧδῃ· διδασκάλων δὲ νηπιάρχων μύθων προσομιλίῃ· ἄλλοισι δὲ ἄλλα ὑπνου θελήματα.

ficialis applicationi laudes suae derogandae sunt, nec extendendae ad alias tractationes, quae casum recipiunt. (§. 167.)

201.

Omni cura vero studendum, ut calor nimius minuatur, ut mollescat cutis, ut impetus sanguinis decreascet et alvus laxetur. Quibus perpetratis, quies saepe in acutis morbis, remissio spasmodorum, deliriorum et dolorum sequitur. Coctionis praeparatio, eaque curatio, quae εὔροζ facit spiracula, optima saepenumero est sedans methodus.

Quod cum nec humectante methodo nec antiphlogistica perfici potest, lex est in acutis morbis, ad fugacissimos stimulos valerianae, spirituum aethereorum et moschi confugere; quibus cutis functiones restitutae turbas nervorum saepe cessare iubent. Et ipsi fortiores stimuli, oleorum aethereorum et camforae, quin etiam cantharidum cuti impositarum, quarum opus omnino est, si dolores spasmi et singularum partium cum pulsum mollitie et cutis laxitate uniuntur, dolores tamen et deliria et spasmos compescunt.

202.

Ad ipsa autem narcotica confugiendum est, si momentum vis vitalis irritabile labascit, vi sensifera

nimis laceffita; nulla tamen praefente cauffa materiali. Itaque opio utimur potiffimum, fi continuae vigiliae, deliria, nervorum diftentiones cum pulfibus fpafticis, exilibus, irregularibus, cum cute arida pallida, lotio etiam turbido aegrum male habent. Anxietas incredibilis cum alvi profluviiis aut vomitu irritato nullo prorfus remedio adeo tuto cohibetur, quam opio, cui zincum oxydatum aut hydrargyrum muriaticum mite admifcetur.

Belladonna et conium et laurocerafus citra febrilem ftatum eos fpafticos adfectus fugant, quibus ftases producuntur.

203.

Longe alia vis eft acidi carbonici, quod perturbationes folummodo nervorum gastricorum, vomitionem et cardialgiam compefcit, caloremque nimium et bilis corruptionem impedit. (*pharm.* §. 265.)

Alcalina confumptionem imponderabilium in mufculis accelerare eoque modo fpafmos arcere videntur. (*pharm.* §. 273. 274.)

Tandem et zincum oxydatum et bismuthum nitricum et cuprum fulfurico ammoniatum, celebratiffima antifpafmica, incitamento peculiari videntur vires fuscitare, ut morbofam intentionem cellare opus fit.

CAP. VII.

DE METHODO ANTIPHLOGISTICA.

a. *Modus agendi.*

204.

Cum in calore nimio minuendo ligandoque et in impetu sanguinis cohibendo haec methodus versetur, quodammodo cohaerere cum methodo sedante atque cum ipsa humectante et molliente (§. 102), facile perspicitur. Namque sanguinis nimius impetus exponi nequit, nisi ex inaequabili vis sensiferae, quae per nervos organicos in vasa conducitur, distributione nimiaque eius vis intentione. (*path. gen.* §. 75.) Sedantem vero methodum versari generatim diximus in restituenda aequabili vis sensiferae dispensatione. (§. 183.) Quod cum contingat amotis incitamentis; caloris etiam, incitamentis vulgatissimis accendi, amotio sedantis methodi species est.

205.

Itaque haud uno eodemque modo antiphlogisticam methodum agere patet. Refrigerat enim primum, qui calorem sensibilem cogit vaporibus formandis inservire: quod cum contingit, necessario calor sensu percipiendus minuitur, capacitate aucta. (*phys.* §. 303.) Hinc perspiratione cutanea et pulmonali incremente corpus refrigeratur.

Dein refrigerat, qui res ingeri et ad corpus applicari iubet, quibus calor vincitur atque ligatur. Quod acidis fieri, salibus neutris, frigore demum ipso, notissimum est.

Refrigerat, qui incitamenta circuitus minuit et e medio tollit. Hinc, si sordes primarum viarum evacuantur, si dolores mitigantur, si animi adfectus compescuntur, si victus tota ratio ita instituitur, ut nova incitamenta circuitus gigni nequeant, aestus nimius minuitur.

b. *I n d i c a n t i a.*

206.

Exigi hanc curandi rationem, si aestu nimio corpus exercetur, exploratum habemus. Necessitatem vero huius methodi perspiciet, qui secum perpenderit, nimiam virium intentionem, aestu manifestam, pervertere molimina naturae salubria, coctionem ac crisin impedire et in praeceptis nonnunquam aegrum dare, ni eam minuamus. (Cf. *phys.* §. 250. *path. gen.* §. 30. *therap. gen.* §. 29.)

Hinc non solum in inflammationibus activis, dum nondum successiones instant, sed in febribus exanthematicis aliisque ardentibus, continuis, ante ἀκμήν, et in ea ipsa, magni momenti est, methodo antiphlogistica uti, ut naturae vires a turbis nimiae

intentionis deflectantur et crises praeparentur. Eadem enim commoda, quae de humectante methodo et molliente laudavimus, (§. 102.) etiam de hac praedicari possunt.

207.

Nec ad febrium acutarum curationem haec methodus duntaxat commodanda est, sed ad diuturna etiam mala, quae nimia vis sensiferae per calorem intentione exasperantur, inflammationibus abortis vel spasmis vel deliriis etiam. Haec symptomata nonnunquam optime tolluntur refrigerante methodo, dummodo compertum habeamus, calori nimio tribuenda ea esse.

c. Contraindiantia.

208.

Quae supra iam de detrimentis methodi humectantis dicta sunt (§. 104 — 107.), optime et ad hanc methodum applicantur.

Nocet enim, si, neglectis causis et virium ratione, soli caloris minutioni studemus, ubi causas incitantes prius amovere et vires firmare expedit. In febrium malignarum progressu haud continuanda est methodus antiphlogistica, ne vires prosteruantur.

Cum negari nequeat, in calore ipso salubris aliquid esse, cuius ope molimina naturae perficiantur,

166 SECT. II. DE VIRIB. VITAL. MUTAND.

(§. 106.) caloris eius critici indoles curiose investigetur, ne praepostere supprimatur. Verissimum enim est Galeni effatum: „si perfecta quies futura „est, oportere magnam et validam adfectionem prae- „cedere solutioni.“ *) Et antiquus auctor ait: „Ae- „stus et ardorem extremum continere aegrum ad „certum temporis terminum, donec, quae fluere „debent, coquantur et crassiora fiant.“ **)

d. *I n d i c a t a.*

209.

Aestus nimius tutissime minuitur, dum cave-
mus ab omnibus rebus, quae incitare vasa sanguife-
ra valent. Itaque victus rationem, quae sedantem
methodum adiuvat, partim et hic commendare licet.
(§. 198.)

Curiosissime renovandus est cubiculi aër, ne
vel inquinetur vel nimis excalescat. Sicut enim ex-
perientia docuit, aëre corrupto magnopere incitari
febres, ita aërem purum, ob oxygenis adfinitatem

*) Galen. de dieb. crit. lib. 1. c. 1. Χρή, εἰ μέλλοι βε-
βαίως παύεσθαι, μέγα τι καὶ ἰσχυρὸν νόσημα προηγεῖσθαι
τῆς λύσεως.

**) Hipp. de veteri med. Καῦμα καὶ φλογμὸς ἔσχατος
κατέχει μέχρι τινός, μέχριν ἂν τὰ ρεύματα πεφθῇ καὶ γενη-
ται παχύτερα.

erga calorem (*pharm.* §. 258.), mitigare aestum febrilem compertum habemus. Ita et necesse est, stragulis vestimentisque uti cubitoriis, quae minus valeant exaestuare.

Ciborum potuumque et ipsorum medicamentorum insignis vis est, calorem augendi: itaque in his commodandis omnis cura adhibenda, ne ullo modo aestum producant. Levissimis utendum est cibis vegetabilibus, potibusque humectantibus (§. 111.), quique dum leniter alvum ducunt et lotium, calorem minuere valent.

Animi nimia intentio mentisque perturbationes sedulo vitandae, quibus mirum est, quantopere systematis sanguiferi vis sensifera saepe accendatur.

Somnum conciliare saepe prodest, ut calor minuatur: eo enim placari vitae functiones sanguinisque praeprimis impetum sedari exploratum habemus, (*phys.* §. 384.)

210.

Sanguinis impetus, quo aestus cietur, vario modo minui potest. Sine ambagibus id fit venae sectione, aut si topicus aestus nobiliorum partium urget, hirudinibus vel scarificatione. Compescitur tamen etiam sanguinis impetus localis salibus metallicis et plumbi et hydrargyri, qui tum constringere vasa minima tum absorptionem augere valent.

Plumbum igitur aceticum (*pharm.* §. 341.) et hydrargyrum muriaticum mite (*ib.* §. 325.) praestantissimis antiphlogisticis adnumeranda sunt.

211.

Magnum est huius methodi adminiculum in excretionibus promovendis quaerendum. Tum enim amoventur iis incitamenta morboſa, tum, aucta meatuum pervia indole, humorum in vapores transitus augetur, quo facto calor decreſcere debet. Itaque et alvus mollienda eſt et laxanda, lotii fluxus promovendus, cutis demum hactenus mollienda eſt, ut perſpiratio increſcat. Quod cum opio nonnunquam et balneis tepidis perficiatur, quanta his inſit vis antiphlogiſtica, patet.

212.

Id eximie ſaepe iis contingit, quae calorem attrahunt ac ligant. Quibus oxygenes ac acida merito adiudicantur, unde et acida mineralia aqua diluta et vegetabilia ſorbere et ſales etiam neutros, nitrum maxime; blandiores etiam, kali aceticum et tartaricum, tartarum natronatum, et boraxatum, tartarum depuratum et natrum ſulphuricum, aquae copia idonea ſolutos propinare opus eſt.

SECT. III.

DE HUMORUM MUTANDA VEL
COPIA VEL INDOLE.

CAP. VIII.

DE DIRECTIONE HUMORUM MUTANDA.

a. *Modus agendi.*

213.

Ducere humores in averſam partem, maxime vero ab internis ad externa vocare, a ſuperioribus ad inferiora, ſaepe neceſſarium eſt, cum morbi vi nobiliora organa interdum ita obſideantur, ut capitalis fiat morbus, ni hac methodo ſuccuratur. *Revellere* autem, ſeu ἀντιſπᾶν, ex antiquiſſimis temporibus dicitur, qui in contrariam partem ducit, ſi quae, quorſum non debent, feruntur; ſi autem, quorſum decet, his aperit vias, ad quas quaeque vergit materies *). Idem et ἀποκρούεσθαι, ſ. *repercutere*, ab uno loco in varia diſpellere vocabant **). Ratione loci,

*) Hipp. epid. lib. 6. ſ. 2. p. 1170. Ἀντιſπᾶν, ἢν μὴ, ἢ δέ, ῥέπει· ἢν δὲ ὅπῃ δέ, τούτοις δέ, στομοῦν, οἷως ἔχαστα ῥέπει.

**) Galen. ſimpl. med. fac. lib. 5. p. 63.

in quem illiciantur humores, dicebatur ἔλκειν, *trahere, derivare.*

214.

Id autem artis praesidium, ut et vetustatis auctoritate sanctum et quotidiano usu comprobatum, ita gravissimis nititur praeceptis et physiologicis et pathologicis. Cum enim stimulos sequantur humores, a stimulis localibus etiam pendere impetus humorum s. congestiones, certum est. (*path. gen.* §. 77.) Cum praeterea stimulorum duorum eundem organismum occupantium alter duntaxat possit actionem suscitare, alter vero, plerumque debilior, supprimatur aut frangatur (*phys.* §. 71.); artis praesidia eo praecepto fulciuntur, quae stimulo artificiali iubent morbosum suppressere. Accedunt leges antitheseos, adfociationis et sympathiae (*phys.* §. 72 — 74.), quibus nexus organorum stabilitur, quo utimur, dum, altero incitato atque secretionem eius aucta, in altero supprimitur et aboletur morbosa activitas.

His igitur potissimum legibus nitimur, si directionem humorum convertimus in alia loca, quam quae, morbi vi compulsae, petunt. Consensui et sympathiae praecipue studendum est, ut, quatenam loca cum adfectis, vel nervorum vinculis vel simili fabrica cohaereant, pateat. Antagonismo etiam et antithesi opera danda est, ut ad convenientia loca illiciantur, quae nobiliora obsident.

215.

Morborum universalium conversio in locales, utilissima saepè, dum natura eo vergit, hac ratione perpetranda est. Quodsi enim, decrefcente iam universali incitatione, chemicam efficaciam, apertis viis, quod *ποροποιεῖν* Galenus vocabat, augemus, secretion-
nesque novas separare studemus, (*path. gen.* §. 30.) omnino cessat morbus universalis.

b. *I n d i c a n t i a.*

216.

Necessariam esse revulsionem s. *ἀντίσπασιν*, atque ad alia loca *ἔλξιν* s. derivationem, cum nobiliora organa vi morbi obsidentur, per se patet. Oportet tamen distinguere humores irruentes variasque eorum vias observatione cognoscere, ut, quo vergant, quibusque locis vel attrahendi vel evacuandi sint, efficiatur. Sanguinis impetus vel caput vel pectus obruens venae sectione; secretiones morbosae in tunicis viscerum mucosis ad cutis mucosum rete trahuntur; colluvies aquosa in tunicis serosis vel lotio vel sudoribus tollitur.

217.

Itaque in inflammationibus revulsio tentanda, dum singula tantum organa obsidet, dum in tunicis mucosis viscerum sedem habet, quas liberatum iri

Spes est, si in externis tunicis mucosis similes cieamus adfectiones. Rheumaticae igitur et catarrhales inflammationes huic methodo potissimum cedunt.

Nec inutilis est ea curandi ratio, sed summe proficua in iis inflammationibus, quae et ortum et moram vis sensiferae, quae in nervis organicis residet, inaequabili distributioni debent, seu nervosis. Ibi enim, incitatis locis secretioni dicatis, separatisque ope chemicae efficaciae adauctae (§. 215.) non solum revellitur inflammatio a nobilioribus organis, sed universalis morbus etiam decrescit.

Magnopere demum urget necessitas eius methodi, si inflammationes ex adfectu cutaneo suppresso, exanthematibus, sudoribus ulceribusque repulsis originem duxerunt. Nihil tum superest, nisi revellere et ducere humores ad pristinum locum.

218.

Similia indicantia in variis aliis febribus valent. Si quid enim nobiliora organa obsidet, quod vel antea cutem occupaverat, vel facile in cutem ducitur, eo vocare decet. Febres omnes, quae rheumaticis aut catarrhalibus stipantur adfectibus, aut quae *παλίμβολοι* seu vagae ac variae sunt, *μεταβολαῖσι* curari, seu iis mutationibus, quae revulsione nituntur, antiquum est praeceptum *). Hinc *Φοινικμοῖς*

*) Hipp. epid. lib. 6. f. 6. p. 1190.

et vesicatoriis aliisque id genus epispasticis febres curamus non solum rheumaticas et catarrhales, sed nervosas etiam, dummodo incitatio universalis haud adeo conspicua fuerit.

Tempestive autem adhibemus hanc curationem, vel protinus in initio, si nondum penitus formatus morbus omnem infestaverit organismum, aut in decremento, maxime vero post coctionis signa, ubi semet remittit universalis incitatio.

219.

Profluvia sanguinis aliorumque humorum revelente methodo curantur, si ex aliis profusionibus orta plura adferunt damna, quam e quibus nata sunt. Sic haemoptysis ex haemorrhoidibus aut menstruo sanguine percussis orta, revocandum esse sanguinis impetum versus priora loca urget. Pariter etiam alvi profluvia ipsaque dysenteria revulsione curantur, si e suppressa perspiratione cutanea nata sunt.

Praeterea necessaria saepe est revulsio, si profluvia adfectione nervorum sustinentur; quae si *παλίμβολος* est ac modo huc modo illuc vergit, cohiberi potest, cum in organo minus ad vitam necessario secessum chemicum per auctam secretionem promovemus, ut dynamica intentio cesset. (*path. gen.* §. 30.)

Morbi doloribus stipati revellente methodo curantur, si dolores, quibus salubris aliquid inest et critici, ob errorem naturae aut infractionem, in idoneis locis haud perficiuntur, neque in faeces humorum ac morbosas secretiones abeunt. Auxilium ferre naturae expedit, ut devia rursus in rectum tramitem revocetur. In arthriticis adfectibus vulgatissimum est praeceptum: revocandum esse morbum ad articulos, si quid ex iis in interna viscera abscessit: alii etiam dolores nobiliorum partium silent, cum articularis morbus idoneo modo decurrit.

In spasticis adfectibus revulsio tentanda est, si ex adfectibus cutaneis aut perspiratione naturali suppressis orti nobiliores partes obsident. Excitata rursus scabie repersa spasmus silent ex ea nati. Sic tetanus, qui in tropicis regionibus e refrigerio oritur, iisdem remediis curatur.

Spasmi tamen et ab hac causa alieni, ἀντισπασμοί saepenumero rite curantur, dum sperandum est, fore ut aucta per revulsionem chemica efficacia, intentio dynamica morbosa cesset. Salivatione epilepsiam solvi haud novum est: nonnunquam et purgantibus curata fuit: saepius etiam ulceribus et ustione,

quam veteres iam Graeci et Arabes magnopere laudarunt.

222.

Pari ratione et mentis morbi revellentibus curantur: praecipue vero, qui e cutaneis adfectibus percussis ortum duxerunt, scabiei insitae exemplo, qua melancholiam fugatam esse meminimus. Idem morbus, ex impetu sanguinis aliunde caput irruentis natus, venaesectionibus tollitur. (*Aret. cur. chron. lib. 1. c. 5.*)

Nec absolum est, excitatis per alia organa humorum secretionibus sensorium commune liberare. Hinc purgantia fortiora, vesicatoria etiam et quae exanthemata proliciunt, in melancholia commoditates plures imo sanitatem adferre compertum habemus.

223.

Tandem et in variis cachexiis utilissima est revulsio, dum vel incipiens ulceratio viscerum destructionem eorum minitatur, vel colluvies adest aquosa aut lymphatica, dum nondum firmata est, aliorum movenda. In phthisi incipiente fonticuli, cortex mezerei cuti impositus, provocata per unguentum e tartaro stibiato scabies, salivatio ipsa nonnunquam profuerunt. (*Portal mém. sur la nature et le traitement de plus. malad. vol. 2. p. 75.*) In hydropse

incipiente expediunt interdum purgantia, salivatio, exanthemata arte excitata.

224.

In omnibus morbis natura ipsa nos docet productis morbis localibus, quam gravis sit ac necessaria haec curandi ratio.

Inflammationes pectoris natura solvit miliaribus aliisque exanthematibus, erysipelate etiam et diarrhoea (*path. spec.* §. 243); dysenteria cum rheumatismis alternat, ut cessantibus his illa oriatur, curetur vero soluto rheumatismo: eadem vicissitudo exanthematum rodentium et dysenteriae observatur. (*ib.* §. 411.) Arthritidem naturae ope penitus solvi, haemorrhoidibus alvique profluviiis diuturnis, docuimus. (*ib.* §. 457.) Morbos etiam spasticos, epilepsiam praeprimis et hystericos adfectus similibus naturae adminiculis solvi exploratum habemus, ut et ulcera sponte orta et alvi profluvia in epilepsia salubria sint.

c. *Contraindiantia.*

225.

Quae quanquam verissima, plures tamen admittant exceptiones. Primum enim in hoc consilio nihil antiquius et gravius, quam naturae nutibus obtem-

temperare: quo haec vergit, eo humores dirigendi sunt. (§. 31.) Itaque hac abutitur methodo, qui ad libitum plane humores dirigit, neglecta naturae proclivitate, neglecto popularium morborum ingenio. Nonnunquam tamen et ipsis naturae nutibus haud protinus obtemperandum est, siquidem natura molitur saepius, quod artis imitationem respuit. (*path. spec.* §. 372. *therap. gen.* §. 30.)

Peccat contra hanc regulam, qui, secretionem quadam, quae forte salubris est, repressa, aliam, à naturae viis alienam suscitare studet.

226.

Dein prohibetur haec methodus, quamdiu universum corpus incitatione nimia occupatur. In febris acutae vigore et incremento eo minus haec ratio adhibenda est, quo minus semet febris remittit, quoque magis intenditur totum corpus. Differenda igitur est haec methodus in id tempus, ubi, decrescente morbi vigore, natura ipsa proclivitatem ostendit ad adfectus locales.

Pariter etiam inflammatio et dolor et spasmus, quo vehementiores sunt, quoque magis universum corpus in consensum trahunt, eo minus revellente methodo tractantur. Arthritidis activae insultus sibi potius committendus est, quam revulsio tentanda.

Abutitur etiam hac methodo, qui uno eodemque modo revellere humores varios aut derivare studet. Siquidem ingens est discrimen inter blandissimum modum, fluxum menstruum interceptum vaporibus calidis balneisque pedum tepidis restituere ac inter eum, qui scarificationibus aut remediis violentis drasticisque adlicit sanguinem. Expedit, naturam aegroti, morbi ingenium viriumque rationem sedulo comparare, priusquam modum ac rationem revulsionis indicaveris.

d. *I n d i c a t a.*

Fortissimum revellentium remediorum Galenus vocabat venaesectionem, cui sententiae quanquam haud omnino adstipulamur, satis tamen commodum habemus adminiculum, ut sanguinis impetus ex aliis locis in alia dirigatur. In contentionem olim venit acerrimam vis sectionis venarum loco adfecto proximarum; ad dirigendum sanguinis cursum. Namque, qui Hippocratem sequebantur, prope a loco inflammato, venas cubiti secare in pleuritide consueverunt; qui Aretaeum, (*curat. acut. lib. I. c. 10. κρέσσον γὰρ ἀπωτάτω ἄγειν.*) Archigenem (*Aet. tetr. 2- serm. 4. c. 68.*) et Arabes, e remotissimis locis sanguinem mittere maluerunt. Quam litem, seculo decimo

sexto celeberrimam ita optime composuit Argenterius (*comment. 3. in Galen. art. med. p. 415. 420.*), ut primum dispiciendum esse doceret, unde impetus sanguinis in inflammatione venerit: proximam autem eius partis, unde irruerit sanguis, venam secandam esse: si vero proxime a loco ipso adfecto sanguinem miseris, magis etiam attrahes sanguinem. Quod nullibi manifestius est, quam in ophthalmiis. Qui enim hirudines prope ab oculo adfecto admo-
verit, mox animadvertet, inflammationem oculi gravio-
riorem fieri; multo levio-rem vero, imo mox solvi, si e remotis locis sanguinem miserit.

Itaque in vena secanda omnino refert, locum eligere, cum incisio venae liberio-rem adfluxum sanguinis producat: delectum vero venarum ipsarum merito negligimus, utpote cum sanioribus anatomiae cognitionibus haud congruum. Pariter et de scarificatione et de hirudinibus iudicandum, quibus omnino revellitur sanguis a partibus iis, in quas praeter naturam irruit. Maxima autem vis revellendi inest scarificationi, quam ἐγχαρξιν Graeci vocitabant, tum ad inflammationem a loco nobiliori avocandam, tum ad rheumaticos etiam impetus avertendos, tum demum ad restituendum menstruorum fluxum et haemorrhoidum. Egregiam habet haec methodus vim ad instaurandam cutis functionem normalem, si diuturnis laborat exanthematibus; maioribus nostris

fatis commendata, a nostrae aetatis medicis perperam neglecta.

229.

Praestantissimis antispasticis adnumeranda sunt emplastra et unguenta e cantharidibus; quae, dum inflammationis speciem in cute cient, secretionem incitant et per consensum ac antagonismum pravae secretioni in nobilioribus partibus finem imponunt. (*pharm.* §. 149.) Unde proficua maxime sunt in inflammationibus rheumaticis et passivis, in doloribus et spasmis eidem causae tribuendis. Possunt etiam impetum sanguinis a capite avertere, si e causa nervosa ortus fuerit: ubi satius est ea a cute amovere protinus ut *Φοινιγμόν* excitarunt, priusquam vesica sero depravato repleta nata fuerit.

Revulsioni inserviunt et epithemata e radicibus Armoraciae, seminibus Sinapis et Capfici (*pharm.* §. 154.), maxime, si secretionem cutaneam augere minus in animo est, quam, cute irritata, loca nobiliora liberare.

230.

Magna revellendi vis inest purgantibus, quod Galenus de attrahente versus intestina facultate intellexit *). Incitatis intestinis attrahunt omnino humo-

*) Galen. de simpl. medic. fac. lib. 5. p. 64. Πάντα γὰρ ὅσα καθαίρειν κατέλεξα, δύναμιν ἐλκτικήν ἔχει.

res aliorum ruentes, eosque a nobilioribus organis revellunt. Hinc maximi usus sunt in diuturnis morbis a colluvie serosa ortis; in melancholia ipsa capitisque et oculorum adfectibus, a pravorum humorum impetu ortis; in menostasia, ubi ad restituendum menstruum fluxum omnino aliquid conferunt; in morbis cutaneis, ut revellatur a cute, quidquid pravam patitur secretionem. Quantopere juvent plurimas alias aegritudines, Hamiltonius uberrime docuit. (*observ. on the utility of purgative medic. in several diseases, Edinb. 1806.*)

231.

Quemadmodum frigoris vis est maxime repertiens, contractis partibus; ita calor, expansis vasibus ipsisque humoribus, potenter attrahit. *) Utriusque facultatem adhibemus in gravissimis deliriis, quae typhum comitantur, dum aquam frigidam capiti repente infundimus, reliquum corpus vero aqua calida fovemus. Lotio autem manuum pedumque calida praestantissima est ad avocandum e superioribus partibus sanguinem.

*) Galen. l. c. p. 63. "Ελκει μὲν γὰρ αἰὲν τὸ θερμὸν, ἀποχρῶνται δὲ τὸ ψυχρὸν.

CAP. IX.

DE MOTU SANGUINIS HUMORUMQUE ACCELERANDO.

a. *Modus agendi.*

232.

Motus humorum omnis cum a mutua actione fluidi contenti et vasorum continentium pendeat, augendus est et accelerandus iis rebus, quae vicissitudinem utriusque momenti confirmant, vasorumque vires imprimis excitant. Itaque, si ob laxitatem partium solidarum motus humorum tardatur, adstringente; si ob duritiem et siccitatem, molliente; si propter energiae defectum, roborante; si e vis sensiferae torpore, incitante utimur methodo; si denique spasmis forte vasa constricta sunt, paregorica et sedans methodus exigitur. Quibus efficitur, quam varia sit ratio, qua finis huius methodi obtinetur.

233.

Cum stases seu stagnationes dicamus motus humorum iusto tardiores, *resolvere stases* est motus humorum stagnantium accelerare. Itaque de resolventis methodi variis et saepe sibi contrariis modis idem sentiendum. Stases autem eae cum vel in venis, vel in vasis absorbentibus, vel in capillaribus vasis

et in ipsis glandulis praecipuam habeant sedem; in haec omnia organa agi, cum stases soluturi sumus, saepius quoque solam absorptionem promoveri, parum est. (*Cf. path. gen.* §. 80 — 84.)

234.

Exoluit autem nostris temporibus informatio illa resolventis methodi, quae mechanice eam agere comminisceretur. Maiores enim nostri, acicularum figuras in salibus fingentes, incidere hos et findere spissos humores crediderunt; cui commento, quamvis id vulgo medicorum etiamnum placeat, nemo tamen favebit, qui corporis oeconomiam rite cognitam habet.

b. *I n d i c a n t i a.*

235.

Motus tardior cum frequentissimus sit, huius methodi etiam amplissimus est campus, plurimisque morbis aptus, qui e stasi humorum originem ducunt.

Quamlibet in arteriis loci inflammati et vasis capillaribus motum esse acceleratum non dubitem, tardio rem tamen motum sequi inflammationem, nuper e Thomsonii investigationibus curiosis (*lectures on inflammation. Edinb. 1813. p. 80. in Meckels*

Arch. für Phys. i. p. 446.) didici. Itaque et in discutienda inflammatione, maxime si localis fuerit, resolventem adhibemus methodum.

256.

Frequentissima autem sedes stagnantis sanguinis humorumque est in vena portarum, eiusque ramis viscera abdominalia perreptantibus. Quae cum in plurimis morbis accusanda sit, enumerare libet eos, in quorum curatione potissimum resolvendae sunt eae stases abdominales.

Et primum quidem febres intermittentes eae, quae, magis compositae, e stasibus abdominalibus originem ducunt, resolvente methodo tractandae sunt; (*path. spec.* §. 37.) quamvis haec in simplici eo morbo dampni plus quam emolumenti adferat. Febres catarrhales et rheumaticas, dum frequenter recurrunt, ex eadem nasci dispositione docuimus (*ib.* §. 63. 73.): hinc resolvente methodo recte intellecta optime debellantur. Febris lenta nervosa, quae saepe ex atonia viscerum abdominalium et stasibus originem ducit (*ib.* §. 86.), insigne accipit adminiculum ex eadem curandi ratione.

Exanthemata chronica, imprimis scabies et herpes, curari saepius nequeunt sine resolvente methodo, cum e stasibus abdominalibus ortum ducant. (*path. spec.* §. 363. 368.)

Sanguinis profluvia, maxime haemorrhoidum fluxus et metrorrhagia interdum ex eadem causa nascuntur, (*ib.* §. 394. 398.): unde eadem methodus non raro prodest. Frequentius vero sanguinis menstrui suppressio cum stasibus abdominalibus cohaeret: itaque restituit cum fluxum, qui tardum sanguinis motum per vasa abdominalia accelerare potest. (*ib.* §. 441.) In fluore albo curando facillime stasium ratio habenda est, cum quibus consistit. (*ib.* §. 455.)

In arthritide anomala eiusque sequelis ratio praecipue stasium est abdominalium habenda, cum omnis malorum caterva cum hoc viscerum statu cohaereat. (*ib.* §. 459.)

Nec adfectuum nervosorum curatio saepius aliena est. Quippe apoplexia (*ib.* §. 492.), epilepsia (*ib.* §. 530.), hypochondriaci imprimis et hysterici adfectus (*ib.* §. 551.); mentis etiam morbi, maxime melancholia (*ib.* §. 566.) ex illo potissimum fonte manant.

Denique in cachexiis curandis inquirendus praecipue est status viscerum vasorumque abdominalium torpidus, cum quo et colluvies hydropica et phthisis pituitosa ac tuberculosa et scrofulosi adfectus frequenter cohaerent.

237.

Quae sedes stagnationum quanquam frequentissima sit, alia tamen, et satis quidem vulgaris in vasis absorbentibus et glandulis quaerenda est. Earum partium torpor aut spastica constrictio hydropibus et scrofulis atque rachitidi occasionem praebet, quibus igitur resolvens methodus opponenda est.

c. *Contraindiantia.*

238.

Quae si probe perpenduntur, comparata imprimis cum modo agendi exposito (§. 232 — 234.); nescio an unquam, indicantibus rite stabilitis, aliquid huic methodo contrarium esse possit. Neutiquam enim uni curandi rationi adhaeret, qui resolvendas esse stases sibi proponit; sed modo robur amissum restituit, iam laxas partes adstringit aut duras mollire studet, nunc vim sensiferam incitat, mox spasmos sedare satagit: iam metasyncrismum molitur, si labes diuturna est et pervicax; denique interdum *ἀντίσπασιν* in auxilium vocat, ut, aliorum directo humorum cursu, nova suboriatur incitatio.

239.

Circumspectionis tamen curiosae opus est in statibus inveteratis, ne solvantur humores, qui facile

in pravissimam corruptionem mutari possunt. Sicut id praeceptum vel maxime in scirrhusa glandularum duritie valet, ita et commendandum est in iis stasibus, quae per multos iam annos moratae aliter mutari nequeunt, quam in aegrorum perniciem.

240.

Aliud est damnum e male intellecto curationis huius consilio nascens. Qui enim medicamentis, quibus speciatim vim resolventem tribuimus, morbos diuturnos assiduo agitatur, solidarum partium compagem diutino incitantium usu infirmabit, tenebritatemque adeo augebit, ut spastici adfectus saepe numero sequantur hanc curationem.

Prospiciendum etiam est impetui sanguinis in alias partes, qui non raro cum stasibus iunctus est. Temere congestiones exasperat, qui vel resolventibus, quae incitant, vel iis, quae roborant aut adstringunt, stases discutere conatur. Sic haemorrhoidum cursus nimius, sic ipsae metrorrhagiae medicamentis resolventibus in peiorem indolem vertuntur, nisi rationem habueris congestionum versus eas partes; nisi inprimis plethorae commotae obviam iveris. Itaque obstacula huius curationis prius removenda sunt, quam ipsam adhibueris.

d. *I n d i c a t a.*

241.

Ex iis, quae modo dicta sunt, liquet, quam late pateat curationis huius utilitas, quantaque sit praesidiorum varietas.

Princeps autem regula esto: Victus rationem et in hac curatione instituenda multo plus valere, quam medicamenta, tum quia toti corporis constitutioni, mutata penitus victus ratione, aliud impertitur ingenium, tum quia vires, medicamentis, quamvis idoneis, continuo sollicitatae atque infractae, victus ratione servantur.

242.

Exercitatio autem corporis motusque vel activus vel passivus optimum est auxilium, quo motus humorum acceleratur. Frictio tumorum, praesertim medicamenta per strigilim instillata (*Cels.*) in hydrope, oedematibus et scrofulis optimum saepe offerunt auxilium. Nihil aeque iuvat hypochondriacos aliosve, stasibus abdominalibus laborantes ac equitatio: itinera et navigatio magnopere profunt. (§. 139. 198.)

243.

Cum et in cibis magna vis sit, eligendi sunt, quos Celsus e medica materia dicebat, simplices,

concoctu faciles, sine aromatibus exaestuantes parati. Vitanda iuscula carniū nimia, quae mollire potius et relaxare stomachum solent. Commendanda sunt legumina iuniora, feminibus liquorem amnii adhuc continentibus, radices Dauci, Sifari, Tragopogonis, Scorzonerae, ceteraque vegetabilia, quae supra (§. 136.) in roborante diaeta collocavi. Pariter et de carnibus et lactis usu iudicandum. (§. 154. 155.) Insignis vero vis et ovis recentibus et fero lactis inest, quibus stases abdominales solvantur.

244.

In potibus eligendis vinum gallicum rubrum, leve, fragrans ceteris praeferatur; quod cum aqua miscendum, si forte nimis exaestuat. Vitandi liquores spirituosī, vina acida, theae potus, coffeae etiam largus: prohibenda cerevisia, nisi lupulo bene condita ac fermentationem diu iam passa.

245.

Quod medicamenta ipsa attinet, praecipue commendanda sunt, quae extractiva parte vel dulci vel amara gaudent. Illa, radicis graminis exemplo, blandissime solent stomachum et intestina agitare, ut motus humorum acceleretur. (*pharm.* §. 41.) Haec simul roborant potentiusque incitant. Succī recens expressi Taraxaci, Fumariae, Marrubii, Car-

dui benedicti, Trifolii fibrini, Centaurii minoris, aliarumque herbarum verno tempore sumti, quibus interponitur serum lactis, elixiria etiam roborantia, magnam habent vim ad solvendas etiam diuturnas stases. Si defunt succi recens expressi, extracta earum herbarum iungenda sunt, pro varia partium solidarum adfectione vel cum sedantibus, (Asa foetida praeprimis et Castoreo) vel cum resinosis acribus volatilibus (Chelidonio maxime maiori, radice Saponariae et stipitibus Dulcamarae) vel cum sapone aut ferreis medicamentis.

246.

Clysmatum usus quotidianus in his morbis magnas nostra memoria obtinuit laudes. Coquuntur autem e variis herbis, quae vel mollire duntaxat tractum intestinale valent spasmosque sedare, vel leniter etiam incitare ac roborare. Si stricta sunt intestina, spasmisque agitur aeger hypochondriacus, e fursaribus cum seminibus Lini, herbis Verbasci, Althaeae, Mercurialis aut Malvae, additis etiam oleis blandis; si vero viscerum vasorumque torpor vincendus est, ex herbis Taraxaci, Millefolii, Fumariae, Cardui benedicti, Trifolii fibrini etc., additis salibus neutris blandioribus, kali tartarico et acetico, clysmata componuntur. Nonnunquam prodest, et balsamico-adstringentia, ut radicem Caryophyllatae, et aethereo-oleosa, ut corticem Cascarillae, adiungere.

Quod si his remediis alvus et intestina saepius eluuntur, emolumenta plura e proxima admotione eorum ad loca adfecta nascuntur: namque saepius et in intestinis crassis sordes immobiles haerent et in ramis venae portarum haec intestina perreptantibus stiles quaerendae sunt. Praecipua vero spes collocanda est in effectu, quem in nervis intestinalibus producant, quique facillime ad reliquos nervorum plexus propagatur.

Haud tamen negandum est, clysmatum usum quotidianum atque diu continuatum, si e solis molliantibus rebus componuntur, intestina nimis mollire ac debilitare, unde satius est et roborantia addere et clysmatum usum per aliquod tempus interrompere.

247.

Roborantia, balsamico-adstringentia et ipsa martialia in usum vocanda sunt, quoties torpor viscerum laxitasque valorum abdominalium praevalent, cum pituitosa colluvie, flatibus continuis et fluore albo: vitanda tamen in teneritate partium et spastica dispositione. Corticem peruvianum aut glandes quernas magnopere prodesse experientia docuit. Aquae etiam foteriae martiales merito commendantur in ea diuturna laxitate, quae in cachecticum abitura est statum. In ferri ipsius praeparatis officinalibus praestantiora ceteris ad hunc finem obtinendum sunt.

ferrum tartarifatum, malicum etiam et aceticum, aut muriaticum cum baryte muriatico.

248.

Saepius tamen incitantibus, quae proprio sensu ita dicuntur, maior fides habenda est. Eorum autem nonnulla specifica sunt, hydrargyri praesertim muriatici mitis exemplo, quod parvis dosibus exhibitum, systematis absorbentis torporem tollere; absorptionem potenter promovere et stases glandularum referare valet. Barytes etiam muriaticus eidem fini inservit.

Nec sine insigni laude dimittendum sibiium, cuius oxydula, hydrogeni sulfurico nupta, egregiam habent et fere specificam vim ad incitandum motum vasorum lymphaticorum et capillarium. Sulfur sibiatum aurantiacum, sapo sibiatus, calcaria sulfurato-sibiata, sibiium quoque sulfuratum nigrum, in omnibus eiusmodi morbis utilissima sunt: potentissimum connubium sibi cum hydrargyro in pilulis Plumerianis.

Mitior est, neque minus salubris sulfuris usus, quo, maxime si thermis adhibetur, potenter stases et abdominales et systematis lymphatici solvuntur.

Blandum stimulum praebent sapo medicatus et fel taurinum, quae utiliter cum asa foetida et extractis

tractis amaris ad diuturnas stases abdominales resolvendas exhibentur.

249.

Peculiari vi incitante vasa absorbentia gaudet kali carbonicum, quo ad tumores lacteos et hydropicos discutiendos utimur: potentiora sunt et kali et natrum causticum, maxime vero ammonium. (*pharm. §. 277.*)

In salibus neutris insignis spes collocanda est. Alii enim, kali aceticum et tartaricum, tartarus natronatus et boraxatus, blandissimum impertiunt incitamentum visceribus abdominalibus, ut et teneris profint hominibus. Validius agit ceteris ammonium muriaticum, quo egere in stasibus pituitosis resolvendis fere nequimus.

250.

Quodsi torpor adest insignis, nec extimescimus stimulorum fortiorum ancipitem forte usum, graveolentia, ut ammoniacum, galbanum ipsumque opopanaxem adhibemus, maxime ad accelerandum vasorum uterinorum infimique abdominis usum. Tunc etiam vel vomitoriis studemus potenter incitare vasorum systema; vel purgantibus fortioribus intestinorum vasa ita lacerare, ut suppressus sanguinis cursus restituatur: cui fini apta est Aloë, radices

Hellebori, gummi Cambogiae ipsumque Elaterium caute adhibitum.

251.

Quodsi vero spasmis constricta sunt vasa, eamque ob causam motus intercipitur, e narcoticis eligenda sunt, quorum virtutem solventem usus docuit: Conium maculatum imprimis in morbis systematis lymphatici, Laurocerasus in pervicacibus abdominis spasibus. His tamen ne nimium fidatur, cavendum, cum continuatus usus torporem adferre soleat.

CAP. X.

DE HUMORIBUS EVACUANDIS.

Art. I.

De sanguinis missione.

a. *Modus agendi.*

252.

Quamquam sanguinis missionem in causis morborum numerantes, detrimenta eius alibi (*path. gen.* §. 147.) iam perstrinxerimus; hic tamen interest, modum agendi sine therapeutico considerare.

Et primum quidem vulnus, quod venae infligimus, haud sine momento est. Agit id incitamen-

ti loco, unde et derivare et revellere ope venae sectae possumus. (§. 228.)

Dein detracto sanguine, habitualement et necessarium quidem stimulum, quo partes solidae omnes continuo incitandae sunt, minuimus et amovemus. Quo stimulo, si, congesto sanguine in nobilioribus organis, vires solidarum partium opprefferit, detracto, liberatur efficacia, ut ad functiones normales redeat. Si autem vel reiteratur, vel nimia copia educitur sanguis, incitamento necessario detracto, efficacia labascit, protinus vi sensifera magis incitata (*path. gen.* §. 54.), ut et teneritas augeatur et dispositio ad spasmos oriatur et secretiones, maxime bilis, pervertantur et motus sanguinis praeter naturam acceleretur, volumen eius pandatur, plethora spuria subnata. (*path. gen.* §. 73.) Denique vero cum energia vis sensifera ipsa prostermitur, ut musculorum vires hebescant et nervorum, nutritio turbetur et totum corpus in cachexiam pronum fiat.

Itaque, si quando sanguinis missio artis praesidium sistit, contingit id, tum incitamento derivato aut revulso; tum liberatis partibus ab opprimente sanguinis irruentis incitamento; tum denique momento vis vitalis irritabili infirmato, si quando id nimis lacessitum est.

b. *Indicantia.*

253.

Solent, qui de sanguinis missione agunt, eam praecipere in plethora vera, quam e nimia vis vitalis energia cum vere abundante sanguinis copia proficisci statuunt. Cum vero rationem potius laesam esse inter copiam sanguinis et partium solidarum vim, dissidium adesse inter sanguificationis facultatem et consumptionem sanguinis, probaverimus (*path. gen.* §. 71.), nequaquam plethora per se, etiamsi vera fuerit, sanguinem mittendum esse iubet. Namque, quamvis sanguini aliquid detrahatur, minuitur tamen simul vis vitalis, amissaque cruoris portio facile restituitur. Itaque Galeni praecepto potius obtemperandum: „Satius est abstinere, ne vis vitae solvatur quam sanguinem mittere, etiamsi sanguis abundet.“ (*comm. 1. in Hipp. de vict. acut.*) Melius est, penum minorem sanguini parando praebere, exercitatione autem corporis consumptionem generati sanguinis promovere, quam vires sanguine misso debilitare.

254.

Nihilominus plethorae ea ratio, quam commotam diximus, quaque, irruente sanguine in partes nobiliores, hae obruuntur, ut functiones pervertan-

tur ac supprimantur, verissime et urgentissime indicat venae sectionem.

Quod ut rite intelligatur, necessitasque venae sectionis luculenter pateat, dispositio et causae praegressae ante omnia considerandae sunt. Si quis enim vegeta aetate floret, cibus valentioribus nutritus, bonaque digestionem conspicuus est, iam vero ex aestu insolito aut frigore in inflammationem incidit, aut si apoplexia e suppresso fluxu menstruo in muliere nascitur, αἰμόφοβος esto, qui sanguinem non detraxerit.

Maxime vero popularium morborum ingenium lucem foenerare valet. Vernal tempus, inflammatoria constitutio poscunt venae sectionem, nisi graviora repugnent. Id vero popularium morborum ingenium cum, *novae febris ingressu*, saepius statim haud innotescat, necessarium est interdum experimentum in sanguinis missione cautissime instituentum. (§. 3.)

255.

At vero accidit nonnunquam causas latere: unde, quae nec unquam negligenda sunt, symptomata in censum veniunt. Solent pulsus plenus fortis ut indicans sanguinis mittendi praedicare: non desunt etiam, qui eo usque sanguinem detrahendum esse praecipiant, donec pulsus haec indo-

les semet remiserit. Quod praeceptum quamvis ex toto taxandum sit, si modo reliqua respondent; nequaquam tamen curatio haec ad pulsum eam indolem finienda est. Non raro enim pulsus mollissimi sunt in vera pulmonum inflammatione, (*path spec.* §. 239.) in apoplexia, quae sanguinis missionem etiam atque etiam poscit, pulsus intermittentes sunt. (*ib.* §. 486.) Cognitis rite causa et morbi indole, curandi ratio neutiquam deferenda est ob pulsum oppressum: contingit enim saepius in altum denique extolli, postquam sanguinis debita copia evacuatâ fuerit.

256.

Sanguinis e vena missi indoles ac proclivitas in secessum particularum propiorum habetur indicans repetendae huius curationis. Quo densior enim est crusta phlogistica, eo magis urgere dicitur venae sectio. Quod quamvis generatim negare haud audeamus, ex iis tamen, quae de fortuitis causis crustae phlogisticae monuimus (*path. gen.* § 90.), efficitur, tantum abesse, ut in hac sanguinis missi indole acquiescere possimus, ut potius et sine ea sanguinem mittere et, si quando post nimios corporis motus orta fuerit crusta phlogistica, cavere a repetitione eius debeamus.

Ut, quae generatim dicta sunt, singulatim illustrentur, *inflammatio* primum indicat sanguinis missionem, si vere activa fuerit, si febre comitata, si organa vitalia occupat, si, recens orta, nondum proclivis est in successiones, si corpus robustum male habet et e suppressis cursibus sanguinis orta est, si popularis morbi ingenium activam eam signat. Pulsui minus fidendum, quam symptomatum gravitati, doloribus in pneumonia atrocibus, spiritus difficultati, anxietati et pectoris oppressioni. Saepe in morbi ipsius augmento, si pulsus etiam exiles sunt et contracti, si facies pallet, membra frigescent, aegerque summam queritur debilitatem, repetitis venae sectionibus salus recuperatur, dummodo compertum habeamus, inflammationem vere esse activam et popularem constitutionem nequaquam esse adversam. Animi defectiones per se detertere nequeunt, cum saepius ex obrutis partibus nobilioribus originem ducant. Qui sedentes sanguinis missionem absque animi deliquio haud patiuntur, dum cubant, multo maiorem sanguinis copiam animose fundunt.

Nec nimis anxie causis inhaerendum, si gravitas symptomatum ac periculum pluris habenda sunt. Si quis enim, vino lustrisque confectus hepatis inflammatione corripitur, summa inflammationis vehementia febrisque continuae atrociam omnino nos cogit

ad venaesectionem, quamvis caussae praegressae vires vitales potius infregerint. Qui frigus debilitantibus adnumerant caussis, reiicient forte venaesectionem in magnis frigoris conclamati noxis, ubi tamen prodesse meminimus.

Nec temporis morbi nimis curiosa ratio habenda est. Generatim quidem monitum valet, quo praecocius in inflammationibus sanguis mittatur, eo meliorem praestare effectum; sed absolum esset, intra dierum aliquot limites constringere hanc curationem, cum saepe et in progressu inflammationis symptomata omnia praesto sint, quae sanguinis missionem indicant.

Solent quidem inflammationes rheumaticae originis ac catarrhalis alienas putare a sanguinis missione: nec repugnamus, si vere passivae sunt. Attamen vidimus in catarrho epidemico, qui ex oriente 1782, 1788 et 1803 per totam fere Europam grassabatur, (*path. spec.* §. 58.) pulmonum inflammationes nonnisi venaesectione posse compesci. Idem valet et de rheumaticis inflammationibus, quae interdum hactenus ardente et continua febre stipantur, ut sanguinis missio fere unicum sit auxilium.

Nec dissuadeant medico hanc curationem symptomata forte biliosa, quae ad inflammationem, praecipue pulmonum accedere solent. (*path. spec.* §. 240.) Ea enim, a violentia inflammationis nata

minuuntur et evanescunt, si sanguinis impetus arcetur.

258.

Haudquaquam opus est, vera ubique adsit inflammatio, dummodo impetus sanguinis functiones necessarias supprimat et periculum minetur.

In typho ipso epidemico et contagioso, quamvis initio larva inflammatoriae febris indutus observetur, ubi anceps, imo magnopere noxia est venae-sectio, obveniunt tamen casus, ubi, propter habitum aegri summe plethoricum, impetum sanguinis versus encephalum periculosum necessaria est haec curatio. Ita omnino fuit in eo typho, quem post clades Gallorum teterrimas in Russia et Germania 1813 per totam Germaniam observavimus.

Nec febres putridae omnino alienae sunt ab hac curatione, cum initio saepe ardentes sint et inflammatoriis simillimae (*path. spec.* §. 99.). Itaque et protinus in initio utilissimam esse venae-sectionem Jacksonius (*on the fevers at Iamaica*, p. 223.) et Pringlius in febre castrensi, dummodo robustus fuerit aeger et initium febris inflammatoriae simile, (*diseas. of the army*, p. 270.) observarunt. Nec in peste ipsa taxanda est venae-sectio, dummodo sanguis in nobilia loca irruens periculum minetur. Sic Rufelius neque bubonum, neque aliorum forte exanthe-

matum eruptionem adversam esse huic curationi statuit. Metuisse se refert initio a pulsus remissione et debilitate mox post venam sectam periculosa symptomata, sed postea invenit, hanc pulsus debilitatem necessario cohaerere cum ipso morbo, neque praecocius accidere, si vena secetur, quam si haec omitatur curatio. (*von der Pest*, tom. I. p. 171.)

Febres intermittentes interdum, si verno tempore et favente epidemica constitutione subcontinuae fiunt, impetu sanguinis caput aut pectus vehementer obruente, aut si ex haemorrhoidibus menstruoque fluxu suppressis originem ducunt, nonnisi sanguinis missione ad sanitatem perducuntur. (*Stoll rat. med. vol. 4. p. 493.*)

Ita et in exanthematicis febribus tanta interdum est sanguinis nobilia organa obruentis vehementia, ut, nisi cohibeatur, non solum exanthematum eruptio et perfectio impediatur, sed summum etiam periculum nascatur. Scarlatinae autem curatio multo tutior nostris est temporibus, ex quo hanc medelae rationem simul cum antiphlogisticis remediis apte adhibere didicimus. Et in ipso secundario morbo, leucophlegmatia calida, praesidio est venaesectio, cum a partibus nobilibus capitales avertat inflammationes.

259.

Sanguinis prefluvia indicant venaesectionem, si vel ex orgasmo universali orta partes vitales infe-

stant, vel a suppressis aliis originem ducunt. Sic in haemoptysi sanguinem mittere opus est, si homines ea laborant aetate florentes, sanguinis abundantiam alioquin iam perpassi; si e vulnere aut percussione thoracis sanguinis profluvium ortum est; si interceptus est fluxus haemorrhoidalis aut sanguinis menstrui cursus. Ipsa metrorrhagia postulat nonnunquam sanguinis missionem in feminis robustis, quae iampridem sanguinis abundantia laborarunt.

260.

In dysenteria populari proficuum imo expeditissimum interdum praesidium peti e sanguinis missione patet, si vernales epidemias contuleraveris. Hae enim utique in inflammationem pronae, paucas sanguinis meri deiectiones adferunt, summos vero dolores, tensionem abdominis dolentissimam, sitim extinguere nesciam, aliaque eiusmodi symptomata, quae ni inflammationis praesentiam, magnam tamen proclivitatem ad eandem notant. (*path. spec.* §. 413.) Puerperae, e lochiorum interceptione, in eundem morbum incidunt, nec averti exitium, nisi sanguine audacter misso, potest.

261.

De morbis nervosis per sanguinis missionem curandis magna est contentio. Magnopere fallacem arbitror indicantium vulgarium catervam, quae in apoplexia

ex habitu petuntur. Namque, qui faciem venasque sanguine turgentes solummodo crederent sufficere, ut sanguis mittatur, nesciisse videntur, cum eodem externarum partium turgore posse vel serosam ventriculorum cerebri colluviem vel verum vasorum collapsum una adesse; contra vero, cum inundatione encephali cruenta interdum pallorem faciei iungi. (*path. spec.* §. 438. 491.) Itaque potius ad causas praegressas, ad diathelin aegri et aetatem respiciendum est, si tuto hanc administrare curationem cupiveris. Aetate enim confectos plerumque sanguinis ipsius colluvie apoplecticos fieri, ideoque sanguinem mittendum esse, praesertim si ante e naribus stillaverit, compertum habemus.

262.

Quamvis morbi spastici ut plurimum sanguine detracto exasperentur, in variis tamen capitalis instat impetus sanguinis in organa vitae praeposita, quem avertere vena secta fas est. In tetano, „si „plurima fuerit in venis plenitudo phlebotomiam adhibebat Asclepiades in ipsa vehementiae summitate.“ (*Cacl. Aur. acut. lib. 3. c. 8.*) Adsentitur Hillarius, cum inflammationis metus saepius adsit. (*Krankh. von Barbadoes*, p. 282. 283.) Epilepsiam methodici sanguinis missione temere adhibita curare satagebant: (*Cacl. Aur. chron. lib. 1. c. 4.*) et ipse cautissimus Aretaeus, propter gravissimum sanguinis impetum in

caput, venas secandas esse iubet: prohibens tamen, ne ad animi deliquium usque sanguis mittatur: πρόκλησις γὰρ τοῦ πάθους λειποθυμία (*Aret. cur. chron. lib. 1. c. 4.*). Nostreis utique temporibus iugularium venarum sectio in morbi comitialis insultibus perniciosius salutaris existimatur.

263.

Quinetiam melancholia, etiam si incauta sanguinis missione ita exasperatam vidimus, ut in maniam capitalem abiret, haud penitus tamen huic curationi repugnat. Siquidem nascitur saepius e lochiis, haemorrhoidibus, menstruo sanguine suppressis: natura ipsi medetur haemorrhoidum cursu, varicibus ruptis aliisque sanguinis fluxibus. Hinc e pristinis inde temporibus (*Aret. cur. chron. lib. 1. c. 5.*), si e similibus causis natus fuerit morbus, venam audacter secare medici consueverunt.

264.

In hygrophobia defendi posset venaesectio, quod nervorum tunicas inflammatas deprehendimus. (*path. spec. §. 535.*) Nec sine exemplo antiquitatis anceps haec est curatio, cum iam Eudemus eam administraverit. (*Cael. Aur. acut. lib. 5. c. 16.*) Ob pulsum fortissimum Hartleyus iam intra paucos dies centum et viginti uncias sanguinis detraxit, sine omni alio remedio, nisi balneis frigidis adhibitis,

quo facto aeger perfecte convaluit, etiam si iam pathognomica adfuissent morbi symptomata. (*Leske's Ausz. aus philos. Transact. vol. 2. p. 265.*) Ad lipothymiam usque Peterfius sanguinem detraxit, additis remediis antiphlogisticis. (*ib. vol. 3. p. 187.*) Tiltonii (*Medic. Comment. von Edinb. vol. 6. p. 448.*), Hilarii (*Krankh. von Barbado. p. 318. 324.*), Nugentii (*Versf. über die Wafferfcheu, p. 10.*), Bartonii (*med. and physf. journ. vol. 14. p. 123.*) aliorumque nuperiorum experientia salubris effectus huius curationis in tam capitali morbo confirmatur.

265.

Num in phthisi pulmonali sanguinem detrahere expediat, deliberatione indiget. Namque, quamdiu florida est, dolores sunt acuti, febris subcontinua, habitus plethoricus; cum maxime intercepti sunt sanguinis fluxus, saluberrimum est hoc praesidium, quo saepe avertere ulcerationis initium possumus. In progressu vero morbi, volumine sanguinis panko et plethora spuria orta fallitur saepius medicus, detractoque sanguine vires infirmat.

Tandem et in hydropibus prodest venam secare, si venarum turgor compresserit vasa lymphatica, eoque modo absorptio impedita est. (*path. spec. §. 578.*) Itaque iam Hippocrates (*vict. acut. p. 405.*), si anni tempus, aegri aetas et constitutio id iulle-

rint, venam brachii in hydrope secat. Et Io. Actuarius (*meth. med. lib. 4. c. 7.*), si menstruus fluxus aut haemorrhoidum suppressi fuerint, eandem suadet curationem, quae in hydrocephalo etiam utpote ex inflammatione oriente, interdum initio proficua fuit.

c. *Contraindiantia.*

266.

Utilissima haec curandi ratio quot quantasque sanitati noxas adferat, in superioribus (*path. gen. §. 147.*) exposuimus. Inde sequentium contraindantium veritas elucebit.

Primum autem damnanda omnino sanguinis missio, quae sine urgentibus indicantibus administratur. Etenim, ut cum Aretaeo loquar, τὸ αἷμα ἐστὶ τῆς φύσεως ὁ χῶρος καὶ ἡ τροφή, seu, ut nos saepius iam probavimus, est et stimulus universalis, necessarius ac habitualis, quo partes omnes indigent, functiones suas rite perpetraturae: est et alimentum atque materies, e qua omnes alii humores parantur. Itaque sanis interdicens est sanguinis missio, quam nonnulli ad praecavendos morbos commendant. Tantum autem abest, ut morbi epidemici ea curatione avertantur, ut potius, infractis viribus et receptivitate aucta, multo citius hominem corripiant. Negari nequit, si verno tempore aër incalescit, san-

guinem humanum etiam in maius pandi volumen, venas turgere, capitis saepe dolores, cordis palpitationes oriri, quibus adfectibus mederi se posse nonnulli existimant, si sanguinem miserint. Satius autem esset, alimenta vitare, quae corpus faciunt, potus, qui exaestuans, exercitationibus corpus fatigare, ut partes solidae firmentur.

Sunt caussarii homines, stasibus abdominalibus tarsoque sanguinis per venam portarum motu laborantes, qui, dum praeprimis sedili indulgent, palpitationibus cordis, pulsu pleno et forti, capitis aestu et doloribus variisque id genus adfectibus conflictantur, quos sanguinis missione compescere credunt. Multo tutius ii consulunt sanitati, si corpus exercent et resolvente methodo utuntur.

Gravidae etiam creduntur, propter cessantem menstruum fluxum, plethora laborare, cui per phlebotomiam minuendae studendum sit. Quanquam non inficiamur, in robustis mulieribus, quae et sanguine abundant et epulis delectantur, venaesectionem quandoque utilem esse ad praeventendum partum difficilem ipsamque peritonci inflammationem: multo frequentius tamen nocet, detracto fetui alimento, unde pallidi imbecillesque infantes gignuntur. (*Thebesius in nov. act. nat. cur. vol. 1. obs. 15, Cf. path. gen. §. 147.*).

267.

Dein probe cavendum est, ne levamen, statim post venam sectam sentitum, tanti credatur, ut curatio ea salutaris habeatur. Id enim satis vulgare est, humorum evacuationes, etiamsi haud indicatae fuerint, levaminis tamen nonnihil protinus adferre, quoniam liberantur partes stimulo obsidente. Contra vero venae sectio, etiam urgentissime indicata, saepe nihil levaminis adfert, priusquam repetita fuerit.

268.

Repugnat venae sectioni aetas infantilis, quoniam τὰ ἀνέχονόμενα πλείστον ἔχει τὸ ἐμψύχον θερμὸν, πλείστης οὖν δεῖται τροφῆς. (*aph. i. 14.*) Nec facile senibus, nisi necessitas urgeat, vena secanda, quoniam naturaliter sanguinis copia aetate decrevit.

Clima etiam aestuosum omnino adversarium est venae sectioni, unde veteres, qui in Aegypto medicinam et fecerunt et docuerunt, maxime Chrysippus Cnidius, Erasistratus et Strato Berytius, hanc curationem penitus reiecerunt.

269.

Virium ratio circumspectissime consideranda est, si venam secare in morbis volueris. Inflammationes enim mere passivae, ab inaequabili vis sensiferæ distributione ortae, tantum abest, ut vena secta tol-

lantur ut potius in pessimos exitus perducantur. Sic etiam inflammatio, quae ad cachecticum statum accedit, neutiquam hac curatione tractanda est.

270.

Morborum ingenium cautissime dispiciendum est, ne fallacia symptomatum nos ad perversam seducat curationem. Bilis aliorumque humorum turgor impetum sanguinis saepe versus nobiliora organa pellit, qui longe alia curatione ac venaesectio-
ne tollitur. In febribus nervosis et morbis spasticis orgasmus insignis tantum abest, ut sanguine detracto cohibeatur, ut spasmi plerumque magnopere exacerbentur ea curatione. Itaque cautissime examinanda est ratio spasmorum et nervosorum adfectuum, cum eos nonnunquam tamen ex inflammatione aut orgasmo saltem proficiscentes omnino possis sanguine e vena millo debellare. (§. 271. f.)

271.

Tempus morbi praeprimis attentionem meretur. Inflammatio si iam in successiones proclivis est, si suppurationi proxima aut ipsi ulcerationi, nequaquam sanguinis missione tractanda est, sed quae crescit, viget et in *ἀνμῆ* versatur. Ibi caute administrata transitum in resolutionem seu discussionem optime promovet.

272.

Copia sanguinis e vena mittendi morbi ingenio et gravitati, virium etiam rationi respondeat. In inflammationibus activis, violentis; in apoplexia gravissima duodecim aut viginti uncias detrahimus: minorem copiam in morbis, qui haud tantopere urgent, aut ubi viribus magis parcendum est. Sic sex aut octo unciae in febribus nervosis sufficiunt.

Quodsi minor copia exigitur, hirudines etiam apponuntur, quarum binae, si esuriunt, unciam unam sanguinis vorare consueverunt. Sex igitur, octo aut duodecim requiruntur, ut e. g. encephalitis in febre nervosa instans avertatur.

Art. II.

De mutandis, quae praeter naturam in primis viis haerent.

a. G e n e r a t i m.

273.

Chemicas omnino mutationes earum rerum contingere, quae vel praeter naturam et humoribus gastricis et intestinalibus, ciborumque reliquiis generatae, vel quae ut peregrinae in stomachum et intestina ingestae sunt, nemo negabit. Etenim et aco-
ris primarum viarum subactio ope absorbentium al-

calinorum terreorumque, et bilis concretæ solutio, maxime vero venenorum curatio absque chemica mutatione cogitari nequit. Ita autem in ventriculo primisque viis haerent, ut proxime eas attingere medicamenta possint.

Alia vero sunt morbo vel causis prægressis producta, quæ serdes dicuntur, tum e ciborum reliquiis tum ex ipsis humoribus inquilinis generatae. Eae haudquaquam mutantur, nisi ratione virium has partes regentium mutata. Coctionem completitur haec curatio, seu modum, quo sordes firmiter parietibus adhaerentes nimisque secum cohaerentes ad evacuationem proclives redduntur. Quae quidem dynamica methodus nequaquam negligenda est in ipsa chemica mutatione, utpote quae saepe simul a debilitate aut perturbatione vis digestivæ pendet.

b. De succi gastrici pravitatibus corrigendis.

274.

Duplici potissimum modo succus gastricus corrumpitur; vel acescit, vel putrescit. Utrumque vitium vel ex ingestis, quæ acorem aut putredinem gignunt, vel e perturbata nervorum gastricorum efficacia exponendum est. Plerumque vero, etiamsi e ciborum qualitate lucem accipiat, comitatur tamen acrimonia acida saltem et graviditatem et arthri-

tidem anomalam et hystericos adfectus ac hypochondriacos, ut perinde sit, quid comederint aegri. (*path. gen.* §. 248.) Putredinis autem ortum fere semper a vitiata virium ratione nasci, monuimus. (*ib.* §. 94.)

275.

Itaque, si pyrosi adfcitur aeger, occurritur quidem tempestive magnesia, kali carbonico et natro, calcaria etiam e lapidibus cancrorum concharumque testis. Saepissime tamen haec non sufficiunt, cum ilico recurrat acor, ut vegetabilia in eum prona comesta fuerint. Addenda igitur sunt ea, quae fugacissimo stimulo sedant, aut incitant etiam vires stomachi, ut regularis moderataque actio nervorum restituatur. Olea aetherea fragrantia, fructus et radices ea continentes (calamus aromaticus, fructus carvi, coriandri, nux moschata: Chenopodium ambrosioides: Mentha crispa et piperita) multo tutius acrimoniam succi gastrici acidam domant, quam terrae et alcalina. Amara quoque (fel taurinum, centaurium minus, carduus benedictus etc.) et balsamico - adstringentia (Thea Bohea, radix caryophyllatae, ipseque cortex peruvianus) utiliter ad eundem finem adhibentur. Hystericis mulieribus confert plerumque asa foetida aut castoreum cum felle taurino.

Putredo succi gastrici, quae initium februm putridarum constituere solet, chemicam omnino admittit curationem. Carbonem enim (*pharm. §. 300.*): acidum carbonicum, in fontibus medicatis naturaliter contentum, aut e rebus fermentantibus, potione Riveriana et mixtura Hulmiana eliciendum (*ib. §. 265.*); acida alia vegetabilia, tamarindorum maxime et citri, quibus nonnulli sales neutros et ipsum culinarem admiscunt, (*ib. §. 287.*) putredini chemico modo resistunt. Quod et de mineralibus contendere posset, si dynamica eorum, maxime acidum muriatici, actio magis conspicua esset. Ipsi etiam acidis vegetabilibus, ut melius in vires agant easque refocillent, admiscuntur leniter aromatica. Mixtura sulfurico-acida et elixirium acidum Halleri saepe multo potentius putredinem arcent, quam acida simplicia.

c. *De concretis bilis solvendis.*

Calculos biliares ex atonia viscerum digestionis interservientium et torpore venae portarum oriri probavimus. (*path. gen. §. 111.*) Neque tamen eo minus chemica eorum mutatio contingit, si intestini quodeni partem eam occupant, ubi proxime in eos agere medicamenta possunt. Oleum terebinthinae

cum aethere sulfurico mixtum peculiari ea vi gaudere, ut calculos huius generis solvat, iam monuimus. (*pharm.* §. 119.) Idem et de spiritu terebinthinae cum spiritu nitrico - aethereo mixto valet.

d. *De peregrinarum rerum et venenorum fontica qualitate compescenda.*

278.

Peregrina, quae praevalente quodam elemento noxios effectus producant aut destruunt etiam partes vitales, ita generatim tractanda sunt, ut tum fontica eorum indoles protinus corrigatur, tum partes custodiantur, tum denique quam ocyssime eiiciantur. Ultima quidem indicatio ubique locum obtinet, si statim post ingestas eas res ad aegrum accedimus. Custodiuntur partes mucilaginosae, gelatinosae et albuminosae, oleosae etiam et lacte uberrime ingestis. Haec etiam sola sufficiunt ad subigendos acrium resinarum effectus.

279.

Oxyda metallorum et sales eorum ingesti, iis vincuntur, quae oxygeni libero resistunt. Ei autem fini inserviunt praecipue sulfur, kali sulfuratum, calcaria sulfurata et liquor ammonii sulfurati, thermae praecipue, quae sulfur continent. Haec omnia et plumbi et hydrargyri oxyda optime reducere

fonticosque effectus arcere valent. Subii quoque oxydulati connubia cum sulfure, utriusque metalli oxydati noxiam qualitatem emendant. Novissime et ferrum in morbis ab hydrargyrosi ortis conferre observatum est. (*pharm.* §. 355.)

Arsenico contrarius est sapo medicatus: narcoticis venenis resistunt acida, praesertim vegetabilia, quae igitur largis dosibus acetii, fructuumque boraeorum ingerenda sunt. His autem, quae acido borussico scatent, ammonium mederi, nuperà Vindobonensium medicorum experimenta docere videntur.

e. *De flatibus pellendis.*

280.

Flatuum, seu spirituum in intestinis collectorum, ortum e suppressis aut labefactatis intestinorum viribus exposuimus. (*path. gen.* §. 248.) Hinc igitur, quanquam haud plane negemus, chemico modo posse flatus coërceri, ea tamen curandi ratio tum multo plus negotiū facit, tum generationem spirituum novam praepedire nequit. Gas carbonicum, si quando in stomacho intestinisque elicitur, magnesia usia et aqua calcis; gas hydrogenicum carbonibus; gas oxydatum azoticum calcaria potenter absorberi dicuntur. Quae remedia, si forte cum effectum producant, nunquam tamen tanta

copia ingeri possint, ut omne flatuum volumen absorbeant.

Multo satius est, causas spirituum intra intestina collectorum amovere, eoque modo flatus ipsos pellere. Sordium copia ingens, quae saepe vires intestinorum supprimit, ut flatus gignantur, iis educenda est, quae alvum moliantur, admixtis, quae spasmos sedare leniterque firmare intestina possunt. Rhei radix cum aromaticis, calamo maxime aromatico; sales neutri cum infuso chamomillae; tartarus depuratus cum cortice aurantiorum egregie saepe opitulantur. Clysmata praecipue prosunt ex aromaticis, alvum mollientibus et spasmos sedantibus composita.

Quodsi hernia constricta est, mechanicis prius et idoneis aliis remediis ea constrictio laxanda est, quam ad flatuum ipsorum curationem processeris.

281.

Quae dicuntur *physagoga*, aut barbare, *carmiativa*, pleraque aromatica sunt, oleo aethereo extractoque amaro praegnantia, quae tum suavem fugacemque nervis impertiunt stimulum, quo spasmi tolluntur, tum roborant intestina, ut inaequabilis vis sensiferae distributio cesset. Celeberrima sunt cortices aurantiorum; fructus cardamomi, coriandri, carvi, foeniculi, phellandrii; herbae menthae

piperitae et crispae, Melissae, Chenopodii ambrosioidis; radices calami aromatici, angelicae et zedoariae: ipsa etiam graveolentia, asa foetida, castoreum, valeriana, millefolium et absinthium. Quinetiam fugacissimus stimulus spirituosorum spirituumque aethereorum, si torpent intestina, flatus pellere valet.

Externis quoque irritantibus expelli posse flatus, si pertinaciter regenerantur, patet e moxae usu apud Iaponiae Chinaeque incolas, quo colicas flatulentas citissime et tutissime curant, (*Hallmann in Thunberg diff. bot. vol. 1. p. 170.*) Veteres cucurbitas siccas abdomini imponere, recentiores etiam emplastra vesicatoria adhibent, ut torpor intestinorum tollatur. (*Medic. Comment. v. Edinb. vol. 9. 1. p. 82.*)

f. *De vermibus enecandis.*

282.

Quamlibet haud inficiemur, nonnullis remediis inesse aliquid specifici, quo vermes intestinales interimantur; Stanni limati exemplo, extracti nucum iuglandum et seminum fantonici; pleraque tamen anthelminthica eo potissimum valent, ut intestina incitando, pituitam solvant atque educant, quae vermium, maxime lumbricorum, sedes est: non-

nulla etiam spasmos simul compescunt aut robur partium augent, quo nova pituitae generatio impeditur. Insignes ferrum meruit laudes, pares fere cortex peruvianus, quorum neutrum, nisi firmatis intestinis, agere potest. Gummi contra cambogiae, aloë, hydrargyri praeparata pituitam educunt, vermibusque eripiunt alimentum. Asa denique foetida, valeriana oleumque animale, quae nonnulli specifica habuerunt, spasmos sedare, adeoque normalem restituere virium rationem valent,

g. De coctione promovenda.

283.

Cruda dicebantur maioribus nostris ea, quae, perversa quidem secretionem generata partibus tamen continentibus adeo firmiter adhaerere videbantur, ut naturae vi minime possent educi, sed incitamento suo praeternaturali etiam magis turbarent vires spasmosque adferrent. Hinc Galenus impactos dicebat et ut ita quis dicat incuneatos eiusmodi humores. *) Coctionem autem vocabat mutationem eam, ope naturae virium perfectam, qua ad σύμμετρον κρᾶσιν, ad mitiorem et tenuiorem aut spissiore etiam indolem converterentur. Ea igitur mutatio versatur tum in

*) De causis. sympt. lib. 3. c. 5. Ἐμπεπλασμένοι καὶ ὡς αἱ εἴποι τις, ἐσφηνόμενος ὁ λυπῶν χυμὸς.

demta acrimonia, tum in attenuato eo, quod nimis cohaeresceret, tum in conspillando, quod nimis tenuae esset et fluidum *).

Quodsi nos, generatim hanc informationem stabilientes, cruditatem diximus deflexum summum a normali virium aequabilitate, coctionem autem, inclinationem morbi, seu remissionem eam, qua sensim aequabilis virium ratio restituitur (*path. gen.* §. 120.); coctionem etiam sordium ita promovemus, ut molliente methodo et humectante nimiam fibrarum tensionem tollamus faciamusque εὔροα omnia, quibus natura aliquid educere potest; ut sedante methodo spasmos, remissioni contrarios, compescamus; ut incitantibus denique secretionem corrigamus. Itaque, quam varia sit haec curandi ratio, patet.

284.

Coctio sordium gastricarum et intestinalium saepe sola methodo antiphlogistica, humectante et molliente perficitur, si sanguinis orgasmus, febris valida cum cute arida, lingua sicca et partium omnium solidarum magna intentione iungitur. Venaesectio-

*) Hipp. de prisc. med. p. 15. Πέσσεσθαι καὶ μεταβάλλειν, καὶ λεπτύνεσθαι καὶ παχύνειν, δια πολλῶν εἰδῶν καὶ παντοίων. . . Ὅσῳ ἂν πλέοσι μίσγῃται, τοσούτῳ ἤπιότερα καὶ βελτίονα.

nem ipsam praemittere in plethoricis, febribusque ad inflammationem pronis, opus est. Ad haec portiones refrigerantes, acidulae aut e salibus neutris, parca dosi exhibitis, profunt. Sufficit saepe kali aceticum aut tartaricum aqua pura solutum exhibere. (§. 201. 210.)

285.

Coctio sordium gastricarum, dum spasmi corpus infestant, promovetur nauseosis, seu exiguis dosibus eorum, quae vomitum cient, praesertim ipecacuanhae, cui addere pauxillum opii iuvat. His quoque adnumeranda sunt, quae fugacissimo stimulo remissionem adductura sunt: spiritus aetherei, radix valerianae. Denique etiam zinci oxydum et morphium et opium ipsum, prout aegritudinis ratio singula postulat, in auxilium vocanda sunt.

286.

Quodsi tenax humorum indoles cum inertia stomachi et intestinorum iuncta est, fortiora resolutiva: ammonium muriaticum, ammoniacum, extracta amara adhibenda sunt, quibus demum tonica roborantia adduntur. (§. 142.) Tota autem methodus, quae stasibus resolvendis par est, huic quoque fini apta invenitur. (§. 251. f.)

Abutuntur tamen hac methodo, qui negligunt naturae natus. Cum enim huc vel illuc vergit, eo

potissimum ducendi sunt humores, ne unquam repugnemus naturae.

Art. III.

D e v o m i t u c i e n d o.

a. Modus agendi.

287.

Generalem vomitus expositionem cum in superioribus (*path. gen.* §. 247.) perstrinximus, patet, his succussibus violentis, non solum brevissima via eliminari stomachi contenta et intestini duodeni, sed e ductibus etiam choledochis et pancreatico exprimi, si quae ibi abundant, et omnia viscera sub hypochondriis sita valide agitari, stases referari et motum praeprimis per venam portarum accelerari. Diximus, nisibus vomitum comitantibus impetum sanguinis versus pectus et caput augeri; validis musculorum abdominalium motibus nervorum etiam distentiones nasci; nisibus denique violentis rumpi posse vel vasa vel membranas.

288.

Therapeutice vero vomitum contemplaturos decet emolumentorum memores esse, quae praecipua producere haec curatio potest. Et primum quidem motus ille antiperistalticus finem imponere solet nimiae peristaltici motus contentioni, unde diarrhoeae

diuturnas sistere valet. Dein excretio saburrae gastricae via fit brevissima, qua vitatur damnum, e longinqua ductione per tractum intestinale nascens. Multo citius igitur, si quae peregrina et venenata in stomacho intestinoque tenui sedent, expelluntur, multoque tutius, quam id per alvum fieri potest. Succussus etiam salubres sunt, ut toti motricium fibrarum compagi alia impertiatur temperies, ut exagitatae torporem vasorum tollere, spasmos quoque in remotis partibus sedare, secretiones promovere possint. Hinc minus frangere vires solet vomitus quam alvi ductio; hinc resolventem pariter ac sedantem methodum adiuvat, ipsamque metasyncrisin.

b. *I n d i c a n t i a.*

289.

Indicatur vomitus, et urgentissime quidem, si peregrina, quae natura subigere nequit, et venena, maxime narcotica, in stomacho et intestino forte tenui haerent. Quodsi forte adfuerint, quae alioquin prohibere possint hanc curationem, in hoc tamen casu vel postponenda sunt, vel, si fieri potest, removenda, cum necessitas vomitus summa sit. (§. 58. 59.) Si narcotica venena, opium et belladonna, ingesta sunt, exhibitum promptissime emeticum non solum brevissima via expellit, quod nociturum est,

sed agitato systemate nervorum effectibus narcoticorum senioribus resistit.

290.

Paulo difficilius paucis verbis exponitur necessitas vomitus, dum sordes primas vias occupant. Quodsi manifesto ira aeger excanduit, aut ciborum vel potuum copia se ingurgitavit, extemplo vomitum ciere magnopere expedit: expedit etiam, dum popularis morbi ingenium sordes biliosas aut pituitosas turgentes signaverit, dum naturae nutu salutaris vomitus praecesserit, aut nausea saltem continua indicaverit cum aliis turgoris sordium signis, vomitum salubrem futurum. Id vel maxime contingit sub ipso morborum initio, si nondum forma evoluta est, si symptomata praesentia causarum effectibus manifestis adnumeranda sunt. Quodsi vero in morbi progressu, ex adfectionibus organorum digestionis inservientium sordes nascuntur, eaeque turgent, vomitu quidem tolluntur, sed augetur ipso vomitu adfectio organorum: hepatis maxime inflammatio, quam saepenumero turgor bilis sequi solet. Nonnunquam etiam ex inaequabili virium distributione in progressu morbi sordes nascuntur, quibus idonea quidem interdum sunt emetica, licet et augere inaequabilem virium dispensationem possint.

291.

Magna est vomitus arte excitæ utilitas in stasibus referendis et motu sanguinis humorumque per venam portarum accelerando. (§. 260.) Adiuncta sunt commoda e temperie nervorum gastricorum splanchnicorumque nata. Unde in febribus intermittentibus, ipsisque malignis et comitatis insignis spes est in vomitu collocanda, quem præcipue sulfur stibiatum aurantiacum tartarusque stibiatus producant.

Hinc magna est derivanda efficacia emeticorum in affectibus diuturnis stases abdominales excipientibus. In phthisi pulmonali, pituitosa et tuberculosa expeditissimum est, vel ipecacuanham vel sulfur stibiatum ita exhibere, ut modo nauseam iam vomitum ipsum cieant. Cuprum sulfureum et sulfurico-ammoniatum Britanni in ea phthisi, quæ ipsis vulgatissima, exhibent, ut et stases abdominales resolvant et metasyncrisin moliantur.

Hydrops, qui sæpe spontaneis vomitibus cedit, emeticis etiam interdum fugatur, si e stasibus abdominalibus ortum duxit. Praxagoram iam vomitum iussisse non solum ieiunum, verum etiam post vespertinum cibum, in hydrope, memorat Caelius Aurelianus. (*chron. lib. 3. c. 8.*) Et recentiores nonnulli scillam potissimum eo consilio adhibent, ut vomitum cieat.

In menostasia et fluore albo, qui hanc excipit, ex abdominis stasibus derivandis repetitus emeticorum usus saepe magnopere iuvat.

Quid quod in ipsa haemoptysi, quae alioquin ex toto vetat emetica (§. 308.), si e stasibus ortum ducit, vicaria forte haematemeleos excretio, Praxagoras iam (*Cael. Aurel. chron. lib. 2. c. 13.*) nostris temporibus Stollus et Dömlingius emetica egregium usum praestare docuerunt.

292.

Magna est insuper vis vomitus arte excitati ad incitandas vires, ut crisin moliantur, sive per cutim id fiat, sive per vias aëriferas, sive per renes et vesicam. In febribus praeprimis lentis nervosis aut versatilibus eo consilio potissimum exhibentur, ut torpidae vires sollicitentur, crisisque, qua natura vergit, promoveatur. Metasyncritico et antagonistico modo agunt, ut lacescito stomacho caput liberetur blandaque sequatur perspiratio.

Nuper etiam rheumatismum acutum ita curare ausi sunt, ut, vomitu ineunte morbo producto totius corporis ambitus incitaretur, atque perspiratio cutanea suppressa restitueretur.

Pari ratione utilis est vomitus arte excitatus in febribus exanthematicis, ubi virium torpore impedi-

tur exanthematum eruptio ac perfectio. Unicus saepe vomitus sufficit, ut naturae vires erigantur ac crisis necessaria per exanthemata consequatur.

293.

Nec sedans virtus emeticorum negligitor. Explicanda ea est ex alieno stimulo, quem haec remedia stomacho impertiunt, quoque morbosa incitatio compesci potest. (§. 203.) Utile maxime est id consilium, cum spasmi et stases abdominalibus originem ducunt: quod cum in hysteriis adfectibus et hypochondriacis locum obtineat, utilissima saepe esse in iis emetica patet. Omnium etiam medicorum testimonio probatur eorundem remedium usus in epilepsia, vel ante poroxysmum datorum, vel exiguis et repetitis dosibus exhibitorum, quo facto sedare tumultus ex inaequabili virium dispensatione ortos consuescunt. In eclampsis infantum Chalmersius (*von den Krankh. in Südkarol.* v. p. 74.) nil utilius praedicat emeticis e tartaro stibiato paratis. Confirmat usum in eodem morbo Richter. (*med. und chir. Bemerk.* p. 132.)

Utilissima profecto emetica sunt in tussi convulsiva, ubi non solum pituitam tenacem expellunt, sed alium impertiunt stomacho stimulum, cui morbosus cedit, stases etiam resolvunt, si quae adfue-

rint. (*Remer's Annal. der klin. Anst. zu Helmst.*
1. p. 359.)

294.

Quamvis generatim inflammationibus repugnare videtur emeticorum usus (§. 308.); sunt tamen variae inflammationum species, vel e fordibus biliosis ortae, vel a solutione spontanea, ob vires naturae perturbatas aut fractas, alienae. Iis auxilium ferre emeticis haud dubitamus.

Sic, cuius auctoritatem nulla delebit aetas, Stollus in ipsa pneumonia, quae popularem morbum biliosum sequeretur, emetica summa proficua invenit, cum post eorum denique usum et sputorum coctio et dolorum mitigatio et crises perspiratione absolvendae contingerent.

In angina membranacea emetica saepe prodesse, vel inde elucet, quod vomitu saepe membranas illas morbosas salubriter eiici meminimus. (*path. spec.* §. 228.) Testimoniis Crawfordii, Witherli (*Bemerk. über die Fehler beym Gebr. der Arzneyen.* p. 95.), Smithii (*memoirs of the med. soc. of Lond.* vol. 6. p. 74), Lentinii (*Beytr.* 1. p. 306. 3. p. 195.) aliorumque insignis usus eius methodi ad solvendas membranas confirmatur.

295.

In dysenteria quanta sit emeticorum utilitas, neminem latet. Invertunt directionem motus, quo intestina laborant, ut, quae deorsum continuo tenderet, iam sursum contingat: expellunt, quae forte adsunt fordes, spasmos, quibus conflictantur intestina, sedant, et cutis functiones suppressas ad normam redire cogunt. Praestant id omnino, dum exiguis dosibus, ne abundans sequatur expulsio, exhibentur: quae virtus maxima est radicis ipecacuanhae.

Pariter iuvare et in diarrhoeis diuturnis supra iam monuimus. (§. 288.)

296.

Nec sine laude dimittenda est haec curatio in variis eclypsibus, maxime in apoplexia, vel serosa, vel e consensu e fordibus biliosis oborta. Sic et in amaurosi, quam Schmuckerus ex ira subitanam observavit, quaeque interdum e stasibus existit abdominalibus, prodest emeticum exhibere, ut vel fordes eliminentur vel stases abdominales solvantur atque nervi splanchnici alienum excipiant stimulum.

In infaniae genere, quod longius spatium recipit, seu melancholia, Celsus iam suadet vomitum ciere. Magnae doses emeticorum, ut torpor virium tollatur, stases etiam atrabilariae solvantur, a pluribus recentioribus, Perfecto inprimis et Buchhavio,

commendantur. Exiguïs autem et repetitis dosibus, ut sola nausea oriatur, prodelle omnes consentiunt.

c. *Contraindiciantia.*

297.

Prohibetur haec methodus primum cruditate sordium, in morbo iam formato. Quodsi enim nondum paratae sunt sordes ad evacuationem, si potius impacae haerent plicis intestinorum, si nimis tenaces sunt aut acres, prius naturae adminiculo et artis praesidiis coquendae sunt. (§. 283 — 285.) Excipiendum tamen initium morborum nondum formarum, et a manifestis causis ortorum, ubi brevi post iram aut ciborum vorationem nimiam emetica praesentanea praestant commoda. Excipienda etiam peregrina et maxime venena, quae coquere natura et mutare nequit, quorum igitur expulsio urget.

298.

Dein contraindicat plethora, et impetus sanguinis in nobiliora irruentis. Qui congestionibus versus caput et pectus laborant, aegre ferunt vomitum: vitandus igitur, ni urgeant indicantia. (§. 294. 296.) Hinc igitur gibberi senesque decrepiti, in apoplexiam proclives, haud sine graviore molestia vomere solent: saepe quoque pessime inde habent.

Nec gravidæ, maxime tertio mense, ubi in abortum sunt pronæ, facile vomunt, nisi urgeat necessitas.

299.

Alvi obstructio pertinax prohibet vomitum, cum impetus sanguinis in pectus et caput ea magnopere augeatur. Itaque alvus prius eluenda est, quam vomitum cieamus.

Hernia adflicti, si constrictio anñuli aut incarceratio metuenda est, vel vitare vomitum, nisi in præcipiti sint, vel fulcire περιζώμασι aut ipsa manu, dum vomunt, partes adfectas debent.

300.

Virium ratio et naturæ molimina ex toto observanda sunt. Interdum enim spasmi validi cardiacam ita constringunt, ut vomitus facile consequi nequeat, nisi prius spasmi sedentur. Ubi iam intente sunt vires, in accessibus febrium, et vespertino tempore, haud facile vomitus ciendus, sed dum febres semet remiserint et matutinis horis.

d. *I n d i c a t a.*

301.

Delectus emeticorum studio summo instituendus est, prout citius vel tardius, mitius vel fortius vo-

mitum concitare effectusque secundarios promovere cupimus. Ad mitiora et quae cito agunt, referuntur aqua tepida, larga copia ingesta, titillatio etiam pharyngis ope plumae. Mitioribus quoque accensenda radix ipecacuanhae, quae et spasmos sedare et perspirationem augere solet. (*pharm.* §. 116.) Sulfur stibiatum aurantiacum et vinum stibiatum in blandioribus nominanda, quae simul stases potenter solvere et mitigare spasmos valent.

Fortius emeticum praebet tartarus stibiatus, ocynus ceteris agit, alvumque simul ciet. Hoc etiam potentius agunt zincum sulfuricum et cuprum sulfuricum, maxime commendanda, si venena narcotica ventriculum oblidant.

Minus tutae sunt radices asari, bryoniae, helibori albi, herba gratiolae etc., quippe quae spasmos potius concitant et quandoque ventriculum inflammant.

Art. IV.

De alvo ducenda.

a. *Modus agendi.*

302.

Mire varius est agendi modus eorum, quae hoc capite comprehenduntur. Etenim alia sunt, quae

duntaxat obstacula amonent, alvum comprimentia, unde, si sicca est et constricta intestinorum compages, et olea et aqua tepida, qua alvus eluitur, ipsaque sedantia alvum ducere possunt.

Alia sunt, parum remota ab his, quae, dum calorem nimium ligant, constricta vasa strictosque aperiunt ductus excretorios: hac blanda excretionem per totum tractum intestinale promota alvoque liquata aestum minuunt, revellunt mitissime ab aliis organis, adeoque normalem restituere virium distributionem valent. *Laxantia* haec dicuntur, extractis plantarum dulcibus aut saponaceis, salibus etiam neutris mitioribus vegetabilibus comprehensa. Haec quoque, exiguis dosibus adhibita, coctionem promoveri et stases resolvere valent.

Tandem, quae significantius *purgantia* dicuntur, principio resinoso saponaceo gaudent, quo potenter et diu vellicant intestina, motum peristalticum fortiter augent, ut et expulsio fardium eorumque, quae in intestinis continentur, contingat et sensus intestinorum augeatur et adliantur humores potentius ex aliis partibus ac revellantur. Solent etiam, quae fortius alvum ducunt, absorptionem cutaneam augere, ut corpus gravius fiat post purgationem et contagium facilius suscipiatur.

303.

Itaque patet, haudquaquam in intestinis solis huius curationis actionem finire ac circumscribi. Irritato enim tubo intestinali, corporis longitudinem fere sexies superante, cum toto corpore communicatur ea incitatio, ut sensus torpentes motusque suscitantur, absorptio augeatur et in diuturnis morbis salubris nonnunquam agitatio sequatur.

Sed ipsa ea irritatio, ut salubris esse potest, ita, propter secretionem auctam, corruptioni humorum ansam praebere solet. Etenim adlecti continuo humores non possunt non corrumpi, ut repeti alvi ductio debeat. Quod quam noxium sit, vel e debilitate patet, quam necessario adfert continuata tanti tractus incitatio et humorum copiosa excretio.

304.

Inficiari quidem nequit, varia remedia, quae huc pertinent, peculiari ac specifico plane modo partes adficere, ut singularium etiam humorum adfluxus sequatur, sicut rhei radix speciatim bilem corrigere solet et evacuare, hydrargyrum vero muriaticum mite pituitosos humores; haud tamen generatim adstipulari possumus veterum sententiae, quae cuivis fere remedio suos tribueret humores, quos e corpore educeret.

b. *I n d i c a n t i a.*

305.

Generatim quidem statuimus, in quocunque morbo alvum esse liberam servandam, cum ingens ille tractus merito dicatur organum depurgatorium, quo ad normam valetudinis secundae agente, orgasmus febrilis mitigetur et congestiones deriventur. Hinc vehementia febrium minuitur, coctio promovetur, metastases impediuntur, quamdiu alvus libera manet et aperta. Cui quidem fini inservit methodus humectans et antiphlogistica, clysmatumque applicatio, si intra nychthemeron alvus non cessit.

306.

Laxantia speciatim indicantur sordibus. Sed studiose investiganda est sordium ortus et indoles, priusquam evacuationem moliamur. Sydenhami essatum: „Nihil novum est, variis in febribus fordes „generari,“ gravissimum est, et, rite observatum, impedit nos, quominus eas fordes educamus, quae in progressu morbi, tanquam eius effectus, nascuntur.

Itaque fordes protinus indicant laxantia, si a causa manifesta, ciborum reliquiis etc. ortae, deorsum tendunt. Id autem cognoscimus lingua sordibus obducta, appetitu deficiente, oppletionis sensu in

236 SECT. III. HUMOR. INDOL., COP. MUT.

praecordiis, turgore abdominis et borborygmis, proclivitate etiam in alvi fluxum, cum torminibus forte, tenesmo et lumborum doloribus iuncta.

Indicant quoque laxantia sordes, si popularis morbi ingenium eo vergit, ut saburra intestinalis generetur. Dum regnat febris biliosa, ipsae inflammationes intercurrentes optime solvuntur alvò liquida et bilem corruptam educente. Hinc naturae nutus observandi, imitandique in epidemiis, ut quo vergat, eo moveantur humores.

307.

Laxantia, cum sordibus indicantur, praeferrenda sunt emeticis, si natura potius deorsum quam sursum movet saburram; si impetus sanguinis versus nobilia organa, si gibber pectoris, hernia incarcerationem minitans aut alia emeticorum contraindicationia (§. 297 — 300.) adsunt.

Praeferrenda laxantia ipsis purgantibus, si sordes adsunt, quoties fibra stricta, tensa et sensu acuto praedita repugnat usui irritantium fortiorum, quod tum in febrilibus morbis, tum, ubi spasmi vigent aut nimiae siccitas adest, contingit. Sic in alvi obstructionibus pertinacibus, cum morbo cachectico iunctis, noxas non paucas subinde purgantia adferunt, profunt vero laxantia blandiora. Ubi cum alvo adstricta sanguinis profusio per vasa haemorrhoi-

alia vel adest vel metuitur, vitanda sunt probe purgantia, utpote quae impetum sanguinis exasperant; praefenda laxantia blandiora, quae utique mitigare sanguinis cursum possunt.

308.

Laxantia enim indicantur, si sanguis vel humores in partem nobiliorem irruentes revellendi sunt. Leniter enim incitato tractu intestinali et secretionibus auctis, incitatio morbosa aliarum partium pergere nequit. (§. 219.) Itaque in inflammationibus topicis, levioribus, maxime ophthalmiis, ipsoque erysipellate, conducunt saepius laxantia, dummodo protinus in initio exhibeantur, priusquam plures partes in consensum trahantur. Quodsi etiam orgasmus sanguinis hominem ita adficit, ut impetus versus nobiliores partes metuendus sit, laxantia adhibita, antiphlogistico modo agunt. (§. 211.)

Eodem consilio apta sunt laxantia, dum aliae caeque molestae adfunt excretiones, quas sistere cupimus. Sic pyralismus, sudores profusi, ipsaque modum excedens puris excretio optime mitigantur laxante methodo, quae a partibus adfectis humores revellit. Eidem fini idonea sunt in exanthematibus, quae vulgo sanescunt, si laxantia remedia alvum probe duxerint.

309.

Ad apothepiam interdum laxantia exiguntur, si fordes per morbum generatae adsunt. Hae enim, si remanent, secretiones alias etiam depravant, ut metastases facile consequantur. Itaque convalescentibus e graviore morbo, praesertim, qui e variolis supersunt, exhibenda sunt laxantia, ut reliquiae morbi eliminentur, metastases autem praevertantur.

310.

Purgantia ipsa, fortiori et diutino stimulo intestina incitantia, idonea sunt, ubi vis sensifera torpet. Itaque in statu ἀπυρέτω, si fordes adsunt pituitosae aut atrabilariae tenaces, intestina vero languent, alvusque eam ob causam obstructa est, utilia sunt.

Praeferenda etiam laxantibus sunt, si in morbis diuturnis incitamento egenus fortiori, quo vis sensifera fuscitari, secretiones etiam et absorptiones potentius agitari, adeoque et incitatio salubris et ipsa metasyncretis (§. 171. 182.) produci potest. Itaque in hydropse praeprimis et aloë, et gummi Cambogiae, helleborus etiam et ipsum elaterium interdum proficua sunt, dummodo exploratum habeamus, a mero torpore vasorum absorbentium glandularumque ortum ducere. Hinc etiam usus purgantium in melancholia exponendus est.

c. *Contraindiantia.*

311.

Tam salubris atque late patens huius methodi usus haud impedit, quominus noxas plures adferre possit. Namque primum monitum est, qui valetudine secunda gaudet, nullis egere nec laxantibus nec purgantibus, quae forte ad praecavendos morbos sumuntur. Tantum enim abest, ut hunc effectum producant, ut potius et debilitatis, per stimulum, intestinorum viribus, et attractis, per secretionem auctam, pravis humoribus, sanitati noceant et, absorptione cutanea aucta, contagium etiam facilius suscipere corpus cogant. Hinc iam Erasistratus purgantium usum in febribus intermittentibus et arthritide anomala taxavit, quod noxii humores attrahantur, qui ante non aderant. (*Cael. Aurel. chron. lib. 5. c. 2. Galen. de venaesect. adv. Erasistr. Rom. p. 15.*)

312.

Prohibetur haec methodus excretionibus aliis salubribus et a naturae providentia excitatis, quae et pervertuntur et impediuntur hac curatione. (§. 308.) Plurimi morbi acuti penitus solvuntur blanda et universali perspiratione cutanea, etiamsi alias et peculiares experiantur crises. Illa igitur nequaquam impedienda est vel laxantibus vel purgantibus,

unde in apothera pia illa (§. 309.) instituenda cautissime procedendum, ne metastases oriantur, quas praevertere cupimus. Eruptio exanthematum, si necessaria est, variolarum exemplo et morbillorum, impeditur alvo cita, quae revellit humores a cute naturaeque ideo molimina perturbat.

313.

Nocent laxantia et purgantia, dum vires infractae sunt: namque debilitatem insigniter augent. Probe tamen distinguendus est virium languor, ex oppressione ortus, qui comitari potest sordium abundantiam turgoremque. Ubi vera adest debilitas, vel morbi diuturnitate, vel stimulorum violentia aut absentia etiam producta, vitantur laxantia et purgantia, quae maxime abdominis viscera infirmare solent. Hinc in febribus nervosis, intermittentibus etiam et arthritide atonica noxia sunt haec remedia.

314.

Contraria ei curationi est teneritas fibrae, vis sensiferae augmentum, proclivitas ad spasmos et inflammationes, quae omnino augentur his remediis. Purgantia imprimis offendent infantum constitutionem: nec alvus eorum ducenda, nisi blandissimis laxantibus et oleis. In enteritide et peritonitide puerperali profunt quidem quandoque, quae alvum leniter exonerant, sed tum demum, cum composita est

est inflammatio cum sordibus biliosis manifestis atque cum adhibentur, quae simul antiphlogistica sunt: e. g. hydrargyrum muriaticum mite. Sedulo tamen vitanda omnia purgantia, proprie sic dicta.

315.

Nocent purgantia, imo et laxantia, ubicunque sordes e morbo productae tutius removerentur causis sublatis. Id in febrium intermittentium progressu contingit, ubi e febris ipsius natura ac indole sordes generatae ei demum methodo cedunt, quae causam febris proximam tollit. (*path. spec.* §. 59.) Idem et in variis febribus acutis accidit, quae linguam sordidam saepe comitem habent aliaque saburrae indicia, neutiquam vero indicant purgantem methodum, sed quae causae contraria est. Experientia docet, methodo laxante perperam adhibita continuo novam generari saburrae colluviem, imo ipsam interdum accedere humorum putredinem, ni citius ea exhibueris, quae morbi indoles poscit.

d. *I n d i c a t a.*

316.

Blande laxantia sunt vel generatim humectantia (§. 110. 111.), vel quae miti quodam acido praegnantia calorem attrahunt et constrictionem tollunt. Succae herbarum recens expressi et quae solventia

diximus (§. 245.), serum lactis inprimis, pruna cocta et pulpa tamarindorum cum manna electa huc pertinent. Quibus si olea adduntur, blandissima praesto sunt remedia, quae obstructionis causas vulgares tollere et alvum ciere possunt.

Paullo potentius agunt sales neutri: primum vegetabiles, kali tartaricum et aceticum, tartarus depuratus, natronatus et boraxatus: dein sulfur: post sales neutri minerales: natrum maxime sulfuricum, magnesia sulfurica, natrum denique phosphoricum. Eorum vires et effectus suo loco speciatim indigitavimus.

317.

Purgantia sunt folia sennae, radix rhei, ialapae, hellebori etiam nigri: gummi Cambogiae, colocynthides, scammonia, aloë et elaterium. Quibus omnibus hydrargyrum muriaticum mite palmam praeripit.

Art. V.

De lotio pellendo.

a. *Modus agendi.*

318.

Urina naturaliter aquosorum humorum abundantiam, azotici praeterea copiam et salium phos-

phoricorum educi, in superioribus (*phys.* §. 291. 292.) monuimus, unde necessitas eius excretionis et salubritas in morbis ilico patet. Acutorum enim plerorumque morborum ea solutio est, ut quae generata morbi violentia erant, hac potissimum via eliminentur, quod naturae molimen imitari artis est officium.

Nec negligenda est renum cutisque antagonismus, quo fit, ut aqua potissimum renes petat, vapores per cutem excernantur: unde alternare solet naturam utramque secretionem, ut, promota hac illa fileat: quod imitari etiam artis est.

319.

Quodsi igitur urinae flumen liberum promoveretur, primum serosorum humorum (*τὸ ὀψιῶδες* Galen.) copia minuitur, quod calori minuendo et incitationibus morbois mitigandis inservire potest. (*phys.* §. 303. 350. *path. gen.* §. 20. 21.) Deinde iisdem humoribus elementa animalia secedunt, quae, in corpore remanentia, magis incitare possent partes solidas: familiari hoc renum diverticulo utitur natura, ut morborum per suas aetates provectorum fordes emungat.

320.

Magna etiam est et gravissima diureseos actio, quae revulsionem humorum ex aliis locis complec-

titur. Si qui enim humores serosi et lymphatici in telae cellularis textibus accumulatur, hac potissimum via possunt eliminari, nisi peculiaribus conceptaculis inclusi sint.

Vasorum denique absorbentium vis augetur hac pariter excretionem ac reliquis omnibus.

b. *Indicantia.*

321.

Indicatur igitur diuresis primum lotii flumine intercepto aut iusto parciori. Id quidem tum in acutis morbis tum in diuturnis non raro eo potissimum necet, ut calor augeatur, incitatio increseat, adeoque crises salubres impediatur. Dum cruditas febrium acutarum viget, lotium et parce fluere et turbidum esse consuevit; qui humectantibus et anti-phlogisticis sorbitionibus urinae fluxum auget, cruditati finem imponere coctionemque praeparare potest.

322.

Idque eo magis necessarium est, quo maior quibusdam morbis peculiaris inest proclivitas, lotio critico terminari. Febres intermittentes, scarlatina, febris nervosa acuta solent, etiam post alias crises, absolvere tamen indicationem lotio ubertim fluente eaque secum rapiente, quae morbi mora genita fue-

rant. Popularis morbi ingenium sedulo indagandum est, ne haec proclivitas negligatur.

323.

Indicatur diuresis excretionibus aliis nimis aut colluvie serosa intra conceptacula telae cellularis, quae, revulsis huc humoribus, sisti possunt. Sudores nimii, ob antagonismum cutis renumque, huic fluxui cedunt. Colluvies autem serosa et lymphatica, quae vel libera est intra telam cellularem, vel, postquam perfrixit, orta, neque cum viscerum labe iuncta, neque in atoniam universalem prona, diuresi tollitur.

324.

Necessaria quoque diuresis, si in renibus aut vesica mucus vel arenulae, seu ea sedent concrementa, quae lithiasin minantur. A laxitate renum et torpore orta haec incitantibus cedunt, quae secretionis excretionisque vim in iis diverticulis augent.

c. *Contraindiantia.*

325.

Generatim quidem in febrium curatione abstinendum est a diuretica methodo cum natura hanc excretionem haud molitur, cum crudus etiamnum est morbus, nec idonea humorum aquosorum copia

renes petit. Quod si accidit, ea saltem imperanda sunt, quae obstacula removere et copiam humorum per lotium excernendorum augent: sed vitanda ea, quae proxime renes stimulant. (Ἄ δεῖ ἄγειν, ὅκου ἂν μάλιστα ῥέπη, ταύτη ἄγειν, διὰ τῶν συμφερόντων χωρίων.)

326.

Dein, quae proxime renes et vesicam incitant, vitanda sunt, si haec organa iam vel inflammata vel exulcerata, vel alio incitamento adfecta sunt. Abstinentum igitur a diuresi in hydropibus, cum renes forte iam labem contraxerunt.

Denique etiam liquet, hanc excretionem nocituram esse, cum vires iam defecerint: nulla enim excretio arte excita tentanda est, priusquam, suffecerint vires, inquisiverimus. (Ὅποιᾳ ἂν ἡ φύσις ἢ τοῦ μέλλοντος ὑπομένειν, ἐς τοῦτο ἄγειν.)

d. *I n d i c a t a.*

327.

Multa sunt, quae haud proxime diuresin movent, sed obstacula potius tollunt et materiem suppeditant, qua renes ad excretionem indigent. Haec, tum in victus ratione sita, tum in curandi ratione generali, tutiora sunt propriis diureticis, neque facile contraindicantia patiuntur.

Obstacula, quae libero lotii flumini contraria sunt, in spasmodicis saepenumero versantur: quod plerumque in morbis nervosis contingere solet. Itaque fovendae partes mollientibus et sedantibus; alvus eluenda; oleo delibendum infimum abdomen et perinaeum. Potiones e mucilaginosi humectantibus exhibendae: maxime vero spiritus nitrico - aethereus, qui fugacissimo stimulo spasmos sedare et diuresin ita promovere solet.

Alia obstacula quaerenda sunt in nimio aestu febrili et incitatione vasorum sanguiferorum. Quibus occurrimus antiphlogistica methodo, ipsaque sanguinis missione.

Quodsi tenaces adsunt humores, si stasis abdominalis accusanda est, iuvat resolvens methodus, quae, si expedit, etiam lotium pellere consuevit. Ita laxitas cum tenacitate iuncta roborantibus, uvae ursi exemplo, tollitur. Sed victus rationem simul ita administrare expedit, ne acidum uricum, quo mucus congelascit, generetur, potiones quoque leviter diureticae commendandae.

328.

Optime diuresin promovemus, aucta humorum aquosorum copia. Id fit humectante methodo; maxime profunt aquae foteriae acidulae, quae acidum carbonicum continent, fons Selteranus, Geilnaviensis, Kis-

singensis etc. Eodem consilio commendanda balnea et humidus aër. Potiones quoque acidulae, e fructibus horaeis paratae: tartarus depuratus: acidum tartari aqua dilutum: acida alia ipsaque mineralia: vinum rhenanum, praecipue vero molellanum egregiam habent virtutem diureticam.

329.

Ipsa quod attinet diuretica, quae peculiari modo renes et vesicam incitant, secretionique et excretioni favent, alia sunt mitiora, ut herba petroselinii, quae infusa et cocta, absque ulla graviore irritatione diuresi favet. Kali etiam carbonicum et sales neutri et hydrargyrum muriaticum mite ita urinam cient, ut aestum simul compefcant. Ubi cum mucii concrementis acidum uricum praevalet, arenulis in lotio apparentibus, magnesiâ carbonicâ summe proficuam invenit Brandius. (*Gilb. Ann.* 50, p. 178.)

330.

Potentiora sunt, quae resinoso principio scatent: radix praesertim rhei, scilla, digitalis purpurea, Viola tricolor, baccae Juniperi, balsama naturalia, novissime cantharides. Ad haec confugiendum est in atonia organorum diuturna, in mucii colluvie et laxitate insigni: vitanda autem in omni statu febrili,

Art. VI.

De methodo diaphoretica.

a. *Modus agendi.*

331.

Perspirationem cutaneam et sudorem, quomodo differant, quamque graves sint excretiones, in superioribus (*phys.* §. 274. *l. path. gen.* §. 119.) præcepimus. Id tamen hic repetendum est, per nulum fere organon in tot morbis impura humorum elementa, morborum vi generata, excerni, quam per cutem; cuius ratio vel ex ingenti vaporum copia (*phys.* §. 272.) vel ex ambitu cutis, insignique consensu, cuius ope cum plerisque organis necitur, elucet.

Id tamen protinus præcipiendum est, et perspirationem cutaneam et, qui maxime e laxatis ductulis excretoriis declarandus est, sudorem a mediocri quadam vasorum secernentium efficacia nasci, quae etiam si arteriarum maiorem incitationem, capillarium tamen et ductulorum eam remissionem supponat, ut excerni superflua elementa cum humoribus organicis possint. (*phys.* §. 273.) Id etiam vulgaris confirmat observatio de pulsibus mollioribus, magis rhythmum servantibus, qui sudores criticos præcedere solent. (*path. gen.* §. 252.)

Haec arteriarum incitatio sudores praeprimis antecedens, si remediis producitur, aequè utilis esse ac noxia potest. Incitans enim methodus, quae diaphoresin saepenumero habet sequelam, quanta commoda adferat, quot etiam damna, in superioribus (§. 149 — 162.) uberrime docuimus. Itaque et diaphoretica methodus, ni caute administretur, et orgasmum augere et vires pariter erigere ac perturbare potest, cutisque functiones abnormes aequè tollere ac nova vitia producere.

332.

Sed praecipue ratio est habenda incitati systematis cutanei, propulso eorum humorum et evacuatorum; quo facto tum revelluntur humores ab internis partibus, tum corpus liberatur incitamenti molestis et exaestuans, ut refrigeretur etiam post sudores (§. 205. 211.), tum aequabilis vis sensiferae distributio restituitur, quae oclusis spiraculis cutaneis turbata erat.

Si quae sanguinis elementa praedominantur, si acres praesertim humores sunt, perspiratione cutanea et sudoribus blandis ea acrimonia eliminatur, purgantur humores atque sanguis normalem recuperat mixtionem: unde *haematocathartica* haec remedia dicta sunt. Sed nequaquam hactenus intelligendum id est, quasi omnis sanguinis proclivitas ad corrup-

tionem omnisque humorum acrimonia sudoribus excitatis curari possit. Peculiares solent humores id singulare habere, ut, perspiratione continua aucta, purgentur; quod ulia solummodo discendum est.

Quaquam denique contagia interdum vaporibus cutaneis dispergantur, et e corpore dissugiant, haudquaquam tamen licet, nisi natura ipsa viam nobis monstret, methodo diaphoretica hunc in finem uti.

333.

Insignis antagonismus cutanei systematis et renum, illius et tractus intestinalis ita agit, ut perspiratione aucta et sudoribus profusa sistantur excretiones nimiae in illis visceribus. Nec negligenda est similis cessatio colluviei aquosae in tela cellulari. Itaque utiliter agit haec curandi ratio ad restituendum aequilibrium tunicarum mucosarum serasarumque, exhalationis et absorptionis, internae et externae exhalationis.

b. *Indicantia.*

334.

Indicatur primum haec methodus suppressa perspiratione, quae ex inquinamentis cutis, ex ariditate spasmisque eius, ex ingenti febrium vehementia

252 SECT. III. HUMOR. INDOL., COP. MUT.

nascitur, facileque cognoscitur aspritudine cutis et siccitate, pulsuum duritie rhythmoque laeso, rau-
citate vocis et oculi indole arida. Tum in acutis
morbis, tum in diuturnorum initio et decursu per-
spirationem restituere expedit, etiamsi aliae curatio-
nes exiguntur, ut hac potissimum via natura moli-
mina sua perficere possit. Sic maximi interest, in
syphilitici ipsius morbi curatione protinus balneis
aliisque rebus, quae perspirationi favent, spiracula
cutanea aperire, antequam hydrargyro utamur: id-
que ipsum iuvat ita exhibere, ut diaphoresin potius
moveat quam alias excretiones.

335.

In acutis morbis naturae nutus saepe nos co-
gunt ad sudores proliciendos. Febres enim variae,
intermittentes, catarrhales, rheumaticae, exanthe-
maticae, inflammatoriae, nervosae: dysenteria ipsa:
tum quoque adfectus chronicorum malorum, arthri-
tici et spastici terminantur fere naturae adminiculo
per sudores, qui saepe peculiari odore ostendunt sin-
gularem accidere humorum secessum, quo facto et
apertis oscillis cutaneis remissio gravioris incitationis
contingit. Qui quidem naturae nutus sedulo studio-
seque observandi et imitandi sunt. In febribus acu-
tis instituenda est haec curatio, cum, aegritudine
per aetates suas protracta, pulsus molliores sunt, fe-
bris semet remittit, ipseque mador in axillis indicat,

naturae congruam esse hanc evacuationem. In decremento ut plurimum morbi atque post alias crises, hoc velut complementum accedit. Nonnunquam tamen, perturbatione graviore praegressa sudoribus profusis omnis morbus brevi decernitur; quod si rite observatum fuerit, magnopere interest, succurrere naturae consilio idque perficere, quod ipsa molitur.

336.

Quodsi morbus nondum formatus est, statim in initio saepe sussuminatur, si contagiam forte studemus perspiratione aucta eliminare, aut, si e perfrigerio ortus, ilico sudoribus profusis restituere normalem cutis functionem studemus. Quod priori praecepto minime repugnare, patet vel e comparatione eorum, quae de vomitu in morbi initio nondum formato diximus. (§. 290.) Febrem castrensem malignam hoc modo statim initio in fugam verisam esse, Fringlius saepe expertus est. (*diseases of the army*, p. 290.) Gregorius id praeceptum generatim iniungit. (*elem. of pract.* §. 102.)

337.

In variis adfectibus cutaneis prodest perspirationem cutaneam promovere, ut remissio ea contingat, quae aequabilis virium distributionis adeoque normalis secretionis restitutionem attrahit. Febres quidem

exanthematicae, si essentialis est et necessaria exanthematis eruptio, melius curantur, obstaculis diapnoës cutaneae remotis quam ea methodo, quae proxime cutem stimulat. Sed in exanthematibus diuturnis et *ἀνυπέραις* summe proficua est diaphoresis, ut interceptae functiones cutaneae restituantur. Quid quod ipsi sudores profusi, ob ingentem totius vasorum systematis incitationem salubri corporis mutationi producendae pares sunt, ni exanthemata internis causis sustinentur. Remedia etiam incitantia tum demum optimo effectui coronantur, cum perspirationem liberam producant et ipsos sudores eliciant. (§. 145. 165.)

338.

In morbis ab arthritide anomala ortis magni est momenti diaphoresin elicere, siquidem et devius impetus versus interiora ea revocatur iterum ad ambitum et restituitur normalis functio cutanea, si continuo servatur vaporum per cutem exhalatio. Pleraque remedia, in ea aegritudine laudata, ut guaiacum, aconitum, aquifolium, Sulfur etiam subiatum et Rhododendron chrysanthum, finem tum demum consequuntur, si diaphoresin iugiter promoverint.

339.

In morbis spasticis diuturnis utilissima est methodus diaphoretica, ut, remissione hac oborta,

aequabilis restituatur vis sensiferae dispensatio et consumptio imponderabilium augeatur. Natura ipsa id docet, terminatis accessibus morborum eorum per sudorem foetidum: pleraque etiam remedia paregorica tum demum optimum produciunt effectum, cum ἀτμίταιν faciunt corporis, aut vel vapores cutaneos servant, vel ipsos sudores proliciunt. (§. 201.)

340.

Denique prodest haec curandi ratio in variis morbis tunicas mucosas serosasque ipsamque telam cellularem adfligentibus. Consensus et antagonismus, qui cutem intercedit aliaque organa, necessariam reddit hanc excretionem, ut aequilibrium absorptionis et exhalationis revocetur. Hinc in cachexiis, maxime hydropicis magnopere prodest, sudores prolicere, dummodo aliae graviores causae, viscerum labes aut venarum turgor vasa absorbentia comprimens, defuerint. Ita et in morbis hydrargyrosi productis utilissima est diaphoresis ipsorumque sudorum provocatio, ut nimia exhalatio et solutio humorum hydrargyro producta cessent.

c. *Contraindiantia.*

341.

Tot commodi huius methodi non impediunt plurima detrimenta, quae, dum perperam administratur, cieri solent.

Et primum quidem in initio formati iam morbi acuti, dum cruda sunt omnia, insigniter nocet naturam cogere ac compellere ad excretionem, quam, sibi commissa, haud moliretur. Neque sinamus nos irretiri ortu febrium e perfrigerio, indole earum catarrhali seu rheumatica: possunt ea quidem averti sudoribus (§. 356.), et, dum aetates suas percucurrerunt, spontaneis sudoribus terminantur. (§. 355.) Sed τὰ πέποινα Φαρμακεύειν καὶ κινέειν, μὴ ὥμα, μηδὲ ἐν ἀρχῇσιν, ἢ μὴ ὀργῇ.

342.

Obstat huic curandi rationi orgasmus sanguinis eiusque abundantia et impetus in nobilia organa, si ea remedia elegeris, quae proxime incitant systema cutaneum. Turbantur enim vires et pervertuntur, sanguinis impetus augetur functionesque organorum vitalium supprimuntur. Quod ex iis iam patet, quae de detrimentis incitantium generatim monuimus. (§. 160.) Hinc in inflammatoriis morbis, in febribus continuis, in arthritide activa, quamdiu impetus insignis viget, noxia sunt diaphoretica proprie sic dicenda.

343.

Quodsi natura aliam molitur evacuationem, noxium est hanc perturbare provocata diaphoresi. (§. 161.) In febribus biliosis proficua est alvus liquida,

quida, quam praepostere sistimus, dum sudores arte prolicere audemus. Solent quidem et vomitus et diarrhoea, si *κρίσις* existunt, sudoribus levantibus terminari; sed nihil anticipare debet medicus, neque intempestive agere.

344.

Nocet diaphoresis, si primae viae sordibus sca-
tent, si alvus obstructa est et stases vasa abdominalia
occupant. Quodsi urget eius excretionis necessitas,
prius removenda sunt obstacula; alvus mollienda,
sordes educendae, stases resolvendae, priusquam in
cutem agatur. Maxime noxia sunt diaphoretica, quae
proxime cutem adficiunt, si purida illuvies primas
vias occupat. Haec enim nonnisi augeri et in san-
guinem ipsum intrudi potest incitantibus iis adhibi-
tis, quae diaphoresin movent.

345.

Denique et viribus prospiciendum est. Robur
enim corporis nulla alia fere evacuatione magis in-
fringitur et exhauritur, unde et in morbis acutis
abstinendum est ab hac curatione, si vires prostra-
tae sunt, et in cachexiis diuturnis, cum iam in
praecipiti esse aeger videtur.

d. *I n d i c a t a.*

346.

Satius est, obstaculis remotis, naturae nutibus promotis et victus ratione idonea diaphoresin producere, quam incitantibus fortioribus compellere naturam ad sudores, quibus vires et perturbantur et infirmantur.

Obstaculis removendis inserviunt, quae cutis inquinamenta tollunt, *ὑπτικὰ* Galeno dicta: balnea nimirum tepida, lotiones et vestimenta lanea, pura.

Alia obstacula, et frequentissima quidem, spasmos complectuntur, inaequabili virium dispensatione ebortos, quos amovemus fugacissimis incitamentis, moscho, valeriana, spiritibus aethereis; vel ipsis narcoticis, opio, hyoscyamo; vel nauseosis, ipecacuanhae praeprimis radice, parvis dosibus exhibenda et sulfure stibiato aurantiaco aut vino stibiato. Haec etiam ita agunt, ut sordes, si forte adsunt, solvant et educant.

347.

Alia proxime in vasa cutis capillaria, quae perspirationi praesunt, ita agunt, ut vel laxent ea vel incitent. Huc praeprimis fomenta sicca, unctiones cutis, quae oleis aethereis, aqua Lucii, reginae hungaricae aut colonienfi, tartaro etiam stibiato et balsamo sulfuris fiunt, sinapismi et vesicatoria ipsa

pe tinent. Electricum quoque flumen proxime incutem directum perspirationem augere solet.

343.

Tandem ea advocanda sunt quae vasorum systema incitant, minus tamen cor et truncos, quam ramos in vasa capillaria abeuntes. Haec igitur vapores augendo calorem simul minuunt. Praestant id fragrantia, infusum florum sambuci; sales quidam neutri, maxime ammonium aceticum et liquor ammonii succinici; sulfur etiam et graphites, maxime vero camfora. In vasa maiora simul agunt et calorem simul ita augent, ut nonnisi in statu chronico adhiberi possint, resinosa acria volatilia, ut guaiacum, aconitum, stipites dulcamarae; tum balsama naturalia et aromatica, radices praeprimis serpentariae et angelicae, quae, si febris semet remittit, utique in morbis etiam acutis summe proficua sunt. Denique hydrargyrum muriaticum mite cum sulfure sibiato, camfora et opio mixtum, quae quidem mixtio in statu chronico perquam utilis est, ut incitetur corpus, metasynerilis moveatur et sudores provocentur.

349.

Victus ratione promovere diaphoresin oportet; calore cubiculi lectique mediocri; animi quiete et sorbitionibus analepticis leniterque diaphnoëis: cof-

feae, si nihil obstat et theae. Multum etiam interest, in matutinas differre horas hanc excretionem, ne ciborum forte digestio turbetur: indusia denique et vestimenta cubitoria mutare, si sudoribus madent.

Art. VII.

De sputis promovendis.

a. Modus agendi.

350.

Membrana mucosa bronchia intus obvestiens, glandulisque muciferis pertexta, naturaliter praeter vapores mucum etiam secernit, quo lubricae eae viae servantur. (*phys.* §. 200.) In glandulis bronchialibus similis latex secernitur, sublividus tamen, cum moco tenui illius membranae interdum mixtus. (*ib.* §. 201.) Haec quidem muci copia augetur variis morbis, praesertim catarrhis et inflammationibus eorum organorum: pervertitur etiam muci indoles: additur nonnunquam pus aut sanies, si vomica iuxta est, aut suppuratio membranam mucosam corripit: additur denique sanguis, si impetus eius in pulmones adest. Ea omnia *sputorum* nomine comprehenduntur: quae et in sanis hominibus, dummodo paullo laxiores sint glandulae muciferae, quotidie secreatu aut levissima tusculula efferuntur.

351.

Non novum est, variis morbis sputorum eiectionem salubrem esse. Namque et ambitus ingens eius membranae et consensus cum tunica mucosa externa ipsaque, quae intestina obducit, et necessitas remissionum, si laxatis ductulis excretoriis humorum copia educitur, id exponit. Itaque naturae consilium ars imitatur, dum obstacula liberae huius excretionis removet, spasmos tollit, inflammationem mitigat, praesertim dum systema cutaneum ad normam sanitatis revocatur. Namque diaphoresis leniter servata egregio esse adminiculo solet, ut sputa promoveantur.

Finem speratum quoque attingimus, si, ubi mucus deficit, tunicam mucosam aridam humectamus, lubricamus et mollimus; denique, dum adest mucus, sed eiici ob laxitatem partium nequit, finis potimur, si incitantia ea exhibemus, quae specifico modo tunicam mucosam adficere et ad motus congruos irritare valent.

b. *Indicantia.*

352.

Indicatur autem haec methodus primum, si morbi catarrhales et pectorales ea viarum siccitate laborant, ut mucus naturalis deficiat, ut crisis igi-

tur, quam natura moliri solet, consequi nequeat. In catarrho pulmonum epidemico (*path. spec.* §. 59.), in pneumonia rheumatica (*ib.* §. 248. , nottha (*ib.* §. 251.), in asthmate, hydrothorace, phthi- si denique tuberculosa aridae saepius viae aërierae necessariam reddunt hanc curandi rationem.

Sed maxime circumspiciendae sunt morborum aetates, ne properemus excretionem, quam natura nondum molitur. Nihil vulgarius est, quam in initio et ipso vigore pneumoniae arefcere vias aërierae: has igitur praepropere exagitare, mollire et ad excretionem stimulare temerarium est, cum naturae molimina pervertantur. In progressu morbi, si repente forte exarefcit aspera arteria, atque sputis, quae arte efferrentur, suppressis functiones pulmonum turbantur et sufflaminantur, properato opus est, ut sputa restituantur. Sic et in morbis diuturnis pectoralibus, ubi sicca sunt haec organa, in causam inquirendum est, qua sublata optime sputa restituantur.

353.

Sputa provocare opus est, si mucus quidem adest, sed nimia copia adeoque tenax, ut ipsis partium viribus eiici nequeat, ut opprimantur igitur viae aërierae. Id et in catarrho inveterato, et in phthi- si pituitosa et in hydrothorace, in senibus etiam

languore virium confectis accidere consuevit. Urget saepe necessitas huius curationis, si suffocationem haec muci colluvies minatur. Nec potest nisi iis remediis, quae proxime incitant tunicam mucosam, haec excretio promoveri.

354.

Denique et puris collectio intra vomicam et secretio morbosa eius in tunica morbosa indicat sputorum promotionem; si vicina bronchiis maioribus vomica est, si matura est et prona ad rumpendum; si denique puris assidua generatio e laxitate potius pulmonum quam ex inflammatione vegeta nascitur.

c. Contraindicantia.

355.

Sicut aliorum humorum propulsiones aetatibus morborum respondere debent, ita in hac praecipuis, quod iam ante (§. 352) monuimus, nihil praecipitandum est. Contraindicatur enim cruditate morborum, catarrhi et inflammationum initio eaque vehementia, quae secessum humorum impedit.

356.

Prohibetur etiam, si sanguis, pus et sanies aut mucus etiam tenax parenchyma ipsum pulmonum occupant, unde haud facile in bronchos maiores eii-

ci possunt. Plaga pulmonibus inflicta, sanguis pulmones inundans nequit hac methodo educi: neque pus, quod intra pleuram et pulmonum superficiem sedat, empyemate oborto: neque lymphæ in hydrothorace peculiaribus conceptaculis contenta.

Nec, ubi evacuare licet sputa, soli huic eiectioni insistendum est, cum, continuata hac methodo, facilius laxitatem pulmones eam contrahant, ut nova continuo sputa gignantur.

d. *I n d i c a t a.*

357.

Optime sputa prolicimus, si impedimenta amovemus. (§. 551.) Itaque coctio generatim promovenda est, spasmi mitigandi sunt, sordes primarum viarum solvendae et eiciendae, diaphoresis leniter sollicitanda; impetus denique sanguinis vehemens revellendus est, ut vasa capillaria liberius agere et transitum humorum secretorum faciliorem reddere possint.

358.

Si mucus naturalis deficit, viae aërierae exaruerunt, lubricantia requiruntur, quae licet pro tempore tantummodo opitulentur, in tussi tamen sicca et pervicaci utilissima sunt. Pasta althaeae, glycyrrhi-

za, gummi arabicum, saccharum et oxymel, iuiubae et filiquae dulces, pallulae maiores et minores, ipsum denique cetaceum, caute adhibita, nec diu continuata, optime sputa promovere solent.

359.

Si secretio ipsa promovenda est et stimulandae viae aërierae, radicem Iris florentinae, fructus foeniculi et anisi, sulfur stibiatum et aurantiacum et rubrum et ammonium muriaticum adhibemus. Specifico modo agunt Asa foetida, radix enulae, ammoniacum, scilla, benzoë, myrrha et radix senegae; quae in diuturnis malis pectoris variam utilitatem praebent, sicut id in pharmacologicis uberius docuimus. Prodest etiam inhalare vapores coctarum plantarum mollientium et oxymellis, ut et lubricentur partes et si qua adest vomica in bronchos maiores depleatur.

DE HUMORUM CURSIBUS PRAETERNATURALIBUS
REGENDIS AUT COMPESCENDIS.

Art. I.

De sanguinis profusionibus cohibendis.

360.

Quamvis curatio haemorrhagiarum perfecta varia est pro varietate caussarum (*path. spec.* §. 374.); quamvis imprimis ratio est habenda activae aut passivae virium indolis et inaequabilis earum distributionis (*ib.* §. 369. 370.); opus tamen est, quamvis sanguinis profusionem, si nimia fuerit, si exhausta vita praecipitatura est aegrum (*ib.* §. 375.) ei obviam ire eaque imperare, quae vel mechanico modo, vel chemico vel etiam dinamico, vasa minima rupta aut laesa contrahere, thrombum sanguinis producere eaque ratione sanguinem cohibere valent.

361.

Haec quidem prima indicatio perficitur iis rebus, quae ad loca profluvii adhibita citam vasorum contractionem adstringendo producunt. Maxime necessariae in haemorrhagia e laceratis, vulneratis aut alio modo laevis vasis, summe etiam utiles in haemorrhagiis, quae laxitatem et atoniam vasorum, ut causam

agnoscunt; casum tamen recipiunt in activis sanguinis profluviiis iisque, quae ex inaequabili virium dispensatione, e spasticis vasorum aliis locis constrictionibus et ex incitamentis morboris existunt. Vidimus enim (§. 86 87.) adstringentia incitatione aucta saepius nocere et teneritate partium atque ad spasmos proclivitate vetari. Itaque Hippocratis dictum: ἐς τὰ ἔσχατα νοσήματα αἱ ἔσχαται θεραπείαι ἐς ἀνριβείην πράττεται probe tenendum est.

Frigus ad id optimum praesidium est. Aqua glacie mixta, ipsa glacies et nix partibus cruorem effluentibus, vel vicinis apposita: sales etiam neutri, ammonium praecipuum muriaticum, natrum sulfuricum et muriaticum aqua soluta et aceto mixta commode imponuntur parti. Quid quod ipse sal culinaris ingestus ita creditur sanguinis profusiones sistere, ut frigus subitaneum producat. (*pharm.* §. 237.) Ad quem finem etiam nitrum exhibemus, quod, ne noxium stimulum moveat, in spiritu frumenti solvunt. (*Selle de curand, hom. morb.* p. 584.)

Simili modo et acida agunt, in quibus alumen et extus applicitum, et intus sumtum cum mulcentibus et mucilaginosi passivas haemorrhagias optime saepius sistit. Huc et acidum sulfuricum pertinet, quod spiritu vini mixtum, in aqua Rabelii vel elixirio acido Halleri praesidiis egregiis ad sanguinis profusionem sistendam adnumeratur. Acido etiam

268 SECT. III. HUMOR. INDOL., COP. MUT.

phosphorico suae tribuuntur laudes. (*pharm.* §. 266.) Optime acida cum narcoticis iunguntur: acidum praeprimis sulfuricum cum tinctura opii, si spasticae simul adsunt constrictiones vasorum remotiorum.

Alcohol contrahente vi topice applicitum nonnunquam epistaxin saltem feliciter cohibet.

Plumbum aceticum eodem consilio adhibetur, quod cum opio interne datum nuper laudes meruit; sed anceps est remedium, quod nonnisi in maxime ancipiti casu experiri licet. Cuprum sulfuricum et aqua styptica ex eo parata similia praestant.

Nec negligenda sunt, quae mechanice agunt. Compressio vasorum per digitos et torcularia; turundarum, spleniorum gradatorum, linteorum carptorum, quae catechu, boletum fomentarium, bovisstam, sarcocollam, et kino aut alia excipiunt adstringentia; maxime vero gummi arabicum et tragacanthae cum adstringentibus mixta sanguinis profusiones e naribus saltem, dentium evulsionem sequentes aut topicas alias sistere possunt. Quae ubi applicantur, studendum est, ea loco ei, unde sanguis proruit, immittere, ne, fonte iugiter manante, irrita sint conamina. Quodsi igitur e naribus cruor profunditur, suadent intestinum suillum siccatum ita naribus indere, ut per illius extremam partem apertam, infundi possint haematostatica.

Quodsi activa fuerit haemorrhagia, febre stipata; e suppressis aliis haemorrhagiis orta; in homine plethorico, robusto obvia; pulsibus fortibus et plenis iuncta; opera danda est, ut orgasmus sanguinis compescatur, cordis arteriarumque activitas nimia minuatur, ne continuo inde sanguis in loca adfecta irruat. Id quidem praesidiis iis, quae sanguinem minuunt, revellunt et aestum nimium compescunt, perficientes circumspectionis tamen opus habemus, ne, quae huic quidem vitio apta sunt, alium statum attrahant, aequè noxium, debilitatem nimirum vaforum, qua pariter haemorrhagiae sustinentur. Sanguinem mittendum esse in haemorrhagiis activis, supra (§. 259.) docuimus. Simul tamen victus ratio antiphlogistica eaque remedia, quae orgasmum minuere valent, (§. 209. 210.) adhibenda sunt.

Hinc maxime quies, securitas et silentium, ut cum Celso loquar, commendanda sunt. Cubiculi aër sit frigidiusculus; culcitae plumeae et vestimenta cubitoria calida vitentur. Incumbat aeger stragulis e crinibus equinis aut stramine factis: soluta sint membra a vinculis et vestibus arctioribus. Lucis nimia incitatio prohibenda: sonitus omnis arcendus. Ubi haemoptysi aut epistaxi laborat, situm servare iuvat erectum: si nimia ex utero est sanguinis profusio, supina cubare, genubus contractis, aegra de-

bet. Magnopere prodest, a cibis potibusque exaesiuantibus et irritantibus abstinere: sufficit sorbitiones propinare ex oxymelle, acido sulfurico diluto cum syrupis; acidulas etiam ex acido tartari, tartaro depurato, e fructibus horaeis; nitri demum solutionem cum gummi arabico et mucilaginosi.

363.

Ad haec, in omni haemorrhagia causis irritantibus removendis studendum est. Mulieres, metrorrhagia laborantes, ea non liberantur, nisi, dum parturiunt, placenta solvatur (*path. spec.* §. 400.), dum partum iam enixa sunt, grumi e secundinis residui educantur. (*ib.* §. 401.) Quodsi neque parturiunt, neque gravidae sunt, polypi uteri, scirrhii, steatomata, inversio uteri et procidentia respiciuntur: quae vitia nisi curaveris, haemorrhagia omnia medentium conamina eludet.

In aliis haemorrhagiis fordes saepe primarum viarum, stases abdominales, vermes etiam accusantur, quibus sanguinis impetus excitatus tum demum quiescet, cum causas illas removeris. Alvus adstricta, qua orgasmus saltem sustinetur, clysmatibus mollientibus curanda est.

364.

Super haec, ut perfecta haemorrhagiae curatio instituatur, inaequalis virium dispensationis ratio

habenda est. Haec saepe numero ea est, ut truncorum maiorum ratio ad ramulos minimos laesa sit: habitualis profecto dispositio ad haemorrhagias et aneurysmata. (*Matani et Welten in Lauth. script. de aneurysm.* p. 324. 483.) Sic varices interni haematemesin producant. (*path. spec.* §. 385.) Frequentior hac ratio laesa est inter vasorum sanguiferorum systema et vasa capillaria, quae consumtura sunt sanguinem; unde a rheumatismo, perfrigerio, functione cutis perturbata, haemorrhagiae nascuntur. His succurrendum est iis, quae vasorum capillarium functionem restituunt, perspirationem promovent et aequabilem imponderabilium distributionem. Proficua sunt emetica parvis dosibus exhibita, praecipue radix ipecacuanhae, quae cum opio iuncta utilissima est ad haemoptysin et metrorrhagiam, si inaequabilem virium dispensationem sequuntur. Camforam etiam et liquorem ammonii succinici aut radicem valerianae exhibent.

Huic praecipue casui idonea est Digitalis purpurea, quae arteriarum maiorum vim minuit, dum vasorum capillarium functionem restituit. Itaque tum tincturam eius, tum pulverem cum aequali portione hydrargyri muriatici mitis et opii in sanguinis profusionibus insignem praestare usum comperimus.

Huc et ipsum opium referimus, quod, excitato momento irritabili arteriarum, vim sensiferam minuere, statuimus. (*pharm* §. 230. 231.) Tincturam opii praesentanea saepe sistere commoda, si sanguinis profusiones e spasticis existunt constrictionibus, certum est. Oleum hyoscyami coctum cum gummi arabico parem praestare usum nupera docuit experientia.

Externe denique adhibentur, quae vasa capillaria incitant aut stimulos in cutem revellunt. Lavacra pedum e cineribus clavellatis, sinapi aut e kali caustico; cucurbitulae in epistaxi occipiti impositae; vesicatoria in haemoptysi scapularum interstitiis applicita, in metrorrhagia etiam in femoribus collocata, ita tamen, ut praeter rubedinem cutis nullam diuturnam feri secretionem excitent: haec saluberrimo consilio adhibentur.

355.

Tandem verae atoniae et laxitati saepius obviam eundum est, quae tum in scorbutica diathesi tum in putridis febribus, tum etiam in mulieribus, quae a mensurais defici incipiunt, accusanda est. Firmanda sunt vasa, totique corpori aut parti saltem adfectae, robur restituendum, quod, veterum consilio, fit deligatis membris: utilis quidem interdum administratio, sed saepe irrita. Satius est acida
mine-

mineralia cum cortice peruviano: tincturam praecipue cinnamomi exhibere in metrorrhagia, quae ex atonia vaforum originem ducit. Martialia quoque nonnunquam profunt: ferrum praeprimis sulfuricum et liquor stypticus Looffii. (*pharm.* §. 362.)

In scorbutica diathesi et putrida acidum carbonicum expeditissimum est, vel in potione Riveriana aut mixtura Hulmiana, vel in aqua Selterana et Geilnaviensi exhibitum, vel externe in rebus fermentantibus applicandum. Acida itidem mineralia proficua sunt, cum vino et spiritibus aromaticis: cortex peruvianus, kino denique et catechu.

Art. II.

De cohibendis aliis profluviis.

366.

Quodsi alii humores praeter naturam effluunt, primum dispiciendum est, curationem admi. aut, sive secus. Nonnulla enim profluvia, a natura excitata, morbos potius solvunt quam efficiunt: ideoque salubria sibi committenda sunt: diarrhoeae exemplo et ptyalismi, urinae quoque largo fluxu, quibus morbi acuti non raro indicantur. Et in ipsis diuturnis morbis, quamdiu affluit aliquid, vel praeter naturam generatum, meliuscule semet habere solet aeger, quia ipsae stases non raro profluviis

Huc et ipsum opium referimus, quod, excitato momento irritabili arteriarum, vim sensiferam minuere, statuimus. (*pharm* §. 230. 231.) Tincturam opii praesentanea saepe sistere commoda, si sanguinis profusiones e spasticis existunt constrictionibus, certum est. Oleum hyoscyami coctum cum gummi arabico parem praestare usum nupera docuit experientia.

Externe denique adhibentur, quae vasa capillaria incitant aut stimulos in cutem revellunt. Lavacra pedum e cineribus clavellatis, sinapi aut e kali caustico; cucurbitulae in epistaxi occipiti impositae; vesicatoria in haemoptysi scapularum interstitiis applicita, in metrorrhagia etiam in femoribus collocata, ita tamen, ut praeter rubedinem cutis nullam diuturnam feri secretionem excitent: haec saluberrimo consilio adhibentur.

365.

Tandem verae atoniae et laxitati saepius obviam eundum est, quae tum in scorbutica diathesi tum in putridis febribus, tum etiam in mulieribus, quae a mensstruis defici incipiunt, accusanda est. Firmanda sunt vasa, totique corpori aut parti saltem adfectae robur restituendum, quod, veterum consilio, fit deligatis membris: utilis quidem interdum administratio, sed saepe irrita. Satius est acida
mine-

mineralia cum cortice peruviano: tincturam praecipue cinnamomi exhibere in metrorrhagia, quae ex atonia vasorum originem ducit. Martialia quoque nonnunquam profunt: ferrum praeprimis sulfuricum et liquor stypticus Looffii. (*pharm.* §. 362.)

In scorbutica diathesi et putrida acidum carbonicum expeditissimum est, vel in potione Riveriana aut mixtura Hulmiana, vel in aqua Selterana et Geilnaviensi exhibitum, vel externe in rebus fermentantibus applicandum. Acida itidem mineralia proficua sunt, cum vino et spiritibus aromaticis: cortex peruvianus, kino denique et catechu.

Art. II.

De cohibendis aliis profluviiis.

366.

Quodsi alii humores praeter naturam effluunt, primum dispiciendum est, curationem admittant, sive secus. Nonnulla enim profluvia, a natura excitata, morbos potius solvunt quam efficiunt: ideoque salubria sibi committenda sunt: diarrhoeae exemplo et ptyalismi, urinae quoque largo fluxu, quibus morbi acuti non raro indicantur. Et in ipsis diuturnis morbis, quamdiu affluit aliquid, vel praeter naturam generatum, meliuscule semet habere solet aeger, quia ipsae stases non raro profluviiis

Quodsi nutrientis facultatis infirmitas accusanda, roborantia ipsa, melius nutrientia in adminiculum vocanda sunt: quae in diuturnis profluviiis summe necessaria sunt. Diabeten meminimus corticis peruviani, lichenis islandici et animali victu tandem debellatum esse, cum aliis omnibus remediis resisteret.

371.

Cum omnia haec conamina irrita sunt, cum mere localis adest laxitas, quae humores ad profusionem cogit, adstringentia eliguntur, quae vel proxime in locum adfectum agunt vel consensu eum ita mutant, ut vasa contrahantur, robore restituto. (§. 83.) Catechu et kino, plumbum aceticum et tormentilla necessaria saepe sunt, ut alvi profluvia, blennorrhoea et similes profusiones sistantur: sed cauto opus est, ne regulas (§. 85 — 87.), quae prohibent adstringentium usum, laedas.

Art. III.

**De regendis et restituendis sanguinis cursibus,
qui natura fiunt.**

*A. De mensiuorum cursu evocando vel
restituendo.*

372.

Generalis est curatio, in plurimis muliebribus morbis administranda, quae menstruum sanguinis

cursum vel evocat, vel, si interceptus est, restituit. In therapia igitur generali locum obtinet.

Primum autem dispiciendum est, admittat is status omnino curationem, sive secus. Namque, si femina concepit et fetum gestat; si vel iunior est vel senior, quam ut naturalis ille sit sanguinis cursus, absolum est eum prolicere. Itaque protinus aetas indaganda est et graviditatis signa sedulo examinanda.

Dein generatim monendum, haudquaquam omni tempore evocandum esse sanguinis menstrui cursum, multoque melius cedere, si temporibus iis fixis, ubi consuevit fluere, id moliamur. Itaque vel naturae molimina exspectanda vel sciscitanda sunt ex aegrota tempora cursus illius consueta.

Postremo in puellis, cum cursum nondum expertis, si molimina adsunt graviora, examinandae sunt partes verendae, ne, si occlusum forte est ostium (*path. gen.* §. 102.), si pravus uteri situs (*ib.* §. 224.), si scirrhus aut polypus (*ib.* §. 108. 311.), quod manu potius ferramentisque curandum est vitium, suscipiamus.

Quibus praemissis, si puellae sunt nondum eum cursum expertae, si graviora patiuntur, colicos dolores, spasmos, lipothymiam; inquirendum protinus

est in sanguinis forte abundantiam, quae minuenda est tum venaesectione, tum hirudinibus ad verendas partes aut ad femorum internam partem apposis, tum victus ratione tenui et remediis antiphlogisticis. (§. 209. 210.)

Alia est causa, et frequentior quidem nostra aetate in opulentioribus: evolutio nimirum corporis inaequabilis, ad quam spasmi accedunt. (*path. gen.* §. 37.) Haec causae opponuntur stimuli fugaces, spiritus aetherei, radix valerianae, ipecacuanhae etiam exiguis dosibus cum opio. Sed evolutioni etiam moderandae operam dare necesse est, quod victu et exercitatione, itineribus etiam et vitatis omnibus stimulis abnormibus, perficitur.

Dein viscerum abdominalium status examinandus est. Nihil frequentius accidit, quam puellas, ab infantia inde cupediis, epulis et comestationibus adsuetas, aut ita educatas, ut librorum lectionem et artificia muliebria praeferre discerent corporis exercitationi, dum pubescunt, abdominis ambitu praeter naturam aucto, stases pati abdominales, vermicibus conflictari aut frequentibus sordibus. Vermes quidem euectos propellere, saburram educere expedit; sed multo curiosius est status abdominalis curandus; quod iterum victus ratione ad leges artis instructa optime fieri, supra monuimus. (§. 241. f.)

Nonnunquam tamen corpus cetera bene constitutum atonia quadam partium verendarum laborat, qua fit, ut sanguinis copiam eam discernere nequeant. Contingit id in mulieribus, quae fluorem album passae, aut quae aerumnis et morbis praegressis infirmas sunt. Quodsi generalis haec adest sanguinis penuria, ad roborantem methodum, maxime victus rationem nutrientem (§, 131. f.) et ad moderationem animi perturbationum refugiendum est. Si vero localis adest laxitas et atonia, stimuli topici in auxilium vocandi sunt, quibus tum calor externus, tum fumigationes e balsamicis et aromaticis, succino praeparatis, tum graveolentia, ammoniacum, asa foetida, millefolium, tum resinosa acria purgantia, hellebori exemplo, aloës et gratiolae, adnumerantur.

Denique magnopere interest, spasmorum vim in retinendo eo cursu cognoscas. Namque protinus ut perfrixit femina, sistitur: terrore etiam et aliis causis intercipitur. His opponenda sunt balnea tepida, pediluvia, radix ipecacuanhae tum et, quae fugacem stimulum praebent, radix valerianae, olea aetherea, liquor ammonii succinici etc.

B. De haemorrhoidum fluxu restituendo.

376.

Fluxus haemorrhoidalis quamvis valetudinem adversam semper supponat, levare tamen symptomata praegressa solet: ideoque suppressio haud sine noxa contingit.

Duplex autem suppressio accidit. Vel enim, citra dispositionem, e causa manifesta, refrigerio, terrore aut corporis intentione nimia, cursus ipse subito intercipitur: vel, quae diutius iam fluxerant, e dispositione spastica, e stasibus abdominalibus, ex arthritide accedente, cessant.

377.

Discrimen id probe servandum est. Namque passiones e subito interceptis haemorrhoidibus fluentibus natae multo graviores sunt, multoque magis urgent medici auxilium, quam quae e dispositione potius lenta ortae sunt. Illae saepe aegrum praecipitant impetu sanguinis nobiliora organa petente, colicis doloribus inflammatoriis, cordis enormitate repente orta, apoplexia etiam et inflammationibus viscerum.

Itaque, ubi urgent symptomata ex intercepto repente fluxu nata, sanguis omnino mittendus est ex inferioribus (§. 254.), exhibenda, quae leniter alvum ducunt et caloris stimulum adimunt, tartarus

depuratus et sulfur praecipitatum. Tum iuvant, quae spasmus debellatura sunt: radix ipecacuanhae parvis dosibus cum opio; interdum cum hydrargyro muriatico miti; radix valerianae, extractum hyoscyami, stibium etiam sulfuratum. Nec negligendum est kali sulfuratum, cuius sedans indoles indices magis comprobatur. Denique caute revellentia adhibenda sunt; alvus eluenda irritantibus resinosis, maxime aloë; aut, si nimiam extimescimus incitationem, asa foetida cum oleis, sapone et castoreo.

378.

Quodsi vero haemorrhoidum fluxus lente cessat, e dispositione aut ex accedente morbo adfini, cautissime procedendum est, nec prius tentanda revocatio, quam exploratum habemus, passiones graviores ex ipso intercepto fluxu pendere, neque diutius iam eum cursum quieville. Namque tum superfluum, ni noxium, erit, cum arte prolicere.

Plerumque autem inquirendum est in stases abdominales, sine quibus raro is status contingit. Solvendae sunt victu iisque praesidiis, quae supra (§. 241 — 251.) indicata sunt. Dein debilitas nutritionis vincenda est roborantibus (§. 131. f.): torpor vero et laxitas partium adfectarum adstringentibus et incitantibus, quibus speciatim aloën, myrrham, ferrum sulfuricum et helleborum accensemus.

DE SECRETIONUM CORRECTIONE.

379.

Acrimoniam humorum tollere, putredini obviam ire et pus benignum producere proxime nequimus, nisi prius virium ratione mutata. Namque et generatim potentiam nervorum in secretionibus mutandis, maximeque nervorum gangliosorum sensum organicum eas moderantem et Galvanicarum actionum cum secretionibus similitudinem probavimus. (*phys.* §. 247. 249.) Tunc vero causam pravitatis humorum in virium ratione turbata quaesivimus: (*path. gen.* §. 94. 95.) suppurationem denique benignum ab activitate quadam mediocri vasorum pendere praecepimus. (*path. spec.* §. 163.) Hinc nec de acrimonia corrigenda, nec de putredine arcenda, nec de suppuratione promovenda, velut de peculiaribus methodis, sermo esse potest.

380.

Quodsi enim acrimoniam humorum secretorum animadvertimus, sive ea in humoribus gastricis et intestinalibus, sive in cutaneis adsit, protius inquirendum est, adsint stimuli, qui vel topice vel consensu organa secretoria adeo incitent, ut in secretis humoribus elementa polaria praevaleant. Proxime

in loca secretioni dicata agunt contagia, quae amovere aut inertia reddere oportet: vesicatoria ocysissime saepe secretiones pervertunt: unguentum e tartaro sibiato pustulas variolarum similes producit. Similibus stimulis morbofis e medio tollendis opera danda est. Hinc et diaphoretica methodus utilis est ad acrimonias humorum cutaneorum tollendas. (§. 337. 338.)

In remotis, sed consensu nexis partibus stimuli haerent, qui secretiones pervertunt. Nihil vulgatius est, quam saburram et vermes, praecipue vero stases abdominales corruptionem humorum in ambitu corporis producere, ut curare hanc acrimoniam nequeas nisi laxantibus aut purgantibus (§. 308. 310.), resolvente etiam adhibita methodo. (§. 256.)

381.

Sed virium ratio et magis generatim habenda est. Siquidem e debilitate diuturna vis reproductivae pleraeque proficiscuntur humorum acrimoniae, unde roborans methodus praestantissima est. (§. 122.) Hanc adjuvare, atque, ubi torpet vis sensifera, secretiones optime promovere possumus, methodo incitante. (§. 152. 155.)

Quodsi vero vires inaequabiliter distribuuntur, quae praecipua est causa depravatorum humorum,

284 SECT.III. HUMOR.INDOL., COP.MUT.

revulsio tentanda est (§. 223.), aut sedans etiam methodus, quae fugacibus incitamentis agit. (§. 193.)

382.

Unica est methodus, acrimoniam humorum proxime domans, quae succi gastrici acorem aut putridam indolem, exhibitis absorbentibus vel acidis compescit. (§. 274. 275.) Haec et proficua esse potest, ubi saburrae acidae stimulo humores cutanei depravantur, quod consensu fit. Dein in ulceribus saniosis et carcinomatosis arcere acrimoniam chemicis reagentibus possumus: acido carbonico, aqua calcis et pulve e dauci carotae radicibus parata.

383.

Putredo arcenda est primum evacuatis iis rebus, quae facilius, si vires defecerint, putrescunt. Hinc, si fordes putridae adsunt, laxantia profunt acidula. (§. 308.) Nec in scorbuto absolum esse, leniter alvum ducere, Blavii testimonio et Kortumii.

Dein vel maxime interest, glandulas ita firmare, ut subigendo eo, quod in putredinem vergens a vasis lymphaticis attrahitur, pares reddantur. (*path. gen.* §. 95.) Fit id potissimum ita, ut, vel orgasmo nimio minuto, modica quaedam consequatur actio; vel, si torpet vis reproductiva, incitante methodo haec suscitetur; vel denique, si inaequabilis adest

virium distributio, hae ita componantur, ut medio-
criter et ordine quodam normali agant.

384.

Itaque patet, *antisepticam* methodum saepe re-
duci ad *antiphlogisticam*, maxime cum febres putri-
dae ingenti orgasmo incipiunt. (*path. spec.* §. 99.
therap. gen. §. 206.) Sed cavendum est, ne ultra
tempus summi orgasmi producat. (§. 208.)

Utilissima est incitans methodus ad putredinem
arcendam, si vis sensifera torpet. Acida mineralia,
camfora et arnica summe phosphorus denique et ve-
sicatoria proficua sunt, si cum pulsibus languidis ex-
trema in frigus vergunt, si febris haud valida est,
si sudoribus viscidis disfluit cutis.

Quodsi vero spasmi adsunt et dolores, inflam-
mationem minantes, fugaces potius stimuli eligendi
sunt, qui remissionem producant, normali secretio-
ni idoneam. Radix valerianae, spiritus aetherei, mo-
schus et oleum animale eximie saepe antiseptica sunt,
si ille status adest.

Denique si labes organorum nutritioni dicato-
rum putredini occasionem praebet, roborantia expe-
ditissima sunt. Quod tum in scorbuto, tum in fe-
bris putridae eo gradu valet, ubi nondum penitus
prostrata vis sensifera nulla tamen adest nimia inci-

tatio. Cortex peruvianus potentissimum est antisepticum, si cum victus ratione idonea iungitur.

385.

Puris blandi secretio proxime promoveri nequit, nisi vel stimulis praeternaturalibus remotis, vel ténerritate partium ac nimia incitatione per mollientia et sedantia minuta, vel incitata etiam validius partium adfectarum totiusque corporis vi reproductiva.

Itaque ulcera curaturum decet ante omnia stimulorum externorum et internorum, quibus secretiones perturbantur, accessum cavere eosque amovere. Aëris contactus, caloris nimii et frigoris noxae vitandae sunt. Sanguinis nimius impetus vitandus: hinc pedes ulceribus diuturnis deturpati elatius ponendi sunt: exercitatio membrorum frequens vitanda. Maxime vero victus ratio ita moderanda est, ne potus exactuantes, cibi dyspepti et acres ingerantur; ne animus perturbetur. Somno providendum est, ne continuis vigiliis vires aegroti pervertantur. Deligatio sit nec nimis frequens nec arctior iusto. Unguenta et emplastra irritantia sedulo prohibenda, nili torpor partium ea exigit.

In ulceribus externis sufficiunt pulvilli et linamenta carpta e blandis succis expressa aut cerato simplici illita: quibus et aër arcetur et mediocris activitatis gradus servatur.

386.

Quodsi vero ulcus est inflammatorium, si margines dolent et rabent, puris generatio impeditur nimia incitatione, ut pauca sanies aquosa secernatur vel plane siccum sit ulcus; antiphlogistica necessaria est curatio. Lavantia profunt; utiliter imponuntur mollientia, ipsaque aqua tepida, quam Kernius nuper nimis generatim commendavit. Ad dolores sedandos proficiant oleum hyoscyami expressum et fomenta e seminibus lini et herbis malvae, althaeae etc.

387.

Si vulnus contra marginibus torpidis, flaccidis cingitur, si sanies copiosa effluit, carnes luxuriant et spongiosum aliquid surgit; stimulantia et adstringentia profunt. Aqua calcis reliquis fere palmam praeripit: tum deligatio arcta: involutio membri: Bayntonii methodus emplastris adhaesivis ulcera diuturna constringendi: putamina nucum iuglandum, cortex ulmi et salicis: demum saturnina in usum vocanda sunt, si colluvies saniei cum sensus torpore et flacciditate ulceris iungitur.

Ubi carnes luxuriantes ex hac causa adsunt, ni iisdem cesserint remediis, zincum sulfuricum et oxydatum, aerugo, hydrargyrum oxydatum rubrum et muriaticum corrolivum, argentum nitricum et

kali causticum adhibenda sunt. Calli iisdem remediis vel compressione etiam, nisi nimis obduruerint, vel incisionibus, maxime vero tartari stibiati solutione tolluntur.

Circumspiciendum tamen, vires totius corporis nutritivae erigantur: quod tum nutriente diaeta, tum roborantibus et incitantibus fit, quibus et corticem peruvianum, et lichenem islandicum, myrrham etiam et aquam calcis adnumeramus.

388.

Quodsi denique stimulo specifico morboſo ulcera laceſſuntur, huic opponenda ea, quae uſus docuit. Syphilitica ulcera hydrargyroſi; ſcabiola ſulfure et zinco ſulfurico; ſcorbutica acidis curanda ſunt.

SECT. IV.

DE EUTHANASIA PROMOVENDA.

389.

Medici officium eſt, non morbos ſolummodo perfecte curare, ſed lenire dolores, levare graviffima ſymptomata, ipſius denique mortis inevitabilem acceſſum ita moderari, ut, quantum fieri poteſt, terminus vitae minus moleſtus ſit. Medicus enim, huma-

humanitatis minister, humano animo artem exerceat oportet.

390.

Mortis autem facies varia est tum pro natura morbi, tum pro varia aetate, tum pro ratione cultus et educationis, religionis et institutionum publicarum. Qua caussarum varietate liquet, mortis lenimina mox esse in potestate medici, mox vero nulla ipsi patere.

Namque, ut primum morbi differentias consideremus, et generatim (*phys.* § 102.) et speciatim in variarum aegritudinum expositione indicatas, pluribus morbis si ad extrema ventum est, anxietas animique terrores familiares sunt. Quodsi ii e doloribus proficiscuntur immanibus, hos lenire necessarium est: c. g. in carcinomate uteri. Quodsi anxietas e suffocationis metu et colluvie intra fistulam spiritalem pendent, leniter solventia et anodyna propinare expedit.

Quodsi vero cruciatus ingentes lenire nequimus, quaeritur, an medicum deceat, narcoticis mortem accelerare? Cautissimus Aretaeus (*curat. acut. lib. 3. c. 5.*) etiamsi generatim id, ut humanitatis legibus adversum, prohibeat, addit tamen nonnunquam, si praevideat medicus cruciatus haud evitabiles diu duraturos, somnolentia promota mor-

tem leviozem reddere debere. *) Utique exploratum habemus, regulas generales praescribendas haud esse, sed cuiusvis cordati medici conscientiae committendum, quam ratione ineluctabilem mortem remediis narcoticis et promovere et lenire licitum ducat.

391.

Id autem generatim monendum esse ducimus, aegrotorum plurimorum anxietatem ex incertitudine potius pendere, quam e mortis ipsius certae terroribus. Itaque medicum oportet, si morbi exitus letalis exploratus est, eum ita annunciare, ut humanum virum decet: ne incertitudinis perturbationibus diutius aeger crucietur. Namque magni refert, aegrum posse tempestive res suas curare, liberorum sorti providere et testamentum nuncupare.

392.

Mortis terrores non raro ex institutionibus publicis, civilibus et religiosis pendent, quarum effectum amovere medico saepius haudquaquam licitum est. Quodsi enim religionis ministri Deum iracundum et haud facile propitium sermonibus suis exhibent; si *μετάνοιαν* difficillimam reddunt, et aeternis

*) Θέμις δέ ποτε προγγνώσκοντα σαφὰ τὰ παρόντα, ὡς οὐ φύξιμα, κατηβαρέη νοσήσῃ εὐνάσθαι.

SECT. IV. DE EUTHANASIA PROMOV. 291

terrent poenis infernalibus: quid mirum, aegrotos in his educatos religionis horroribus, mortis accessu inmaniter terreri? Satius est profecto nullam profiteri religionem, atque, ut rudis quisque homo, coecum fatum subire, aut, ut Turcarum gens, nil nisi voluptates sensus mulcentes exspectare, quam talem, quae ultima vitae momenta acerbissima reddit.

393.

Si homo, rationis suae recte compos, ea, quae mortem sequuntur, secum reputans, ambigit, dormiturus sit animus post obitum, sive somniaturus, ex hac ipsa dubitatione nascitur metus somniorum. *) Cum nemo unquam redierit ex incognita illa regione, ratio humana sibi commissa, etiam si plurima testentur, animum esse immortalem, nihil tamen certi de statu animorum post mortem habet,

*) — — — — — *To die — to sleep;
To sleep! Perchance to dream: ay, there's the rub:
For in that sleep of death what dreams may come,
When we have shuffled off this mortal coil,
Must give us pause.*

SHAKESPEARE: *HAML.* act. 3. scen. 1.

Socrates, si somnus sit mors, nullam somnium extimescebat, (*Plat. apol. Socrat.* p. 16.) Καὶ εἴτε δὴ μηδεμία αἰσθησις ἐστίν, ἀλλ' οἷον ὕπνος, ἐπειδὴν τις κα-
ταύεται, μὴδ' ὄναρ μηδὲν ὁρᾷ, θαυμάσιον κέρδος αὖ εἶναι τὸ θάνατος.

ut et Socrates ipse finem apologiae hunc faciat:

Ἀλλὰ γὰρ ἤδη ὥρα ἀπιέναι, ἐμοὶ μὲν ἀποθανουμένῳ, ὑμῖν δὲ βιωσομένοις· ὁπότεροι δὲ ἡμῶν ἔρχονται ἐπὶ ἄμεινον πρᾶγμα, ἄδηλον παντὶ, πλὴν ἢ τῷ Θεῷ.

Nisi igitur Deus nobis per Iesum Christum spem aeternae vitae et fiduciam largitus fuerit, metus et terror miseros nos ubique anxerint ac sollicitaverint. Hanc religionem, ut humanitatis triumphum, ut summum Dei beneficium, venerari, diligere ac eius praecepta et promissa cuivis eorum capaci moribundo commendare, ut mors minus acerba reddatur, officii est tum sacerdotum tum etiam medicorum. Namque in his saepe aegri multo maiorem collocant fiduciam, quam in ipsis sacerdotibus.

P r o d i i t

Rudolphopoli,

ex typographico Froebeliano.



CURTII SPRENGEL
INSTITUTIONES
MEDICINAE FORENSIS.

LIPSIAE ET ALTENBURGI,
SUMTIBUS F. A. BROCKHAUS,
1816.

CURTII SPRENGEL

INSTITUTIONES

M E D I C A E.

TOMUS VI.

PARS SECUNDA.

MEDICINA FORENSIS.

LIPSIAE ET ALTENBURGI,

SUMTIUS F. A. BROCKHAUS.

1816.

CONSPECTUS.

Introductio.

Doctrinae informatio §. 1.

Ratio ad iuris legumque disciplinam §. 2.

Medici publici officium, continens se intra limites doctrinae medicae §. 3.

Collegiorum medicorum est, et hos transgredi limites §. 4.

Iudex aut caussidicus an callere medicinam forensam debeat aut possit §. 5.

In foro, i. e. praesente iudice et a medico publico actio iudiciaria instituenda est §. 6.

Scientia, ingenio, virtutibus necesse est insignis sit medicus publicus §. 7.

De libello componendo §. 8.

De eius libelli forma, ordine et scriptionis genere §. 9.

De emendatione legum, si principiis artis medicae contrariae sunt §. 10.

De ordine rerum tractandarum §. 11.

Sect. I.

De iure natorum.

Cap. I. De monstris.

Cur quaestio de monstris huc pertineat §. 12.

Monstra, ostenta quid sint §. 13.

Quaenam formae vitia proprie huc numeranda sint §. 14.

Series acephalorum §. 15.

Acephali veri diu vivere nequeunt §. 16.

Causae eius deformitatis §. 17.

Quaenam iura habeant §. 18.

Bicipites fetus aut bicorporei §. 19.

Ortus probabilis §. 20.

Quaestiones de iis forenses §. 21.

Cap. II. De hermaphroditis.

Veri qui sint §. 22.

Plurimi alterutri sexui adscribendi §. 23.

Quomodo oriantur §. 24.

Androgyni frequentiores §. 25.

Genometabole inde exponenda §. 26.

Gynandrae rariores §. 27.

Neutri sexui quidam tribuendi §. 28.

Cap. III. De abortione criminosa.

De vita fetus probabilis §. 29.

Abortus quid sit, quidque leges circa eum statuerint §. 30.

Quid medici sit publici in abortione investiganda §. 31.

Signa abortionis praegressae §. 32.

Quibusnam causis ea tribuenda sit §. 33.

Aetatis, qua fetus gaudet, exploratio §. 34.

De molis §. 35.

Maturior partus enecatus §. 36.

Cap. IV. De partu legitimo.

Quaestiones iudiciariae quaenam sint §. 37.

Maturitatis signa §. 38.

Tempus tamen simul graviditatis investigandum §. 39.

Praecox partus an legitimus sit §. 40.

Ultra terminum gestatus an legitimus sit §. 41.

De superfetatione §. 42.

Cap. V. De infantis nece.

I. De vita infantis dubia.

Quaenam quaestiones oriantur? Infanticidii definitio iudiciaria §. 43.

Vitalium duntaxat fetuum occisio mulctatur §. 44.

Vestigium praegressae vitae in pulmonum functione perpetrata dubium §. 45.

De vagitu uterino §. 46.

Debilis fetus paucis conatibus pulmones adeo mutare nequit, ut vestigia eius functionis supersint. §. 47.

Quaenam sint vestigia §. 48.

Docimasia pulmonum hydrostatica quonam modo instituenda §. 49.

Putredinis effectus in pulmonibus §. 50.

Inflatio pulmonum §. 51.

Docimasia pulmonum Ploucquetiana §. 52.

Mutationes aliae pulmonum vasorumque §. 53.

VI

CONSPECTUS.

Vesicae urinariae vacuitas aut plenitudo satis ambigua
§. 54.

De sugillationibus, vitae praegressae signis §. 55.

De fetus mortui signis §. 56.

II. De mortis genere, quo infans decesserit.

Dubium est iudicium, culpa an dolo contigerit §. 57.

Quaestiones forenses de ea re §. 58.

Inscitia graviditatis, ignoratio partus instantis, partus ipse
inscia muliere an contingere possit §. 59.

De neglecta funiculi umbilicalis deligatione §. 60.

De suffocatione infantis §. 61.

Quomodo sine matris culpa contingere possit §. 62.

Quanam ratione per alia suffocetur infans §. 63.

Scelestiora occisionis genera §. 64.

Sect. II.

De iure vulneratorum et occisorum.

Cap. I. De laesionum letalitate.

Laesionum definitio §. 65.

Quaestiones forenses. Partitio letalitatis §. 66.

Discrimen letalitatis ante et post mortem §. 67.

Quaenam exigantur, ut minus ambiguum sit post obitum
iudicium §. 68.

Quomodo optimae leges sentiant de partitione laesionum
§. 69

Differentia letalitatis, qualis vulgo exponitur §. 70.

Ploucquetiana divisio verior §. 71.

Quid medici sit publici, in hoc discrimine adhibendo §.
72. 73.

Enumeratio vulnerum sanabilium aut immedicabilium huc non pertinet §. 74.

Cap. II. De veneficiis.

Definitio §. 75.

Atrocius est crimen alia occisionis specie §. 76.

Eventus discrimen §. 77.

Difficultates examinis a medico instituendi §. 78.

Circumspectissime agendum §. 79.

Quomodo examen chemicum instituendum sit §. 80.

Symptomata exploranda §. 81.

Partitiones venenorum vulgares §. 82.

Venena vegetabilia narcotica §. 83.

Venena animalia, arsenicum et alia §. 84.

Examen chemicum arsenici §. 85.

Examen plumbi, hydrargyri et cupri §. 86.

De medicinis periculosis et poculis amoris §. 87.

Cap. III. De autochiria.

Quaestio saepe difficillima §. 88.

Mortis arbitrariae genera. Suspensio §. 89.

Mortis genus per globum e sclopeto elisum §. 90.

Alia mortis genera §. 91. 92.

Cap. IV. De eruendis aliis mortis speciebus.

Cautelae in eo examine necessariae §. 93. 94.

De suffocatione §. 95.

De fame alioque modo enecatis §. 96.

Sect. III.

De iure sexuum.

Cap. I. De iure virginum.

Quaestiones iudiciariae §. 97.

Virginitatis definitio §. 98.

De hymenis integritate §. 99.

Alia pudicitiae signa §. 100.

Obstetrices sufficiantne ad id examen §. 101.

De stupri violenti et haud voluntarii discrimine §. 102.

De stupri violenti idonea informatione §. 103.

Vestigia eius §. 104.

Concipere possit, cui stuprum vi illatum sit §. 105.

De consummatione stupri §. 106.

Cap. II. De iure coniugum.

Matrimonii finis quomodo frustretur §. 107.

A. Impotentia virilis.

Differentia eius §. 108.

Castrati an vere impotentes? Crypsorchides? §. 109.

Causae coitus haud efficacis §. 110 — 112.

Quid medici sit in hoc examine §. 113. 114.

B. Sterilitas feminarum.

Differentia eius §. 115.

Obstacula coitus §. 116 — 118.

Sterilitatis causae altiores §. 119. 120.

Cap. III. De eruenda graviditate,

De occultatione graviditatis §. 121.

Examen signorum §. 122 — 125.

Cap. IV. De probando puerperio praegresso.

Signa recens praegressi puerperii §. 126.

De eruendis signis diutius praegressi §. 127.

Sect. IV.

De iure aegrotorum.

Cap. I. De morbis simulatis.

Difficultas officii §. 128.

Qui morbi facillime praetendantur §. 129.

De doloribus simulatis §. 130.

De sensuum defectu ficto §. 131.

De epilepsiae simulatione §. 132.

De sanguinis profusionibus §. 133.

Cap. II. De morbis dissimulatis.

Quando morbi dissimulentur §. 134.

Syphilis frequentissime celatur §. 135.

De blennorrhoea virili dignoscenda §. 136.

De blennorrhoea muliebri §. 137.

De ulceribus venereis §. 138.

De exanthematibus syphiliticis §. 139.

De aliis cutis turpitudinibus dissimulatis §. 140.

Cap. III. De mentis aegritudinibus.

- Quomodo id examen et cur medicis committatur §. 141.
Medii aut neutri status §. 142.
Quid leges sanxerint §. 143.
Quid desideretur in iis legibus §. 144.
Fatuitatis et stupiditatis discrimen §. 145.
Quomodo examen instituendum §. 146.
De infaniae specie prima §. 147.
De lucidis intervallis §. 148.
De expergiscentium statu §. 149.
De somnambulorum statu §. 150.
De altera infaniae specie §. 151.
De exam. adfectibus producta et instinctu coeco
§. 152.
De furore examinando §. 153.
De surdorum, qui simul muti sunt, statu §. 154.
-

INSTITUTIONES
MEDICINAE FORENSIS.

INTRODUCTIO.

1.

Medicinam forensem diximus (*introit.* §. 7.) comprehensionem rerum, quibus medicus in foro et ad lites diiudicandas utitur. Sicut enim ad regendam civitatem remque publicam administrandam medicarum rerum scientia exigitur, quas *medicina publica* complectitur; ita, ut leges observentur, causae dicantur ac ius exerceatur, saepe est opus medicarum cognitionum, quas neque a iudice, neque a causidico expectaveris, a medico solo suppeditandas. Eos medicos civitas quaecvis bene administrata constituit, ut cognitionum medicarum auxilia impertiant iis, qui saluti publicae provident, civitates regunt et leges custodiunt.

Cum variarum rerum medicarum comprehensionem sistat haec doctrina, disci nequit, nisi ab homine disciplina medica, omnibusque doctrinis ad medicinam pertinentibus rite imbuto. Itaque et finem facit totius disciplinae medicae: et iuris studiosus aut consultus idoneo modo eam capere nequit, nisi totum medicarum doctrinarum ambitum rite cognoverit. Id autem, cum nostrae aetatis doctrina medica amplissima sit, cumque pluribus nitatur aliis cognitionibus, fieri fere nequit, nisi quis, Conringiano ingenio pollens, adolescentiam omnem et iuvenilem aetatem in studiis adeo disparibus consumserit. Itaque et irrita putamus et superflua eorum conamina, qui vel iuris studiosos in his rebus erudire gestiunt, vel Alberti aut Valentini aut Maffi etiam nupero exemplo libros edunt, quibus iure-consulti utantur ad dirimendas lites et solvenda dubia forensia.

Quodsi quaestionum medicarum ad res forenses pertinentium solutio nec a iudice nec a causidico expectanda est, sed a medico, quem eum in finem civitas constituit; pariter opus est et hic abstineat ab omni quaestionum legalium tractatione: neque, si de mentis indole sciscitatur, quaerat, qui-

nam sint hominis heredes: neque, si de vulneris letalitate quaestio existit, quinam fuerit animus eius, qui hominem fauciaverit aut necaverit. Sed simpliciter et ingenue inquirat in ea, quae medicus scientia sua exponere potest. Egregie id perspexit magistratus patriae, cum anno 1790. d. VIII. Martii sanciret, medicis publicis cavendum esse ab omni interrogatione rei ac ab omni quaestione legali; nihil eorum esse, nisi medicas res eruere, nullo personarum respectu habito. Similiter iudicat magistratus bavaricus (*Anmerk. zum Strafgesetzbuch für das K. Bayern*, B. 2. p. 14. f.)

Nihilominus necessarium quandoque est, ut, priusquam medicus quaestiones suas inchoet, a iudice obtineat primam interrogationem, ut, quid speciatim inquirendum sit, pateat.

Varii auctores perhibuerunt, medicum sine cognitione principiorum in iure valentium finem aut scopum examinis vel scrutinii a se instituendi intelligere non posse. Quod etiam si verissimum sit, et, quatenus imputari possit cuiquam factum, medicus scire debeat, curiose tamen insistendum est *σωφροσύνη*, quae, eruendis medicis rebus acquiescens, abstinet ab alienis iuris quaestionibus.

4.

Quodsi eos limites officii, quo medicus publicus fungitur, rite constitutos agnoscimus, alio ta-

men modo se habet cum collegiis medicis et facultatibus, quae, cum a iudicibus arbitri advocentur, ex universae causae informatione tantum iudicare valent. Itaque praeter necis vestigia et res medicas debent et inquirere in omnia, quae dilucidare causam et iudicium iuvare possunt. Medicus publicus aut dissector testis vices gerit: ad collegia vero medica commentarii actorum integri mittuntur, quae-
stioque saepe duplex proponitur, altera e corpore delicti, altera ex aliis argumentis, locorum temporumque rationibus diiudicanda. Quodsi enim infans statim post partum culcitis impositis suffocatus fuerit, corpus infantis nulla profecto certa monstrat praegressae necis signa: ubi vero rea libere confitetur, hanc infanti mortem a se illatam, sufficiunt signa, alioquin dubia: ubi arbitri e commentariis actorum confessam ream noscere debent.

5.

Nonnulli etiam contendunt, et iudici et causidico necessariam esse medicinae forensis cognitionem, ut iudicare de medici consilio possint. Id autem de forma tantum consilii valet: namque ipsam materiem diiudicare nemo potest, nisi qui omnibus doctrinis medicis imbutus est. Quodsi e. c. de veneficio quaestio nascitur, scrutinium medici an rite secundum leges chemiae et doctrinae medicae institutum

fit, iudex nullo modo decernere potest. Soli formae consilii adhaeret, in qua si nihil peccatum fuerit, vel ipse, vel defensor, si etiamnum dubitant, id consilium ad magistratum medicum mittunt, ut de indole scrutinii iudicium ferat.

Si defensor, ut reum excuset, in latebras neglectae explorationis cadaverum absolutae semet conicit, audiendus non est, quoniam, dum confessus est et convictus maleficus de veneno exhibito, superfluum est caput aperire, ut forte apoplexiae vestigia deprehendantur. (*Platner quaest. med. for.* 23. 24.)

6.

Scrutinium medicum forense fiat necesse est in foro: id est, iussu iudicii; praesente aliquo, quem iudex aut magistratus ad eum actum misit; fiat denique a medico, cui fides publica a magistratu commissa est. Iussu iudicii quaestio instituitur, ne privatorum hominum odia vel studia ius pervertant. Praesentia viri, quem iudex aut magistratus delegavit, necessaria est, ut actus legitimam habeat formam et solemnem.

Patriae leges sanciunt, et iudicem et scribam, qui tabellas quaestionis calamo excepturus sit, praesentes esse debere: nec actuarium solum sufficere,

nisi iudice aegrotante, urgente necessitate ac advocato alio scriba. (*Allg. Criminalrecht für die preuss. Staaten*, 1. §. 46.) Quodsi vel actuarius solus, vel solus index adfuerint, ordinaria cognitio haud sequitur, sed *nullum* habetur iudicium. (*ib.* §. 43.)

Denique cuivis medico haudquaquam licet a iudice excitari, cum, in Germania saltem, medicis singularibus commissa est a summo magistratu cura salutis publicae et rerum forensium. Neque tamen eo minus licet etiam iudicem, si quis alius medicus legitimus in peculiari quadam quaestione famam sibi acquisivit, eum advocare, aut ita eum adhibere, ut medico publico opem ferat ac hunc doctrina sua experientiaque adiuvet. Laudandus igitur iudex aut caussidicus etiam, si, cum vel de graviditate dissimulata vel de causis divortii quaestio existit, praeter medicum publicum advocat etiam obstetricium virum, dummodo hic usu pariter ac doctrina insignis sit. Sacramento singulari ad hunc actum adigitur extraneus is medicus, aut iureiurando eo obstringitur, quod in officio adeundo praestiterat. (*Cf. allg. Criminalrecht für die preuss. Staaten*, 1. §. 145 — 148.) Eodem iure patrio chirurgis legionariis aut etiam iis, qui cohortem quingenariam curant (*Bataillons - Chirurgus*), eadem dignitas tribuitur, quae medicis publicis. (*ib.* §. 148. 160.).

7.

Medicus publicus, cui ab iis, qui civitatem regunt, et salus publica et quaestionum forensium decisio committitur, emineat inter alios medicos tum doctrinae ambitu et eruditionis, tum ingenii acumine, tum amore honesti verique, tum humanitate, sedulitate, candore animi ceterisque virtutibus, quae bonum virum faciunt et decent. Doctrinae ubertas necessaria est, cum haud vulgaris anatomiae vel subtilioris cognitio, chemiae etiam, physiologiae reliquarumque disciplinarum medicarum exigatur.

Sed theoria medica haud sufficit, nisi adaptata ad leges. Itaque has cognoscat medicus: tamen iuris peritum esse debere haud inde fluit.

Ingenii acumen singulare requiritur in variis quaestionibus forensibus dilucidandis, praesertim in morbis simulatis et disimulatis eruendis. Virtutes animi si ubivis hominem faciunt et ornant, medicus publicus iis egere eo minus potest, quo magis de honore, opibus et prosperitate civium agit. Itaque, etiamsi doctrinae prodigium sit, si lucri cupidini, simulatibus, impudicitiae indulget, si religionem despicit negligitque conscientiam, satius est, talem virum abigi a foro quam attrahi.

8.

Ut magistratum iudicisque mandatis obtemperet, opus est, medicus libellum componat, quo

memoriam omnium rerum, quas in homine vivo aut mortuo invenerit, comprehendat. Eo libello, quem *visum repertum* aut *consilium* etiam vocitant, clare, distincte et succincte, sine ambagibus et minutiarum studio tradat, quaecunque magistratum aut iudicem ductura sunt ad iudicium ferendum. Is libellus ne memoriter, scrutinio iamdiu peracto, conscribatur: sed, dum vel secatur cadaver, vel inquiritur in hominis vivi statum, memoria saltem brevis a scriba forense calamo excipiatur, e qua deinde medicus publicus libellum componat iudiciale.

In eo libello necesse est memoriae tradantur ea omnia, quae enodare quaestionem valent, omissis iis, quae nihil ad rem faciunt. Quod, quam arduum saepe sit, quantumque saepe ingenii acumen et doctrinae maturitatem exigat, paucis dici nequit. Haud ad rem pertinent laesiones vasorum nervorumque omnium, variaeque res, quae ambiunt hominem vivum mortuumve, sed nullam habent efficaciam ad quaestionem legalem dilucidandam.

9.

Quod ad formam eius libelli attinet, haud properante nimis calamo, sed curiose omnique sedulitate ita conscribatur, ut, si fieri potest, quaestionis decisio clarescat. Quodsi ambiguum est iudicium,

contraria argumenta iuxta ponantur, ut cuius artis perito pateat, nullum de eo casu arbitrium valere.

Quamvis praecepta doctrinae artisque leges sedulo observari opus est, abstineat tamen medicus publicus ab omnibus opinionationibus, quae, certo haudquaquam experimento suffultae, iudicium magis confundere valent quam elucidare. Ambages omnes omittat nihilque scribat, nisi quod res exigit.

Ordo rerum libello consignandarum naturalis est. Exordium ducendum a mandato magistratus aut iudicis, a persona aut cadavere scrutandis, quae describuntur; laesiones omnes aut res inquirendae enumerantur; experimenta referuntur instituta; tum demum iudicium fertur, argumentis additis, quae e doctrina petuntur. In his quidem argumentis quanquam scriptorum celeberrimorum auctoritas haud plane negligenda est, neutiquam tamen argumentorum defectui praetendenda est ulla auctoritas.

Scriptiois genus sit planum, ab ostentatione eruditionis et apparatu scholastico alienum. Vernacula lingua concipiatur, quae, licet facile peregrinis oculis egeat, si vulgari captui proniores sunt, has tamen etiam recipit.

10.

Medici forensis est, ex artis suae principiis omnia eruere, quae quaestiones legales obscuras solvere valent aut errores etiam fugare. Hinc, si e veterum medicorum ratiociniis natas opinationes et leges falsas deprehenderit, auctoritatem legum haud pluris aestimabit, quam saniora doctrinae medicae aut physicae praecepta. Quodsi partus octimestris, Hippocraticorum auctorum arbitrio minus vitalis habetur, quam septimestris, erroneum hoc praeceptum nullo modo a medico forensi statuendum est.

11.

Ordo autem rerum tractandarum, cum vinculo quodam idoneo destituantur, naturalis est, ut a progenie inchoaturi, quaestiones legales solvere studeamus, quae tum aetati cuivis tum sexui vel communes vel peculiare sunt.

SECT. I.

DE IURE NATORUM.

CAP. I.

DE MONSTRIS.

12.

Cum omne ius, quo utimur, vel ad personas pertineat, vel ad res vel ad actiones (*Digesti. lib. 1. tit. 5. l. 1.*), prima quaestio existit de infantum natorum humana vel personali conditione.

Homo dicitur in iure, cuicumque mens rationis capax in corpore humano contingit: persona autem homo, statu civili praeditus.

Itaque quaeritur, infans quando humanae speciei abiudicandus sit? ut nec sacro Christianorum

lavacro imbuti fas sit, nec hereditatis iura tribui, nec alimenta praeberi.

13.

Ad hanc quaestionem veteres Iurisconfulti ita respondent, ut liberos non dicant, qui contra formam humani generis, converso more, procreentur; veluti, si mulier monstruosum aliquid aut prodigiosum enixa sit. Partum autem, qui membrorum humanorum officia ampliaverit, inter liberos connumerari debere. (*Digest. lib. 1. tit. 5. l. 14.*) Tales partus ostenta vocant: id nempe ita dicitur, quod contra naturam nascitur, tribus manibus forte aut pedibus, aut qua alia parte corporis, quae naturae contraria est. (*Digest. lib. 50. tit. 26. l. 38.*)

14.

Itaque et ipsa humanae naturae definitio et veterum Iureconsultorum decreta monstra habent, quae mente rationis capaci egent: haec enim princeps humanae naturae praerogativa. Mentem autem eam deesse in recens natis duntaxat e defectu cerebri efficitur: namque aliae omnes notae ambiguae sunt, cum nec similitudo formae cum brutali momenti peculiaris instar habeat, nec de mente infantis recens nati, sana futura sit sive secus, aliud valeat iudicium, quam e cerebri praesentia. Vana igitur et inania eorum

conamina, qui hic quidem loci uberius de sede animae disputantes eam in universo corpore collocant, aut, cum spiritus sit, a corporea indole alienus, nulli parti propriam declarant. Quae licet in se prorsus vera sint, ad forenses tamen quaestiones haud pertinent: firma superstitie veritate et inconcussa, quod claritas perceptionum, iudicii formatio et libertas voluntatis, ut humanae naturae *πλεονεκτήματα*, ne cogitari quidem possint sine encephali normali fabrica. (*inst. phys.* §. 366.) Itaque nec Ploucquetus audiendus, qui monstra declarat eos fetus, quorum cranium et facies cum brutorum consentiat. (*Über die physischen Erford. der Erbsähigk. des Kindes*, p. 129.) Fabulosa enim pleraque, quae huc referuntur, e Liceto, miraculorum anilium collectore, petita. Nec ossium cranii defectus, dummodo cerebrum integrum sit et normale, qualem Zwingerus observavit (*Eph. nat. cur. cent. 7. obs. 73.*), ad forensem monstrorum significatum trahendus.

15.

Monstra vera, humano iure privanda, hactenus acephala, ut cerebro cerebelloque careant, continuam seriem sistunt, quae incipit ab iis, quorum ossa cranii basilaria solo periosteo et integumentis communibus teguntur, deficiente omnino quovis encephali vestigio, quale exemplum Penada refert

(*saggio 1. d' osservaz. p. 57.*). Progreditur series ad eos fetus, qui cerebri loco massam cellularem fungosam gerunt, tum ad eos, quorum encephalus nonnisi vesicas sistit, prima eius organi rudimenta, denique ad illos, qui substantia medullari, sed confusa, nec in discretis organis figurata gaudent. His omnibus abiudicanda est humanitas, quanquam bene nutriti videantur.

Id enim peculiare habent acephali, quod cum totum corpus gangliis regatur, sicut animalium inferiorum corpore (*inst. phys. §. 362.*), partium aliarum nutritio saepe modum excedat, pili abundanter in aliis locis crescant, ut et totum pilosum observaverit Bangius (*coll. havn. vol. 1. p. 92.*). Sed eam ipsam ob causam antitheses necessariae ad vitam animale superiorem haud evolvuntur, unde et ossa plerumque mollia et muscoli sint gelatinosi motuumque fere incapaces.

16.

Plerumque praecoces sunt partus, atque, licet vivant, vitam tamen protrahere ultra aliquot dies, ultra septimanam saltem nequeunt. Lac quidem sugunt, sed continuo sopore et nervorum distentionibus opprimuntur: interdum iris est immobilis, pulsus fere nequeunt percipi, totum corpus continuo friget et caeruleo colore tingitur. (*Klein monstr. acephali hist. p. 12.*)

17.

Cuinam causae ortus eorum monstrorum acephalorum tribuendus sit, ambigitur. A violentiis externis oriri vix credibile: hydrocephalo exedi cerebri substantiam valde dubium (*inst. phys.* §. 362.): itaque ex impeditis potius evolutionis progressibus deducenda sunt. Cum e gangliis dorso adiacentibus et e medulla spinali encephalus sensim evolvatur, ut hunc et appendicem medullae spinalis habuerint veteres (*inst. phys.* §. 363.); cum nunquam encephalus adlit, deficiente medulla spinali (*Meckels Handb. der menschl. Anat.* 1. p. 351.); sunt potius rudimenta pristinae formae, quae in vesicis et massa fungosa, cerebri vices gerente, observamus. Tota igitur vi a mere organica, tantopere remota est ab omni humana indole, ut nec animalis omnino dici possit.

18.

Itaque veri acephali, seu fetus, qui omni encephali vestigio carent, nec humani iuris participes sunt, nec personae habendi. Hinc minime in societatem Christianorum sacri lavacri ope suscipiendi: hinc nec heredes esse possunt, nec testamenta eorum partu rumpuntur. Alimenta autem iis detrahi, vel omnino enecari superflua est crudelitas, cum nunquam ultra aliquot dies vitam protrahere possint.

Quodsi vero encephalus adest, licet cum deformitate ossium aut partium aliarum, ostenta iureconsultorum sensu nuncupanda, filiorum ius derogandum non est. Namque nescimus, possitne evolvi mens humana. Itaque et ii et hydrocephalo nati omnino sacro Christianorum lavacro imbuendi sunt, heredes esse et testamenta rumpere possunt.

19.

Multo difficilior est quaestio de *bicipitum* aut *bicorporum* fetuum iure. In statu enim civili quaeritur, duae sint personae, qui capite duplici praediti sunt; baptizandi sint seorsim et suo uterque iure gaudeat. Ad eam quaestionem solvendam inferviunt accuratiores fetuum eorum investigationes.

Plerique fetus bicipites, quorum amplissimam historiam doctissime nuper conscripsit Meckelius, collega clarissimus, (*de duplicitate monstrosa*. Hal. 1815.) ita formati sunt, ut coaluisse geminos appareat: unde defectu potius evolutionis peccasse quam excessu videantur. Namque, etiamsi capita et humeri seorsim normalem monstrant formam, thorax tamen et abdomen hactenus unam constituunt massam, ut et cor unicum imperfectum sit, cavitate unica praeditum, et, si duo adfuerint, alterum tamen altero perfectius sit. Rarissima sunt exempla a Schweikhardo (*Beschr. einer Missgeburt*. Tübing.

1801.) et Sigwarto (*Hist. gemell. coalit.* Tübing. 1769.), descripta, ubi utrique fetui suum esset cor et perfectum. Alia vitia, a formatione impedita, vulgaria sunt: labium leporinum, spina bifida, diverticula intestinorum, coalitus canalis intestinalis cum vesica urinaria. Anteriora abdominis integumenta deficere ipsaque generationis organa, Penchienati observavit. (*Mém. de Turin*, 1788. p. 57.) Cetero frequentiora esse sexus sequioris, quam masculi, rarissime utrumque sexum separatum, observationibus edoctus, idem Meckelius statuit. (l. c. p. 14. 21. 22.)

20.

Nec is gemellorum coalitus causae mechanicae tribuendus est, cui Treviranus tribuere studuit. (*Biol. tom. 4. p. 443.*) Sed cum hereditarium sit id vitium, cum in eadem familia saepius recurrere, ex eadem muliere modo haec monstra iam alio modo deformes fetus gigni observatum fuerit; liquet, e vis formativae potius defectu aut impedimentis vitiosisve necessario fluere.

21.

Itaque duae sunt personae, si cerebrum in utroque capite cum omnibus sensuum organis perfectum est, confluentibus duntaxat partibus inferiori-

bus, unde et libertatem arbitrii in utroque non raro animadvertas. Praeclarum eiusmodi exemplum sstunt puellae gemellae hungaricae, Helena et Iudith dictae, quae initio saeculi XVIII. per Germaniam ducebantur. Osse sacro coalitae utraque suam habebat mentem: Helena pollebat ingenio, plures linguas callebat: Iudith intellectu debilior; amore mutuo insignes, rixabantur tamen, quotiens altera alvum missura erat, altera nolente. Menstrua haud eodem tempore utrique respondebant. Quodsi vero altera aegrotaret, altera semper male se habebat. (*Waldschmidt de sororibus gemellis ab osse sacro monstrose cohaerescantibus. Kilon. 1709. Ettmüller de monstro hungarico. Lipsf. 1707. Torkos in philos. transact. vol. 50. P. 1. p. 34.*) Utraque mortua est, anno aetatis XXII.

Plurima alia exempla sunt fetuum perfectionum, quibus adhaereret imperfectior alter: sensu nonnunquam humano destitutus, ut solas functiones organicas exerceret. (*Bartholin. hist. anat. cent. 1. obs. 66. Parsons in philos. transact. n. 489. Percival ib. vol. 47. p. 360.*) Perfectior solus humanus videbatur.

Rarissimum exemplum, quod maiorem reliquis ambiguitatem habet, narratur ab Ever. Homio (*Phil. transact. vol. 80. P. II. p. 296.*), ubi caput alterum inversum alteri superimpositum erat, oculo-

rum motus non respondebant, capite altero dormiente, quando alterum vigil esset. Sympathia tamen insignis aderat; infante enim fugente, capitis inversi os saliva scatebat; dum ille eiularet, huius lacrimae fluebant. Ergo duae personae, sed alterius forma imperfecta, cum praeter caput nil adesset. Triennem hunc infantem observavit Homius.

Quodsi fetui alterius vestigia inclusa sunt (*Huxham in phil. transact. n. 487.*), quaestio forensis existeret nequit.

CAP. II.

DE HERMAPHRODITIS.

22.

Hermaphroditos vocabant veteres, qui utriusque sexus perfectas partes gererent, quales sculptores, vis virilis femininique decoris formas iuncturi, finxerunt. Nec tamen sufficit externarum partium finilium coniunctio, sed necessarium est in eadem persona connubium organorum internorum, testium igitur et ovariorum, uteri et vesicarum seminalium. Tales, si unquam vixerint, veros hermaphroditos cum Osiandro vocamus. (*Neue Denkwürdigk. vol. 1. P. 2. p. 265.*) Hos autem, ab antiquitate passim

creditos, e Paulli Aeginetae et Ulpiani inde temporibus, fabulis potius adnumeramus, etiam si Ackermannus ante undecim annos exemplum veri hermaphroditismi invenisse se contenderit. (*Infantis androgyni historia.* Ien, 1805.)

23.

Omnia, quotquot interius cognoscimus, hermaphroditorum exempla dispescimus in *androgynorum* et *gynandrorum*: illorum, qui cum mares sint, minus tamen evolutas gerunt partes: penem haud apice foratum, sed subtus, aut plane impervium, scrotum divisum, media parte fissa, meatu vaginam mentiente et vel in faccum coecum, speciem uteri prae se ferentem, vel dum urethra vera esset, in vesicam ipsam urinariam ducente; testes nonnunquam reconditos, aut ad annulum abdominalem appressos. Gynandrae vero feminae mares simulant, clitoride in penis molem excrecente, nymphis propendulis et vaginae ore clauso.

Hanc autem differentiam primus, ni fallor, statuit Leonidas Alexandrinus (saec. forte IV.), ex quo Paullus Aegineta mutuatus est; (*lib. 6. c. 69.*) et Aly Abbatis filius (*theor. lib. 9. c. 54.*). Unde et Avicenna iam (*can. lib. 3. fen. 20. tr. 1. c. 45.*) bene monuit, vera haud videri, quae de utriusque sexus partibus genitalibus aequalibus in eodem homine

narrentur: alterum membrum semper altero esse debilius. Hinc Iureconsulti veteres, Ulpianus et Paulus, (*Digest. lib. 1. tit. 5. l. 10. lib. 22. tit. 5. l. 15.*) hermaphroditum censuerunt eius sexus aestimandum esse, qui in eo praevaleat.

24.

Est autem causa huius turpitudinis in impedita embryonis evolutione quaerenda. Namque in embryone, quo propior est origini, eo minus sexuum discrimen animadvertitur: prima utique forma muliebri proxima est. (*Meckels Handb. der menschl. Anat. 1. p. 56. Rosenmüller in Abhandl. der physf. med. Soc. zu Erlang. 1. p. 100. Autenrieth in Reils Archiv, 7. p. 110.*) Itaque, etiamsi masculus fuerit fetus, divisio partium et diductio externa, muliebrem speciem adfectans, penis imperforati similitudo cum clitoride, testium occultatio superesse possunt. Veteres etiam, qui omnes partes masculas externas cum internis muliebribus easdem haberent, facillime transitum sexuum statuebant. (*Huarte examen de los ingenios, c. 15. p. 373.*)

25.

Androgyni gynandris frequentiores, dum nascuntur, propter scrotum, testium expers, in speciem nympharum divisum et parvitatem mentulae, saepe

imperforatae, pro puellis habentur. Hi, inter puellas educati, possunt, vel dum pubescunt, vel serius etiam, ipso sanguinis fluxu corripì e parte, quae vulvam mentitur, ut menstruorum cursui obnoxii dicantur; possunt virum admittere, cum scroti rima nonnunquam in saccum coecum ducat. Simul tamen visi sunt non solum erectionem pati, et clitoridi familiarem, sed pollutiones etiam nocturnas, quin alias feminas fecundarunt; corruerunt saltem, si forte ob testiculorum minorem evolutionem geniturae penuria adesset.

26.

Huc omnino trahendae narrationes de *genome-tabole*, ut Malacarnius nuncupavit, seu sexus muliebris mutatione in virilem: cuius rei antiquissimum habetur exemplum, quod Hippocraticus auctor (*Hipp. epidem. lib. 6. §. 8. p. 1201.*) de Phaëthusa Abderitana muliere narrat. Dicitur quidem ea, cum maritus exulasset, a menstruis defecta, virile corpus obtinuisse et barbam: id vero sine genitalium partium mutatione contigisse exploratum habemus. Evidentius vero huc pertinent exempla à Plinio (*lib. 7. c. 4.*) relata: Casini puerum e virgine factum, iussuque aruspicum in insulam desertam deportatum: Arescontem Argivum, cui nomen Arescufae fuisset, qui nupserit viro, cum seipsum virginem crederet, mox barbam et virilitatem provenisse uxoremque du-

xisse. Ipse Plinius se vidisse refert in Africa L. Cossicius, civem Thydritanum, nuptiarum tempore in mare mutatum. Similia exempla, quorum unum Laodiceae a se ipso visum, enumerat Phlegon Trallianus (*de reb. mirab. c. 6—9. p. 64—70. ed. Franz.*). In iis memorandus est Antiochenus, qui, Claudio Imp., cum pubesceret, post magnos cruciatus, ex virgine iuvenis factus est.

Nuperis temporibus eiusmodi androgyni observati fuerunt a I. Bauhino (*apud Schenck obs. p. 520.*), Paraeo (*opp. lib. 24. c. 5.*), Amato Lusitano (*cent. 2. hist. 39.*), Boëthio (*misc. nat. cur. dec. 1. ann. 2. obs. 252.*) et Claudero (*ib. dec. 2. ann. 3. obs. 75.*). Scientius tamen maioribus suis Morgagnius inspexit hermaphroditi crediti cadaver, cuius urethra fissa et ita aperta esset, ut credulis imponeret, tanquam vulvae species. (*de sed. et causs. morb. ep. 67. n. 6.*) Multo speciosiore casum penis imperforati pro clitoride habiti, fissi scroti in formam vulvae, unde et sanguis proflueret, Arnaudius observavit. (*über Hermaphrod. p. 18. 32.*) Memoratu dignissimum quod idem narrat exemplum filiorum eiusdem matris, qui omnes pene imperforato gauderent, unde manifestum est, e nulla mechanica causa, sed e vis plasticae vitio proficisci eas deformitates.

Celebratissima sunt quaedam nostrae memoriae exempla. In Norvegia ancilla, quae aliam im-

praegnauerat, licet testes haud externi essent, virum tamen se esse pollutionibus ante e tribus foraminibus penis inferioribus prodidit. (*Tode's Journ. vol. 3. P. 4. p. 423.*) Morgagniano simile exemplum fuit Michael Anna Drouart, qui pro hermaphrodito ante hos quinquaginta annos habitus fuit. (*Delius in fränk. Samml. B. 1. p. 150. B. 7. p. 598.*) Similima etiam, urethrae nempe fissae, testiculorum tamen externe conspiciendorum exempla retulerunt Hesselbachius (*Salzb. med. Zeit. 1808. II. 335.*) et Wittmannus. (*ib. 1809. I. 202.*) Minus scienter descripsit Baillieus, e Stoveri ore, hermaphroditum, virum certe, cum testiculi adessent, sed fesso scroto et pene imperforato: mammae praesentes credebantur feminam prodere, quamvis et hae turgescere in viris non raro soleant. (*Samml. für pract. Ärzte, B. 20. p. 459.*) Brandii exemplum etiam clarum est, qui, frenulo penis, quod occulerat eum, discisso, virilem formam restituit. (*Neue Samml. für Wund-ärzte St. 22. p. 2.*) Duorum denique androgynorum meminimus, qui nostra memoria hactenus exagitarunt medicos, ut feminae perperam haberentur, qui profecto mares essent: Adelaïs nimirum Previllia et Derreria Berolinensis. Illius descriptionem a Giraudio factam si legeris, haesitaveris de sexu pronunciendo, cum de utero et menstruis, testibus tamen et mammarum defectu sermo sit. Sed pars, quae uterus dicebatur, nil fuit, nisi saccus coecus, in

quem rima scroti promearet: menstruorum autem cursus potius haemorrhoidibus tribuendus erat. (*Osianders neue Denkw.* B. 1. St. 2. p. 246.) Similis fuit Derreria Berolinensis, ab Hufelandio, Mursinna et Martensio pro femina habita, quam virum esse Starkius optime probavit. (*Neues Archiv.* B. 2. p. 552.)

27.

Gynandrae rariores. Realdus Columbus dissecut olim mulierem, cuius clitoris in penis molem succreverat, angustata vulva. (*de re anat. lib. II. c. 15.*) Clitoridem ingentem cum vagina clausa Parsonius observavit. (*Philos. transact.* vol. 47. p. 142.) Similem casum legimus apud Baillieum. (*Anat. des krankh. Baues*, p. 241.) Nuperrimum exemplum memorat Burdachius. (*Anatom. Untersuch.* Heft 1, p. 40.)

Posse etiam quandoque, haud providis saltem, imponere prolapsum uteri, qui mentiatur membrum virile Homius testatur. (*Roose's Beytr. zur gerichtl. MW.* B. 2. p. 214.)

Itaque in infante recens nato si sexus dubius est, oblietricibus mulieribus haud committendum est arbitrium, sed medicus, fabricae gnarus, accitus probe investiget partes. Quodsi testes deficiunt, utique ambiguum manet iudicium, donec pubescere

incipiat. Tam in androgynis genarum mentique pubes, vox hircitalliens, testium vel proventus, vel dum remanent, cupido rei venereae aut ipsae pollutiones nocturnae virilitatem testantur. Contra gynandras produnt eadem aetate mammae turgentes, menstruorum cursus, pelvis amplitudo et femorum possius. Matrimonio has haud capaces esse res ipsa docet: androgynos vero uxorem ducere minime rarum est.

28.

Neutri sexui adnumerantur, qui sine omni partium genitalium vestigio nascuntur. Ii sunt vel acephali, vel plane imperfecti, vesica urinaria fissa aut intestinis cum vesica in cloacam avium aut amphibiorum coalitis. Rarissime ultra aliquot dies vitam protrahunt, ideoque a baptismo abstinendum, nec, dum acephali sunt, personarum iure frui possunt.

Sed neutri etiam sexui accensendi esse videntur, quorum testes haud evoluti omnem virilitatem adimunt, ut nec barba prodeat, nec rei uxoriae cupido nascatur, cuius anomaliae exemplum narrat Homius. (*Roofe's Beytr.* l. c. p. 217.)

CAP. III.

DE ABORTIONE CRIMINOSA.

29.

Vita, qua fetus gaudet, variis distinguitur gradibus. Siquidem, quo origini est propior, eo magis tota eius vita exseritur ac manifestatur in nutritionis functione, celerrimoque incremento, silentibus interea vitae sensiferæ motuumque arbitrariorum effectibus. (*phys.* §. 540.) Nec in musculari fibra duplicitas illa telæ cellularis et partis fibrosæ necessaria ad efficientiam (*phys.* §. 309.); nec in cerebro discrimen corticis dispicitur atque medullæ: unde merito hæc fetus vita cum inferiorum animalium vita componitur. Simulac vero, medio fere graviditatis tempore, i. e. post viginti fere hebdomadas, (*phys.* §. 545.) antithesis nascitur, quæ nervos intercedit et musculos, horumque velamentum cellulare et medullium fibrosum; motus incipiunt fetus, a quibus altioris vitae vestigium derivandum est. Protinus ut infans in lucem editur, et aura spirabilis oxygene suo novum stimulum præbet, quo antitheses necessariae evocentur, et sensuum actiones et motus liberiores et ventriculi actio ceterarumque functionum totidem sunt novi plane stimuli, quibus æquabiliter agentibus vitæ veræ humanæ summa minutatim elicitur.

Itaque his physiologiæ argumentis docemur, fetum quidem a primo inde formationis initio vi-

vere: humanam tamen vitam prius inchoare non posse, quam in lucem editus fuerit; quanquam maior sit probabilitas vitae huius futurae, dum motus singulares illos edere coepit.

30.

Abortum dicimus partum ante septimum mensem elisum: quodsi intra septimum et nonum mensem editur, partus praecox appellatur: quanquam veteres quidam acutius magis quam verius distinxerint.

Iam vero, cum fetus sit futurus homo, vitaeque sua, licet inferiore, fruatur, necis crimen omnino et mulieri, quae vi vel medicamentis partum abegit, vel alii mulierem ita tractanti, ut abortiatur, irrogatur. Lege id iam Mosaica sanctum (*Exod. 21. 22.*), ubi, cum sine noxa abortaverit mulier, viros, qui rixati percusserint mulierem, pecunia mulctandos esse, statuitur. Ulpianus (*Digest. lib. 48. tit. 8. l. 8. tit. 19. l. 39.*) legem tulit; si mulierem visceribus suis vim intulisse, quo partum abigeret, constiterit, eam in exilium mittendam esse. Quanquam ad legem Falcidiam (*Digest. lib. 35. tit. 2. l. 9.*) moneatur, partum nondum editum hominem dici non posse; alio tamen loco (*Digest. lib. 1. tit. 5. l. 7.*) statuitur: qui in utero sit, perinde

CAP. III. DE ABORTIONE CRIMINOSA. 31

ac si in rebus humanis esset, custodiri debere, quotiens de commodis ipsius parius quaeratur.

Codex Carolinus (*art. 133.*) distinguit vivum fetum et nondum vivum: si ille abactus sit, capitis damnandam esse ream; si vero nondum vivus fuerit, consulendos esse legum peritos. Magni igitur erat momenti, ut forensis illa quaestio de vita fetus dirimeretur, ad quam solvendam cum medici dissensionibus potius et controversiis responderent, quam clara expositione, animationem fetus fere a tempore motuum seu a graviditatis medio inde ducere consueverunt et legum latores et iudicia. Namque, quem Hippocratici auctores (*de nat. pueri*, p. 238) statuerunt terminum, triginta post conceptionem femellae et quadraginta duorum dierum post masculi conceptionem, ubi *διαρρηῖται* et *πῆξιν* accipiat fetus, nimis brevis iudicibus visus est.

Itaque et patriae leges fanciunt: (*Allg. pr. Gesetz. Th. 2. Tit. 20. §. 985. 986.*) si abortionis poculis abegerit mulier partum intra graviditatis priores triginta septimanas, annis duobus aut sex in ergastulum mittendam esse: quodsi id factum fuerit ultimis mensibus, annis octo aut decem ergastuli damnandam esse. Similes poenas decernunt bavaricae leges. (*Strafgesetzb. für das K. Bayern, Art. 172.*)

Iam igitur medici publici est officium, si partus vere abactus fuerit, inquirere in causas, quae culpa mulieris ipsius aliorumve abortionem fecerint, sive id consilio doloque evenierit sive culpa. Quandoquidem scimus, opportunitatem adesse memorabilem saepe ad sanguinis ex utero profusiones (*path. spec.* §. 397.); tertio imprimis gestationis mense conspicuam, (*ib.* §. 399.), quae vel per se abortionem producere potest; mulierem, quae post cursum, saltum aut leves plagas abortavit, minus ea propter quam ob praecipuam opportunitatem in id malum incidisse statuimus.

Quae opportunitas si haud adfuerit, in causas praegressas inquirendum est, sive vi egerint, unionem fetus matrisque seiuncturae, sive id impetu sanguinis versus uterum concitato effecerint. Thoracum nectilium arcta restrictio, labores graviores, coitus iusto frequentior et violentior, plagae aut casus vehementiores illuc: huc emeticorum, erchinorum purgantium drasticorum actio pertinet. Potest etiam sanguinis missio iusto crebrior a pedum venis aliquid conferre.

Medici publici est, nexum causarum cum abortionem investigare, quae si brevi tempore post admittas causas consecuta est, suspicionem movet, consilio culpave egisse.

Si quaestio iudicialis existit, aborta fuerit vere mulier, curiose inquirendum est in signa praegressi partus, quorum singula ambigua sunt, omnia vero iuncta evidentiam faciunt. (§. 126 f.) Et primum quidem versatur in sanguinis profusione, quae abortionem sequi aut praecedere solet, a menstruorum fluxu et aliis metrorrhagiae speciebus rite, nonnunquam tamen aegerrime, distinguenda. (*path. spec.* §. 398.) Quodsi vero per tres aut plures menses menstruorum cursus cessaverit, subito iterum post vim externam et causas exaestuantibus cum moliminibus et doloribus parturientium erumpens, suspicio movetur in feminis aetate florentibus, abortionem simul accidisse. Vero erit similior haec suspicio, si, postquam a menstruorum cursu deficeretur mulier, phaenomena ea nascerentur, quae in utero gestare signant. (§. 122 — 125.) Tum vel maxime mammae pertractandae sunt, quae si turgescunt lacte vero, nec sero aut lympa aquosa, de abortione praegressa neutiquam fere dubitatur. Neque omittendum partium verendarum examen; tumorem enim externarum partium, vaginae laxitas, osculi uterini molities nec perfecta occlusio, praecessisse abortum notant. Cetera signa, plicae praesertim et rugae abdominis, ambigua sunt, cum in mulieribus, quae pluries iam pepererunt, naturaliter existant.

Quodsi exploratum est, mulierem abortisse, medici publici est, diiudicare, consulto id factum sit et crimine, an fortuito? Prior autem quaestionis pars iterum in duas dilabitur, ipsius mulieris culpa id contigerit an aliud? Si inveniantur indicia remedium drastrictorum, eorum maxime, quae famam quamdam eius flagitii habent, sabinae praesertim, croci, lauri aliorumque valide irritantium, interrogandum est, an ilico post sumtas eiusmodi res colici sint exorti dolores, molimina exstiterint, quae abortionem praecedere solent. Nam, si diu post hausta eiusmodi pocula abortus contigerit, aliis etiam causis, interdum fortuitis, tribuendus est. Quodsi uspiam, in hac profecto quaestione solvenda, circumspeditione opus est, ne vel crimen impune maneat, vel innocens poenam habeat.

Necessaria est aetatis, qua abortus gaudet, determinatio; quae plerumque probabilis, ambigua tamen interdum est, neque ad dies, sed ad hebdomadas duntaxat finire potest. Qui de hac re iudicium laturus est, evolutionis leges probe noscere debet.

Quodsi enim ante quartam septimanam partus eliditur, ovum solum est, nubecula in limpido latice

CAP. III. DE ABORTIONE CRIMINOSA. 35

apparente, villisque numerosis cincta facie, qua utero adhaeret: cruenta saepe inest seu vasculosa et carnea massa. (*phys.* §. 533.) Quarta autem septimana, cum ovum gallinacei molem aequat, formati iam fetus vestigia dispiciuntur: gyrenorum similis, caudatus est, vesicula umbilicali instructus: formicam fere mole aequat. Sexta hebdomade, cum anserini molem ovum habet, fetus apis magnitudine, caput ingens, oculorum vestigia punctiformia, tubercula quatuor loco manuum pedumque monstrat. Medullam spinalem et cor manifesto in pellucido fere corpusculo dispexeris. Interea pondus magnopere increvit, ut Wrisbergii fetus decem hebdomadam tres drachmas pondere aequaret, longitudo duos pollices. Tertio mense iam digitum longus esse solet, placenta evolvitur, pedes manusque. Quarto mense sex aut octo pollices longus, uncias duas aut quatuor pondere aequare solet. Quinto aut sexto duodecim pollices longus est, duodecim uncias pendere, membrana tamen pupillaris adhuc adesse solet. Septimo mense in masculo fetu testes descendunt, in utroque crines prodeunt: pondus aequat tres aut quatuor libras.

35.

Nec aliena est de mola quaestio. Quodsi enim mulier haud nupta, post graviditatis signa, tertio, quarto aut quinto mense enixa fuerit congeriem ve-

ficarum, pedunculis uvarum more cohaerentium, sive sacco communi inclusarum, sive ope massae carnae nexarum, aquam limpidam continentium, suspicio est, eam concepisse, e degenerata placenta eam congeriem natam fuisse atque in quadam vesica fetus marcelli vestigium repertum iri. (*path. spec.* §. 601.) Molae vero carnosae sarcomata potius nuncupanda sunt, vel etiam polypis adnumerandae, neque conceptionis praegressae suspicionem movent.

56.

Atrociter peccatur, si maturior partus a matre ipsa aut ab obstetrice enecatur, priusquam spiritum duxerit. Fieri id ferunt potissimum a flagitiosa obstetrice, dum vel acum aut mucronem capiti infligit, aut caput ita comprimit, collum vel funiculo umbilicali vel laqueo etiam hactenus confiringit, ut mors necessario sequatur. Quod crimen a iurata obstetrice haud quidem expectandum ut caveatur, patriae leges statuunt, feminae haud nuptae partui, praeter obstetricem, honestam aliam mulierem adstare debere. (*Allg. Gesetz. b. für die pr. Staaten*, Th. 2. Tit. 20. §. 911.) Bavaricae leges vinculis et ergastulo mulctant mulierem, quae fetum nondum in lucem editum vi et consulo enecat. (*Strafgesetzb. für das K. Bayern.* art. 171.)

CAP. IV.

DE PARTU LEGITIMO.

37.

Gravissima est quaestio iudicialis, partus praecox, i. e., qui ante ratum a natura terminum eliditur, aut serotinus, i. e., qui post eum terminum editur, legitimus sit, an hereditatem consequatur, testamentum rumpat etc.?

In qua quidem quaestione solvenda primum e physiologia et observatione repetenda est sententia: naturaliter gestari partum novem menses, seu ducentos septuaginta tres aut octoginta etiam dies, licet aliquot dierum spatio praecocius aut tardius partus contingere possit. (*phys.* §. 548.) Quodsi cum hoc termino a conceptione signa externa maturi fetus congruunt, nihil obstat, quin legitimum declaremus partum.

38.

Maturitas fetus cognoscitur tum e pondere et longitudine: illud sex utplurimum libras civiles germanicas, haec pollices duodeviginti aequare solet: quanquam multa et graviorum et maiorum fetuum exempla occurrant. Dein necesse est, totum corpus vera epidermide firmisscula glabra et incarnata obtigatur, crines in capite, in digitis ungues prodie-

rint; funiculum umbilicalem etiam oportet robustum esse. Matorus infans, qui et sanus est, protinus ut in lucem editur, eiulatu cubiculum implet, membra vivide movet, meconium mittit et ad sugendum instingitur.

Haud maturum esse fetum cognoscimus tum e pondere et longitudine multo minoribus, tum e cuticula tenerrima, subrugosa, praesertim in facie, quae fatiscere pressa aut fricta videtur, tum e crinium defectu, unguium tenerrima et quasi membranacea indole, tum denique e funiculi umbilicalis tenuitate cognoscimus. Accedit, in pueris testes ante septimum mensem in abdomine haerere; infantes eiusmodi sine clamoribus aut eiulatu cubare, semper dormire, nullos membrorum motus edere, nec oculos aperire nec sugere posse. Quae signa si concurrunt, partum esse praecocem atque immaturum, docent.

39.

Quamquam persuasum habeamus, infantem, qui maturitatis signa prodit, haud posse praecocem atque vel septimestrem esse vel etiam iuniorem; id tamen pariter exploratum est, quod quotidiana docet observatio, infantes a debili et aegritudinibus obnoxia matre editos, aut quorum nutritio aliis causis impedita fuit, tanquam immaturos gigni, quamlibet per

ratum tempus ac debitum gestati fuerint. Itaque docet medicum publicum, priusquam de legitima infantis indole iudicium ferat, inquirere in tempus ipsum graviditatis, ut constet, matris aegritudine an peculiari debilitate nutritio impedita fuerit.

40.

Iam quaeritur a iudicibus, partus praecox, i. e. qui ante nonum mensem eliditur, legitimus sit, possitque vitam protrahere.

Missā antiquorum sententia iam diu abrogata de octimestris partus maiore vitalitate quam septimestris (*Geschichte der Arzneyk.* 1. p. 476. 477.); non dubitamus, partum septimestrem, aut qui ducentos dies gestatus fuerit, legitimum declarare, si modo signa praecocis et haud maturi infantis ostenderit. Alioquin enim, si maturus est, necesse etiam est, ratum terminum attigerit. Patriae autem leges, si modo in matrimonio legitimo partus fuerit editus, et septimestrem, dum quoque maturus editur, legitimam matrimonii prolem habent. (*Klein's Ann. der Gesetze in pr. Staaten*, 7. p. 114.). *)

*) Τὰ ἐπτάμηνα γόνιμα γίνεται πρῶτον, ἄσθενῃ δὲ τὰ πολλὰ. Τὰ δὲ ὀκτάμηνα περὶ μὲν Αἴγυπτον καὶ ἐν ἐνίοις τόποις δύναται ζῆν· ἐν δὲ τοῖς περὶ τὴν Ἑλλάδα τόποις ὀλίγα πάντων σώζεται. (*Arist. hist. anim.* 7. 4.)

Alia quaestio est, partus, qui ultra ratum tempus, i. e. ultra ducentos octoginta dies protractus dicitur, pro legitimo habendus an spurius sit et fraudulentè suppositus? Ea quaestio, in posthumorum iure praeprimis agitata, ita solvenda esse videtur, ut, retardari omnino nonnunquam posse partum ad trecentos fere et decem forte dies partum statuamus. Similem terminum et patriae leges volunt. (*Allg. Gesetzb. für die pr. Staaten*, B. 3. §. 19.)

Sed necesse est, in causas simul peculiares inquiramus, quae moram illam insolitam producere consuescunt. Etenim aegritudines, aerumnae et aliae causae debilitantes vires naturae adeo infringere possunt, ut aliquot etiam septimanas post idoneum tempus partus edatur. Cuius rei certissima testimonia exstant in commentariis fide satis dignis. (*Abh. der med. chir. Akad. zu Wien*, 1. p. 102. *Stark's Archiv*, B. 2. St. 3.) Nec haesit summum patrium iudicium in pronuncianda sententia pro partu gemellorum etiam, qui trecentos et duos dies post conceptionem sequutus fuisse perhibebatur. (*Klein's Ann.* 11. p. 297.): nec facultas medica Lipsiensis in defendendo partu undecimesiri. (*Platner. quaest. med. for.* 6.) *)

*) Ἐναι δ' ἐπιλαμβάνουσι καὶ τοῦ ἐνδεκάτου μηνός. (*Arist. hist. anim.* 7, 4.)

Sed, qui ultra trecentos et decem fere dies nascuntur, merito spurii censentur. (*Klein's Ann.* 1. p. 201.) Mortuos quidem fetus diutius gestari, certum est, sed de his quaestio forensis nulla existit.

42.

Huc etiam de *superfetatione* quaestiones pertinent. Potest enim vidua, praegnans a marito relicta, quae rato tempore fetum enixa est, post aliquod tempus alium fetum excludere, qui sitne a marito generatus ideoque legitimus, dubitatur.

Superfetare mulierem posse, antiqua credulitas facile tulit: (*Arist. hist. anim.* 7, 5. *Plin.* 7, 11.) licet iam Plinius gemellos distinxerit, Vopiscos appellatos (*ἐπισησίδους*), qui utero retenti nascerentur, altero interempto abortu. Hos nupera doctrina plane reiecit, si alter nimirum fetus debilis esset et alter perfectus, eodem tamen partu editi, eiusdem coitus proles habentur. Nec, si abortus editur tertio mense, rato denique tempore partus maturus, hi aliter nati esse videntur. Potest enim alter gemellorum perire, altero superstite. Neque vivi gemelli, si spatio aliquot horarum paucorumve dierum semet sequuntur, superfetationem testantur.

Sed negandam tamen haud prorsus esse superfetationem, in superioribus (*phys.* §. 548.) monui-

mus: neque utero duplici ea, si unquam contigerit, tribuenda, cum Cunestrini studio inventa sit simplicitas ovarii tubaeque cum uteri duplicitate. (*phys. ib.*) Sed, cum partus maturi mense aut longius distant, qualia exempla Hallerus (*elem. phys.* vol. 8. p. 464 f.) collegit, superfetationem veram accidisse, nulli dubitamus.

CAP. V.

DE INFANTIS NECE.

I. De vita infantis dubia.

43.

Ardua de nece infantis recens nati quaestio et saepe intractabilis naturaliter in duas diducitur:

Vixerit nimirum infans in partu, an iam ante mortuus sit?

Quodsi vivus in lucem editus fuit, vi dolo illata an naturaliter vitam amiserit? aut culpae matris et adstantium mors tribuenda sit?

Infanticidium autem, de quo quaesitores iudicarii interrogant, strictiori significato dicitur delictum matris haud nuptae, inter partus clandestini angores vitam infanti vivo adimentis. Quodsi enim

legitimum infantem mater in matrimonio vivens interemerit, haud infanticidium, sed parricidium, vocatur: parricidio etiam aequale putatur crimen, si illegitimum quidem infantem, nec tamen recentem sed post nychthemeron a partu enecaverit. (*Pr. Gesetz buch, Tit. 20. §. 887. 913, Klein's Grundf. des peinl. Rechts §. 345.*)

44.

Itaque ad medicos confugiunt et iudices et quaesitores, ut, vita gavifus fuerit infans, cum in lucem ederetur, comperiant: nam in partum mortuum faevitia nullo modo punitur. Id autem e vestigiis vitae praegressae in corpore exanimato infantis divinari posse creditur.

Neque in monstrorum necatores animadvertitur, si acephala fuerint ideoque humanitatis expertia. (*Glück Comment. über die Pandect. vol. 2. p. 64. Feuerbach's Lehrb. des peinl. Rechts, §. 207.*)

45.

Quorum vestigiorum princeps fere atque palmarium habetur pulmonum per spiritus ductos mutatio. Nituntur autem, qui huic testimonio fidem habent, sententia Galenica, vitam sine spiritus ductione esse non posse, nec aspirare posse infantem aut respira-

re aërem, nisi 'qui vivat *). Ea autem sententia quamvis ex toto quidem negari non possit, occurrunt tamen omnino exempla vitae, quae sine respiratione et circuitu sanguinis per pulmones protrahitur. Quodsi enim vel foramen ovale inter utrumque cordis atrium apertum manet, vel cordis septum haud rite formatur, vel etiam aorta utrique ventriculo adaptata est, (*path. gen.* §. 201.) vita omnino fruitur infans, neque tamen omnis omnino sanguis venosus per pulmones pellitur, ut ibi oxydatus in arteriosum abeat. Etiam si igitur pulmones suo munere haud perfungantur, vita tamen omnino fruitur infans.

Dein credibile est, cum nervos pulmones potissimum e medulla spinali accipiant, posse etiam spirituum ducendorum officium contingere sine vita sensiferâ ea, quae humano juri idoneum reddit infantem. Itaque et monstra acephala, humano jure destituenda (§. 18.) et hydrocephalos, vitam aegerrime protracturos, spiritus tamen ducere per aliquot tempus quid est quod vetet?

46.

Pulmonum functio, eaque effecta earum mutatio creditur aliter locum obtinere non posse, quam

*) Galen. de loc. adf. lib. 6. p. 214. Περίστευται ἀχώριστον εἶναι τοῦ ἀναπνεῖν τὸ ζῆν, τοῦ τε ζῆν τὸ ἀναπνεῖν, ὥστα καὶ εὖ ζῶντα πάντως ἀναπνεῖν καὶ τὸν ἀναπνέοντα πάντως ζῆν.

edito iam in lucem fetu atque absoluto hactenus partu, ut abdomen etiam penitus vinculis materni uteri solutum sit. In quo tamen perhibendo egregie falli, priores Idenae (*Gedagten om het dryven en zinken der Longe. Leeuward. 1739.*) et Croezeri (*Ontwerp van de eerste Inademing. Groen. 1740.*) nuperae etiam observationes Fickeri (*Beytr. zur Arzneyw. Heft 2. p. 130.*), Schmittii (*neue Verf. und Erf. über die Lungenprobe, Wien 1806.*), Osiandri (*Denkwürd. 1. p. 67. Salzbg. med. Zeit. 1809. vol. 2. p. 27.*), Sieboldii (*Ann. der Entbindungsk. 1. p. 100.*) et Thilenii (*Loder's Journ. vol. 4. p. 638.*) probant. Ii enim vagitum infantis uterinum toties irrifum semet audire meminerunt. Posse autem fetum in utero ipso spiritus ducere tum demum rationi non repugnat, cum aquae, quibus prius innatare, disfluxerunt, os eius ita ad uteri os et vaginam conversum est, ut facilius, latius aperto uteri ore, aëram ducere externam valeat.

47.

Alia nascitur difficultas e variis exemplis, ubi infans vel debilis vel cito enecatus unam duntaxat vel alteram aspirationem perfecit, qua pulmonum vasorumque mutatio ea, quam repetita spirituum ductio efficit, nequaquam perpetratur. Ecquis enim statuerit, prima eaque imperfecta aspiratione statim foramen ovale claudi, ductum Botallianum obliterari,

pulmones adeo pandi, ut tota vesicularum compages aëre externo impleatur, vasa omnia turgescant et directionem mutant, atque omnis omnino sanguis penitus oxydetur! Haec utique sensim ac minutatim mutantur, unde, si statim post primos spirituum ducendorum conatus infans trucidatur, mutationes eae impeditae partimque duntaxat absolutae sunt. Itaque fides habenda est clarissimis auctoribus, qui pulmonum mutationes haud contigisse per debiles eos ac paucos conatus experti fuerunt. (*Eph. nat. cur. cent. 1. 2. obs. 121. Loder progr. de pulmonum docimasia. Ien. 1779. Becker in medic. Wochenbl. 1786: n. 29. 30. Scholl de subsident. pulmon. Tubing. 1786. Kiefer de docimasia pulmonum. Ien. 1788. Mendel in Hufelands Journ. B. 32. Preu in Salzburg. med. Zeit. 1806. vol. 3. p. 446.*)

Quarum observationum nonnullae quidem in infantibus praecocius iusto natis ac fere septimestribus institutae negotii plurimum facessere nequeunt, quod immaturitatis testimonia clara essent. Non desunt tamen et maturorum infantium casus, quorum pulmones per debilissimam aspirationem parum aut nihil mutati essent. (*Schenk in Hufeland's Journ. B. 28. St. 3. p. 97. Per quatrimum vixerat et spiritus duxerat et vero etiam eiulaverat puella, cuius pulmones tamen in aqua subsederunt.*)

48.

Quaenam autem sint pulmonum mutationes per spiritus ductos effectae, dispiciendum est. Et primum quidem aëre aspirato pulmones leviores redduntur, quod levius pondus duplici modo probari consuevit: vel natatione in aqua, vel ratione ad pondus reliqui corporis. Prius experimentum *docimasia pulmonum hydrostatica*, alterum *Ploucquetiana* vocatur.

Quod primam docimasiae speciem attinet, negari nequit, pulmones et integros et in frustra sectos aquae innatare, si omnino ac perfecte aërem pluries aspiraverint. Quae functio cum imperfecte perpetrata fuerit, vel in media aqua haerent vel omnino subsidunt. (*Läger in Loders Journ. vol. 3. p. 572.*)

49.

Ut hoc autem scrutinium instituatur, oportet prius pulmones e thorace exemptos ita invertere manuque suspensos per aliquantulum temporis tenere, ut e fistula spiritali effluat, quidquid humorum forte in pulmonibus haeret. Quo facto vas sumendum est, neque angustum neque planiusculum, ut facili negotio pulmones libere natare possint: pedem saltem diametros transversalis et longitudinalis aequet. Id implendum est aqua pura frigida fluviatili aut pu-

teali: cocta enim aqua et egelida minus commoda est: impura fallax. Pulmones cum corde protinus haud iniiciendi sed imponendi sunt aquae ac hactenus circumferendi in aqua, ut, quamnam altitudinem servant, observari possit. Tum separato corde soli pulmones, dein alter lobus post alterum, denique secundum viscus in frusta, quae eodem modo aquae, interim denuo depurgatae, immittenda; simul tamen, dum secatur, observandus est strepitus, quem sectio facit, animadvertendae bullae aëreae erumpentes aut spuma dimissa aut pravitas etiam pulmonum et vitiosum aliquid iis inhaerens.

Quodsi igitur summae aquae pulmones et integri et in frusta secti innatant; leviores esse aqua efficiamus. Eam autem levitatem inde derivamus, quod haud omnis omnino aër respiratione e pulmonibus expellatur, sed vel in minimis lobulis et vesiculis pulmonalibus copia eius supersit. (*phys.* §. 212.) Quodsi vero haud perfecte perpetrata fuerit functio, ut in solos ramos fistulae spiritalis penetraverit, necesse est, pulmones minus leves superficiem haud petere, sed vel in media aqua haerere vel fundum etiam petere. Cum anteriores et inferiores pulmonum partes, dexter etiam lobus prius et affluentius aëre tumescant (*phys.* §. 207.); saepius etiam contingit, pulmonum partes dexteras et anteriores magis aquae innatare quam sinistras et posteriores,

50.

Itaque strenue adfirmanda est vita infantis nati, cum pulmones sani, integri et in frustra dissecti, superficiem petunt: ambiguum est iudicium, cum, qui sani sunt ceteroque bene constituti, in media aqua haerent, aut cum frustra duntaxat singula superficiem petunt.

Iam vero quaeritur, putredine eius visceris levitas ea effici possit? Ad quam quaestionem ita respondemus, ut primum moneamus, si quando computruerint pulmones, totum iam corpus infantis tabo disfluere, cum ultimo fere loco corruptio id viscus adfligere soleat. Itaque id ab ea causa pendere, nunquam ambiguum est. Dein Hebenstreitius iam bene monuit, pulmones eiusmodi natere duntaxat in aqua tabo spurca, dumque nondum expressum id est, quod levitatem facit. Quodsi vero pura adhibetur aqua, tabum etiam exprimitur e pulmonibus, qui ante superficiem peterent, iam subsidere necesse est. Nec color pulmonum, quem infra probationi commendabimus, putredine ita mutatur, ut fuscus eorum, qui nondum spiritus duxerunt, in roseum aut pallidum vertatur. Itaque egerre possumus experimento, quod Roosius suadet, ut, reliquis visceribus aquae impositis observetur, subsident an supernatent: eo enim modo explorari, an et pulmones putredine attollantur. Superfluum id

arbitror, cum pulmones putridi longe alio modo se habeant.

51.

Alia existit difficultas ex inflatis pulmonibus.

Quaeritur enim, si unquam arte aër in pulmones infantium mortuorum inflatur, an eadem levitas eademque pulmonum mutationes contingant, quae naturale pulmonum officium sequuntur? Credibile id videtur, si praecipue experimentorum Galloisii nuperrimorum (*Le Gallois expér. sur le princ. de la vie*, p. 248.) meminerimus, qui in mammalibus, capite praeciso, per aërem in fistulam spiritalem vicissim inflato et emisso, potuit imitari motus thoracis alternos ipsosque reiterare cordis motus, nullo tamen excitato calore animali. Sic iampridem Büttnerus (*vom Kindermord* §. 53. *Obductions - Zeugn.* n. 72.) pulmones infantis, quem mortuum peperisse atque, ut resuscitaret, aërem inflasse retulerat mater, subpallidos vidit, observavit etiam in media aqua haerere. Cui accedit Schmittii testimonium, qui per inflationem non solum pulmones ad natationem cogi, sed spumam etiam strepitumque e discissis elidi pectusque ipsum elevari experientia edoctus refert. (*Neue Versf. und Erf. über die Lungenprobe*, Wien. 1806.) Nec aliena sunt Iägeri experimenta (*Salzb. med. Zeit.* 1796. vol. 3. p. 55.), qui stre-

pitum eundem et levitatem pulmonum aëre inflatorum animadvertit.

His quidem infringeretur atque omnino corrueret pulmonum docimasia, si, quod protinus post mortem violentam Galloisius effecit, vasa pulmonum sanguifera hac inflatione replerentur. Id autem neutiquam fieri, per se credibile est, ipsaque experientia firmatur. (*Büttner l. c. p. 374. Augustin's Archiv für Staatsarzneyk. 1. p. 51.*) Hinc etiam ut infra patefcet, pondus pulmonum haud increfcit eo artificio, ut et Ploucquetiana docimasia, si unquam, in hoc casu plus valeat quam hydrostatica.

Non defuerunt, qui totum hoc argumentum nusquam in rerum natura occurrere, sed esse potius opinionationem autumarent, cum mulier, quae infanticida fit, nunquam ufura fit hac arte, ut infantem fervet. At vero sunt omnino eiusmodi exempla, a Büttnero et Augustino memorata. Neque enim infanticida fuerit, quae hoc fecerit, sed medici est, in corpore infantis inventi id discrimen probe indagare, si mulier confessa fuerit, se infanti post partum examini aërem inflasse.

52.

Accedimus ad aliud docimasiae genus, quod à Ploucqueto nomen habet. Nititur id pondere pulmonum per aërem aspiratum circuitumque sanguinis

[D] 2

aucto. Siquidem persuasissimum habemus, aspiratione sanguinem irruere pulmones, ibique, oxygene evoluto potius quam ex atmosphaera attracto, densari (*phys.* §. 216.); sequitur inde, pondus pulmonum omnino increfcere debere, si cum pondere totius corporis comparetur. Credidit auctor huius docimasiae, si pulmones infantis maturi, qui nondum spiritus duxerit, quindecim drachmas pependerit, pulmones eiusdem infantis, qui aërem attraxerit, triginta drachmas pendere: rationem autem illius ad totius corporis pondus esse 1 : 70, huius 2 : 70. (*Ploucquet comment. in proc. crim. sect. 2. §. 109. Loders Journ. vol. 2. p. 379.*)

Iamdudum animadversum est in hanc docimasia, nec sexus discriminis rationem esse habitam nec profusi ex abrupto forte funiculo umbilicali sanguinis. (*Metzger in Loders Journ. vol. 2. p. 141.*) Ad hanc autem obiectionem Iägerus recte respondit, si unquam sanguinis profusionibus intermortuus fuerit infans, parem *νεκρυξία* esse totius corporis ac pulmonum similem ponderis rationem servare. (*Iäger de vita neogoni, p. 38.*)

Sed, quod maximi est momenti, nec Haartmannus invenit (*Stockh. acad. handl. 1799. tom. 20. p. 40.*), pondus pulmonum pariter increfcere aut minui cum vario totius corporis pondere: nec Struvius, cuniculis ad ea experimenta adhibitis, constauit.

tiam ullam rationis observavit (*diff. de docimasia pulmonum Ploucquetiana. Hal. 1802*): nec Schmittius, qui egregie in his experimentis desudavit, confirmatas vidit Ploucquetianas rationes.

Itaque haud tanti aestimanda est haec docimasia, quin hydrostaticae, quanquam nec ipsi ab omni ambiguitate alienae, praeferatur.

53.

Gravissimum tamen est consilium, haud soli pulmonum ponderi, vel specifico vel absoluto, fidendum esse; sed reliquarum etiam mutationum, quas spirituum ductio producit, sedulo rationem habendam.

Perfecte perpetratum esse pulmonum munus, et inde collegeris, si pericardium a pulmonibus obvelatur, his non totum duntaxat thoracem implentibus sed eum etiam in maiorem amplitudinem diducantibus. Quod quamvis egregie probet, perfunctos esse suo officio pulmones, post imperfectum tamen huius functionis exercitium haudquaquam valet. Namque in cadaveribus infantum, qui vel in partu vel brevi post eum decesserant, Schmittius semper pericardium duntaxat partim a dextro pulmone obtectum invenit. Nec in infantibus, qui nunquam spiritus duxerant, totum pericardium nudum reperitur.

Alia est vaforum pulmonalium facies in iis, qui spiritus duxerunt ac in iis, qui eius functionis expertes sunt. Circa turgidas aëre veficās pulmonales vario modo flectuntur ac protenduntur, cum collapsa sint in iis, qui nondum aërem traxerunt. Quod utique egregium esset signum, dummodo facile et ubique dispici posset. Sed aequè arduum est, hanc vaforum mutationem observare, ac coloris, qui fuscus est in pulmonibus, qui nondum spiritus duxerunt, transitum in pallidum aut incarnatum eorum, qui perfecte munus perpetrarunt. Plures enim gradus adsunt, a maiore vel minore functionis perfectione pendentes.

54.

Ut de vita infantis recens nati certiores fierent, nonnulli confugerunt ad vesicae urinariae statum. Cum enim lotii missio partim arbitrio perficiatur (*physf.* §. 287.); iuvantibus imprimis musculis abdominalibus, dum respiratur e pulmonibus aër excipitur (*ib.* §. 289.); evidentissimum arbitrati sunt testimonium praeviae respirationis vacuitatem eius conceptaculi; plenitudinem autem testari infantem mortuum in luem editum fuisse.

Quae sententia quam temere pronunciata sit, e sequentibus patet. Etenim frequenter accidit, infantes haud protinus, ut partu editi sunt, lotium mit-

tere, sed post horas etiam, dum balneo immittuntur. Itaque deterrima quaeque accidere possunt, priusquam lotium miserint. Dein Halleri testimonio credimus (*elem. phys.* vol. 8. p. 368.), et fetuum vesicam interdum vacuum esse; atque Roosii (*Beytr. zur gerichtl. Arzneyk.* 1. p. 52.), infantes, qui manifesto exanimis in lucem editi sint, vesicas habere posse inanes. Potest enim forte comprimi abdomen mortui infantis, ut lotium reddatur.

Similis est ambiguitas meconii alvo missi.

55.

Alii, Hebenstreitio duce (*anthropol. for.* p. 319.) in sugillationibus externis fiduciam collocant, quas sine vi illata et vita infantis praegressa fieri non posse existimant.

Equidem autem nec vitam infantis post partum necessariam, nec vim illatam posse e sugillationibus certo colligi arbitror. Hesselbachium memini in fetuum mortuorum vertice sub pericranio saepius invenire eiusmodi sugillationes, ubi nulla vis esset illata. (*Vollst. Aul. zu gesetzmässigen Leichenöffn. Würzb.* 1812.) Quas cum nunquam in infantibus post partum mortuis invenisset, quaestionem proponit, possintne eiusmodi vitia mortis partui iam praeviae testimonia esse. Accedit Halleri auctoritas, qui

56 SECT. I. DE IURE NATORUM.

in plerisque cadaveribus infantum recens natorum, in theatrum anatomicum Gottingense apportatorum sugillationes in capite observavit. (*Vorles. über gerichtl. Arzneyw.* vol. 2. tom. 2. p. 9.) A constringente vi, quam et collum et os uteri in caput infantis exercent, oriri easdem vero haud abfimile est. (*Büttner vom Kinderm.* p. 152.)

Sugillationes quoque post mortem nasci videmus a putredine; frequentes, cum praegressae fuerint febris putrida et variolae malignae, aut cum nimia opii copia adhibita sanguinis tenuitas et dissolutio effecta est. (*Bose in Waitz Samml. akad. Schrift. zur gerichtl. Arzneyw.* vol. 1. P. 4. p. 105.)

Dein et stringens funiculi umbilicalis vis, quæ collum obvolveret, manu interea forte faciei aut capiti appressa, sine ulla externa vi, suffusiones excitare potest.

Denique caute distinguendae sunt verae sugillationes a naevis: illae enim verum cruorem in vasa et cellulas effusum habent: hi vero elatam etiam cuticulam et aspritudine deformem. (*Bateman von Hautkrankh.* p. 469.)

56.

Fetum iamdiu ante partum mortuum esse, vulgo colligitur e foetore aquarum; rugosa, collapsa,

lurida aut livida cutis facie; e cuticulae secessione, quae tamen contingere potest etiam in infante vivo, vel propter morbos cutaneos vel compressionem etiam per partum violentiorem. (*Iüger in Schlegel coll. opusc. ad med. for.* vol. 5. p. 47. *Henke's Abh. aus der gerichtl. Med.* 1. p. 31.) Itaque circumspectissime indicandum est de vita infantis ante et post partum.

II. De mortis genere, quo infans decesserit.

57.

Iam vero, si docimasia pulmonum hydrostatica ceterisque signis probatoribus credibile est, infantem in partu et post eum vixisse, quaesitores iudicesque e medico publico sciscitantur, naturaliter obierit infans, an culpa vel dolo matris aliorumque interemtus fuerit?

Haec autem quaestio eo difficilius solvitur, quo pauciora saepe de rebus, quae partum clandestinum comitarentur, comperta habemus. Contingit saepe numero puellas, moribus cetero innocentes, a perditoribus ludificatas, ignominiam sibi voluntariam consciscere nolle, fatendo graviditatem, quam saepe ignorant. Hae, ut angoribus et torminibus partui praevis corripuntur, nesciae, quid sibi velint haec

mala, latrinam petentes, haud opinato saepe fetum elidunt, qui, impactus lapidibus, sive cloacae immerfus, sive ex alto lapsus, abrupto funiculo umbilicali vario modo enecatur. Nec defunt exempla, ubi praescia omnino partus mulier, cumque naturaliter absolvens, simulac angoribus defuncta est, vel in somnum profundum aut comatosum incidit, vel in statum, quo neque ad cogitandum, neque ad agendum libere mentem erigere potest. Itaque culpa quidem, non dolo, infantes interficiuntur.

58.

Quod cum mortis genus ad reae excusationem obtenditur, medici est decernere; possitne puella graviditatis, praesertim primae, inscia esse? Statuenda sit partus ipsius ignoratio? Possitne parturiens ita a se exire, ut mentis non compos sit, neque libere agere valeat? Possit denique fieri, ut, vel intermissa funiculi umbilicalis deligatione, vel lapsu infantis in solum durum vel in latrinam interimatur?

59.

Quodsi defensio reae petitur ex inscitia graviditatis partusque instantis, iudicium proficiscatur necesse est ab ingenio, moribus et valetudine reae. Etenim puella vix nubilis, blanditiis nefarii hominis

corrupta, seducta illius sponſionibus, nil noxae e primo coitu ſecuturum, gravidam ſe eſſe haud credit, quoniam ſigna nescit. A menſtruis defectam ſe eſſe queritur forte, ſed morum ſanctimonia et immatura iuventus etiam alios impediunt a criminatione. Accedit, nonnunquam ſymptomata vulgaria graviditatis, nauſeam, vomituritiones, imo ipſos fetus motus a media inde geſtatione aut deeſſe penitus aut minus ſentiri.

Partus ipſius prima ſymptomata vix a tenefmo vehementi differunt, cum quo novae in his negotiis puellae ſaeppiſſime ea confundunt. Itaque mirum non eſt, latrinam petere, in qua partus perire poteſt.

Dein, quanquam mulieres ad meretriciam turpitudinem iamdudum abiectae, ut deprecentur crimen, ſaepe fingere lipothymiam in partu ſoleant: excuſationi ſomnino locus eſt, ſi cetera congruunt. Namque, ut pauca ex innumeris adferam exempla, Tulpio narrante (*lib. I. obſ. 10.*) mulier praegnans, hyſterica paſſione conflictata, inſcia partum edidit, derogans adhuc fidem amicis id uno ore adſeverantibus. Ab eadem cauſſa ignorantiam partus profectam eſſe in adſini ipſius idem refert, quae ſimul viſu privata fuerit. Similes caſus memoriae tradiderunt Harvacus immortalis (*de gener. anim. p. 358.*) et Pechlſinus (*lib. 1. obſ. 30.*); Smellieus ex epilepſia

natam esse eam torpedinem, ut inscia partum absolveret mulier. (*Collect. of preternat. cases in surgery*, vol. 3. p. 184.); Haenius etiam ex apoplexia (*Rat. med.* vol. 3. p. 243.); Christieus e comate cum eclampsis (*Kühns phys. med. Journ.* 1801. p. 670.); Roosius e syncope (*Lodgers Journ.* 1. p. 152.); Platnerus denique e somnambulismi specie (*quaest. med. forens.* 40.). Alio loco iam (*path. spec.* §. 500.) de asphycticarum partu egimus. Itaque in puella bene morata et haec excusatio nullo modo legibus naturae adversaria est.

Posse et mulierem, haud primiparam, atque sibi consciam, partum elidere perfectum in ipsa latrina, atque id plane ignorare, egregium docet testimonium Kleinii. (*Harles Jahrb. der deutschen Med.* B. 3. Heft 1. p. 48.)

60.

Neglectam funiculi umbilicalis deligationem cul-pae adnumerandam esse, exploratum habemus, quam caussantur, ubi a se exierint aut asphyxia correptae fuerint. Controversia de necessaria funiculi umbilicalis deligatione ita composita esse videtur, ut statuatur, haud quidem ubique letiferam esse negligentiam talem, sed, aliis etiam rebus faventibus, posse omnino sanguinem inde ita profundi, ut *νεκρωσις* letalis sequatur. Nunquam consilii est, e sola deliga-

tione funiculi aliam necis causam praetendere: potuerat enim funiculus vinciri, postquam sanguis omnis amissus esset: neque e neglecta deligatione ilico hoc mortis genus colligendum est, cum et aliae simul causae adesse possint.

Quodsi infans tenellus debilior iusto est nec sanguine abundat, ex omissa funiculi deligatione multo minus periculi derivandum est.

Memorable etiam est temporis discrimen. Quodsi enim in ipso partu abruptitur funiculus, priusquam novas vias sanguis sibi muniverit, assuetus e placenta fontem accipere, multo maiorem casum habet, quam cum iam aliquoties infans spiritus duxerit, novae igitur viae sanguini patuerint.

Quo propius ab umbilico funiculus abscinditur, eo probabilior est sanguinis profusio ex eodem letalis, unde et longitudo eius funiculi probe notanda est.

Abruptus nec deligatus funiculus, qui longe ab umbilico propendet, ab sugillationibus stagnante etiam sanguine refertus est, minorem necis culpam suggerit, quam abscissus.

Cum funiculus umbilicalis collapsus est et flaccidus, corpus etiam male nutritum et marcidum, haud facile ex illo profusio sanguinis letalis orta fuit, sed fetus iam in utero sanguinis penuria laborasse vi-

detur. Quod vitium si non adest, neque aliae laesiones, si abscissus est prope ab umbilico funiculus, si corporis pallor, vacuitas cordis, atrii praesertim anterioris et maiorum vasorum accedunt, probabilis est mortis causa ex hac profusione.

61.

Alia est necis causa, culpa saepius versa, nonnunquam autem dolosa: suffocatio, quam praetendunt, quae insciae in lectis peperisse fatentur. Ea autem mortis species, ubi vel culcitarum moles vel submersio in aqua cloacae aërem arcuisse a pulmonibus functionemque eorum impediisse creditur, in partu ipso et brevi post eum per se haud sine difficultate conceditur, cum nulla sit necessitas, cur sanguis, per pulmones transire prohibitus, priores legere vias per foramen ovale et ductum arteriosum nequeat. Maxima autem nascitur difficultas, si quando in cadavere infantis manifestio apertos eos meatus deprehendimus. (§. 44.)

Quodsi vero iam clausi sunt ii ductus, si in cordis atrio dextro, vena cava et arteriis pulmonalibus cruor magnopere turget; si et pulmones lividi et fistulae spiritalis ramuli sanguine spumoso abundant; si vasa meningum et sinus scatent eodem cruore, aut utriusque visceris vasa rupta etiam inveniuntur; toto corpore livido et maculis cruentis

foedo: tunc omnino efficitur, apoplexia interemtum esse infantem aut impedito sanguinis circuitu.

Eius autem mortis variae esse caussae possunt. Namque debilitas infantis et spastici adfectus, a frigore forte orti, nonnunquam brevi post partum eum ita enecant, ut sanguinis motus eodem modo interceptiatur, ac si strangulatus aut suffocatus esset. Organica vitia congenita, enormitas cordis, thymi, hepatis; coalitus vasorum pulmonalium et bronchiorum; polypi et alii tumores pulmonibus vel pericardio adhaerentes motum cordis praepedire sanguinisque circuitum per pulmones prohibere valent. Haec igitur vitia probe distinguenda sunt.

62.

Harvaeus iam monuit (*de gener. anim.* p. 356.), obstetricibus expertis haud ignotum esse, conceptum aliquando integrum, membranis illaesis, excludi. Quae membranae nisi demantur, os infantis obtegentes, mortem consciscere per aspirationem impeditam, visae sunt. (*Scherf in Kopp's Jahrb.* 5. p. 338.) Itaque sola vel matris culpa, vel obstetricis absentia, ea mors consequitur.

Alia est, quam Schmittius urget (*neue Vers. und Erf. über die Lungenprobe*, p. 248.), mortis causa: funiculi umbilicalis in partu praevii compressio, quam

vel os uteri vel crura mulieris parturientis, nervorum distentionibus forte agitatae, efficere possunt. Quod cum contingit, omnia fere suffocationis signa, maxime tumor atriorum cordis vasorumque maiorum in cadaveribus conspiciuntur.

Neque rara est strangulatio infantis, quam funiculus umbilicalis collum constringens, vel ipsum uteri os, ut caput exclusum est, violenter vasa colli comprimens, efficere valet. Haec vero strangulatio fortuita, quae ne in culpam quidem matris verti potest, quomodo differat a strangulatione dolosa, quae fune collo circumdato aut manibus digitisque collum comprimantibus perpetratur, aut aegerrime aut plane non perspicimus. Namque aequabilem compressionem suffocationemque, quam absque cuticulae secessione Ploucquetus oriri a funiculo umbilicali aut ore uteri constringente arbitratur, (*Über die gewalts. Todesarten*, p. 379.) a collaribus vinculis sericeis aut aliis molliusculis rebus, quibus strangulatus est forte infans, existere possunt. (*Roeske's Taschenb. für gerichtl. Aerzte*, Aufl. 4. p. 201.)

Dein sine culpa matris suffocatio oritur mephitide aut vaporibus lithanthracum metallicisve. Quorum nisi foetorem in loco, ubi infans iacet, senseris, difficillimum est iudicium. Etenim maculae per totum corpus lividae, labia violenter contracta

et

et livida, rigores membrorum turgorque sanguinis atri in atrio dextro arteriisque pulmonalibus haud peculiaria sunt huius mortis indicia, sed suffocationem praegressam generatim probabilem reddunt. Tunc quoque cito putrescere solet corpus, (*Büttner vom Kindermord*, p. 136.) atque pulmones sanguine farcti aquae, cui inmittuntur, fundum petere.

Denique et pituitae fortuita colluvies in ore, larynge et fistula spiritali haud paucos enecat infantes recens natos, sine ulla matris culpa. Eam causam suffocationis optime eruere tum ex inspectione cadaveris tum e relationibus fide dignis possumus. (*Klein's Annal.* B. 14. p. 273.) Liquorem postremo amnii, quem Scheelius (*Diff. de liquore amnii*, p. 62.) credidit, in fistulam spiritalem abire atque in recens natis nimium oxygenis stimulum mitigare, ut bullis aëreis reddatur, posse nimia copia suffocare infantes, maxime dum nimis viscidus fuerit, haud absurdum est. (*Büttner vom Kindermord*, p. 197.)

63.

Culpa vel dolo submerso in aqua suffocationem producit. Necessarium est scrutinium vitae praegressae, quam docimasia pulmonum hydrostatica probabilem reddit. Dein causa haec mortis divinator, quoties infantis corpus ex aqua extractum fuscum est et lividum, labia sunt subcoerulea, lingua

protrusa, spuma ante os, aqua etiam ex ore naribusque profluit. His accedit in sectis cadaveribus fistula spiritalis spuma farcta, si haud ilico apoplexia interemtus est infans, sed plures irriti aspirandi conatus mortem praecesserunt. Deficit enim spuma aquae cum aspiratione in fistulam spiritalem immissae, cum momento ipso, ubi in aquam caderet aut mergeretur, apoplexia oppressus est. Sed in atrio cordis dextro arteriisque pulmonalibus, sinibus et ventriculis cerebri cruoris turgor semper adest, vacuo interim aut minus pleno atrio sinistro.

Magnopere dubium redditur examen, si liquore annii forte pulmones obfessi irrita fecerint conamina aspirandi, mortuus autem infans in aquam coniectus est. Nescio, quo pacto Wildbergius (*decis. medico-legal. de inf. neogenit. p. 109.*) ipsa microscopica liquoris stagnantis investigatione chemicaque analysi credat haec distinguere posse. Namque liquor cum aqua mixtus investigari haud facile potest.

64.

Scelestiora sunt manifestioraque alia infanticidii genera: luxatio vertebrarum aut fractura, quae ilico capitis mobilitate abnormi cognoscitur: fonticuli pulsantis laesio ope acum, clavorum aut sola compressio vehemens ac diuturna. Haec ultima qui-

dem caussa cognoscitur ecchymosi sanguinis supra vel infra duram meningem, rubore periostei, stagnatione quoque sanguinis in vasis et sinibus. Sed quo tenuius est ferramentum, quod impingeretur in fonticulum, eo difficilius post mortem vestigia eruuntur: ecchymoses saltem sanguinis et colluvies aquosa in ventriculis adsunt, quae tamen et apoplexiam comitantur.

DE IURE VULNERATORUM ET OCCISORUM.

CAP. I.

DE LAESIONUM LETALITATE.

65.

Laesiones dicimus, quae alii medici forenses vulnera nuncupare solent. Vulneris autem informationem iam alio loco strictiorem dederimus (*path. gen.* §. 194.), adhaerendum est laesionis voci, quippe quae omnes complectitur iniurias, quibus et mors et valetudo adversa efficitur, vel membrum aliquod abstollitur. Itaque et plagas et rupturas etiam et luxationes, concussiones, veneficia etiam et nutrimentorum omnium remotio laesionibus adnumerantur.

66.

Cum nulli licitum sit, nisi in bello, aut iudicis decreto, hominem, qui suae spontis est*), ita

*) Anglicae leges volunt, occisus fuerit ratione praeditus et pace regia gavissus. (*The person killed must be a reasonable creature and under the king's peace. Blackstone's comment. on the laws of Engl. B. 4. ch. 14. p. 197.*)

CAP. I. DE LAESION. LETALITATE. 69

laedere, ut vel vita vel sanitas periclitentur; quaesitores sciscitari solent e medicis publicis aut iuratis, laesiones quemnam effectum habiturae sint aut habuerint?

Duplex enim atque satis diversa est quaestio medicis forensibus proposita. Altera, quae in prognosi versatur, dum vita fruitur laesus, existit: posita mortis effugium adsequi aut quatenam damna inde manatura sint? Altera post mortem nascitur: sitne haec laesio eiusmodi, ut necem conciliare debuerit, an mors per alias causas, forte fortuna accedentes, consecuta fuerit?

Id autem discrimen, quamvis cuivis obvium, haud tamen agnoscitur ab iis, qui partitiones plagarum letalium, quibus chirurgia aut ars medica utitur, transferunt ad quaestiones iudiciarias, post mortem laesi propositas. Multae enim plagae, quas sanabiles declarat chirurgia; si reus a vulnerato omnem auxilii spem arcet, immedicabiles a medico forensi censentur. Hinc sapienter sanciunt patriae leges: si vulneratus potuisset mortem effugere, dummodo artis praesidia tempestive adhibita fuissent, maleficus vero inopem vulneratum reliquerit, capitis damnandum esse. (*Pr. Gesetz. b. tit. 20. §. 818.*) Et bavaricis legibus rogatur: coniecturas super sanabili indole laesionum excusare reum non posse, sed laesionem causam mortis censendam esse, nisi vel cor-

70 S.II. DE IURE VULNERAT. ET OCCISOR.

poris mortui investigatione et commentariorum lectione constiterit, alia potius caussa decessisse vulneratum, ac e plaga. (*Strafgesetzb. für das K. Baiern, §. 145.*)

67.

Medicus igitur aut chirurgus ad vivum vulneratum vocatus, pronunciare debet de detrimento, quod captura est vel vita vel sanitas vulnerati: cui examini haud opus est iudex adsideat, nisi testimonium chirurgi suspectum novum exigere videtur scrutinium. (*Allg. Criminalrecht für die pr. Staaten, I. §. 143. 144.*)

In hoc autem examine iuxta leges artis et historiam medicam de laesionum periculo iudicabit medicus aut chirurgus. De quibus cum alibi (*path. gen. §. 157. §. 206 — 212 f.*) sermo fuerit, superfedere repetitioni possumus,

68.

Examen post mortem instituendum multo plura requirit adminicula: neque tamen semper ambiguitate caret, cum saepissime, licet caussa mortis interna palam sit, caussam tamen externam certitudine quadam eruere difficillimum sit.

Caussa mortis interna effectibus per cadaveris sectionem declaratis eruitur: externa autem, quaenam

fuerit, in cadavere neutiquam semper apparet, sed vel ex actorum commentariis vel ex instrumenti collatione cum vulnere vel ex aliis etiam rebus aut certo efficitur, aut probabili coniectura colligitur, aut etiam plane ambigitur. Manifesta quidem est congruentia gladii aut pugionis, quo sicarius vulneratum aggressus fuit, cum plaga in cadavere reperta. Sed inter colluctandum, ubi pugnis et calcibus dimicatur, ubi humi prosternitur alter, alter muro forte alliditur, variae laesiones existunt, quas, si e. g. ebrius fuerit uterque pugnator, e vi illata aut e casu in solum lapidosum, aut ex iracundiae etiam fervore et ebrietate iuxta exposueris. Testimonia adstantium ni praeiuberint, iudicium ambiguum manet. (*Platner quaest. med. for.* 10.) *)

69.

Optimum est discrimen, quod et pleraque iudicia urgent, letalium generatim laesionum, earumque quae hominem peculiari constitutione aut oppor-

*) Agricola qui alium fustibus et verberibus iam exanimem trucidaverat, vinculis damnatur a summo patriae iudicio, quia causa mortis ambigua fuerit: summus olim rex, merito magis quam iure, poenam extremi supplicii irrogat. (*Klein's Ann.* vol. 8. p. 170.) Perspexit enim divi Friderici ingenium ineptias partitionum medicarum.

72 S. II. DE IURE VULNERAT. ET OCCISOR.

tunitate gaudentem interemerunt. Sic iam Romanae leges: „Si quis servum aegrotum leviter percussit et is obierit, lege Aquilia tenetur, quia aliud „alii mortiferum esse solet.“ (*Digest.* lib. 9. tit. 2. l. 7. §. 5.) Et paullo post: „Celsus multum interesse „dicit, occiderit, an mortis causam praebuerit, ut, „qui mortis causam praestitit, non Aquilia, sed in „factum actione teneatur. Qui furenti gladium „promittit, in factum actione tenetur.“ (*ib.* §. 6.) Et alibi: „Multum interest, quod ad Aquiliam pertinet, „sanum hominem occidat, an vero factum imbecilliorum.“ (*Digest.* lib. 39. tit. 2. l. 24. §. 5.)

Patriae leges statuunt, quamvis laesionem, quam protinus mors sequatur, nisi contrarium probetur, mortis causam esse putandam: indicandam autem esse letalitatem iuxta corporis peculiarem constitutionem. (*Pr. Gesetzb.* tit. 20. §. 809. 810.)

Gravissima autem est bavaricarum legum sententia: Nil requiri ad letalitatem laesionis explorandam, nisi certitudinem, eam hoc casu et sub his conditionibus mortem accivisse. Perinde igitur esse, siue sanata fuerit alioquin artis auxilio siue secus; potueritne, tempestivis adminiculis, letalis eventus praeveniri; protinus vel aliis effectibus per laesionem ipsam tamen adlatis, mortem conscivisse; sit denique generatim letalis, an propter peculiarem

corporis constitutionem. (*Strafgesetzb. für das K. Bayern*, §. 143.) Quodsi vero mors quidem secuta fuerit, sed persuasum sit aut probabile, alia causa, praevia iam, nec laesione aggravata decessisse, aut laesionem, quae per se necem haud attulisset, remediis perversis vel aliis rebus forte accedentibus mortiferam demum evasisse; reum esse haud homicidae aequiparandum sed aestimandam laesionem secundum animum. (*ib.* §. 144.)

Similia sentiunt Grolmannus (*Grundsätze der Criminalrechtswiss.* §. 238.) et Tittmannus (*Handb. der Strafrechtswiss.* vol. 2. §. 187.) qui omne vulnus letale per se habet letale et nullum discrimen statuit mortis protinus laesionem sequentis et post longiorem moram. Feuerbachius etiam, summi nominis auctor, nullum esse discrimen statuit, laesio ubique et generatim mortem adferat, an hoc peculiari casu duntaxat attulerit; potuerit artis praesidiis mors averti an immedicabilis fuerit laesio: mortem protinus arcesserit an accedentibus aliis effectibus laesionis ipsius: ut, si quis puncto hominis collo aperuerit abscessum, cuius illuvie suffocetur homo. (*Feuerbachs Lehrb. des peinl. Rechts*, §. 203.)

Cum hac optimarum legum doctorumque gravissimorum consensione aegerrime iungendae sunt

medicorum partitiones, quae tantum abest, ut iudicium adiuvent ut potius iudicum animos avertant a vèri indagatione eosque confundant.

Antiquior est, quamque plerique auctores sequuntur, divisio letalitatis triplex: absolute, per se contingens, quamque per accidens existere dicunt. Absolute letalia dicuntur plerisque (*Callisen syst. chir. hodiern. §. 1215.*) ea vulnera, „quae necessitate „inevitabili in omnibus indiscretim vitam extingunt: aliis (*Metzgers Syst. der gerichtl. MW. §. 65 f.*) definitionem vitantibus, sed exempla potius laesionum gravissimarum adducentibus. Per se letalia vocantur Büttnero (*Aufricht. Unterr. von der Tödlichk. der Wunden, p. 50.*) atque plerisque auctoribus ea, quae certo mortem adferrent, nisi artis auxilium adsequerentur. Artis autem aut naturae auxilio quod interdum, licet rarius vel rarissime etiam vulnus sanetur, nullum fere discrimen constituere bene perspexerunt alii, qui, Michaelis Alberti praeunte (*syst. iurisprud. med. tom. 1. c. 14. §. 5.*), vulnera per se letalia absolute letalibus potius adnumeranda esse iudicant. Ex diverso alii (*Eschenbach medic. legal. p. 70.*), protinus ut vulneris sanati exemplum fide dignum, licet unicum, in auctoribus occurrit, probari perhibent, per accidens potius letalia esse eiusmodi vulnera, quae aliis per se mortifera veneunt. Igitur necesse esset, si hanc

differentiam sequeremur, ex omni hominum memoria atque ex infinitate commentariorum medicorum colligere sanationem vel semel vel bis contingentem; neque eruditio haec iuvaret iudicem, cum, quod supra monuimus, de letalitate per se accidente tanta dominetur dissenfio.

71.

Hinc Ploucquetus haud immerito laefiones bipartiri coepit: (*Comm. med. in proceff. crimin.* §. 18. 22 f.) effe enim vel letales vel haud letales: illas vero vel ex toto atque generatim mortem neceffario adferre, vel e peculiari corporis constitutione aut propter fortuitas res accedentes. Quae quidem divifio, etiamfi displiceat nonnullis auctoribus, eo tamen valuit, ut et legum latores et fcriptores celeberrimi eam acciperent. (§. 68.) Nuperorum, Gebelii (*Knape und Heckers krit. Jahrb. der Staats-AK.* B. 1. tom. 2. p. 294.), Wildbergii (*Handb. der gerichtl. MW.* §. 307.), Berntii (*Handb. der gerichtl. MW.* §. 452.), Klofii (*Syft. der gerichtl. Phyf.* p. 455.), Lucae (*Bemerk. über das Verhältn. des menfchl. Organifm. zu Verletzungen.* Heidelb. 1814.) aliorumque divifiones aliis duntaxat verbis expofitam hanc differentiam celebrant.

72.

Abrogatis igitur partitionibus fcholarum fubtilioribus, operam dabit medicus, ut iudex clare per-

spiciat, quam ratione laesio cum morte sequente nectatur; siue haec generatim ac necessario eam exceperit, an propter peculiarem corporis constitutionem. Quodsi vero aegrotans laesus fuerit, ut mors consequeretur, exponenda quidem est ratio obitus, sed sine ulla ad excusandum aut damnandum reum digressionem. Accidit interdum, ut homini desperatissima plaga vulnerato, inter sanguinis profusionem, apoplexia letalis superveniat; ut homini phthisico, haud diu vitam protracturo sicarius vulnus letale infligat, aut flagitiosus venenum propinet. Si occidere est homini vitam adimere: nonne perinde est, aegrotus ille sit an bene valens? Facti imputatio eadem est, iuris imputatio non eadem: sed haec committenda iudicibus.

Cum autem in foris, germanicis saltem, iam diu obsoleverit error, mortis auctorem verum eum esse, qui absolute letale inflixerit vulnus; (*Stübel über den Thatbestand der Verbrechen*, p. 148.) exulandae sunt etiam e medicorum scholis eae partitiones, nostrorum temporum lumini adversariae.

In ea expositione nexus, laesionem mortemque iungentis, nil valet nisi ratio et doctrina de natura corporis sani aegrotive atque de modo, quo res externae id adficiunt. Itaque temporis spatium lae-

sioni mortique interpositum parvi pendendum est, cum et vulnera, quae vulgo mortem protinus adferre solent, interdum vel sero vel plane non letum efficiant *). Alias autem, vel levissimas plagas, propter peculiarem corporis constitutionem, ilico mors sequitur: e. g. alapa, temporibus inflicta, letalis fit, ob tenuitatem ossium ac proclivitatem sanguinis ad ecchymosin. (*Büttner l. c. §. 10.*) Alia fit letalis, si infans forte validissima manu humi prosternitur. Occidit profecto uterque hominem: quemnam animum habuerit, culpa aut doli arguendus sit, nostra nil refert.

. 74.

Qui omnia laesionum genera enumerant, ut, quemnam eventum habere soleant, exponant, commutare mihi videntur pathologiae et chirurgiae disciplinas cum medicina forensi: haec enim merito exigit eas cognitiones, quae nexum laesionum mortisque complectuntur. Itaque supersedemus enumerationi huc plane haud pertinenti.

*) Duos novi homines, qui, excepto per proelium globo sclopetario in fronte, confanescerent, globo innoxio in encephalo remanente.

D E V E N E F I C I I S.

75.

Veneficium dicitur delictum, quo homini venenum ita exhibetur, ut vita et sanitas periclitentur. Itaque protinus repetenda est e pathologicis (§. 151.) veneni definitio; quod sit substantia, vel minima dosi, per processum quemdam chemico-vitalem, vitae noxia. Unde mechanica quae dicuntur venena ab eorum classe seiungenda esse, persuasum habemus.

76.

Ab antiquis inde temporibus homicidii id genus maxime truculentum poenaeque graviore mulctandum habebatur quam simplex occisio. Imperator iam Antoninus statuit: „plus esse hominem extinguere veneno quam gladio occidere.“ (*Cod. lib. 9. tit. 8. l. 1.*) Codex Carolinus non capitis solum sed rotae etiam et culei, si feminae fuerint, veneficos damnat: (*Constit. crim. carol. art. 130.*) et anglicae leges addunt rationem, quia ex omnibus occisionum generibus minimum huic effugium conceditur per fortitudinem aut circumspectionem. (*Blackstone's commentar. of the laws of Engl. B. 4. ch. 14. p. 196.*) Patriae leges, quia difficillima sit praeventu nex aut

eius caussa ardua inventu, graviolem irrogant pœnam, trahendum quippe rei corpus ad supplicium. (*Pr. Gesetz b. tit. 20. §. 856.*) Et bavaricae leges supplicium gravius decernunt. (*Strafgesetz b. für das K. Baiern. §. 147.*)

Quibus accedunt doctorum clarissimorum sententiae: propter facilitatem criminis, difficultatem eruendi, eaque ortum maius incitamentum ad flagitium, severius esse puniendum. (*Feuerbachs Lehrb. des peinl. Rechts, §. 248. Kleins Grundf. des peinl. Rechts §. 309.*)

77.

Ut veneficiu eruatur necessaria est certitudo interemtae per id vitae, vel sanitatis graviter laesae. Namque perinde esse, siue mors siue functionis gravioris laesio a veneno exstiterint, iam codex carolinus perspexit. Patriae leges laesionum statuunt notabilem differentiam: rotae damnant reum, si veneficiu rationem homini ademerit, sine spe sanationis (*Pr. Gesetz b. tit. 20. §. 862.*): si alius morbus immedicabilis secutus fuerit, gladii damnant: si morbus sanari potuerit, ergastuli per vitam aut decem annos. (*ib. §. 865.*) Anglicae leges crimen laesarum functionum notabilium, quod barbara voce *Mahemium* (*Mayhem*) vocant, lenius puniunt. (*Blackstone l. c. p. 200.*) Itaque severior

§ 80 S. II. DE IURE VULNERAT. ET OCCISOR.

iusto Feuerbachius videtur, qui nullum poenae discrimen ad eventus differentiam ponit. (l. c. §. 247.)

78.

Ut crimen pateat, necessaria est explicatio nexus laesionis et exhibiti veneni. Itaque protinus oportet de veneni praesentia et indole certiores fieri: quod vel maxime e medico publico sciscitari solent quaesitores. Venenum enim ni fuerit id, quod propinaretur, si errore innoxium esset, poena extraordinaria irrogetur. (*Böhmer medit. in carol. art. 130. §. 8. Kleins Ann. tom. 4. p. 63.*)

Ut veneni suspicio probetur, aliter utimur corpore delicti; aliter, hac iam probata ad illius demonstrandam vim ac efficientiam. Illic, an ingestum fuerit, quaeritur; hic, an valuerit ad mortem. Primum autem genus circumspectissime tractandum est, desiderat reliquias veneni, aspectu et odoratu omnibusque chemiae artificibus exploratas, dein symptomatum et laesionum evidentiam omnemque aliam corporis delicti perfectionem ac absolutionem.

Difficultates huic scrutinio semet opposcentes haud reticendae sunt. Quamvis enim diligentissime peruestigato corpore occisi, saepe tamen haud invenitur venenum, sive quod in intimis partium recessibus

bus latet, sive quod confusum cum humoribus, ob volatilem naturam iam emanavit. Rara enim sunt exempla vestigiorum adeo manifestorum, qualia acidum borussicum relinquere solet: odor amygdalinus magnopere penetrans, ilico e cadavere efflatus. (*Hufelands Journ.* vol. 40.) Reliquae nullas saepe reliquias superesse sinunt. Quod dum contigerit, aut cum aliqua adfuerit ambiguitas, perspicua rei confessio, testimoniorum aliarumque rerum momentis illustrata et confirmata sufficit ad eruendum veneficium. (*Metzgers Handb.* §. 210. N. a. 215. *Platner quæsi. med. for.* 23.) Res enim in cadavere visae saepe a pluribus, maximeque variis causis deducendae sunt, nec ullum prorsus venenum peculiare quasdam laesiones conspicuas relinquit, quin et eae ipsae et aliis causis tribui possint.

79.

Hac quidem animadversione ne abutatur socordia medicorum secantium, qui, rudes a chemiae doctrina, scrutinium solertissime instituendum negligunt, quod perficere id nesciunt. Circumspectionem eam atque curiosissimum examen patriae leges maxime imperant, dum, quidquid in ventriculo inventum fuerit, si ulteriori scrutinio subiiciatur, prius sigillo impresso a commutatione cavendum: (*Allg. Criminalrecht für die pr. Staaten* §. 167.) et tres

82 §. II. DE IURE VULNERAT. ET OCCISOR.

omnino cavitates corporis excutiendas esse iubent. (*ib.* §. 164. 165.) Superflua tamen capitis exploratio, si, ventriculo peruestigato, iam sufficienter constiterit de corpore delicti: neque danda haec defensori excusatio, a neglecto capitis examine petita, si modo cetera congruunt.

80.

Examen chemicum reliquiarum veneni vel a medico ipso publico vel ab alio artifice, pharmacopola iurato, ad leges artis chemicae instituatur, ut, quatenus fuerit veneni species, eruatur. Nec ullis fidendum criteriis, nisi quae saniore doctrina comprobata sunt. Itaque nec experimenta cum animalibus instituta fidem merentur, cum notissimum sit, bruta animalia longe aliter ferre substantias ac humana corpora. (*pharmacol.* §. 19.)

81.

Ad symptomata omnino refugium patet, ut vel probetur veneni suspicio vel diluatur. Periculosa quaedam quae ilico post ingestum cibum suspectum sequerentur, symptomata; obitus denique, qualis venena ingesta excipere solet, ni certitudinem, probabilitatem saltem efficiunt, veneficium praecessisse. Patriae leges fanciunt: etiamsi cadaver inspicere nequiverit, mortem esse veneficii effectum habendum, si,

nulla alia mortis causa praegressa, intra octiduum post suspectum veneficium homo extinctus fuerit. (*Pr. Gesetz. tit. 20. §. 859.*)

Neque tamen et symptomatum explicatio sine difficultate est. Infinita enim prope est varietas eorum, quae vel eandem veneni speciem, ob variam hominum opportunitatem vel alias causas, excipiunt. Quorum si nonnulla alia sunt ac vulgo enumerantur, aut si aliquod defuerit, defensores utuntur passim ad excusandum reum, proinde ac si, quae in singulis eveniunt, in unoquoque occurrere debeant.

82.

Partitiones venenorum, quas auctores proponunt, prout acria sunt, vel narcotica, vel vitae vim proxime sufflaminant, vel exsiccant atque adstringunt. (*Metzger, Klein.*); cum lucidis doctrinae medicae principiis haud congruunt. Melior sane divisio, quam alibi iam (*pathol. gener. §. 152. f*) secutus sum: narcoticorum nimirum, quae hydrogene carbonico praegnantia, azotico sorte admixto, irritabilitatem partium sensiferarum augent, vi sensifera debilitata: quibus contraria sunt venena animalium ipsumque arsenicum. Ea enim subito vim sensiferam magnopere augent, energia penitus prostrata. Alia denique sunt acria vegetabilia, resina sca-

ter acidum praevalens constringuntur partes aut ad-
roduntur.

Aliis autem iam locis symptomata indicavi,
quae varia haec venena excipiunt. (*path. gen.* §.
152. f. *pharmac. innumeris locis.*) Itaque et haec
repetere longum foret et taediosum.

85.

Medici publici est, collatis his symptomatibus,
quae vel ipse observaverit, vel quae ab aliis animad-
versa ipsi referuntur, cadaver ipsum inspicere et per-
vestigare.

Quodsi narcoticis extinctus fuerit homo, cada-
ver laxum, tumidum est, colore rubicundius, calo-
ris aliquo gradu superflite, putredine cito accedente,
epidermide prius soluta. Ex omnibus partibus san-
guis tabumque spumofum putidum promanant, facies
inprimis et reliquum corpus exanthemate saepe obte-
gitur scarlatinam aemulante. Abdomen maxime me-
teorismo inflatum sphacelum monstrat striis aut ma-
culis variis. Aperto cadavere insignis est sanguinis
tenuitas, solutio et nigrescens color: atrocoeruleus
etiam cum spissitudine quadam oleum simulante post
sumptum acidum borussicum: musculorum, praefer-
tim cordis flacciditas et livor: ventriculus, viscera
intestinaque marcida aëre putrido plena, cardia

pylorusque constrictus sphincteresque ani et vesicae resoluti.

Tum examinandae sunt reliquiae in ventriculo intestinoque duodeno stagnantes. Plantae venenatae fructus, folia, dum integra sunt, ilico cognoscuntur. Multo minus, si pulveris exigua copia aut succus vel tinctura sumerentur: quae cum humoribus confusa cito emanarunt. Solent tamen virosum relinquere odorem, e ventriculo surgentem.

84.

Alia venena, animalia, et arsenicum, cadaveris faciem externam sphacelis adficiunt, musculis spasmu rigentibus aut distentis. Apertum cadaver ostendit sphacelum et foramina marcidaque loca in ventriculo, intestinis et visceribus plerisque, constrictis passim ventriculi orificiis, intestinorum locis, sphincteribusque. Interdum tunicae intestinorum aridae, spissae, maculis passim atris confitae sunt. Eaedem maculae cor obsident et pulmones, quae viscera pariter sanguine atro turgent, sphacelloque marcuerunt.

Arsenici tamen minima dosi languorem virium diutinum et maciem adferens (*pharmac. §. 350.*) similes fere effectus ac plumbi oxyda producere consuescit. Cadaveris facies externa macie confecta; membra contracta; musculi instar tendinum stricti;

86 S. I. DE IURE VULNERAT. ET OCCISOR.

abdomen planum, tensum durisque tuberculis prominulis confutum. Tardissime putrescit, ut et mumiaram ad instar rigescat. Aperto eo, ventriculi intestinorumque varia loca constricta, ut nullum fere aditum permittant, rigida aut maculis sphacelum habentibus, marcidis confita: mesenterium, pancreas omnesque glandulae tumidae, durae. Passim etiam ulcera obvia sunt.

Acrida tandem vegetabilia et metallorum oxyda inflammationes gangraenosas relinquunt.

85.

Quibus cognitis, tandem examen substantiarum sequitur in ventriculo repertarum. Quod praesente iudice, vel scriba ad id delegato, a medico publico vel pharmacopola iurato instituendum est.

Cum vulgo ad veneficia arsenicum album, vel cobaltum vel auripigmentum adhibeantur, invenimus earum rerum reliquias calci similes, pulverulentas vel grumosas. Eas prunae candenti cavae impositas et accensas fumum albidum edere ac odorem spargere alliaceum observamus. Qui odor quanquam et ab aliis rebus nascitur: hae tamen solo adspectu iam discernuntur.

Tum liquor ammonii sulfurati ad liquorem examinandum adfunditur, quo facto, si arsenicum hic

continet, praecipitatur citrino colore: eo praecipitato siccato et prunis imposito odor protinus sulfureus, dein alliaceus diffunditur.

Aqua calcis e liquore, qui arsenici tantillum habet, album praecipitat. Sed secius contingit, dum sal culinaris adest in liquore.

Cuprum ammoniatum e liquore simili praecipitatum flavo - virescens producit: coeruleum manet, si nullum adesset arsenicum.

Mangani oxydum atrum cum nitro fusum, in aqua destillata solutum, rubro colore insigne, illico flavescit, si vel minima arsenici soluti portio additur.

Quodsi vero nullae praesto sunt in ventriculi succis reliquiae arsenici, Rosius acido nitri suavit in ipsis ventriculi tunicis id ita detegere, ut ventriculus in frustra sectus aqua destillata, cui kali causticum additur, coquatur. Liquori fusco, dum coquitur, acidum nitricum paulatim adfunditur, donec flavescat et pinguedo animalis secesserit. Liquor filtratus kali carbonico saturatur, iterumque coquitur, ut acidum carbonicum emanet. Tum fluido pellucido flavido additur aqua calcis bulliens, donec praecipitatum nascatur, quod siccatum cum quarta parte carbonis pulverati igni ad candorem usque imponitur: solet arsenicum in excipulo metallico splendore

insigniri. Quodsi calx forte retinet partem arsenici, liberatur id, tritum cum aequa portione purissimi acidi boracici.

86.

Ut plumbum detegatur, liquor suspectus vel evaporatus, addito carbonum pulvere, igni ad candorem usque imponitur, ut metallica forma enascatur: vel liquori ipsi miscetur liquor ammonii sulfurici, unde atrum existit praecipitatum.

Quodsi forte hydrargyri corrosivi sales aut oxyda supersunt in liquoribus ventriculi, hi destillata aqua diluti miscentur liquore kali carbonici, donec fervere desierit et praecipitatum formari. Id lateritii coloris suspicionem movet, hydrargyro muriatico corrosivo hominem interfectum fuisse. Solutio cupri oxydati in liquore ammonii caustici suspecto addita fluido, album praecipitatum format, si idem venenum adest. Aqua calcis lurido colore id praecipitat. Liquor ammonii sulfurici pari protinus colore, qui dein albescit, praecipitat idem venenum.

Cupri oxyda vel sales, quibus post colicos dolores diarrhoeamque mors interdum per inflammationem gangraenosam sequuta est, deteguntur cupro ammoniacali, quo viridi-coerulea nubes in liquore examinando oritur: aqua calcis viride facit praecipitatum.

87.

Veneficio aequiparandae saepius sunt medicinæ periculosae, drastrictae, venenatae, quae vel a medicis ipsis, vel ab agyrtis aut aliis hominibus ingestae diiudicantur iuxta principia medica.

Pocula amoris et odii, sterilitatis etiam, superstitionem sapiunt, merito obsoleta, quamvis negari nequeat, medicamentis exaestuans, drastrictis acribusve damna plura inferri posse.

CAP. III.

DE AUTOCHIRIA.

88.

Difficillima est saepius quaestio: homo, quem animem deprehenderunt, sibi ipse mortem consciverit, an ab aliis interfectus sit? Namque et sicarii solent, ut eo melius lateant, interemtum ita collocare, eaque arma subdere, ut suspicio autochiriae moveatur. Haec sola quaestio a medico publico solvenda est: quae impulerint causas hominem, ut mortem voluntariam obiret, nonnunquam quaeritur: de quo tamen in capite de mentis morbis tractabitur. Illa tamen quaestio eiusmodi est, ut et sine penitioris medica scientia interdum expediatur; nonnunquam

vero tot tantisque obruitur tenebris mortis genus, ut, ni e testimoniis aliorum lucem acceperit, nullo modo solvi possit.

89.

Ut haec paullo luculentius pateant, mortis arbitrariae genera vulgaria percurrenda sunt. In quibus suctum fere est, laqueo semet suspendere, quod ab aliis sine magno renisu interfecti, eiusque in corpore vestigiis haud facile fieri potest. Quodsi forte interfector, ut facinus lateat, occisum laqueo suspenderit, nec turgor venarum, nec livor faciei, nec interna suffocationis signa, nec sugillata e funis viloca in collo conspiciuntur: unde post mortem, ad obtinendum scelus, laqueo collum vinctum fuisse suspicio nascitur.

Si quis ab alio strangulatus fuerit, laquei aut collaris nodos plures, quos repetere occisus nequiverit in agone repereris, nodos etiam in latere colli, quos facilius in anteriore colli parte constrinxerit ipse. Sed simul in actorum commentariis quaestandae sunt rationes.

90.

Aliud mortis genus est, quod globo e sclopeto minori sibi aliquis consciverit. Probabilis sit autochiria, si ori immissum fuerit sclopetum, quod ag-

gressor, invito interficiendo, haud facile fecerit; si artem sclopeti tractandi bene calluerit interfectus; si artificii usus fuerit ad celandum per aliquod tempus facinus, quod nonnulli, admista camfora pulveri pyrio, moliantur, ne fragor oriatur; si digiti etiam pulvere pyrio ambusti et spasmis contracti deprehendantur.

Contra vero, si vulneris sclopetarii directio ea fuerit, ut eminus globus impulsus esse videatur; si interfectus infans fuerit aut artem sclopeti tractandi haud cognoverit; si sclopetum paullo remotius a corpore interemti inventum fuerit; si digiti nec contracti nec pulvere pyrio ambusti aut nigrescentes videantur; probabile est, ab alio interfectum esse.

91.

Alia vulnera, cultro vel gladio, mucrone etiam aut aliis ferramentis inflicta magis ambigua sunt. Novacula colli vasa maiora praecisa suspicionem autochiriae movent, si haud satis profundum fuerit vulnus, ut sanguinis potius profusione extinctus fuisse videatur; si vel in manibus ipsius novacula invenitur, vel plaga a laeva ad dextram directa dextra ipsius manu inflicta fuisse apparet; si e testimoniis patet, ipsum sibi coëmisse novaculam aut alia arma. Simili modo et de aliis aliarum partium vulnerationibus iudicandum, ut semper directionem,

92 S. II. DE IURE VULNERAT. ET OCCISOR.

magnitudinem plagae, ferramentique molem comparemus.

Quodsi vero arma iuxta confossum vel plane non, vel eminus proiecta inveniuntur; si vulnus tergum petierit; si praecisio colli ea est, ut a dextra sinistram versus directa est: si haec omnes promodum partes colli, ad pharyngem usque, separaverit; ab alio interemtum esse, verosimile est.

Neque tamen haec per se certitudinis aliquid habent, nisi testimoniis, quae actorum commentarii continent, fulciantur.

92.

Submersio in aqua, consulto, an negligentia aut scelere alieno consecuta fuerit, ex inspectione cadaveris erui fere nequit. Solent quidem ad violentiae externae vestigia confugere, ut ab alio in aquam esse coniectum, iudicent; sed ea etiam vestigia lapsus in saxa aut impacti in ligna corporis esse possunt.

Eadem est ambiguitas mortis e lapsu aut saltu e rupe, tecto aut alia altitudine. Neutiquam e cadaveris inspectione patet, se ipsum coniecero, an ab alio praecipitatus sit.

Nec ilico patet, venenum sponte sua sumserit an ab alio ingestum fuerit, nisi ex actorum commen-

tariis certa sit causa mortis voluntariae. Solent tamen ex ingenti veneni portione, si praesertim terro sapore gaudeat, colligere, ipsum veneno mortem accelerasse. Quodsi ipse eiusmodi substantias brevi ante mortem ex officinis emerit, probabile est veneficium arbitrium. Si vim atque ingenium veneni probe cognovisse defunctum exploratum est; nil repugnat, si reliqua congruunt, autochiriam supponere.

CAP. IV.

DE ERUENDIS ALIIS MORTIS SPECIEBUS.

93.

Mortis genus, quo homo decesserit, eruitur e cadaveris praeprimis per investigatione, secundum principia anatomiae pathologicae diiudicanda.

Ratione autem pariter ac experientia docemur, esse nonnulla morborum mortisque genera, quae ne ullum quidem sui vestigium, manibus oculisque in cadavere deprehendendum, relinquunt.

Alia exstant in cadaveribus phaenomena, quae aegritudinis praegressae reliquiae habentur, quamquam potius agonis sint effectus aut tardioris mortis: iis adnumerandi polypi cordis, si mera sunt

94 S. I. DE IURE VULNERAT. ET OCCISOR.

coagula. (*path. gen.* §. 91.) Eo etiam pertinet saepius aqua in pericardio aut ventriculis cerebri stagnans. (*path. spec.* §. 582.)

Denique et id tenendum, conspici nonnunquam in cadaveribus putredinis aut sphaceli vestigia, oedemata etiam, quae post mortem demum orta neutiquam cum morbo praegresso cohaerent.

94.

Itaque cautissime agendum in extispiciis, ut iudicium de mortis genere et morbo praegresso feramus. Falluntur vehementer, qui, obiter inspectis una vel altera vel tribus etiam corporis cavitatibus, absolutam existimant cadaveris pervestigationem. Magnopere saepe interest, interiores encephali recessus, ipsam columnam spinalem medullamque inspicere, ut latens forte causa mortis vel morbi species eruantur. Nervorum quoque sectio perquam necessaria est, ut velamenta inflammata aut sphacelo correpta in conspectum prodeant.

95.

Earum mortis specierum vulgaris fere est suffocatio, cuius signa in infante recens nato supra (§. 60 — 62.) indicavimus. Eam suffocationem in submersis, strangulatis, et qui mephitidem passi sunt, animadvertimus. Communia sunt signa: sanguinis

turgor in atrio cordis dextro et pulmonibus, pulmones ipsi sanguine livido farcti: vasorum quoque cerebri et sinuum plenitudo: per totum corpus etiam sparsae maculae.

Quae suffocatio si mephiticis vaporibus orta fuit, praeter turgorem vasorum, maxime capitis collique, diutius post mortem solent cadavera flexilia esse et calida: oculi etiam prominuli per triduum fere splendorem retinent. (*Bichat sur la vie et la mort*, p. 283. 284.) Cordis atrium dextrum et vena cava sanguine fluido quidem sed spumoso turgent: atrium dextrum vero ac aorta sanguine inanes sunt. Glottis solet esse aperta, epiglottis erecta, cum irritis aspirandi conatibus intermorerentur.

Submersorum contra corpora brevi post mortem rigescunt; atque vel tota livida sunt vel maculis lividis conspersa; labia subcoerulea; lingua protrusa; spuma ante os, et oculi prominentes. Secto cadavere similia observamus, quae generatim in suffocatis, cum mors ob impeditam aspirationem sanguinisque oxydationem necessario sequatur. Nonnulli, qui diutius in aqua aspirare conati sunt, fistulam spiritalem aqua aut spuma plenam habent, aquam etiam in ventriculo: alii, apoplexia protinus extincti, nil eiusmodi ostendunt, sed generalia suffocationis signa. Fluidum saepius esse sanguinem in

submersis, observatio docuit; (*Walter de apoplexia* §. 36.) quanquam non ubique. (*Roose's Beytr. zur öff. und gerichtl. MK. 1. p. 189.*)

96.

Qui fame decesserunt, vacuum ventriculum et intestina, nonnunquam etiam passim adrosa haec viscera habent; corpus macie confectum; musculos laxos et attenuatos; vasa pleraque inania. Unde similia omnino phaenomena adsunt eorum, quae haemorrhagias letales excipere solent. (*Kleins Ann. B. 14. p. 163.*)

Denique haud superfluum est consilium, si defuncti cadaver in alium locum portari necesse fuerit, capulum sigillo notare, ne defensori effugium existat, commutatum fuisse cadaver.

SECT. III.

DE IURE SEXUUM.

CAP. I.

DE IURE VIRGINUM.

97.

Verecundiam virginalem violare vetant divinae humanaeque leges. Itaque, virginibus ius suum provocantibus, medici publici est, virgineum decus vel confirmare in foro vel negare, aut, ubi raptum fuerit, decernere, possit id sine ullo feminae consensu fieri. Ea iudicia etiamsi difficultates plures habent, e principiis tamen physiologiae sanioris lucem accipiunt.

98.

Virginitatem igitur illaenam statuimus, cum nullum adest vestigium immixti in vaginam membri virilis: pudicitiae autem integritas haud eadem est. Venereos enim amplexus passa forte est; seipsam polluere potuit, quae nullum coitus perpetrati vestigium habet. Haec vero vitia a quaestionibus forensibus aliena sunt.

Virginitatis sic intellectae signa sunt: nympharum solida strictaque indoles, clitoridis parvitas, hymenis praesentia, vaginae angustia plicarumque et

rugarum multitudo. In quibus hymeni fere princeps testimonii locus conceditur, quod illa membrana in primo coitu plerumque laceretur, unde cruoris aliquot guttae effluunt. Columnulae hymeni adiacentes, rupto hoc, magis in conspectum produnt, caruncularum myrtiformium nomine, quas coitus admissi certiora signa habent. (*phys.* §. 512.)

99.

Quae quanquam vulgaria sunt fideque plerumque digna, haud tamen carent ambiguitate. Etenim certissimum quod creditur pudicitiae illaesaе testimonium, hymenis integritas, superesse potest post coitum primum perpetratum, si mentula parva fuerit, virgo autem iusto laxior aut fluore albo iamdiu vexata. Solet etiam ante menstrua, et, dum haec fluunt, amplior esse aditus, ut et cruentatio, virginitatem prodens, decipere possit. Unde, licet rarissime, etiam post partum hymen superesse potest. (*Tolberg de hymenum varietate* p. 14. 15. diss. Hal. 1791.)

Occurrunt etiam huius membranae varietates, ut a nativitate inde deficiat (*Heuermanns prakt. Bemerk.* 1. p. 21.), ut cristatum fere sit ac carunculis simile (*Tolberg* p. 9.), ut plura sint orificia. (*Osfanders Denkwürd.* vol. 2. p. 30.)

Absque coitu posse lacerari, aegrius crediderim, quanquam, quae manu stuprum committunt, rumpere illud possunt. Sed saltu, divaricatis cruribus, findi, situs partium fere non permittit. (*Tolberg* p. 3.) Quae prolapsum uteri passae sunt, amittere illam pudicitiae custodiam possunt, quanquam in virginibus vix ac ne vix quidem is morbus contingat. A casu in ferramenta scindi hymenem vidit Iörgius: virginitas tamen cognosci etiam postea poterat. (*Taschenbuch bey gesetzmäßigen Untersf. des Weibes*, p. 46.)

Ceterum in sententiam clarorum virorum, Mercurialis (*var. lect. lib. 6. c. 25.*) et Morgagnii (*adversf. anat. 1. p. 40.*) abire nihil vetat: posse nimirum in virgine per placidum continuatumque impulsu membri virilis membranam, si modo laxa fuerit, sine ulla laceratione, obliterari, ut igitur cruentatio linteorum post primum coitum haud certum sit et perpetuum virginitatis testimonium. Quod ni infirmum redderetur artibus meretricum pravis, quae alienum cruorem pro suo ostentant; id tamen experientia constat, non primo solum coitu, sed secundo etiam et paucis sequentibus posse sanguinis guttas profundi.

100.

Quodsi ab hymene recedimus, alia signa pariter aut magis etiam dubia sunt. Angustia enim va-

ginae longa abstinentia et adstringentium usu saepe restituitur. Itaque in suspectis examen esse post balneum tepidum instituendum suadent.

Clitoris quidem exigua, inter nymphas delitescens et praeputium obvelata virginem notat. (*Jörg's Taschenb. bey gesetzmäßigen Untersf. des Weibes*, p. 43.) Sed peculiaris nonnunquam fabrica clitoridem ingentem habet, ut supra (§. 27.) iam notavimus.

Debiliora sunt, quae e mammis petuntur. Quae quamvis solidae et duriusculae esse in virgine solent, papillis haud prominulis, areaque rosea eas cingente, haec quidem primo coitu haud ita mutantur, quin possint diutius etiam in meretrice superesse. Neque defunt virgines castissimae, quarum mammae flaccidae sunt, propter totius corporis laxitatem, areae circa papillas decolores, praesertim dum capillis nigris coloreque cutis subflavido praeditae sunt.

Ut verecundiae virginali parcatur, Romanae leges fanciunt (*Digesti*. lib. 25. tit. 4. l. 1.) ad inspiciendum ventrem tres obstetrices probatae et artis et fidei a Praetore esse adhibendas: et Carolinus codex (art. 35.) providas matronas acciri iubet. Cum vero eiusmodi mulieres haud tanta instructae esse

soleant scientia, ut de partium genitalium anomaliis iudicare possint: consilium est nuperiorum doctorum, medicos potius iuratos et a civitate constitutos accerendos esse. Qui ut serio et graviter rem seriam tractent, neque intempestivis ludibriis iocisque virginis castitatem offendant, monendi sunt.

102.

De stupro violento aut inscia muliere saepius sermo est.

Dicitur autem stuprum violentum id, quod iniusta vi cum muliere haud infami committitur: a quo differt stuprum haud voluntarium, quod licet absque vi, tamen et absque consensu libero mulieris perpetratur. Quodsi enim femina vel plane ignorat indolem et sequelas actionum, quas instituit; si ebria est aut nondum nubilis; si mente capta est, aut forte somnambulismo correpta, fraude et insidiis adgressoris corrupta; liberi arbitrii expers, stupro non voluntario vitatur. Id variae leges pluresque auctores cum ipso stupro violento unum habent: sic Codex Iustiniani (lib. 9. tit. 13. l. 2.) inquit: „Si ipsi raptores metu, vel atrocitate poenae, ab huiusmodi facinore se temperaverint, nulli mulieri, siue volenti siue nolenti peccandi locus relinquetur; quia hoc ipsum *velle* mulierum, ab insidiis nequissimi hominis, qui meditatur rapinam,

„inducitur. Nisi enim eam sollicitaverit, nisi odio-
 „sis artibus circumvenerit, non faciet eam velle in
 „tantum dedecus sese prodere.“

Neque longe abest a stupro vi illato ea corrup-
 tio honestae puellae, quae opio aut aliis id genus
 pharmacis in eum statum mittitur, quo nec sui com-
 pos est nec suae spontis: unde et Grolmanno adsen-
 tiendum esse arbitramur, qui facinus id ipsum stu-
 prum violentum appellat. (*Grundsätze der Crimi-
 nalrechtsw.* §. 239.) Vim habent alii compulsivam,
 quae minitationibus ac terrore puellam debilem adeo
 percellit, ut, etiamsi magnopere abhorreat crimen,
 tamen propter aequale forte crimen, quod commis-
 surum esse adgressorem metuit, semet ii dedat.
 (*Feuerbach's Lehrb. des peinl. Rechts* §. 267. *Böh-
 mer ad carol. art. 119. §. 7.*) Hinc et patriae le-
 ges tales corruptorum insidias ergastulo damnant et
 carcere etiam decenni. (*Pr. Gesetz.* tit. 20. §.
 1048 — 1053.) Qui nondum nubilem puellam
 corruerit, parem poenam subit, ac qui stuprum
 commiserit violentum (*ib.* §. 1054.): quo et man-
 datum d. 9. Nov. 1815. pertinet. Nec alienae sunt
 bavaricae leges, quamvis stuprum solummodo non
 voluntarium hoc appellant. (*Strafgesetzb. für das
 K. Baiern*, §. 377. 378.)

103.

Stuprum violentum non committitur nisi in femina honesta, seu ea, quae nondum prostituit, aut, si forte olim corrupta esset, vita bene acta restituit famam. (*Klein's Grundf. des peinl. Rechts*, §. 404.) Cum meretricibus stuprum violentum nullum committitur.

Vis adhibita sola sufficere debet ad perficiendum stuprum vere violentum. Manifesto autem sufficit plurium adgressorum vis; sufficit etiam robur hominis fortis in puella nondum adulta. Quod si vero aequales sunt utriusque, viri et feminae vires; si huius forte superiores; si omnino sui compos est, nec ullo modo consentit; stuprum vere violentum contingere in adulta fere nequit. Itaque et anglicae leges strictiori sensu stuprum violentum sumunt. (*Blackstone's commentar. on the laws of Engl. B. 4. ch. 15. p. 211.*) *)

104.

Huius stupri vere violenti in corpore feminae signa investigare atque testari, a medicis publicis aut obstetricibus etiam iuratis exigitur. Id scrutinium si

*) *Our english law does not entertain quite such sublime ideas of the honour of either sex, as to lay the blame of a mutual fault upon one of the transgressors only.*

protinus ut vitiata est, instituitur, parum habet difficultatis: namque partium contusarum, quassatarum, laniatarum dolores, tumores, sanguinis profusiones abunde testantur vim illatam, maxime in puellis nondum adultis. Diutius post commissum scelus paullo plus negotii facessit. Sed remanent tamen saepe rupturae partium, ingrediendi difficultas, urinae retentio, alvi obstipatio et diuturna alia mala.

105.

Posse concipere feminam violenter stupratam, aegerrime conceditur, quanquam haud abnuerim in stupro haud voluntario conceptionem contingere posse. Etenim persuasum habemus, sine mulieris voluptate conceptionem fieri nequire: illa tamen voluptas coacta esse potest, ut femina, vel vi, vel insidiis, vel haustibus inebriantibus atque narcoticis eo perducta libidinem omnino denique sentiat. Quam si experta mulier prohibere nequit, quid a puella eorum sensuum rudi expectandum? Varietates etiam multas habet is libidinis sensus, ut et in lipothymia possit minor esse atque eiusmodi, ut postea femina eius non meminerit. (*Albers in Roose's medic. Miscellen*, p. 129 — 137.)

106.

Consummatum requirunt leges stuprum, quo complectuntur tum intrusionem penis, tum feminis

emissionem. (*Feuerbach* l. c. §. 268.) Neque tamen defunt, qui rectius pudicitiae corruptionem solam vimque illatam puniunt, etiamsi seminis eiectio in muliebres partes non contigerit. Ita carolinus codex crimen honestatis virginalis aut matronalis contaminatae irrogat in adgressorem (*carol.* art. 119.) et patriae summum iudicium in atroci eiusmodi flagitio similiter sensit. (*Kleins Annal.* B. 10. p. 197.)

CAP. II.

DE IURE CONIUGUM.

107.

Matrimonium contrahitur, ut coitus legitimus sit et soboles procreetur. Fine igitur frustrantur, qui cum coniuge rem veneream celebrare nequeunt aut nullam progeniei spem habent. Itaque et impotentia mariti, et uxoris ea indoles, ut vel coitui celebrando vel liberis gignendis impar sit, matrimonium rumpunt. *) Querelae etiam existunt de nimia alter-

*) „Canonicae leges, si ante carnalem copulam impossibilitas coeundi deprehensa fuerit, liberum faciunt mulieri, alterum virum sumere.“ (*Can. quod autem* 27. 9. 2.)

utrius coniugis falacitate. Medicorum autem publicorum est, causas eas divortii indagare et vel testimoniis firmare vel negare.

A. Impotentia virilis.

108.

Primum igitur mariti *impotentiae* arguuntur, aut viri ipsi praetendunt id vitium, ut stupri commissi suspicionem a se devolvant. Est autem impotentia duplex: sive coitum celebrare, sive liberos gignere prohibet.

Qui coitum celebrare nequit, vel omnino vi ea caret, vel respectu duntaxat coniugis, vel ad tempus tantummodo. Haec ultima impotentiae species, morbo forte aut senio producta, matrimonium nunquam solvit. Idem de hoc vitio valet, quod de furore coniugis Ulpianus monet: „Quid tam humanum est, quam fortuitis casibus mulieris matrimonium vel uxorem viri participem esse?“ (*Digest. lib. 24. tit. 3. l. 22.*)

Saepius contingit, ut fastidio, ira aut aliis causis frigida sit venus respectu mulieris, quae satis vegeta est, si cum concubinis aut puellis res habetur: quod iam et Stoici et Diocles Carystius observarunt. (*Plutarch. phys. philos. decret. 5, 9. 15.*)

Vi ea carent penitus, qui vel frigidae sunt indolis, vel virtutem generandi, stupro manibus commisso, aut blennorrhoea diuturna, aut medicamentis (camfora praesertim et coffeae potu nimio) infirmarunt. Deinde huc pertinent vitia organorum spermata virile generantium: testium durities ac destructio in sarcocoele, degeneratio in pulvem, (*Ehrlichs Beob.* 202.) aut consumptio ope absorbentium vasorum (*Larrey's Denkwürdigk.* p. 167.): herniae scrotalis cum castratione prava operatio (*Frank's Syst. der med. Pol.* 1. 411.): vesicularum seminalium aut ductuum deferentium durities, calculi, paralyfis.

109.

Huc pertinet quaestio duplex: an castrati nimirum vere impotentes sint? an impotentes, quorum testes in abdomine latent?

Castratos Romani Iureconsulti probe distinguunt a *spadonibus*, hac voce generatim sumpta pro eo vitio, quod generandi facultatem imminuisse videtur. Iis etiam adnumerarunt *thlibias* dictos et *thlasias*, seu eos, qui attritu et equitatione, ut Scythae Hippocratis, effeminati sunt. (*Digest.* lib. 50. tit. 16. l. 128.) Hi matrimonium inire, adoptare, posthumumque heredem scribere poterant. (*Digest.* lib. 1. tit. 7. l. 2. lib. 25. tit. 3. l. 39. lib. 38. tit. 2. l. 6.) Sed castrati ipsi generare non posse credebantur:

unde nec matrimonio, nec heredi, rogando pares erant.

Plura docuerunt exempla, non solos spadones sed ipsos etiam castratos concubitus aptos esse, etiam si hi foecundare feminam nequeant. Namque pruritum et erectionem patiuntur, sive id liquori profusae, sive vesicularum seminalium forte vi secernenti tribuendum sit; unde libidinosae mulieres ennuchorum amplexus amare dicuntur.

Latitantes in abdomine testes ad coitum etiam foecundum aptitudinem haud impediunt, maxime si alter tantum delituerit. Eos monorchidas ius romanum nec a militaribus stipendiis exauctorandos esse censuit, quando et Duces Sylla ac Cotta memorantur eo habitu fuisse naturae. (*Digest.* lib. 49. tit. 16. l. 4.) Zacchias hominis meminit, dextrum duntaxat testem habentis, cui tamen duplicata vasa seminalia adiuncta essent. (*Quaest. med. leg.* lib. 2. tit. 3. qu. 7.) Itaque, si testis alter vel uterque in scroto deficit, tantum abest, ut inde impotentem hominem declaremus, ut potius ex aliis signis, capacem aut imparem esse rebus venereis, colligere debeas. Si latent in abdomine, interdum maior etiam vis generandi adest.

Qui coitui celebrando apti sunt, idcirco haud semper impraegnare feminas possunt. Cuius impo-

tentiae difficillimum est scrutinium. Namque in orbitate matrimonii explicanda prima est quaestio, uter coniugum sterilitatis aut impotentiae arguendus sit? Uterque forte capax, sed vel praecipitat alter opus, quod uno eodemque temporis puncto absolvendum est, si conceptioni student; vel penem nimis longum rigidumque maritus solet ita adigere, ut liquor prolificus magis versus latera uteri eiiciatur, (*The- dens neue Bemerk. 2. p. 264.*); vel nimia libidine procax mulier perdit id, quod sobolem procreaturum esse, repetitis coitibus. Haec vero eruere prohibet saepe honestatis sensus.

III.

Solent nonnunquam semen ipsum inertiae aut tenuitatis accusare, quod, etiamsi conceditur, cognosci tamen nequit.

Id vero haud sine veritatis specie est, feminis inertis eiaculationem saepe nimis debilem atque propinquam esse, ut vel incipientem erectionem sequatur. Solet id vitium eos infestare, qui manibus stuprum commiserunt, aut qui saepius noctu pol- luntur.

Huc etiam pertinent hypospadie, i. e., ii, qui penem haud rite foratum habent, cuius vitii exempla et Morgagnius (*De sed. et causf. morb. ep. 46. 8.*) et nos supra (9. 26.) attulimus. Quanquam sper-

mate foecundo non careant, emittere tamen id rite haud facile possunt. Exstant tamen exempla, ubi et his feminae impraegnatae fuerunt. Namque vulgaris membri virilis immissio in vaginam nonnunquam superflua esse ad foecundationem videtur, cum, si modo bene mixtus ac temperatus est is liquor, stimulum quoque in remotiora loca propagare potest. (*phys.* §. 528.)

Hinc brevitās penis fere nunquam per se impotentiam signat: nec ipsa curvitas, quam iam Diocles Carystius cum Stoicis accusarunt (*Plutarch phys. philos. decret.* 5, 9. 13.) quamque ex aneurysmate arteriae pudendae summus Albinus ortam vidit. (*Annot. acad.* lib. 3. c. 5.) Nec phimosis aut paraphimosis per se impotentiam efficiunt, cum ferramentis curanda sint eiusmodi vitia. Nec calculus vesicae, quanquam in coitu dolores saepe producat: nec herniae, nisi testes simul adfecti sint.

112.

Rarae sunt eaeque verae causae impotentiae urethrae ea coarctatio, ut incrassatae eius tunicae secum fere coalescant, eoque sperma eiiciendum iterum in vesicam reprimant. (*Petit in mem. de l'ac. de chirurg.* 1. 454.) Hanc, blennorrhoeae diuturnae sequelam, alibi iam perstrinximus. (*path. spec.* §. 639.) Ex blennorrhoea quondam superfuit an-

gustia ductuum excretoriorum et *strigosa* indoles vesicularum feminalium. (*Morgagni de sed., et caus.* morb. ep. 44. n. 7.) Alibi (ep. 46. n. 5. 6.) idem clarissimus auctor memorat scirrhum vesicularum feminalium impotentiae causam.

Paullo frequentior causa est tumor prostaticae, quo ductus excretorii vesicularum feminalium, ipsaeque vesiculae comprimuntur et denique obliterantur; quem effectum nescio an quis Herholdtio melius descripserit. (*Arnemanns Magaz. der Wundarzneyk.* vol. 2. p. 101 — 125.)

115.

Itaque medicus publicus de impotentia virili iudicaturus primum aetatem hominis, vitae genus et morbos praegressos scrutatur, ut inde causas impotentiae vel verae vel simulatae eruat. Senex enim septuagenarius naturaliter fere haud aptus est ad concubitum, quanquam vegetae senectae atque etiam foecundae plura exstant exempla.

Dein necesse est et phyficas causas et morales, quae huius omnino matrimonii foecunditatem impediunt, investigare. Interrogandi sunt mores utriusque coniugis: examinanda ipsa thori arcana, alter forte praecurrat alterum, an eodem temporis puncto colliquefiant.

Uxoris examen si nihil caussarum prodiderit, ad maritum conversus medicus interrogationem impotentiae virilis instituet. Neque eo impudentiae unquam patria iudicia processerunt, ut, gallicorum more, in confesso publico lascivire cum scortis hominem impotentiae accusatum iuberent: neque medicum decet, praeter inspectionem membri virilis, titillatione libidinem fuscitare: neque laudandum consilium Wirtembergicorum magistratum, qui chirurgus suadent cum suspecto in eodem cubiculo iacere, ut, erectionem hic patiat, interroget. (*Elvert: die Unzulässigkeit ärztlicher Entscheidungen über männliches Vermögen. Tübing. 1808.*)

Post penis testiumque examen, inquirendum est in partium finitimarum indolem; quaerendum, urina intercipiatur, quo facto cathetere aut cercolis explorandae sunt et urethrae et prostatae ipsiusque vesicae indeles: per anum etiam prostatae tumor investigandus.

Nonnullae causae internae et rarae sunt et abditae. Itaque medicus nequit, nisi probabili coniectura consequi vel impotentiam vel vim generandi.

B. Sterilitas feminarum.

115.

In femina pariter distinguenda sunt concubitus obstacula, ipsaque invalentia concipiendi. Illa dum adsunt, hanc necessario adiunctam habent. Ubi sterilitas sine coitus impedimentis adest, difficillimum est scrutinium causarum. Saepius quoque nullo modo erui hae possunt.

116.

Obstaculorum examen ab externis partibus incipiendum est. Atresia vulvae (*path. gen.* §. 102.), si duntaxat hymenis crassitiem insolitam aut clausam fere indolem complectitur, nequaquam coitus obstaculum insuperabile habenda est: quippe vel robustiore mentula vel scalpello ipso chirurgi aperiri claustrum id potest. Interest scire, menstrua fluxerint: quod dum factum est, spem concipimus, arctam aditus indolem vinci posse. Quodsi vero nunquam sanguinis cursus menstruus responderit, si ne minimum quidem aditus foramen animadvertitur; metuenda est prava conformatio partium internarum.

Huc pertinet maxime confluxus intestini recti cum vagina, in casu a Burnso Glasgoensi obser-

vato (*Edinb. med. and surg. journ.* 1805. Apr. p. 137.) et maxime memorabilis idem coalitus, licet intestinum rectum insuper peculiari ore patefceret. (*Huxham. opp.* vol. 3. p. 8. f.) Conceptionem quidem haud impediverat id vitium, sed, cum vaginae orificium paullo infra umbilicum esset, cum supra id intestina confluerent, taedium ingens inde marito infestum esse debuit.

Saepius idem vitium ex fistula ani aut ulceribus uteri vaginaeque existere visum est. (*Störk ann. med.* 2. p. 204. *Stockhausen diff. de aedoeophsophia.* Hal. 1795.)

117.

Vaginae sola strictura, etiamsi arctissima fuerit, per se coitus obstaculum haud est insuperabile. Etenim quamvis penis adigi altius nequeat, foecundatio tamen contingere potest: ipsaeque angustiae interdum in partu egregie dilatantur. (*Hist. de l'ac. de Paris*, 1712. p. 48. 1748. p. 83.)

Quodsi vero cum arctissima vagina nec uterus nec ovaria evoluta sunt, vitium id in viva femina, nisi e coitus fastidio, haud cognoscendum, amplexus venereos quidem haud impedit, conceptioni vero prorsus adversarium est. (*Morgagni de sed. et caus. morb. ep.* 46. n. 21.) Nonnunquam cum

parvitate partium externarum arctissimoque aut nullo ad vaginam aditu nullus adest uterus; cuius rei memorabilem casum refert Thedenius (*neue Bemerk.* 2. p. 265.). Matrimonio iustibusque veneris apta erat mulier, neque sine libidine: sed conceptionem nunquam contigisse nemo mirabitur.

118.

Sunt in vagina vitia, quae coitum minus gratum aut fastidiosum faciunt, adeoque ni foecunditati obsint, contraria tamen sunt mutuae voluptati, in coniugio quaesitae.

Satis vulgaris est leucorrhoeae muliebris foeditas, qua non modo ipsae partes muliebres laxantur nimis, roduntur ac excoriantur, sed mentula ipsa infestatur. Huc pertinent ulcera vaginae; haemorrhoides ad eam partem conversae, quibus varices dolorem cientes efficiuntur; hernia vaginae; prolapsus eius et uteri; inversio et retroversio.

119.

Iam altiora sunt impedimenta indaganda: nunquam exploratio ipsa omittenda, quam iam Hippocratici auctores suadent. (*Hipp. de steril.* p. 676.) Vulgatissimum est ovariorum id vitium, quod in hydatidosa aut alia degeneratione versatur; cognos-

cendum e signis alibi enumeratis. (*path. spec.* §. 603. 604.) Uterus conflictatur interdum polypis, sarcomate aut carcinomate: quae caussae sterilitatis Erasistrato iam innotuerunt. (*Plutarch. phys. philos. de cr.* 5, 9.) Tubae denique Fallopianae accusandae sunt, dum concretae cum ovariis aut imperviae sunt. (*Morgagni de sed. et causs. morb.* ep. 26. n. 13. ep. 45. n. 23 — 26.)

Quae vitia ut in viva aegerrime cognoscuntur, ita foecundationi impedimenta opponunt insuperabilia, coitui non item.

120.

Dum nullum eorum obstaculorum probabile habemus, saepe tota feminae constitutio arguenda est. Nimis tenera, ad nervorum distentiones pro-na dispositio conturbat in concubitu ipso omnem nervorum compagem, ut nulla sequatur conceptio. Nimia veneris frequentia, ut in prostibulis accidit, sterilitatem producit, quod cessurus repetitus turgorem sanguinis in ovariis tubisque continuum adeoque faciliorem efficit coalitum.

Maxime vero et in muliebri corpore circumspicienda est ratio partium ad mariti partes, cum, quae sterilis esset in priori, satis foecunda interdum sit in posteriori coniugio.

CAP. III.

DE ERUENDA GRAVIDITATE.

121.

Artis peritorum scrutinium exigitur vel in occultata graviditate puellarum vitiatarum, vel in simulata etiam impraegnatione scortorum, viduarum aut mulierum capitis damnatarum, quae supplicium prolataturae sunt.

Occulere solent graviditatem, quae e lapsu virginitatis ignominiam metuunt, labe quadam ac macula non se solas sed totam familiam adficien-tem. Earum forte rerum rudes non desperant, vel abortionem se passuras, vel clandestinum etiam partum edituras esse. Aliae plane nesciunt, amorum illicitorum eos esse fructus, aut se ex unico forte coitu concepisse. (§. 57.)

Occultatio graviditatis ut vitetur, leges patriae studiose sanxerunt. (*Pr. Gesetz. tit. 20. §. 839.*) Plectunt etiam inficiationem (*ib. §. 953*): neque tamen per se hanc dissimulationem mulctandam esse, doctores concedunt. (*Kleins Grundsätze des peinl. Rechts, §. 351. Kleins Archiv des Criminalr. vol. 6. P. 2. p. 63.*) Imputatur tamen, cum conamen infan-tem occidendi adiunctum est, aut culpa matri graviditatem negantis fetus perit.

Impraegnationis praegressae signa primis mensibus ambigua sunt.

Necessaria tamen est primo partium genitalium examen. Nymphae internae primis mensibus turgidiores esse et rubicundiores consuecunt: in media graviditate et haec et externae laxiores sunt: iterum magis turgescunt versus finem: nonnunquam varices adsunt et aquosi tumores. Hymen si superest, impraegnationem valde dubiam reddit. Vagina solet ad tertium aut quartum usque mensem brevior, plicisque haud exiguis, prolapsum nonnunquam mentientibus insignis esse. Post quartum mensem, dum uterus magis ascendit (*phys.* §. 545.), vagina in longitudinem magis passa plicas amittit; nisi laxior iusto fabrica eas retinuerit. Est etiam vagina gravidæ magis lubrica, muco nonnunquam adeo abundans, proinde ac si leucorrhoeam pateretur.

Tum uterus ipse studiose pervestigandus est, stante femina atque iacente; interna exploratione cum externa comparata. In primis graviditatis mensibus cervix uteri paullo propior est vaginae, orificium profundiorum habet situm, quem tamen et in virginibus, quibus menses intercepti sunt, nonnunquam obtinet, (*phys.* §. 542.) In primiparis orificii facies, quæ antea rimam transversa-

lem sistebat, iam ostiolum lenticulare subrotundum repraesentat: sed, si iam pluries pepererint, orificium infundibuli speciem exhibet, ambitu saepe oboso: versus medium gestationis tempus laevam magis spectat: labium utrumque sibi indies magis aequale fit. Cervix uteri ad mediam usque graviditatem turgidior atque mollior est, magisque conica fit. Cum iam fetus etiam motus tangantur, diagnosi facilior est et certior a media inde gestatione. Orificium magis ascendit, plane subrotundum est, ni praegressis partibus plus minusve laceratum fuerit. In his etiam quandoque sponte sua aperitur, ut digiti apice possis ovi membranam externam attingere. Iam per uteri parietes magis attenuatos atque calidiores infans eiusque partes tactu explorantur. (*phys.* §. 546.)

123.

Dein ad mammas veniendum est, utpote quarum indoles uteri mutationes sequi solet. Primis mensibus difficillimum est scrutinium, maxime si prius eas nondum exploraveris. Solent tamen leves sentire punctiones: turgescere incipiunt mammae, papillae magis prominere, area etiam saturius rubere. A vigesima inde hebdomade serosus liquor secernitur, cuius vestigia interdum in indusiis repereris, aut quem facile exprefferis. (*phys.*

§. 544.) Vasa interdum secernentia turgida manifesto conspiciuntur.

His accedunt indicia ex abdominis ambitu petenda. Primis mensibus regio hypogastrica tantum abest ut intumescat, ut potius, utero magis descendente, collapsa aut contracta videatur. A tertio inde aut quarto mense abdomen intensius turgidum uterum gravidum iam tangendum offert. Is tumor increfcit, ut septimo etiam mense paullo supra umbilicum fundum uteri deprehenderis. Fovea umbilici magis obliteratur, ut tandem colliculum repraesentet, regio epigastrica etiam et praecordia magis promineant. Tandem mense decimo medio uterus depressus praecordia libera mittit, tumor inam abdominis regionem occupat. Ei tumori, cum et ab hydropica colluvie et ab aliis causis existere possit, nunquam nimis fidendum: sed curiose comparandae sunt orificii uterini mammarumque mutationes.

Denique exploranda reliqua impraegnationis indicia. Menstruorum suppressio vulgatissima est: ideoque studiose interroganda est femina, quonam tempore ab eo sanguinis cursu primum defecta sit: quanquam haud pauca existent exempla eius cursus

per totam gestationem pergentis aut nonnisi in gravidis obvii.

In iis, quae primum gestant fetum, ventriculus mox post menstruorum interceptionem turbatur; fastidiunt carnes; ieiunae vomituriunt; appetunt saepe insueta. Nervorum organicorum sensus perturbatur, unde iracundiores, tristiores etiam evadunt. Accedunt post mediam graviditatem incommoda ex uteri tumidi pressione in vicinas partes: lassitudo, ingressus difficilis, interdum et varices et oedemata pedum: decubitus molestus: spirandi difficultas: urina intercepta aut, versus finem inprimis, frequens micturitio. (*phys.* §. 546.)

125.

Quae indicia omnia simul sumpta graviditatem quidem certissimam reddunt. Primis tamen mensibus ambiguum semper est iudicium, etiamsi ex ipsa uteri exploratione petatur. Itaque differenda est scrutinii repetitio in quartum aut quintum mensem, ut cum mutatione orificii atque cervicis motus simul infantis deprehendas.

Signa hydropis uterum infestantis (*path. spec.* §. 599.) probe distinguenda sunt a graviditate, quam interdum is morbus mentitur.

DE PROBANDO PUERPERIO PRAEGRESSO.

126.

Saepe oritur quaestio de partu praegresso, quam partim iam supra (§. 32.) tractavimus. Facilius ea solvitur, quo recentior est femina a partu: difficilime, si temporis spatio longo interposito examen instituitur.

Protinus ut femina peperit, lochia effluunt, qui sanguinis fluxus per sedecim aut viginti etiam dies continuans peculiarem spirat odorem, quem et sudores puerperae diffundunt. Is indicium praebet haud spernendum. Nymphae solent esse tumidae, nonnunquam excoriatae aut vulneratae aut varicibus obfessae. Perinaei mensura et vestigia lacerationum adjuvant examen. Clitoris etiam, si diutius caput infantis premeret pelvis exitum, adeo turget sanguine, ut plicae supersint. Vagina insigniter passa est, laxa, plicis destituta, sanguinem lochiorum stillat. Uteri orificium magis versus os sacrum spectans, paullulum apertum, rimae formam sensim adipiscitur: labiis vel laceratis vel alio modo a virginea forma recedentibus. Cervix uteri calidior est, turgidior, violentiae, quam passa esset, vestigia retinet. Uteri ipsius moles per triginta dies maior est quam

in iis, qui nondum pepererunt: dein ad pristinam parvitatem redit.

Pelvim etiam metiri consilii est. Cuius forma si cetero normalis, mensura in promptu est, aberrationes igitur facilius deteguntur. Ossis coccygis mobilitas exploranda, quae brevi post partum adesse solet. Idem valet de ligamentis sacro - tuberosis et sacro - spinosis facile cedentibus.

Tum abdomen inspiciendum et contrectandum. Si laxa sunt integumenta, si rugas contraxerunt, accedentibus reliquis indiciis certioribus, partum praegressum persuasum habemus.

Ad mammas veniendum est. Quae si turgent atque durefcunt, glandulis simul axillaribus tumen-
tibus, si vasa turgescunt, si lac effluit e pressis papillis prominulis; dubium nullum superest, feminam peperisse.

Simul denique in aegritudinis genus, qua mulier laborat, inquirendum est. Quod si alienum fingitur ab eo statu, studiosum instituendum est scrutinium, quod fallere nequit, si genitalia rite indagaveris.

Quodsi diutius iam, ante plures nimirum septimanas, imo menses, partus contigerit, multo difficilius fit indicium. Violatam quidem esse feminam ex hymenis absentia cognoscimus, rarissimis exceptionibus. (§. 99.) Uterus tamen in pristinam molem contractus, vagina arctata plicaeque restitutae saepissime perturbant iudicium. Abdominis rugae nonnunquam desunt post primum partum, aut in femina, quae abdomine naturaliter turgido gaudet. Itaque suspendenda est sententia.

SECT. IV.

DE IURE AEGROTORUM.

CAP. I.

DE MORBIS SIMULATIS.

128.

Qui morbum simulant, vel misericordiam ciere, vel hominum animos advertere vel etiam eximi a stipendiis militaribus cupiunt aut aliis oneribus publicis a poenis etiam vel capitalibus, vel ergastulo. Magistratum iussu medicus publicus igitur diagnosin morborum adhibet, ut fraudem detegat.

Quod officium quantas saepe habeat difficultates, brevibus dici vix potest. Vafrities enim tanta interdum est nequissimorum hominum, ut artibus pravis etiam providum medicum circumveniant. Testimonio sit puella guesstphalica, quae, inedia sexenni fere ficta, decepit ante hos septemdecim annos non paganos solum, sed cultos etiam homines. (*Vezin in Kleins Archiv des Criminalr.* vol. 3. P. 2. p. 120.)

Facillime simulantur morbi, quorum signa necessaria et pathognomonica, quod haud sub sensus medici cadunt, examen eius effugiunt. Namque si dolores, sensuum defectus aut mentis etiam morbi finguntur, pathognomonica earum aegritudinum signa medici examen haud admittunt. Sed alia, et ἐπιγεγόμενα quidem phaenomena lucem eam ministrant, quam ex ipsis pathognomonicis frustra expectaveris. Saepe quoque experimenta necessaria sunt, a quibus, incerto plane homine suspecto, institutis, nisi et valerrimus fuerit et ipsa doctrina medica imbutus, sibi cavere plane nequit.

Dolores igitur primum, quamvis sensus organici adfectiones, questu quidem aegroti protinus cognoscuntur. Sed medicus fraudem dispulsurus circumspiciat sequelas atque effectus dolorum atrociorum, tum in vasorum systemate, tum in aliis functionibus. Cum vehementissimus quisque dolor pulsum concitare soleat, functionesque sensuum, praesertim internorum turbare, fraudem suspicamur, dum pulsus placidissimus est somnusque quietus. Dolores a calculis vesicae derivati ficti sunt, si urinae fluxus nullo modo interceptus est,

neque is humor alienus a sana est indole. Colici dolores ficti sunt, si alvus naturaliter redditur, neque quod expellitur, a naturali statu recedit; si ciborum appetentia et digestio haud turbantur.

131.

Sensuum defectus vel faciliores sunt exploratu vel difficiliores. Coecitas haud facile fallere medicum potest, cum, si vera adfuerit, vel organica vitia adsint, vel nervus opticus ita adfectus sit, ut pupilla etiam haud moveatur. Surditas vero, cum organa auditus sensus fugiant, a callidis hominibus hactenus simulatur, ut vel prudentes etiam medici decipiantur. Necessse est, aut eos improvviso terrore percellere aut iis suggerere, quae haud expectato gaudio moestitiave conturbatura sunt.

Solent milites segnes, qui militiam in agmine et proelia pavescunt, resolutos fingere pedes. Hos adoriuntur medici castrenses asae foetidae cum amicae floribus infuso, methodo nauseam continuam excitante et moxa. Quam curationem adeo abhorrent, ut agmen potius sequantur.

Lipothymiae et syncoptici adfectus solent et faciei habitum deturpare et pulsum vel plane interceptum vel exiguum reddere atque irregularem.

128 SECT. IV. DE IURE AEGROTORUM.

Quodsi igitur, qui syncopen fingit, sueto faciei rubore pulsuque gaudet naturali; si praesertim, protinus ut haud exspectata narrantur, percellitur, persuasum habemus, fraudulenter simulari adfectionem. Et in his et in soporosis aut aliis adfectionibus utiliter saepe ingrata adhibentur incitamenta: emplastra vesicatoria, electricae scintillae e lagena missae, moxa, radix armoraciae tusa. Candens tamen ferrum admovere crudelius iusto est.

132.

Epilepsia solet non raro praetendi. Et licet nervorum distentiones mirae simulentur, haud potest tamen impostor absentiam fingere conscientiae aut sensuum abolitionem. Itaque si teterrime convulsus acus tamen aut moxam sentit, si oculos habet perpetuo clausos, nec immobilem pupillam, si errhinis nares moventur, suspicio nascitur, fictam esse aegritudinem.

Similiter iudicandum de aliis id genus convulsionibus.

133.

Si sanguinis forte aliorumve humorum profusiones finguntur, virium ratio illaesa post longiorem fluxum

fluxuum moram fraudem revelat. Solent enim peregrinum cruorem subdere ac pro suo vendere.

Qui plebis superstitionem, egestis acubus aut aliis rebus plane peregrinis, aut ficta daemonis cohabitatione decipiunt, medicos rationis suae recte compotes fallere nequeunt. Daemoniaci vel impostores sunt, vel melancholici.

CAP. II.

DE MORBIS DISSIMULATIS.

134.

Disimulantur morbi, tum ob infamiam eorum, tum ut matrimonium contrahatur, emolumentaue obtineantur. In qua dissimulatione plurimum saepius dandum inscitiae aut negligentiae, multum tamen et nequitiae tribuendum et calliditati.

Medici publici est, si forte ob solvendum matrimonium vel alias causas suspicio de morbo dissimulato nascitur, omnia signa aegritudinis etiam occultae noscere eaque in homine suspecto ita investigare, ut nec a repetitione examinis nec ab experimentis abstineat, veritatis gratia eruendae.

135.

Eorum morborum frequentissimus fere est syphilis, cuius variae formae hactenus saepe latent, ut sagacitatem exigant singularem.

Generatim quidem falluntur, qui vel a diuturna mora et pervicacia symptomatum, vel ex hydrargyri usu, signa syphilidis petunt.

136.

Prodroma syphilidis symptomata in viris, etiam si quandoque dissimulentur, obvia tamen ceteris sunt. Ardores inter mingendum vehementes et erectio penis frequens notas sistunt, quibus facile blennorrhoea virulenta ab aliis, scrofulosa nimirum, arthritica aut aliis discernitur. (*path. spec.* §. 637.) Curationis genus minoris est momenti; siquidem, Schwediano teste (*von der Lusch.* 1. p. 67.), et blennorrhoeae virulentae sponte sua naturaeque ope convescere possunt, et in aliis eiusmodi fluxibus similia saepe requiruntur remedia ac in syphilitica.

Difficilius iudicium est de blennorrhoea secundaria, ortane sit ex infectione praegressa an e causis debilitantibus. Quodsi membrum virile semper est flaccidum, si nunquam erigitur, si liquor

effluens albumini similis titillationis sensum solum in exitu urethrae efficit, nullum vero ardorem, si nulli adsunt dolores partium vicinarum, potest insensibilis esse, quanquam et hic non raro praegressas blennorrhoeas primarias virulentas sequatur.

Quodsi vero dolores aut punctiones in perinaeo sentiuntur, maxime dum mingitur, aut dum equo curruque vehitur aeger, aut dum coitum celebrat; si liquor emanans gravem spirat odorem; si effluxus cum sensu fervidae aquae ex bulbo profluentis iunctus est; si mictus intercipitur, nec tamen cathetere obstaculum in urethra ipsa sed in collo vesicae deprehenditur, metus est, prostatae tumorem (*path. spec.* §. 640.), blennorrhoeae virulentae vix non semper posthumum, accusandum esse. Exploratio certior fit digito per anum immisso.

Si blennorrhoea secundaria humorem eliminat purulentum, si dolores adsunt in urethra pulsantes aut rodentes, cereolo et cathetere exasperati, dubitari fere nequit, eam ulcusculis syphiliticis urethrae ortum debere.

In mulieribus multo magis ardua est syphiliticae et infantis blennorrhoeae divisio. Namque nec

132 SECT. IV. DE IURE AEGROTORUM.

acrimonia, nec foetor laticis effluentis, nec dolores ardentes aut adrosiones partium, nec menstruorum fluxus pergens, nec quod noctu cesset, infonstem a syphilitica blennorrhoea muliebri distinguere possunt. (*path. spec.* §. 436.) Itaque ni accesserit confessio mulieris, ni ulcuscula semet adiungant, quorum syphiliticam indolem haud facile ignoraveris, ambiguum semper manet iudicium.

138.

Ulcerum venereorum facilis est diagnosi. Orae durae et callosae, fundus lardaceus, sanies effusa, quaquam fluit, similia ulcuscula et excoriaciones destructis partibus producents, optime dilucidant naturam eorum ulcerum. Idem valet et de carie ac exostosis, si modo in ulcera manifesta transeunt. (*path. spec.* §. 641.)

139.

Exanthematum, ut ingens est varietas, ita iudicium difficillimum; ni omnem omnino decursum, modum eruptionis et symptomata comitantia rite indagaveris.

Lichenes, leprae, psoriales syphiliticae, faciem protinus occupantes, saturiorem habent colo-

rem, magis fuscum: calore emendantur, frigore magis gliscunt. Abeunt in ulcera, quorum ingenium syphiliticum manifestum est. Intertrigo perinaei et ani crustas gignit albidas, quales in angina syphilitica existunt. Maxime vero in aliis exanthematibus diuturnis monendum, si variant cum doloribus ossium et tumoribus duris, infectionem syphiliticam suspici debere.

140.

Impetigo, scabies, pityriasis, porrigo, foedaque alia exanthemata, quamvis saepius dissimulentur, hand diu tamen latere possunt. Repulsa forte aut siccata, ut delitescant, damna plurima corpori inferunt.

134 SECT. IV. DE IURE AEGROTORUM.

CAP. III.

DE MENTIS AEGRITUDINIBUS.

141.

Quaestiones de sanitate mentis in foro saepissime occurrunt, tum ut de libero arbitrio constet, tum ut facultas peculium administrandi eruatur, tum denique ut veniam amentiae reus impetret.

Eas quaestiones solvendas medico publico iudex proponit, quia ad nullum alium civem auctoritate publica imbutum demandari id potest officium, tum etiam quia adeo arcte iunctum est animi examen cum corporis investigatione, ut idoneum videatur medici publici munus, animi morbis eruendis.

Magnopere tamen optandum esset, medici publici maiore gauderent animi scientia, quam sibi comparaturi sunt proprio potius studio quam in scholis metaphysicis.

142.

Mentis autem aegritudines, quas iam alibi (*path. gen.* §. 287. *path. spec.* §. 555.) perstrinximus, id omnes commune habent, ut plenam sui

conscientiam tollant atque libertatem. Itaque minores adfunt gradus, quos neutri statui adscripseris, fluctuanti, ut diximus (*path. spec.* §. 554.), conscientiae tribuendi aut libertati neque plenae, neque prorsus abolitae. Dicimus (*path. gen.* §. 163.) animi perturbationes propiores esse ab ea impotentia: quam tamen cum lubitu suo incurrat homo, haudquaquam necessariam esse, neque aegritudinibus adnumerandam, patet.

Par est ebrietatis ratio, quae, quanquam conscientiam tollit et libertatem, sponte tamen contrahitur, ni forte occulto potionis vitio ebrietas acciderit. Itaque vulgo amentiae veniam ebrius haud obtinet, etiamsi quandoque absque omni culpa in id vitium incurrat.

143.

Leges pleraeque nec crimen imputandum esse mente captis nec hominum ratione praeditorum iuribus gaudere posse statuunt. Sic iam romanae leges (*Digest.* lib. 9. tit. 2. l. 5. §. 2.) „Quaerimus, „si furiosus damnum dederit, an legis Aquiliae actio „sit? Et Pegasus negavit: Quae enim in eo culpa sit, cum suae mentis non sit? Et hoc est verissimum. Cessabit igitur Aquilia actio, quemadmodum si quadrupes damnum dederit.“ Ita co-

136 SECT. IV. DE IURE AEGROTORUM.

dex carolinus (*art. 179.*) mitigandam censet esse poenam, si sensuum suorum compos non fuerit reus (*jemandt, der wissentlich seiner sinn nit hett*), ubi ad doctrinae peritos confugiendum esse iubet, qui animi statum explorent. Simillimo modo et patriae leges sanciunt (*allg. Criminalrecht für pr. Staat. 1. §. 280.*); medicos publicos decere iudicium de mentis alienationibus: et alibi (§. 356.): mente captos et imbecilles (*Verrückte und Blödsinnige*) testes quidem esse non posse: interrogandos tamen esse in lucidis intervallis, quamvis circumspectissime.

144.

In quibus quidem legibus id animadvertendum esse arbitror, haud idoneo acumine distingui varias mentis alienationes gradusque eorum, quibus libertas et conscientia vel parum, vel magis, vel prorsus tollitur. In ea autem differentia necesse est fusorem esse, priusquam spontis suae esse hominem iudicaveris. Etenim limites variorum errorum, fallaciarum, vitiorum ipsarumque aegritudinum tales sunt, quales haud facile, sine interiori saltem examine, definiveris.

145.

Itaque primum de adynamia mentis (*path. spec. §. 555.*) sermo habendus est: quam et fatui-

tatem et *imbecillitatem* animi et *stupiditatem* vocant. Intercedit tamen et hic discrimen aliquod haud parvi momenti, ipso verborum significato vindicandum.

Stupidum dicimus (*dumm*) hominem tarditate ingenii in adsequendo intelligendoque laborantem, qui attentione caret acriore, quanquam eam intendere quidem, si modo velit, in aliquam rem possit. Saepe igitur, licet tarde et haud sine negotio, recte iudicat: sed cum extendere attendendi vim haud facile possit, in unam rem intentus, inconsideranter agit; incogitantiae et temeritatis puerilis fere semper arguendus. Itaque, si delictorum accusatur, culpa nunquam vacuus est, neque excusari potest, nisi vera adsit fatuitas. Quoad civile ius, peculium administrare valet, testari in rebus, quae mentis vires haud superant, testamentum denique facere.

Fatuitas vero ac imbecillitas animi in iudicii omnis atque sensus communis defectu versatur, unde impubibus adnumerantur. (*Allg. pr. Landr. tit. 1. §. 29.*) Quanquam sensibus saepe vigeant, memoria etiam satis tenaces sint, rationis vis tamen nulla est in regendis affectibus: hinc iracundia excandescens saepe furunt; neque errore liberari aut ad se redire persuasi possunt: cum liber-

tate plane careant. Haud irritati vero solent valde quieti, taciturni esse ac meticulosi; semper cunctari et haesitare; neque unquam prudentiam sibi adrogare, quamadmodum stupidi saepe faciunt.

Delicta ipsis haud imputantur: quamquam, si aliis damnum intulerunt, mulctatio sit bonorum atque pecuniae: si gravissima commiserunt facinora, ergastulis aut custodiis aliis coërcentur, neque capite unquam damnari possunt. (*Allg. pr. Landr. tit. 6. §. 41.*) Memorabile est, incendia pleraque inferri a fatuis et impuberibus. (*Kleins Annal. vol. 3. p. 7.*)

146.

Medici est, in mentis imbecillitatem inquiri, examen ita instituere, ut homo ante neque admonitus sit neque paratus. Cum enim interrogationem paveſcant, saepe eo maiorem ostendunt fatuitatem, quo magis nituntur eam occulere. Itaque simulet quaesitor, se forte fortuna iis occurrere, ut sermones cum ipsis habeat, quibus detegere vel diluere animi invalentiam possit. (*Pyl's Beytr. Samml. 8. p. 255. f.*) Interrogatio incipiat necesse est ab obviis maxime et trivialibus rebus, in quibus si iudicium nullum manifestatur, exploratam

habemus mentis imbecillitatem. Dein sedulo inquirendum est, ab infantia inde, vel morbo nata sit fatuitas, an denique per circuitus recurrat. (*Pyl's Beytr. Samml.* 8. p. 236.) Denique in corporis statum penetrandum est, qui saepe comitari fatuitatem solet: vitanda tamen fallacia sensuum linguaeque: tarda enim ac impedita loquela, auditus etiam difficillimus suspicionem movent fatuitatis, quae tamen nulla nonnunquam est. Vultus etiam imponere potest, cui fidendum non est, nisi reliqua congruant.

147.

Ad *insaniam* venimus, quam diximus (*path. spec.* §. 555.) id animi vitium, quo imagines phantasiae pro veris sensuum impulsibus habentur, unde sublata imaginationis sensuumque ratio accusanda est. Duplex igitur eius alienationis genus est: alterum ex sensuum hebetudine, alterum ex imaginatione vehementer intenta obortum.

Quodsi sensuum torpor insaniam producit, ebrietatis exemplo et somniorum, nulla plane conscientia clara adesse solet: commutant nonnunquam homines, neque se unicam esse personam eandemque clare cognoscunt. Imagines, quae

phantasia excitat, haudquaquam constanter nec eadem sunt, sed celeriter mutantur. Nec imaginatio ipsa fortior iusto est, quin debilior esse potest; sensuum tamen hebetudo prorsus demit conscientiam, quod ex comparatione sensuum superiorum, obiectivorum Kantii, conscientia nascitur. (*physf.* §. 379. 402.) Hinc sensuum suorum compotes non esse (*nicht bey Sinnen, nicht bey sich seyn*) Germanis dicuntur. His quidem insanis imputari crimina commissa nequeunt, quod sensuum iudicia vel fallacia vel adeo nulla sunt, ut comparatio nequeat institui ad conscientiam stabiliendam.

148.

Memorabile est, *lucida incidere intervalla*, in quibus sui compos est homo. Quae si breviora sunt, saepius interpositis vesaniae accessibus, consideratione haud satis digna sunt, cum plena conscientia rectusque rationis usus non semper redeant. Si longiora sunt intervalla, accessus autem brevissimi; in iis, cum ratio prorsus redeat, delictorum imputatio omnino contingit.

Sed memoratu vel maxime dignum est, insanum, protinus ut in accessibus atrox facinus commisit, saepe statim ad se redire, quoniam hebe-

tudo sensuum vehementia impulsuum fuscitatur. Itaque, si postea sanae mentis sunt, haud sequitur, dum facinus perpetrarent, sui compotes fuisse. Unde et hi veniam amentiae merito implorare possunt. (*Hofbauers Psychol. in Anwendung auf Rechtspflege*, p. 145.)

149.

Qui edormiverunt aut subito expergiscuntur, haud subito recuperant conscientiam; sed, praesertim si antea somniis turbarentur, vecordia transeunte laborant, e sensuum hebetudine explicanda. (*physf.* §. 385.) Itaque, si crimen commiserint in eo medio statu, perinde est ac si vecordes fuerint. Cuius rei exemplum clarissimum in annalibus iudicialiis patriae narratur. (*Klein's Annalen* vol. 3. p. 9. f.)

105.

Huc quoque somnambuli pertinent, in quibus cum sensuum superiorum suppressio vel hebetudo contingat, ut nec pupilla contrahatur (*physf.* §. 591. 592.); sensus organicus vicem superiorum gerit. Unde alium plane hominem esse noctivagum, alium vigilem recte praecipitur. Itaque crimen haud imputandum est, quod forte commise-

rint. Sed culpa peccasse patet, cum cognoscere aegritudinem suam et admonere alios, dum vigilantes essent, omnino possent. (*Böhmer ad carol. art. 179. §. 7.*)

Quae aegritudo si praetenditur, medici est, inquirere in signa eius essentialia. Maxime vero sensuum perfecta suppressio aut hebetudo examinanda, quae variis incitamentis (§. 151. 132.) neutiquam efficacibus atque pupillae immobilitate proditur.

Huc et trahenda esse arbitror magnetismi animalis phaenomena, quae alibi (*phys. §. 395. f.*) exposui. Medicus publicus, de hoc statu iudicium laturus liber sit ab omnibus et scholae et aetatis opinionibus, ut mendacia a veritate distinguat. Magna phaenomenorum pars vanitati tribuenda est muliebri: magna etiam vanitati medicorum. Nec tamen omnia spernenda sunt aut pro fraudibus habenda: sed ducibus doctrina et animi libertate observanda. Quae vera sunt, optime comparantur cum noctambulismo: unde et vigili personae haud imputandum est, quidquid somnambula delipuerit. Laudavimus iam supra (§. 59.) facultatis medicae Lipliensis iudicium de femina in eo statu partum elidente.

Alia est infaniae species, imaginationi nimis intentae tribuenda. Qui hac laborant, sensuum utique compotes sunt: memoria valent: fixas tamen habent ideas, quae vel moestos eos reddunt vel mirifice delectant. Haud repentino motu agunt, sed praeparati ac meditati: neque finis attingendi studium, neque sollertia remediorum inveniendorum, neque prudentia quaedam omnino desideratur. Est eorum animorum tanta perturbatio, ut perpetuo angantur, neque tamen adsequi possint, quid sit, quod se iugiter sollicitet angatque. Violentam appetunt actionem; scelus ipsum perpetrare student et saepe perpetrant, tanquam suae anxietatis remedium. Id sibi imperatum fuisse fatentur.

His accensendi sunt fanatici, quos antiqui Romani religiosos vocitarunt. (*Gell. noct. att. 4, 9.*) Qui, ut salvos faciant alios, eos interficiunt; aut alios interimunt, ut ad supplicium trahantur ipsi: quia vitae eos taedet aut beatitudinem anxii desiderant.

Veniam amentiae impetrare tales homines nihil est quod vetet. Et ipsae patriae leges haud capite sed carcere eos damnant. (*Allg. pr. Gesetzbb. tit. 20. §. 831. 832.*) Quodsi vero nihil adest,

144 SECT. IV. DE IURE AEGROTORUM.

quod libertatem animi laesam probet, delicti poena ordinaria irroganda est. (*Klein's Ann.* 7. p. 7.)

152.

Nec negligenda est exanimatio illa, quam communem diximus animi perturbationum vehementiorum seu iactationum incitatarum adfectum. (*path. gen.* §. 163.) In eo stupore animi agitur saepe, cuius dein poenitet hominem. Quod cum abhorreat a libertate animi et plena conscientia, imputandum homini haud est. Si quis adgressorem graviter laeserit aut etiam confoderit, si ultus fuerit ilico iniuriam acceptam, a poena ordinaria liberatur ob perturbationem mentis libertati infestam.

Sic et fames mortem minitans excusat delicta, validissimo servandae vitae appetitui tribuenda. Quis non meminerit atrocissimorum facinorum, quae in lamentabili illa ἀναβάνει Gallorum et Russia perpetrata fuerunt?

Solet tamen et instinctus coecus, in hypochondriacis sibi quandoque rationem hactenus subdere, ut scelera committantur, quae imputari nequeunt. (*Hofbauers Psychol. in Anwend. auf Rechtspf.* p. 350.)

153.

Transimus ad *furorem* eiusque vehementissimum gradum, rabiem. Eum dicimus (*path. spec.* §. 555.) instinctum adeo perversum, ut impulsus et propensiones nullo modo a ratione regantur nec regi possint.

Est autem difficillima profecto quaestio, quae de hac animi aberratione saepe proponitur. Etenim, cum is furor tum intellectus infirmitate tum adfectuum ferocia nitatur, propinqua certe est cognatio iracundiae et furoris iracundi. Neque, nisi ad eam ipsam rationis imbecillitatem respexeris aut ad animi valetudinem adversam, ex aliis signis manifestam, vel denique ad corporis etiam aegritudinem, neutiquam amentiae veniam pro reo exposcere audebis. Occisor ille Frisius (*Klein's Ann.* vol. 13. p. 89.) tum praecipue ira excandescere solebat, cum tempestas turbida instaret: perpetua idem inquietudine agitabatur: quae laesam notabat sanitatem. Itaque, etiamsi consulto facinus patraverat, malitia tamen atque ipse dolus alienus ab eo putabatur. (*Klein's Ann.* vol. 12. p. 187.)

154.

Tandem de surdis, qui simul muti sunt, quaestio iudiciaria nascitur, sintne rationis suae rite

compotes. Et id quidem, nisi erudiantur, fere negandum esse existimamus. Etenim sine loquela et auditu, quanquam acutissimi alii sint sensus, informationes tamen generales de honesto, bono et recto difficillime nascuntur. Nexus idearum rarus est, impeditus aut nullus: iudicium fallitur aut labascit. Hinc adfectus et animi perturbationes vehementiores sunt, quam ut ratio imbecillis moderari ac gubernare eas possit. Accedit, leges ignorari in eo statu, unde triplici potissimum modo veniam delictorum impetrant. (*Beytr. zur iurist. Litter. in den pr. Staaten, Samml. 5. p. n. 53.*)

S p h a l m a t a.

- P. 95. l. 12. *sinistrum* l. dextrum
— 100. l. 4. inf. *probatas* l. probatae
— 109. l. 11. *effet* l. esse
— 110. l. 5. inf. *coalescant* l. coelefcant,
-

